

**PRINCIPUM ET
ILLUSTRIUM
VIRO-
RUM
EPISTOLAE, EX
PRAECIPUIS...**



BIBLIOTECA NAZ.

XLII

A

34

NAPOLI

42.74.

BIBLIOTECA NAZ.


Vittorio Emanuele III

XLII

A

34

NAPOLI



XLII

a

3h



76




PRINCIPVM
et
ILLVSTRIVM
VIRORVM
EPISTOLÆ,

*Ex præcipuis scrip-
toribus. tam anti-
quis. quam recenti-
oribus. collectæ.*

Amsterdam
Apud Ludovicum Elzevirium A^o 1644.

VF





W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.

W. H. H. H. H.



Amstelredamum

Amstelredamum

Amstelredamum

Amstelredamum

Amstelredamum



Perillustri Iuveni,

D. E R I C O

O X E N S T I E R N A,

Illustriss. & Exc. Herois,

D. A X E L I I O X E N S T I E R N A,

L. B. de Kimitho, Domini de Fyholm
& Tideun, &c. Eq. A., S. R. Maje-
statis, regnique Sueciæ Senatoris,
Cancellarii, Norlandiarum judicis
Provincialis, atque Euangelici fœde-
ris in Germania Directoris &c.

F I L I O.

Q Vum in lucem publicam
Epistolæ virorum prin-
cipum, illustriumque homi-
num, ac vi cuiusvis ac argu-

D E D I C A T I O .

*menti, in serenissima Veneto-
 rum urbe olim editæ, sed diu
 vel ignotæ vel desideratæ, ab
 ornatissimo Iuvene Sueco Lau-
 rentio Broman mihi traditæ,
 meoque impulsu ab erudito
 quodam viro serio emendatæ,
 cum exstarent mendosissimæ,
 in publicam lucem exirent; te
 inprimis, Illustris Domine, sa-
 lutare, ac plus lucis à nominis
 tui splendore mutuari debue-
 runt. Autores earum consu-
 lenti, tu adeündus videbaris;
 tradux illius sanguinis, qui
 non dedit nisi heroas, quales
 heic*

DEDICATIO.

heic maximi sanctissimique
plurimi leguntur; Et qui, ne
ad remota deflectam, genitus
es ex eo parente, cujus pru-
dentissimis consiliis, & ani-
mo invicto, inter adeo ingen-
teis, tamque assiduas Et tot
annorum curas, non Sue-
cia tantum, sed omnis Euro-
pa, quæ libertatem præfert
iniquæ omnium libertati insi-
diantium dominationi, pluri-
mum sese gaudet debere. Ar-
gumentum autem inspicienti,
ubique serium, gravissimum,
Et res atque artes Imperii,
domi

DEDICATIO.

domi forisque , inter subditos
 & socios , amicos & hostes ,
 necessarias , complexum , tua
 eximia indoles , & conceptæ de
 te , ac à te in ipso juventutis
 tuæ pulcherrimo aditu aut flo-
 re confirmatæ , spes offerun-
 tur. Qui te iis maxime studiis
 felicissime dedisti, iisque etiam-
 num inheres constantissime ,
 quibus, ad paterni instar, quo
 nullum majus se dare tibi po-
 test, exempli, non de tuis tan-
 tum, sed tuorum federatis &
 sociis , id est, etiam nobis, op-
 time aliquando & maxime es
 meri-

DEDICATIO.

meriturus. Non est mea tenuitatis, aut aestimare satis aut exprimere tuas virtutes; quæ (ut heic tantum memorem nostrateis eruditos, quibus ita illum animi tui incomparabilem vigorem, illas rarissimas dotes tuas approbasti, ut in stuporem dederis) ab Heinsiiis, Vossiiis, Boxborniis, promptius aliquando laudabuntur. Pietatis tamen erat, cultum obstrictissimi tibi animi mei, quum mea non possem, aliena offerendo, sic publice testari; & privatim identidem repetere

DEDICATIO.

tere vota, quæ tuæ, & illustriſſimæ domus tuæ æternitati, summæque omnium de te expectationi, debentur. Amſtelredami, ipſis Kal. Maii, Clō lō c XLIV.

Illuſtri tuo nomini
devotiſſimus

LUDOVICUS ELZEVIUS.



PRINCIPVM

ET

ILLUSTRIUM

VIRORUM

EPISTOLÆ.

N. Alfonso Argonum Regi.

Quod vincis, merito omnes gaudent; ego vero, & quod vincis gaudeo, & quod victoria clementer & moderate uteris. Recte quidem vir-
 tus tibi victoriam peperit; verum hoc ipsum tibi commune cum multis. Nam & sunt qui vicerunt, triumpharunt, imperarunt, hique innumerabiles, & interdum etiam iniusti, ac penitus indigni; qui vero & victis pepercerint, nihil intemperanter,

A

ranter, nihil avare, nihil crudeliter agentes, ii nostro atque omni tempore perpauca, sed & Diis similes habiti sunt, & habebuntur. Cato tuus agebat, pessimum Imperatorem esse qui sibi ipsi imperare non posset: ideo, ut arbitror, quoniam absurdum videretur, eum plures vincere, qui unum non vinceret. Macedo ille magnus, ut armis invictus laudatur, ita victus vituperatur. Hannibalis gloriæ multum crudelitas detraxit. Equidem malo tibi victoria laudem inveniat, quam fortuna victoriam. Quicquid in bello accidit, fortunæ laus est: verum si vincendo benigne, leniter, caste, mansuete, constanter te gesseris, fortunam sua laude fraudabis, tuamque prorsus efficies victoriæ laudem. Cum ergo hostes deviceris, ac temet ipsum, jure optimo tibi gratulor, mihi gaudeo: Tibi, quia perpetuam ex virtute laudem tibi comparabis, eisque posteritati clementiæ & humanitatis exemplum: mihi, quia tali Rege ac domino fortunatus sum, ubi possim & vivendo melior fieri, & scribendo clarior. Vale, & triumphas.

N. *Alfonso Regi.*

DUrum est, amorem cohibere: & ego te perdit amo; ac, nisi eloquar, dirumpar. Fama est, inclutum Ducem Mediolanensium Philippum Mariam nuptui dare velle unicam filiam, eamque locaturum arbitrato tuo. Vide quam magna sit hominis illius fides atque observantia erga te, ut sua viscera, suam omnem jucunditatem, suum consilium, suam spem in te uno reponat. Novi ego illum; ex animo loquitur. nec minus etiam te novi, qui virtute ac animi gratitudine vinci non pateris. Videre itaque mihi videor hac in re consilium tuum, grave quidem illud, atque utilissimum: jucundissimum fratrem tuum Petrum, nisi vates male vaticinor, puellæ illi honestissimæ maritum deligis ac destinās. Id si ita est, quid maximo illi Duci gratius? quid fratri illi fortunatius? quid tibi laudabilius excogitari potest? hoc uno beneficio Ducem ex creditore tibi debitorem constitues, ex amico amicissimum, ex patre filium. Sileo utilitatem ex iis nuptiis futuram. & ex patre ipso Duce, qui filius Ducis erit, idem & hæres erit. postremo nemo eorum erit, qui merita

4 P R I N C I P U M E T
clementissimi hujus Ducis erga te cognoverint, qui te ex hoc facto laudibus ad cœlum non ferat, quive matrimonium non judicet pro meritis optimi Ducis honorificentissime factum. Hæc ego, humanissime Rex, amore ac mea erga te observantia locutus sum. Vale.

*Florentini ad Malatestas, De morte
D. Galeoti.*

MAgnifici viri. Lugubres & funestas literas vestras tristes accepimus, quibus nobis obitum charissimi fratris nostri D. Galeoti nostro maximo dolore scripsistis. Nos orbatî amico, & Duce optimo, quantum in nobis fuit, doluimus; qualem nec posse aliquando inveniri speramus, &, quod etiam ingenuè fatemur, qualem & quantum adhuc invenire nequivimus. Dolemus igitur nostris & vestris incommodis, dolemus Sacrosanctæ Ecclesiæ cladem, & dispendium Italiæ, & totius rei publicæ detrimentum. Cecidit igitur fortissimus Dux, Ausoniæ decus, Ecclesiæ propugnaculum, consilii maturitas, rei militaris scientia, vnicum nostri temporis fidei & integritatis exemplum: cecidit reipublicæ nostræ verus frater, & secundæ atque adversæ fortu-

fortunæ nostræ particeps; ut hunc casum vix satis digne pro magnitudine rei possit noster populus lamentari. Consolamur tamen in eo, quod scribitis, ipsum dilucida ratione mentis, rebus suis, ut decebat, bene dispositis, communicatione fideli sacrorum Ecclesiæ decessisse. Spes salutis ipsam sævitiam doloris aliquantisper levat: & ut in iis item consolari debeatis, vos etiam atque etiam rogamus. Cogitate tamen, qualis & quanti viri, quantæque gloriæ sitis hæredes; vosque dignos tantis rebus & fortunis virtute animi ac omni præstantia exhibeatis. Maximum enim habetis ad amplitudinem & gloriam exemplum, & stimulum, quem in tanto paterni luminis splendore, & quasi in theatro Italiæ, oculis observare debeatis. Nos autem perpetuo amorem erga vos nostrum, studium, opes, fortunas omnes, vobis pollicemur. Estote unanimes, ne aliquando imperio excidatis. Valete.

*Florentini Bononiensibus, de
Comite Urbini.*

SI vobiscum conquerimur; si vobis; quæ contra dignitatem nostram aguntur, amice ac libere lamentamur: non

est quod mirari debeatis. Nam, cum nulum in amicitia reperiatur officium majus, quam cuncta cum amico, tanquam secum, tuto impartiri; cumque nos (quæ vestra est humanitas) arctissimum vinculum necessitudinis ac benevolentiae devinciat: quid magis æquum inter nos agitari potest, quam cuncta vicissim leniter & quiete conferre, quæ forsitan alterutri contigerint vel levia, vel molesta? Intellexistis, quo animo respublica nostra veteres injurias atque novas passa sit; quas Comites de monte Feretrio nostræ reip. hostili manu intulerunt, oblivioni mandaverit. Comitē Antonium ejusdem familiæ, tunc à patriæ finibus exulantem, nedum inglorium, sed omnibus ignominiiis affectum, ne dum pauperem, sed & omni ratione miserrimum, Florentiæ hilarī vultu alacriterque suscepit: nosque ipsum, nostris sociatum gentibus, non modo patriæ restituimus, sed in avitum imperium nostris sumptibus & periculis reposuimus; deinde iteratis officiis etiam contra magnificum frātre[m] nostrum D. Galeotum de Malatestis viribus nostris tutati sumus: eumq; ad hanc usque diem incolumem florentemque opibus servavimus. Nunc autem, cum miserrimam civitatem Eugubii, intestinis bellis æstu-

antem.

antem, dominandi cupiditate cepisset, & res suæ in ea vrbe longis bellorum incommodis fluctuarent; nos, avari pacis ac tranquillitatis, pluries hætenus, & tum demum per Oratorem nostrum, ad concordiam cum magnifico milite D. Francisco de Gabrielibus rationibus honorificentissimis deducere conabamur; demumque pacis desiderio noster Orator eundem D. Franciscum, iuxta petitionem ejusdem Comitis, promissa impunitate & tuto accessu, suo se conspectui præsentavit. Heu, nusquam tuta fides! hic Comes, contra jus gentium, affecto etiam Oratore nostro multis contumeliis, violata fide publica, pessumdatis fœderibus, cepit D. Franciscum; eumque vi & metu, cedere quibuscunque juribus, quæ in castris pluribus & ubique locorum habebat, compulit. hæc sunt amplissima grati animi officia, quæ pro tot impensis & laboribus à perditissimo homine reportavimus. Veruntamen purgat se, quod hæc omnia facta sunt in populari tumultu, cui obsistere non potuerat. Sed, si prorsus culpa vacabit, id plane sciemus, cum eum ex vinculis & carceribus missum faciet. Nos autem, in ultionem tantæ injuriæ, bellum adversus Comitem Eugubinumque populum paramus; in

quo Deum hominesque testamur, non imperii cupiditate, non lædendi consilio, sed ulciscendæ injuriæ gratia, bellum istud justissimum inchoari; expectaturi tamen aliquantisper, an Comitem aliquando pudeat vel pœniteat perfidiæ ac improbitatis suæ.

Paduani ad Comitem Virtutum.

Tua te fallit opinio, si, quæ in depressionem & excidium rerum nostrarum, non in Italia solum, sed in Germania & Gallia, pluribus jam mensibus, non una tantum, sed & multis rationibus, accuratissime procuras, me latere existimas. Sensimus quidem, etsi non omnia, tamen plurima scelestissima; quæ ne à vobis quidem excogitari posse animum induxissimus; cum talia sint, qualia hostis in hostem, non nisi sævissimis laceffitus injuriis, moliri deberet. Nos autem quibus injuriis affecerimus, quæis contumeliis, penitus ignoramus; nisi forsan, labentes corruentesque fortunas vestras bello, quo cum Antonio della Scala concurrebatis, tueri, vosque etiam in maximo periculo servare, injuriam contumeliamque judicatis. Satis mihi constat, quæ & qualia inter nos
utrin-

utrinque actis temporibus agitata fuerint: quæ quoniam per literam breviter enarrari non possunt, quam brevissime potero, dicam. Satiùs & tutius est, me te apertum hostem & publicum, quam occultum sub amici nomine habere. &, bellum apertum paci fictæ & doloſæ anteferendum. nihil enim aliud doli & fraudes quam vim & injurias parituræ sunt. Proinde vobis bellum elapſa die xxx hujus mensis Junii per has literas indicimus; ſperantès, auxilio & copiis Illuſtriſſimorum Venetorum, quibuscum nuper fæderati ſumus, vos improbitatis ingratiq; animi veſtri pœnas duros; &, clamantium ad cœlum oppreſſorum à vobis voces Deus optimus maximus aliquando audiet. Intendimus, quod omni jure datum eſt, vim vi repellere, & armis paratas nobis injurias propulſare.

*Nob. viro Iacobo de Campo Frigoſio,
Cardinalis de Petra Mala.*

SUadent multa, vir nobilis, ut ad te quamvis minus cognitum aliquid ſcribam, & tecum quæ communia ſunt partiar. ſolent animum levare moleſtiis, impartita aliis conſilia; & plerunque mens mœrore confecta inſtauratur. Pri-

mo suadet virtus, optima efficaxque animorum conciliatrix; qua te plurimum præstare intellexi. Quid enim virtute prædito impertiri consiliorum non licet? Suadet communis eademque voluntas, quæ nescio quo pacto ignotos præponit notis, & peregrinos vicinis. Horum igitur fretus præsidio, scribere ausus sum. Vides, vir optime, partem, immo remp. nostram, quantum imminuta sit; quantumque Italiæ urbes aquilæ nomen abhorreant, ut vix præter urbem hanc alium possit incolere locum? O instabilis, velox, præceptisque fortuna! O mutabilia fata, & variabile mundi decus! O momento durabilis honor! Fuit namque sic illustre, sic clarum aquilæ nomen, ut, post conditam urbem, (ne ab antiquissimis exordiar) nihil memorabile, nihil dignum, quod ipsa non viderit, à patribus nostris traditum gestumque sit. Quorum aliqua præstantiora recensebo. Luctus, qui ex horum memoracione tam felici me aggreditur, me etiam excuset. Aquila duce, Camillum, occupata à Gallis urbe patria exulem, liberatorem urbis vidit: sub se militare gloriosissimum Fabricium inspexit: Decios se pro patria immolasse admirata est: Africanos ante se mortuos deploravit: Fabii maxi-
mi

mi constantia adversus Hannibalem: Carthaginem everti vidit, Scipione auctore: Philippum Macedonem reduxit: Antiochi Asiæ regis vires domuit: Cæsarem Augustum imperio primum decoravit, cum eo cæterisque Imperatoribus orbem universum peragravit, & eidem justissimis legibus imperavit. Unde igitur nunc sic abhorrendum, sic exosum aquilæ nomen? nisi quod opera mortaliū docet esse mortalia. Præfectorum & præsidum ignavia hoc effecit, qui nihil minus curant quam ut expilent urbes, ac voluptatibus inserviant. Reliquum est, ut, quod horum præsidum impudentia omisit, suppleat Iuppiter optimus maximus. Qui eam è cælo misit in terras, eam ad honores pristinos restituat. Vale.

Comes Virtutum Bononiensibus.

DOlemus, & compatimur, Cives egregii, quod aliorū demeritis contra civitatem vestram, quam semper perdidit amavit pater, quamque nos paterna vestigia sectantes inter amicissimas habebamus, nunc bellica arma movere rogamur. Quæ in solos authores pertinacissimos tanti mali, salva re vestra publica, si fieri posset, verteremus; Archi-
guel-

guelfos videlicet Florentinos, paucos numero; qui civitatis Florentiæ regimen sub specie libertatis usurpant; qui, non contenti demoliri urbem in qua nati sunt, nunquam cessant, quousque, seminatis odiis, suspicionibusque subdolis, vos non solum ad imitandam ipsorum voluntatem, sed ad quandam servitutem secum seduxere. Sed vos calliditatibus ipsorum illaqueati permisistis, ut necesse sit per se, ut proposuimus contra statum ipsorum, pro ultione condigna magnificis filiis nostris Senensibus, & Perulinis, violatis per eos capitulis universalis fœderis, agere armis contra vos & Imperium vestrum; ne, quiescentibus intactisque rebus vestris, possitis eos ullis favoribus vel præsidiis sustinere. Proinde, non ut ulciscamur injurias aliquas vel offensas: nullas enim hucusque inter nos intercessisse fatemur; cum tamen multa intercesserint beneficia, quæ, ne videamur exprobrare, silentio prætermittimus: sed, ut Archiguelfos auxilia vestra deficiant, contra vos & imperium vestrum, à die harum nostrarum literarum coacti potius quam sponte vobis bellum indicimus. Papiæ, die xxii Aprilis, 1390.

Bononienses Comiti Virtutum.

Bellicam indictionem vestram lætis & jucundis suscepimus animis, tanquam felicissimum nuncium. Nulla enim, ut literæ vestræ testantur, à nobis unquam injuria affecti fuistis. Ex quo fit, ut bene ac feliciter de victoria speremus. Nam illa semper justiore causam consequitur. Et juxta illud Lucani :

Omnia dat, qui iusta negat ; nec numina desunt.

Adde etiam, quod invictissimi Caroli Francorum præsidium nunquam nobis deerit. Cui, ut & toti orbi, palam fiet, bellum istud, quod superinduxistis, fuisse parum dignū forti virtute prædito principe, ut vestrum nomen vos prædicat: ac vos vestrismet literis mendacii ac doli arguendos; quippe qui ante præfixum tempus agrum nostrum multis maximisque incursionibus vastari iussistis. Datum Bononiæ, II Maji, 1360.

Genuenses Regi Aragonum S.

Quanquam, Serenissime & Præclarissime Rex, quam exploratum habuimus, amplitudinē vestram pacis & quietis

tis consilia incertis bellorum eventibus anteferre, nihil prætermiserimus, quod pro contrahenda pace, & concilianda cum vestra sublimitate gratia, nos facere æquum fuerit: ubi tamen regiis literis ac responsis plane cognovimus, exitum ejus rei in assensu Illustrissimi D. Ducis Mediolani positum esse; differendam duximus legationem nostram, quoad usque id impedimentum sublatum esset. Et cum perspectum haberemus, animum illius clarissimi Principis esse nobis propensum; ad pacis fœdera, cum amplitudine sua, magna animorum synceritate pervenimus; ducentes, id fœdus Majestati vestræ haud mediocriter gratum fore; quippe qui videremus, nunquam de pace nostra sermonem habitum fuisse, quin mox & de assensu illius principis mentio adiiceretur. Cum igitur id, quod obstabat, sublatum sit, ad vos properare jussimus egregium virū Bartholomæum Facium, ut & literas Ducis Mediolani Majestati vestræ reddat, & in sublatione offensionum, cæterisque eam rem respicientibus, regiam voluntatem exploret: cui quoniam in eo negotio & arbitrium & mandata dedimus, superest, amplitudinem vestram orare, ut, habita relationibus illius indubitata fide, jubeat eum

&

& benigne & quam citissime expediri.
Datum Genuæ, x Sept. 1444.

*Eidem Raphael Dux, Consilium,
& Officium.*

Nihil est, amplissime Princeps, quod
tantopere unquam concupierim, &
nunc etiam mirum in modum exoptem,
quam appetere tempus, quo hanc rem-
pub. cum sublimitate vestra vero amore
conjunctam viderem. Nam cum dudum
cognoverim, quam ingentia, quamque
immortalia sint in domum nostram be-
neficia M. V.; cumque hoc ipsum judi-
cium meum amplissimis verbis firmave-
rit affinis meus Obertus Iustinianus, à
conspectu Serenitatis vestræ nuper re-
gressus; qui de summis virtutibus, vera-
que in nos benevolentia sua, multa non
sine maxima laude differuit: arbitratus
sum, si quando optati dies veniant, faci-
le dari posse occasionem, qua non solum
E. V. gratias agere liceat, sed etiam ob-
servantiæ ac studii mei magnitudinem
aliquo insigni testimonio declarare. Ve-
rum, quanto gaudio affectus sum, dum
Obertum audio præconia regiarum vir-
tutum recensentem, tanto item mœrore
confectus sum, quod ex scripto illi dato
cogno-

cognovi, ad inducias veniendum esse,
& exigi assensum illustrissimi D. Ducis
Mediolani. Nam, conditionem illam
reddendarum pecuniarum, cum ex ip-
sis contractibus Celsitudo vestra veri-
tatem perspexerit, nullo labore tolli
posse confido. In qua sententia si Sere-
nitas vestra diutius persistit, quid aliud
id est, quam, quod petebatur, negare?
cum & maxima Prudentia vestra con-
gnoscat, & Obertus ipse plurimis verbis
egisse confirmet, quo consilio princeps
ille obstiterit, ne ad concordiam cum M.
V. deveniremus. Cum igitur eam condi-
tionem difficillimam, & quæ nulla ra-
tione impleri possit, ab omnibus refelli
videam, ita ut ne unus quidem suaserit,
legationem, ea stante, mittendam fore;
statui, hoc ipsum Celsitudini vestræ lite-
ris nunciare; ne forte miraretur, legatum
ad se decretum non fuisse. Quamquam
enim adversus sim, & quantum licebit,
adnitar, ut legati ad M. V. deligantur:
cognosco tamen, eos, qui contra nitun-
tur, argumentis & ratione prævalere. Re-
liquum est, ut Amplitudo vestra hoc sal-
tem observantiæ & studio meo tribuat,
ut aut difficillimæ conditionis conditio-
nem tollat; aut aperte confirmet, id fieri
non posse quod petitur: quod etiam at-
que

que etiam rogo: & si quid mea opera illi opus sit, in quibuscunque rebus me utatur. Genuæ. Vale.

Raphael, Dux Genuæ, Pontifici Romano.

Multa sunt, Sanctissime ac Beatissime pater, quæ ad nos sæpissime in dies afferuntur prodigiis simillima, ex beneficiis, quæ plerique mortuorum ope beati Bernardini se consecutos esse arbitrantur. Longe tamen ea certiora esse non dubitamus, quæ ad Beatitudinẽ vestram perferuntur, ut quæ locorum, temporum, testium, nominatione fulciuntur. Quæcunque autem ea sint, magna in populis opinio disseminata est, hunc virum concionibus, doctrina, abstinence, vitæ puritate quondam admirabilem, Sanctorum catalogo ascribendum esse. Quæ spes multos erexit eorum, qui vel concionantem illum audiverunt, vel consuetudine consiliisque suis oblectati sunt; gratulaturos tandem huic ævo nostro, si inter fluctus & ærurnas, quas multas & varias nostra ætas perpessa est, ea nobis felicitas contingat, tulisse nostra secula hominem cœlo dignum, & æternæ memoriæ consecratum. Quam ob causam

sam statui & ego multis verbis S.V. orare, ut, si ea conveniunt quæ postulantiur, inter Sanctos referatur, & ad id se non præbere difficilem dignetur. Lætitia totus afficietur orbis. Multæ Deo optimo maximo habebuntur gratiæ, quod non usque adeo sceleribus nostris à nobis aversus est, ut mitissimi ingenii sui oblitus sit, qui hunc virum ex inquinato cœtu nostro sibi desumpsit, ac doctorem præconemque sæculo nostro dedit. Id cum B.V. edixerit, erit quod nos omnes gloriemur. Me autem, meaue omnia, benignitati vestræ supplex commendo. Datum Genuæ, mccccxlv, die xx Septembr.

*Raphael Dux, & Consilium Genuæ,
Duci Burgundiæ.*

SCimus, non oportere, Illustrissime & præclarissime Princeps, ut hoc loco dicamus, quo studio ac observantia omni tempore coluerimus clarissimos parentes, avos, cæterosque majores vestros, ac deinde sublimitatem tuam: quoniam, si hæc, ut sunt, Excell. V. nota sunt, non est cur hæc ipsa nunc recenseamus. Hoc unum dicimus, quam primum innotuit nobis, triremes vestras contra Imp. Turcarum

earum Hellespontum petere , mandata dedimus , non modo prætori nostro Peræ , sed cæteris insuper Rectoribus nostris transmarinarum urbium , ut earum præfectos, trierarchosque, omni humanitate ac benevolentia foverent , portasque illis urbium patefacerent , portus commeatusque præberent , & demum nullum prætermitterent benignitatis officium, quo non in illos uterentur. Hæc illis à nostris an præstita sint , Excell. V. curiosius exquirat. Nobis à præfectis nostris illarum urbium renunciatum est, fuisse à se præceptis nostris enixe obtemperatum ; vestrosque non secus omni commoditate earum urbium usos fuisse, quam si civitates illæ sub nomine amplitudinis vestræ gererentur. nam , præter portus commeatusque amice præstitos , præterque fores confidentissime patefactas , & se vestris convivia præbuisse , & sua omnia liberaliter detulisse: inter quæ nec illud obscurum est , magnificum D. Gotofredum, præfectum triremium, cum non longe à Phaside fluviq in regione Colchorum in terram armatus descendisset, captusque ac vinctus fuisset, operâ viri nobilis, Hieronymi de Nigro , civis nostri, servatum , & vinculis solutum. Hæc autem à nobis ita contexta sunt, ut
Ampli-

Amplitudo vestra intelligat, quam indigne ab iis triremibus nostri postea læsi sint. Nuper nobis à rectoribus nostris Caphæ redditæ sunt literæ, quibus nunciant, has vestras triremes, sub auspiciis D. Gotofredi mare Ponticum ingressas, multas cepisse nostrorum naves; qui, licet vel infideles, vel schismatici forent subditi, tamen nostri sunt. Et, si cum infidelibus bellum geritur, non adversus illos saltem geratur, qui in Christianorum oppidis habitant, quique se, vitam & opes, fidei nostræ commiserunt. Est præterea hoc injuria major, quod universum mare Ponticum tutelæ defensionique Genuensium supra annos centum commendatum est; quibus sæculis ita est à nobis custoditum, ut vel nunquam, vel raro admodum, piratæ ulli illo usque penetrare ausi fuerint. Si quis in eo mari injuria afficitur, nostrum est, subvenire læso, & eum ab injuria tueri. Cum autem ii nostri direpti ac spoliati ad nostros præsides querelas detulissent, & ipsi apud D. Gotofredum pro reddendis ablatis agerent, respondisse dicitur, esse sibi bellum cum omnibus infidelibus. Nec profuit memorasse, tutelam nos illius maris gerere, & quod efficacius est, illos esse subditos nostros, & intra mœnia oppidorum

dorum nostrorum habitare. Quoniam perpauca admodum fuere, quæ reddita illis sunt; & quod etiam auget injuriam, quidam, levi parte ablatorum accepta, coacti sunt chirographo, aut alio scripto, fateri, sibi cumulatissime satisfactum. Quæ omnia, adacti necessitate, Sublimitati vestræ nunciamus, non tam ut contra D. Gotofredum querelas deferamus, (id enim quam inviti facimus, & alioqui virtutes ejus admiramur,) quam ut Excell. V., recognita, jubeat, quæ inique ablata sunt, reddi, & si qui captivi ex nostris detinentur, sive infideles, sive alio errore impliciti sunt, protinus exolvi. Nam si contra Regem Turcarum arma capta sunt, quid meruit Persa, quid Armenus, aut Sarmata, qui maluit in nostris urbibus habitare? cur diripiantur, aut capiantur? Oramus præterea Iustitiam vestram, ut, sive hæ, vel aliæ triremes, trans maria rediturae forent, vel ullæ ibi remansuræ, dignetur ea illis dare præcepta, quibus sese a damnis nostrorum abstineant. Genuæ, die xxiii Sept. 1445.

Raphael

*Raphael Dux Genuæ, & Consilium,
Regi Aragonum.*

Suppudet nos, Præclarissime Princeps, adeo sero cognovisse recondita vitia Joannis de Fridericis, ut sit opus nobis, post multa fidei suæ commissa, de perfidia hominis hoc tempore queri. Quam multa, quamque ingentia sint ea, quæ ipso suadente sibi credidimus, nec Majestas quidem vestra ignorare potest, ad quem illum sæpenumero misimus, nec pauca, nec levia tractaturum. Vir autem iste totus vænalis, ubi & Majestatis V. & pectoris nostri arcana novit, in eas se cogitationes convertere cœpit, quibus posset hæc ipsa sibi lucrifacere, & de illis quasi negociari. Fidei igitur vel oblitus, vel nescius, multa quotidie nobis proponere, multa polliceri, multa etiam divinare: inter quæ tandem novum consilium aperuit, quo nos à veneratione Majestatis Vastræ in viam diversam traderet. Sed, ubi constantiam nostram concuti non posse cognovit, alia rursus consilia ingressus, curavit, ut ab Illustrissimo D. Mediolani accerferetur. à quo cum ejus impudentia contemptui habita fuisset, postremo ad eandem Majestatem vestram,

vestram, quam prodere non erubuit, iterato reuersus est. Pervenerunt autem nunc nuper ad manus nostras ejus literæ, quæ indicant, eum machinari, ut triremes aliquot rebellibus nostris conciliet, quarum ope possit mare nobis infestum reddere, & quietem publicam perturbare. Etiam frater ejus, ad montana profugiens, rebellibus nostris se ipse conjunxit: nec sumus dubii, ortum, mores, conditiones hujus viri Sublimitati vestræ nota esse, ut qui, singula rimatus, nec paterna fortuna contentus, in id crimen miserum patrem præcipitavit, cujus damnatus, securi postea percussus est. Sed non hujus loci ac temporis est, scelera ejus enumerare, quæ sero nimium, ut diximus, sed tandem tamen deprehendimus. Verum, quoniam aliquando illum, & quidem enixius, benignitati vestræ commendavimus; nec dubitamus, commendationes hujuscemodi apud Excell. V. illi maximo adiumento fuisse: nunc cognita seditiosi ac turbulenti hominis malignitate, visum nobis est, hæc ipsa Sublimitati V. nota facere, ut possit sibi ab illius fraudibus cavere: & si quid preces nostræ apud ipsum illi proderant, nunc sciat, nos, detecta ejus nequitia, sententiam mutasse, omnemque ejus sub-

sublimationem horrere. Hæc, quia studium & observantiam nostrā ita decuit, nuncianda duximus Serenitati vestræ, ne forsan commendationes pro illo nostræ falsum de homine iudicium, & præterea incommodorum aliquid, afferrent. Quod reliquum est, ad omnem gloriam vestram, sciat M.V., nos, fortunasque nostras, præsto esse. Genuæ, 11 Octobris, 1445.

*Bartholomæus Iustinianus Duci
Mediolani.*

ET si vera sunt, Illust. Princeps, quæ de studio & observantia mea ad Celsitudinem vestram scripta fuere, ego tamen nihilominus ab Excell. V. expectandum putavi aliquas gratiarum actiones. Nam cum memoria repeto vetera recētiaque beneficia, quibus familia nostra à præclariss. maioribus vestris sæpenumero aucta exornataque est; inter quæ nec illud in postremis habendum puto, quod celeberrimæ quondam memoriæ D. parens vester patrem meum Ant. non solum aurata militia donavit, sed inter potiores ac chariores amicos semper habuit: me nullis meis viribus, nec si supra vires etiam enitar vel minimam

nam meritorum vestrorum partem æquare posse intelligo. His accedit, id quod literæ Sublimitatis vestræ pulchre loquuntur, quod, cum eæ fœdera, ad quæ contrahenda incumbitur, & decus & commoda hujus reip. haud dubie respiciant, supervacanea profecto est gratiarum actio, cum ea curando & meam & patriæ utilitatem curem. Ago quinimmo humanitati vestræ gratias, & quidem ingentes ac immortales, quod inter maximas curas, tantarumque rerum molem, recordata est studii ac observantiæ meæ. Ego, ampliff. Princeps, & quia id debeo, & quia esse utile haud dubito, & quia postremo ita velle Sublimit. V. intelligo, cum me profecto præstabo, ut votis Excell. V. non diligentia, non studio, non ardore unquam defuisse videar. Cujus benignitati me mirum in modum commendo, ac dedo. Hæc brevius scripsi, quod negocia Orientalis Ripariæ, nondum satis pacatæ, me extra urbem detinuerunt. Genuæ, x i i Augusti, 1443.

Raphael Dux Genuæ, Nicoto, Nicia & Provincie Ducalis Gubernatori.

VEnit nuper ad nos egregius Secretarius vester, Petremetus de Leone,

B

quem

quem & læti vidimus: qui nobis rerulit, Magnificentiam vestram cum illustrissimo illo Principe non modo sermonem habuisse, sed efficacem operam dedisse Aragonensibus rebus, quas vobis Decembri superiore proposueramus; petiitque à nobis, ut conditiones scripto mandaremus, tam eas scilicet, quas Illustrissimo Duci offerimus, quam eas quas æquum putamus nobis præstari. Quocirca, ut ipse amicitiae vestrae latius referre poterit, respondimus ei, nos tunc, cum ea de re sermonem fecimus, vehementer optasse, ut perficeretur; arbitantes, magnam animorum securitatem, multaque non levia commoda, ex hujuscemodi societate partibus ipsis comparari posse. Verum ne ignoretis, posteaquam Serenissimus ille Rex triremes suas, & in eis celebrem legationem, misit huc ad nos, & pacis conditiones agitatae sunt, remisimus ad Magnificentiam suam legatos nostros, cum authoritate latoque arbitrio pacis conciliandae; quæ forsitan & jam contracta est. Et, cum à die profectionis legatorum jam mensis completus sit, certam ejus rei notitiam singulis horis expectamus. Itaque, qui tunc liberi exolutique eramus, nihil nunc certi promittere possumus, ut qui arbitrium nostrum,

nostrum, & hujus reipublicæ, in legatos ipsos transfudimus. Hoc tamen dicimus & affirmamus, si re infecta legatio nostra redeat, id quod tunc nobis placebat, iterum placitum fore. neque enim videmus aliquid supervenisse, quo consilium mutare debeamus. Verum quod ad conditiones pertinet, non possunt in hoc rerum ambiguo statu, sicut prudentia vestra probe intelligit, conditiones vel offerri, vel peti: æquum tamen nobis videtur sic à longe judicantibus, ut, quot pedites excellentissimus ille Princeps ad securitatem præsidiumque nostrum præstaret, totidem nos Celsitudini suæ præstaremus; quotcunque ille triremes armaret, nos totidem numero educeremus: multaque alia ejusmodi, quæ adveniente casu res ipsa tempusque docebit. Hæc tamen brevibus dicimus, si ad pacem non deveniatur, & augustiss. Dux à re conficienda abalienatus non sit, nos ab æquis honestisque conditionibus non esse recessuros. X Martii.

*Raphael Dux Genuæ, & Consilium ,
Invictissimo Principi Friderico ,
Ro. Regi, semper Augusto.*

L Iteras regias , invictissime Princeps ,
vicesimequarta Iunii superioris die ,
Viennæ datas , sero quidem , sed debita
veneratione accepimus ; ut quos sacrum
Imperium in peculiare filios semper ha-
buit ; honoribusque ingentibus, sæpe be-
neficiis , exornavit. Et , quanquam ex-
ploratissimum haberemus, animum Sub-
limitatis V. ad universale bonum Eccle-
siæ maximo studio & summa vi anhelare ;
juvit tamen nos, vix dum lecto literarum
initio, hoc ipsum earum etiam testimonio
cognovisse. In quo quidem Majestatis
vestræ proposito digne collaudando ,
quanquam nullas vires, nulla hominum
ingenia satis esse arbitremur ; nos tamen,
quantum datur , illud laudamus , prædi-
camus, & omni genere laudum extollen-
dum ducimus. Neque enim videmus ,
quid sit aliud , quod æque possit nomen
vestrum æternitatis gloriæ consecrare ,
quam, pro Dei sponsa Ecclesia , ejusque
incrementis ac vera tranquillitate, excel-
lentiam vestram nullas curas, nullas vigi-
lias , nullos demum labores effugisse.
Quod

Quod autem ipsis iisdem literis Majestas vestra nos hortatur, prælatos, legationemque, die stata ad eam urbem mittere, ubi novum haberi concilium decretum fuerit; dicimus, non ignorare, rem, de qua agitur, maximam & summam omnium esse, in cujus rationem omnes mortalium res, parvæ, tenuesque, judicandæ sunt; cum præsertim ipsius Dei causam directe adspiciat; cui & animorum simplicitas, & rectitudo consilii, maxime debeantur. Itaque, ne quid ex properatione peccemus, curabimus, quid nos deceat, intelligere; ita ut, cum statuta dies advenerit, nil eorum, quæ dignitatem, amplitudinem, veram tranquillitatem Ecclesiæ tueantur, nequaquam pro virili deferamus: qui nos, nostraque omnia, Benignitati V. semper commendamus ac dedimus. Datum xvi Sept. 1443.

*Galeotus de Carecto, Marchio Finarii,
Regi Aragonum.*

Non dubito, Majestatem vestram cognovisse, navem unam Genuensium, cujus erat ductor Casanus Gentilis, nuper à magnifico D. Embastita captam, & Majoricam deductam fuisse.

B 3.

Hæc

Hæc navis cum oppugnaretur, & prælium anceps videretur, deditionem tandem fecit, ut viri omnes salvi essent. Inter hos est adolescens quidam nomine Nicolaus, gnatus Francisci Regis. Cui ego jampridem omni genere familiaritatis & amicitiae deunctissimus sum; ita quidem, ut secunda adversaque omnia, quæcumque illi eveniant, semper duxerim mihi esse communia. Is adolescens, amissis fere omnibus fortunis, adhuc retineri videtur, nec, ut fidei datæ convenit, liberatus est. His adductus sum, ut orarem Majest. vestram, ut per fidem, quæ Barbaris etiam servanda est, & quia patrem & filium ita diligo, ut eos inter maxime conjunctos semper enumeraverim, dignetur Sereniss. D. Regina scribere, ut mox jubeat hunc adolescentem liberari. Id quidem, humanissime Princeps, & nominis gloriæque vestræ utile erit, & ego id beneficii mihi met ipsi collatum existimabo: Majestati autem vestræ me, meaque omnia, defero. Vale.

Fran-

*Franciscus Cataneus, Genuensis,
Francisco Foscari, Duci
Venetiarum.*

A Liis literis, Illustriss. Princeps, certio-
riorem feci vos, me, propter integritatem sanctitatemque illius vestri imperii, & veterem benevolentiam, quæ mihi cum plerisque civibus vestris intercedit, illuc me conferre statuisse, ibique multos annos mercatorio more mansurum: eamque oravi, ut, quamquam raro soleat veniam & salvos conductus peregrinis concedere, dignetur me inter paucos enumerare; non quia ego mihi metuum, aut pecuniis, sed potius, ut, qui merces & bona sua Venetias diversuri erunt, majore fiducia res suas mihi committant, si sciant, me, & quæ mihi commissa sunt, fide publica tuta esse. Huic petitioni meæ, Excell. Princeps, nec repulsa nec assensus datus est. Sed in aliud tempus rejecta est. Quæ dilatio ita me distrahit, ita incertum suspensumque habet, ut nequeam consilium capere, nisi ab Excell. V. id impetrem quod consiliorum meorum fundamentum est. Ex quibus statui rursus sublimitati vestræ supplicare, ut pro mea erga vos obser-

vantia, ac studio, dignetur voto huic meo respondere, & hanc syngrapham liberi accessus decernere, quo mea omnia, & quæcumque meæ curæ committentur, in omni eventu tuta maxime sint: quod mihi mirum in modum gratum erit. Vale.

Raphael Dux, & Consilium Genuensium, Romano Pontifici.

NON dubitamus, Sanctissime pater, cognitam esse Sanctitati vestræ veterem egestatem Genuensium sacerdotum; de qua, si quod esset operæ pretium, multa parvo labore afferri possent testimonia, quibus liqueret, quam sibi etiam lege naturæ parce viventibus res angustæ sint. Verum quoniam de hac Sacerdotum egestate, quæ nota est, nunc minime loquimur, eam tantummodo attingemus, quæ hujus temporis est. Annonæ caritate, quæ multos annos hanc regionem vexavit, qua item externis bellis, terra marique circumtonantibus, diu fortunæ nostrorum attritæ sunt, effectum est, ut neque ab agrestibus, neque à civibus tenuioribus, exigì pecuniæ possint. Et, cum pars maxima redituum sacerdotalium ex annuis pensionibus constet: egestate conducen-

ducentium necesse est res angustiores locatoribus fieri. Accedunt & onera publicorum munerum, quorum partem haud levem jamdudum Sacerdotes pertulerunt. Nam, cum infelicitas temporum coegerit nos pro salute patriæ ac libertatis nostræ undique pecunias corradere, pars prope quarta fructuum, quos ex locis communitatis suæ nostri percepturi fuissent, sibi quotannis eripitur, & in sumptus publicos erogatur. Quæ sic, ut sunt, si summa sapientia vestra cogitare voluerit, facile cognoscet horum Sacerdotum egestatem. Cum vero inotuerit nobis, literas Apostolicas perlatas esse, quæ jubent hos Sacerdotes contribuere in classem contra Turcas parandam; non potuimus non miserari ærumnas eorum: qui, cum naturæ desideria ægre possint explere, ad ejusmodi sumptus invitantur. Propter quæ B. V. oramus mirandum in modum, ut ad ea, quæ diximus, animadvertēs, dignetur id onus iis Sacerdotibus remittere, cui, etiamsi velit, obtemperare non possit. Quod quanquam per se ita æquum est, ut vix æquius quid haberi possit; nos tamen loco beneficii accipiemus; qui nos nostraque omnia S. V. deferimus, Genuæ, die Octob. 1443.

Idem, Regi Aragonum.

Profecto, Regum Illustrissime, quorundam tuorum audacia diutius ferri non potest, nec temeritas tolerari; dum nimis quidem vel lenitate abutuntur, vel severitatem non formidant. Et, dum sub invidia Majestatis tuæ regnare se putant, aut quod alius sit prægustator, aut alius architriclinus, aut à cubiculis, dici non potest, dum provinciis aut urbibus præsumunt, quanta sibi licere existiment, quam se omnia impune facturos putent, vel quantam humanitati tuæ dedecoris notam & maculam inurant; ut nihil ex eorum injuriis ad Majestatem tuam nisi dedecus, ad se præda, ad miseros dolor perveniat. Atque utinam contenti ii forent, in tuos tantum hæc genera iniquitatis exercere, nec in peregrinos etiam sævirent, & audaciæ suæ atque immanitatis furorem extenderent. Si quidem de gloria tua tantum detrahunt, ut, cum tu sis humanissimus, ii quidem sint immanes & sævissimi. Urbanus Testa, Princeps humanissimus, civis noster, quintus jam agitur annus, quum in Sardinia sub fide publica captus fuit; quam is, qui vicem tuam illic gerebat, sibi dederat: nec solum.

lum bonis omnibus & fortunis spoliatus est, & contra jus gentium turpiter vexatus, verum etiam in carcerem conjectus. tetrum adeo & horrendum, ut, qui cum illuc conjecerint, nihil viderentur nisi de morte ejus cogitare. Tandem, cum multos menses in iis tenebris multa & maxima passus fuisset, præter omnium spem semivivus eductus est: nec putavit, alium esse, ad quem injurias suas & querelas citius deferret, nisi ad Majest. tuam; cui hæc non minus quam sibi futura gravia existimabat. Summo cum dolore te usque in Brutios est persecutus: qui cum causam suam humanitati tuæ aperuisset, gravesque iniurias exposuisset, ita commotus fuisti, ut plane id liqueret, has tuorum injurias minime tibi placere, nihilq; magis te cupere, quam ut omnes æquo sub te jure continerentur. Itaque literas ad præfectum Sardiniae dedisti, plenas certe & minarum & indignationis; quibus significabas, de hujusmodi rebus quis sensus tuus foret, & quam ex animo tuo non esset, ejusmodi injurias à Purpuratis tuis tenuioribus inferri. Verum homo ille non solum rapax & inhumanus, sed, quem audacia & confidentia cæcum & præcipitem ageret, ita Majestatis tuæ literas contempsit, ita illatae

latae injuriæ non pœnituit , ut civis noster non tantum nihil ab eo consequi suarum rerum potuerit , verum etiam quinque totos menses ludibrio habitus sit. Itaque nihil ad suos retulit nisi injuriam & inopiam, nihilque ex literis tuis consequēbatur præter labores & sumptus gravissimos. Hæc nos cum fieri à tuis videremus , ut qui nullo metu , nec minis literarum tuarum , terreantur , & quos nullus Majestatis tuæ pudor detineat ; dolendum admodum duximus , si in hac tanta tua fortuna hominibus inhumanis & prædonibus audaciæ tantum & licentiæ daretur , aut si tanta Majestati tuæ moderatorum & continentium virorum est penuria , ut illos provinciis aut urbibus præficias , qui non modo nulla sint humanitate præditi , verum immanes, atque maxime cupidi; qui quia procul ab oculis tuis absunt, aut quia non potes omnia respicere, sub hac sive ignoratione sive umbra latentes , nullum est crudelitatis & avaritiæ genus quod non exerceant. Dicam enim libere , dicam audacter , nisi sæveritas tua , aut sapientia , hos cohibuerit ; nisi terror , quando æquitas eos non potest : in magnum multarum gentium & luctum & dolorem hæc Amplitudo tua redun-

redundabit. Ii soli possunt, immanes & agrestes, tantum de gloria tua detrachere, quantum vix tua vel humanitas vel virtus queat adjicere, dum, quia de te aliquid se meritos putant, credunt, hoc quasi munimento ad omne injuriarum genus posse uti. Itaque Majestatem tuam oramus, ut omnem curam posteriorem ducat hac, qua modestos & continentes hujusmodi curis præponat, neve tam eos, qui bene de se meriti, quam qui honore digni sunt, præficiat. Verum nostrorum sive amor, sive studium, longius fortasse nos abduxit; ad Urbani causam venimus. Rogamus te mirum in modum, quando his omnibus bonis spoliatus venire istuc non potest, ut, cujusmodi literas ad proregem dederat, easdem ad urbem Sateris & prætorem scribat. Hoc itaque modo facilius civem nostrum jus suum consecuturum speramus, & urbi illi non futurum ingratum. Nam ob hanc causam tota Sardinia quatuor jam annos urbis hujus commercio caruit; à qua spiritum fere ac vitam ducit. Lege enim cautum est, ut nemo Sardus nisi fide Urbani possit huc venire. Decet itaque Majestatem tuam non solum civis nostri commodo & æquitati consulere: verum provinciæ

commerciorum respicere. quæ cum tamdiu urbe hac caruerit, tanto affecta est incommodo, quantum iste tuus præses pirata nunquam posset restituere. Genuæ xviii Junii, 1445.

*Raphael Dux Genuæ, Marchioni .
Mantua, & fratribus.*

EX literis vestris, & ex ipsa rei natura, facile nobis fuit conjecturam facere, quanto in luctu essetis amisso parente Clariss. viro, ob ejus egregias singularesque virtutes omnibus populis cognitæ. quo nos, qui privati eum coluimus, principatum vero adepti, summa benevolentia complexi sumus, accepto lugubri nuncio, ita consternati sumus, ut neque animum continere potuerimus, neque lacrymis temperare. Nam quo pacto siccis oculis audiamus illius viri obitum, quem merito tota Italia lugere debuisset? Quæ ob causam nolumus, amicitia vestra hoc tempore à nobis expetant consolationis officium; cum ægritudinis expertem esse oporteat eum, quicumque se consolatorem profitetur. Neque ignoramus, solere in leniendo dolore multa memorari; Nihil magis quotidie audiri quam hominum funera: interire quandoque urbes,

regna,

regna, imperia; nedum humana corpuscula: fuisse aliquando populos, qui natalem hominis diem fletu exciperent, exitum convivii ac lætitia celebrarent: quæque alia sapientes in remedia lachrymarum pulchra excogitarunt. At nos summam neque ulli calamitati comparandam jacturam semper arbitrati sumus, quotiens aliquis nobis eripitur ex illis summis ac prope divinis hominibus, quorum prudentia, integritas, innocentia, multos ab injuriis & interitu eripuisset, quorumque beneficio multi adiuti fuissent, multi etiam servandi fuerint. Verum præclaras optimi parentis virtutes & nos sæpe laudavimus viventis, & nunc defuncti non minus prædicabimus; digni profecto, qui primum fulgorem illum Marchionatus in suam domum transtulerit. Quod reliquum est, vos, ut Imperii, ita virtutum hæredes eritis, viuæque parentis optimi imagines, nobis, amicis, affinibus, tantæ jacturæ solatium: illudque memineritis, esse vobis, præter urbes, imperium, opes, gratiam, amplam quoque ab illo hæreditatem amicorum relictam; de quibus tantum vobis ipsi polliceri poteritis, quantum intelligetis à nobis posse præstari. Primo Octobris, 1449.

Raphael Dux Genuæ, Duci Mediolani.

SI, Illustrissime Princeps, amplitudinem tuam metiri voluerimus, nihil invenietur apud nos, quod sit tanto fastigio dignum munus. at si contra, summam illam humanitatem vestram intueri potius licebit, quæ non rem, sed animum æstimare solet, scimus, nihil ei tenue visum iri, quod libentissimo & gratissimo animo datum sit. Propterea dilectum familiarem nostrum Valerianum Borlascam cum exiguis muneribus ad te mittendum duximus: quem precamur, ut animum nostrum, non rerum tenuitatem metiatur; illoque accipiat vultu & animo, quo data sunt; cum etiam sciamus, magni viri esse magna contemnere, & vilia plerunque maximi æstimare. xi Decembris, 1545.

*Dux Mediolani, Francisco Barbavara,
& Opicino de Alzate, Locumtenen-
tibus Reip. Genuensium.*

Dilectissimi nostri, vidimus omnia quæ scripsistis de eligendo novæ classis præfecto: satis superque animadvertimus id quod innuitis, quod electio
Au-

Auriensis Ducis universis longe magis probaretur. Brevibus igitur respondentes, dicimus, quod, si in familia illorum de Auria aliquis est in maritimis rebus peritus, qui nobis inimicus non fuerit, neque sit, ita nos gerere debetis, non attentis maculis & iniustis notis in ea familia aliquando compertis, ut in illum cadat electio. Nobis enim Auriensis Imperator multo magis probaretur, si talis esset qualem dicimus. Præterea exinde satisfiet nobilibus illis, in quos jure optimo munus Imperatorium pervenire debet. Si vero in ipsis Auriensibus vir ea præstantia & partibus, quas dicebamus, præditus non sit; volumus, quod eo casu operam detis, ut alter illorum duorum deligatur, in quos etiam propensi videmini; Nicolaus scilicet de Nigrono, & Orobonus Imperialis. Sed animadvertite, quod in eum potius electio & fors cadat, qui maritimarum rerum peritiam majorem & longiorem habuerit, non habita ad alias eorum conditiones ratione ulla. Habetis mentem nostram super electione; vos date operam, ut quamprimum totum negocium conficiatur. Mediolani, die xxv Aprilis, 1433.

Dux

*Dux Mediolani, Francisco Barbavara,
& Opicino, & Antonio de Alzate,
locumtenentibus reip. Genuens.*

EX literis vestris intelleximus difficultates, quas adducunt cives illi nostri in muniendis oppidis & arcibus nostrarum partium Genuensium, & imprimis in muniendo Bulzanetū & Pontem Docimum, de quibus tibi, Antoni, præcipuam curam mandatumque dedimus. Vidimus etiam quæ ipsi cives nobis super iisdem rebus scripserunt: qui etsi nonnullas rationes deducant ad luendam sententiam suam, tales tamen non sunt, ut videatur ab ipsis rebus procurandis & muniendis desistendum. Nec possumus non mirari, quod nobis ita ex corde, vos Francise & Opicine, scribatis pro iis munimentis non agendis, attenta opportunitate & usu eorundem. Licet enim partes vestræ sint, pro Genuensibus intercedere; atque id etiam nobis placet: non tamen in rebus tam necessariis & utilibus ita loqui & agere deberetis. Non sunt quidem illa munimenta & propugnacula inutilia, ut inquiunt Genuenses; imo pro eventibus, alias & sæpe secutis, qui etiam futuris temporibus evenire possunt,

sunt, ne dum videntur utilia, sed apprime necessaria. Et quamvis olim propugnacula Bulzaneti diruta fuerint, id temere & inconsulto potius quam prudenter factum fuit; nec longum tempus præterit, quod nos ejusmodi facti pœnituit. Quis neget, Pultiferenses, & alios male affectos, ac novarum rerum cupidos, in officio mansuros, & pacatiores futuros, si arces & propugnacula in caput eorum muniantur? Quis nesciat, civitatem melius ac tutius custodiri ducentis peditibus, stantibus castris, & arce egregie munita, quam mille, ipsis non extantibus? & exinde impensam pro custodia civitatis ibi diminui, non augeri? Hæc cum ita sint, omnino disponimus atque volumus, ut fiant exordia & initia horum munimentorum, sine aliqua exceptione, & omni contradictione rejecta. Quare vos, Franciscæ, & Opicine, detis operam, ut quamprimum hæc omnia conficiantur. Mediolani, xxii Julii, 1433.

*Philippus Maria, Dux Mediolani, &c.
Papæ Angleriaque Comes, ac
Genæ Dominus.*

Sicut pro danda nobis & muneribus nostris tranquillitate & quiete pacem ample-

amplexi sumus : ita omni studio, & exacta diligentia, quærimus & intendimus omnia. prorsus abstergere ac præcidere quæ in nostris populis dissidia generare possint. Proprium est enim Dominorum & Principum, ea semper animadvertere, quæ ad salutem & commodum sociorum & bene vivendi formam attineant. Sentientes igitur, in civitatibus ac locis nostris aliquando fieri conventus inter plures variasque familias, quæ sub eorum modis & formulis novas affinitates in eunt, ac faciunt se omnes iisdem cognominibus nuncupari ; & cognoscentes aperte, conventus hujusmodi non esse laudabiles, licet umbram quandam boni præ se ferant ; ut qui tandem potius divisiones & civiles discordias, quam fructum aliquem, parituri sunt : His literis nostris edicimus, atq; decernimus, quod tales conventus, cujusvis generis existant, per, & inter subditos nostros, nullo modo, nullaque ratione, vel causa, fieri debeant, absque venia nostra & speciali indulgentia, sub indignationis nostræ pœna, nec non sub mulctis nostro arbitratu auferendis. Mandantes universis & singulis officialibus, & subditis nostris, quatenus hoc ipsum decretum nostrum describi faciant. Medidano, die x x i i i i Maii.

Dux

*Dux Mediolani, Franc. Barbavara,
& Opicino de Alzate.*

Dilectissimi nostri, quicquid dicat Leo de Taliacocio, nos de Thoma de Campo Fregosio bene sentimus; neque persuadere nobis possumus, quod aliter quam bene operari velit. Nihilominus laudamus, ut dicta illius quam diligentissime observari faciatis: &, si, præterquam speramus, aliquid attentaverit, ex quibus fides ejus in dubium vocetur, id, quod opportunum fuerit, faciatis, ita ut nihil mali agere possit: sed gerite vos ita caute & prudenter, ne ipse veniat in suspicionem, quod de eo male sentiamus, ne postmodum in deterius ruat. Placet, quod Reverendissimum Cardinalem Rotomagensen honorifice exceperitis: Omnia mihi probata sunt; bene est quod me certiores feceritis. Mediolani, die xiiii Martii, 1433.

*Dux Mediolani, Francisco Barbavara,
& Opicino de Alzate, & Officia-
libus Genuensium.*

Dilecti nostri, sentimus, quod in negotio componendæ classis segniter
vos

vos geratis , ob subortum quendam rumorem firmatæ pacis. Miramur, quod vos incertis rumoribus ab inceptis desistatis, aut minus diligenter agatis, quicquid agendum est: cum certissimi esse possitis, quod, si pax confecta esset, vobis, & quidem imprimis, eam notam fecissemus. Oramus igitur vos iterum atque iterum, ut omni studio, cura, & diligentia, ad exornandam classem incumbatis; neque vos deterreat aut quovis modo retrahat causa pacis; quia nec conclusa est, nec de conclusione spes habetur. Florentini enim, consilio Baptistæ de Campo Fregosio, & Ioannis Ludovici de Flisco, nunc innovant, quo Pontremolum, & omnia quæ illi de Campo Fregosio & de Flisco tenere solebant, restituantur. Cui petitioni, cum inhonesta sit, tam pro bono nostro, quam illius Magnificæ urbis, nequaquam assensum præstare decrevimus. Nullam ergo spem in pace ponatis, sed classem amplam & firmam parate quam majori properatione fieri potest: nullus locus sit moræ, ne hostes nos imparatos offendant. Agite ut magnanimos & prudentes viros decet; nos maximam spem in vobis posuimus, Mediolani, die VII Aprilis, 1433.

Dux

*Dux Mediolani, Francisco Barbavara,
& Opicino de Alzate, &
Ancianis Genuæ.*

Dilectissimi, ut superioribus literis scripsimus, maxime cupientes, ut Genuenses nostri Venetiis captivi liberarentur; non expectato exitu consilii jam cæpti, quod nimis longum videbatur, misimus ad Illustriss. Dominium Venetorum solemnes oratores nostros, D. Andream Barth, Imperialem, & Ioannem Franciscum Gallinam, ut cum ipso Dominio pro liberatione omnium captivorum, tam suorum, quam nostrorum, ordinem & modum expendant. Ipsum D. Andream Barth ad hanc legationem elegimus, quod huic ratione patriæ visus est optime conveniens. Neque dubitamus, quin in liberatione dictorum captivorum istos inter & Venetos bene conveniet. Habent enim latissimas habenas à nobis. Et, si præfatum Dominium suos apud nos detentos, in quibus adsunt multi viri præstantes, charos habuerit, dimissioni nostrorum consentiet, maxime quia plures ex suis habemus. Considerantes igitur, quod accessus Domini Damiani Pallavicini, quem Venetias

tias mittere volebatis, non est opportunus; imo posset in solutione dictorum captivorum majores difficultates adducere: (Quo major sit instantia, eo minus interdum obtinetur:) Decrevimus, ut ipse D. Damianus Genuam revertatur. Quod vobis ad excusationem sui enarrare libuit; utque intelligeretis, quibus consiliis adducti eum domi detinuerimus: vobis pollicentes, nihil nobis magis cordi futurum quam captivorum vestrorum solutionem, cum ex sola occasione ipsorum liberandorum paci consenserimus. Mediolani, die VIII Julii, 1433.

*Dux Mediolani, Francisco Barbavara,
& Opicino de Alzate.*

Q Uaternas à vobis literas habuimus de ornanda classe, sicut etiam Blasius de Axereto retulit. Mihi gratissimum fuit, intelligere rationem & diligentiam, quam adhibuistis pro inducendis ad vota nostra civibus. Volumus, ut assentiat, quo ipsi cives ad nos suos oratores mittant, prout eos decrevisse sensimus. Illud tamen date operam, ut, qui venturi erunt, fide & benevolentia erga nos propensi sint, ac tales, qui in classe comparanda nequaquam à voluntate nostra dissen-

disfidentiant. Quo citius ergo id cūrabitis, eo nobis gratius erit. Datum Mediolani, Majo, 1433.

*Dux Mediolani, Francisco Barbavara,
& Opicino de Alzate.*

Optima est sententia civium illic nostrorum, de attrahendis & completendis omnibus recessuris ex locis Agri Pisani, qui reip. Florentinæ ex pace restitui debent. Sed, ut prudentissime dicis, non sunt ea de causa edicta publica facienda, ne Florentini propterea conquerrantur. Omissis ergo edictis, date operam, ut, quicunque ex iis locis illuc venturi sunt, amice colligentur, & humane tractentur, cum in concessione immunitatum, tum in aliis quibusvis: ad hæc, eos clam certiores faciat per nuncios, de propenso erga eos animo Genuensium, ut ad veniendum proniores fiant. Mediolani, xviii Maii, 1433.

*Dux Mediolani, Francisco Barbavara,
& Opicino.*

Audivimus quæcunque scripsistis de longo colloquio habito cum D. Andrea de Biute: fuitque nobis jucunda lectio

ctio literarum vestrarum, & id officii mihi gratissimum fuit. Neque enim melius dici potuisset, neque de amico erga regem Aragonum animo tanta referri poterant, quanta sunt. Ut igitur consilium ipsius D. Andreæ sequamur, decrevimus Regi aliqua scribere de pace cum Venetis & Florentinis nuper inita: ut intelligat, nos erga Majest. suam eo animo esse quo semper fuimus, & meliori, si tamen melior esse possit; & præterea ipsum Regem hortari ad præsidia & opem sacro concilio ferendam, sicut ipse D. Andreas laudare videtur: namque, ut tu probe nosti, posset ex ipso concilio multos favores commodaque sentire. Verum, si quando contigerit ipsum D. Andream ex Catalonia redire, nomine nostro ei plurimas gratias habebitis. Mediolani, XXI Maii, 1433.

Iisdem.

Quicquid affirmant iī cives nostri Genuenses, nos prorsus proposuimus, & volumus, ut non modo naves onerariæ, sed & triremes exornentur. Cum satis in hoc genere animum nostrum perspicere potueritis. Detis igitur operam quibuscunque rationibus, & instetis diligenter.

ligentissime, ut negotium ornandæ classis absolvatis. Videtis enim, æstatem imminere; & multum nobis temporis ad conficiendas res deperiit. non ita segniter agunt hostes nostri: ii omnia jam in promptu habent. Mediolani, 18 Aprilis, 1433.

*Genua Dax, & Consilium, Senatui
populoque Mediolanensi.*

QUamprimum nobis nunciatum est de obitu Illustriss. Philippi Mariæ Ducis, cogitare cœpimus, quæ conjunctio animorum, & pervetusta amicitia, sancte quidem ac religiose servata nobis, cum Mediolanensi populo intercesseſſit. qui secundis rebus nostris lætari consueverat, clades autem & incommoda quasi sua iniquissimo animo ferebat. Venitque in mentem, instare tempus, quo de amicorum benevolentia periculum faciamus, absque eo quod alios rogamus; cum ultro amici amicorum commodo omnia deferre debeant, quæ vel utilitate vel adjumento esse possint. Itaque, etsi jure mirari possumus, nihil nobis literarum allatum esse, easque summa cupiditate expectamus: tamen optimum duximus, vobis consilia nostra deferre,

ferre, & ita quidem omnia, ut nihil prorsus excludamus, sed consilium, operam, auxilia, demum quæ nostra sunt, pro incolumitate saluteque vestra vobis polliceamur; atque, ut hoc sibi persuadeant, etiam atque etiam oramus. Erit humanitatis officiique vestri, rescribere, quid potissimum agamus. Nam nos, perspecto animo vestro, nihil prætermittimus quod à nobis perfici possit. Mirum est quantopere literas expectemus. Et quoniam ignotum nobis, quæ forma imperii illi nobilissimæ urbi data sit, id persuasum maxime habeatis, quod, quascumque rationes resp. sibi delegerit, nos id ut prudentissime constitutum non modo comprobabimus, sed & pro tuendis rebus vestris, tanquam pro salute nostra, laborabimus. Genuæ, xvi Augusti, 1433.

*Dux Mediolani, Papia Angleriaque
Comes, ac Genua dominus,
Genuensibus.*

Audite, quam pulchre Deus Opt. Max. rebus nostris faveat, quantoque causæ nostræ justissimæ sit adjumento. Hesternæ die, matutino tempore,
classis

classis nostra potens & felix contra navem maximam hostium prope Padum prodiit: super quam aderat egregius gener & filius noster, Franciscus Sfortia, Vicecomes, & spectabilis Nicolaus Piccininus de Perusio, imperator noster, viri profecto magnanimi & fortissimi, cum nobilissima nostrarum gentium acie; ipsumque hostile navigium ad Cremonam tanto ordine tantaque vi agressi sunt, ut illud quamprimum devicerint, captis etiam majoribus, quos Galeones appellant; quatuor exeeptis, qui misere evaserunt. Qui capti sunt, munitissimi erant gentibus & multarum rerum copia, interceptis etiam navibus minoribus, quam plurimis com meatibus oneratis. Id igitur gloriosum & triumphale nobis munus primum Diis immortalibus, inde virtuti nostrorum acceptum ferimus, volumusque vobis impartiri. Facite in oppidis & vicis vestris decerni supplicationes triduo, animisque lætis & præsentibus estote.

*Dux Mediolani Francisco Barbavara,
Vicario Ducalis Saona.*

INtelleximus, Dominicum quendam Gravarium, Alexandrinum ciyem, dudum

dum à locis nostris absentem , decedentem ex Montefarrato, profectum Venetias, deinde Romam; nunc vero per viam Ripariam Genua Monteferratum iter suum direxisse , nonnulla inquirendo & gerendo contra dignitatem & imperium nostrum. Est autem vir proceri corporis, macer , habens latos & magnos pedes: quod ad faciem attinet , est rufi & albi coloris, calvus frontem, balbutiens , & naso aquilino. Cupientes igitur eum in manu habere, damus tibi id oneris, ut in quibuscunque locis apponas viros diligentissimos , qui eum prætereuntem sistant , capiant, ad nosque quamprimum deducant. Mediolani , die xviii Octobris, 1433.

*Dux Mediolani Francisco Barbavara ,
Vicario nostro Saonæ ; nec non Reverendissimo Episcopo & Antianis
civitatis Genuæ ac Saonæ.*

Nuper intelleximus, collata fuisse signa maxima contentione animorum , die dominica post festum corporis Christi, bello illato ab Hussitis hæreticis Boëmiæ. quo prælio tredecim millia Hussitarum ceciderunt; interempto etiam Impe-

Imperatore eorum, & aliis duobus supremis authoribus & principibus factionis; nec non septingentis ex ipsis captis. ex nostris vero ducenti tantum desiderati sunt. Hoc tam felici nuncio, quicumque de fide nostra bene sentiunt, lætari debent. Volumus igitur hoc felicissimo rerum eventu decerni triduanas supplicationes. Mediolani, die xxiii Iunii, 1433.

*Dux Genuæ, & Officium provisorum,
Baptistæ de Bæno, & collegis, legatis
apud Mediolanenses.*

Accepimus priores literas vestras, Papiæ datas, die xxii mensis: quæ significabant, alias prius literas à vobis ad nos datas fuisse; quas nunc intelligimus periisse dolo aut incuria tabellarii. Secundæ quoque literæ vestræ, die xxiii & xxv Mediolani datæ, significant, etiam alias prius literas scriptas; quæ etiam nunquam ad nos perlatae fuerunt. Atque ita dum ratiocinamur, quot accepimus, tot perierunt. Quod ideo à vobis ignorari nolimus, primum ut literæ posthac cautius committantur; deinde ut, si quid erat in literis illis, cujus ignoratio posset rebus discrimen afferre, curetis id, quicquid erit, literis iterare. Has postremas

non modo raptim non legimus, imo nulla est in eis syllaba, quam non semel atque iterum versaverimus. Verum quo magis illas excutimus, eo vehementius miramur tres illas petitiones populi Mediolanensis. Ante omnia mirum est, quod prudentia sua dubitare videatur, oppida, quæ multis seculis quiete possedimus, nostra esse. Deinde quod quantacumque modesta fuerit illius reip: querela, conquestaque sit, quod terras nostras receperimus; quasi aliis licuerit nostra occupare, & capta detinere, nobis vero non liceat hæc ipsa vindicare. Postremo nondum intelligere potuimus, quid Mediolanensi reip. intersit exquirere, quo jure has terras receperimus; nisi forte hæredē se facit Illustissimi Ducis defuncti. Quod si est, testamentum proferat. Et tamen, quia de juribus Novarum gravius dubitare dicuntur; ut sciant Magnifici illi Senatores, nihil ambire quod nostrum non sit; si unquam in hujusmodi sermonem incideritis, volumus eos certiores faciat, Novas huic reip. vendidisse Ioannem Marchionem Montisferrati, pretio aureorum xvii. mill. Quod oppidum cum diu possessum sine ulla controversia fuisset, nobis à Ioanne Balcario Duce primo subtractum est. Qui post multos annos
non

non modo illud nobis reddidit, sed de illo liberalem insuper donationem nobis fecit. Sunt hic apud nos publica documenta; quæ ideo non mittimus, quia de salute ac firmamento illius reip. major quam de juribus Novarum hoc tempore nobis cura est. Atque utinam adeo tranquillæ & in tuto positæ res illæ forent, ut ejusmodi disputationem tempora exigèrent: misissemus ad vos chirographa, ut, si quis ex iis dubitasset, omnem prorsus hæsitationem exueret. Sagittariorum petitio recte à vobis gesta est, ut neque assenseritis, neque repuleritis eam. Si enim cæterea parari ac perfici videremus, non recusaremus pro salute ac libertate illius populi aliquid oneris, aliquid etiam impensarum subire. Ingens vero illa pecuniarum mutuatio nos profecto usque ad admirationem commovet. Quo enim pacto nobiscum ageretur, si fame macerati, valloque & obsidione cincti, auxilium à Mediolanensibus peteremus? Nobis, dono Dei Opt. Maximi, tuta sunt omnia; nullum terra, nullum mari bellum gerimus. offerimus illi populo amicitiam nostram, auxilia, opemque; & ita quidem offerimus, ut hæc nullo pretio vendicemus. Vnde est igitur, ut, qui nihil petimus, sed ultra pollicemur, quasi redem-

ptioni subiiciamur? An forsan illud nomen Gallorum, quod aliquando etiam Romanis formidini fuit, nos quoque terrere debuit? Falluntur, qui ex hoc nobis terrorem incutere opinantur. Nos Christianissimum Francorum Regem ita quidem & veneramur & colimus, ut non metuamus. Neque aliquid est, ex quo à præclarissimo illo Rege lædi mereamur; cum sciamus, ab eo mirum in modum amari. Quas ob res volumus, ut non expectetis has vobis minas rursus incuti; sed vos ultro dominos Auditores vestros & Præfectos alloquamini, eosque etiam nostro nomine certiores reddatis, summam nobis ac prope unicam esse cupiditatem libertatis & amplitudinis suæ. Ad quam tuendam augendamque si arbitrantur tutum esse utileque consilium, cum Rege Excellentissimo foedus percuriendi, nulla eos nostra ratio deterreat. Quicquid enim libertati suæ conducet, erit omni tempore jucundissimum nobis. Attigimus, ut arbitramur, eas partes litterarum vestrarum, quibus jure responsum debebatur. Venimus nunc ad eum articulum, qui vel moram, vel adventum vestrum respicit. Quocirca dicimus, non videri nobis rem minimi ponderis, si hoc temporis discessum vestrum permittamus.

mus. Multa sunt enim, quæ possunt quotidie supervenire; quibus præsentia illic vestra prodesse plurimum possit; digressusque vester, nisi cum ratione fieret, facile posset suspectos rumores non sine perniciæ parere. Rursus cogitamus, moram illic vestram non parum obesse posse; præsertim si, quæ dona dextra porrigimus, sinistra accipiantur. In hac autem dubitatione positi, ad hanc omnes sententiam inclinavimus: videlicet, si vel capitanei, vel alii magistratus illi reipub. præsidentes, vel si egregii cives, etiam magistratum non gerentes, vel si ille Franciscus Comes, moram illic vestram laudarit, vos inde injussu nostro nequaquam discedatis. Si vero quispiam tardationem illic vestram multi faceret, nec eam vobis suaderet, hoc tunc casu volumus, ut DD. præfectos, & saltem XII ex nobilioribus civitatis, alloquamini: quibus synceritatem animorum vestrorum ad studium & salutem suam aperiat, eamque solam causam fuisse perfectionis vestræ: nos in consilio nostro optimo perseveraturos fore; &, si quid evenerit in quo possimus rebus suis prodesse, id nos factorum testimonio probaturos. Iisque, & ejusmodi persuasionibus, animos eorum impleatis. Quibus paratis,

paratis, arbitrio vestro & moram & redditum relinquimus. Hoc tamen vos iterum iterumque monemus, ut, si redire statueritis, ita sane veniatis, ut intelligamus, non desiderium patriæ, aut liberorum, sed probabilem rationem, vos huc attraxisse. Scitis, quanta res agatur, quæ pericula rebus impendeant. Scelus esset, hoc tempore privata commoda publicæ saluti prætulisse. Nos, nisi virtuti vestræ consideremus, hoc profecto arbitrium nunquam vobis committeremus. Si inde excedere ac regredi decreveritis, relinquitte istic Franciscum Vernatium, qui omnia quotidie quam diligentissime exploret, & eorum, quæ gerentur, nos faciat certiores, quoad vestro consilio adjuti rebus illis aliter consulemus. Vos, quantum patriæ debeatis, prius cogitate, quam de vestro reditu quicquam statuat. Genuæ, xxviii Augusti, 1447.

*Pius Pontifex II, ad Archiepiscopum
Genuæ.*

Pius, Episcopus, servus servorum Dei, Venerando fratri, Paulo, Archiepiscopo & Duci Genuæ, salutem, & Apostolicam benedictionem. Ducatum patriæ tuæ omnibus civium suffragiis te
asse-

assecutum scribis, eumque per nostram benedictionem confirmari petis. Admirati sumus consilium tuum, qui ejus civitatis temporale imperium acceperis, quæ plures omnibus urbibus Italiæ tumultus & seditiones quotidie mover, nec ullum diu rectorem Ducemve patitur. Et tu anno superiore, quanta sit tuorum civium constantia, in te ipso didicisti; qui, cum ab eis ad hunc ipsum principatum fuisses assumptus, non tam cito magistratum iniisti, quam deponere coactus fuisti. Nobis quidem eodem fere tempore & assumptio tua & depositio nunciata fuit. quid nunc futurum sit, ignoramus. Huc accedit rei novitas: nunquid idem homo duas gerere personas possit. An absit sanguinis effusio, nescimus. Tamen, quod Archiepiscopus ante te alius, ut inquis, Ducatum inierit, maximam esse causam oportet, quæ hanc novitatem induxerit. Forsan experti sunt Genuenses, secularia imperia injusta esse; atque, inde tot rerum mutationes oriri putantes, ad te confugerunt, sperantes abs te melius & mitius gubernari. Magna tibi est bene agendi necessitas imposita: Nisi rectam justitiæ lancem tenueris, nisi vim prohibueris, nisi modum pravis cupiditatibus imposueris, nisi te ipsum & tuos stipato-

res

res in honesti fræna redegeris ; non stabit imperium tuum ; brevi dominaberis urbi ; nec regnum Genuæ tantum, sed & sacerdotalis muneris honorem non sine maximo dedecore amittes ; si tamen eiiciaris, & non pejora tibi contingant ; ut sunt ante oculos domestica exempla. Vide quid agas ; Non eadem est & sacerdotalis & sæcularis imperii ratio. Paternam & omni clementia plenam esse pontificalem administrationem oportet, non tyrannidem. Multa in sæculari dignitate ferunt homines, quæ abhorrent ab ecclesiastica : Quæ in laico pusilla & levia existimantur delicta, in clerico maxima & gravissima judicantur. Sacerdotes, quorum vita veluti speculum inferioribus est, non modo à malis operibus abstinere, sed omnia mala declinare oportet, quæ quoquomodo suspicionem mali ferunt. Vide quem gradum ascenderis : Si potis es pie & juste imperare, ac non subditos solum, sed & te ipsum coercere ; si vales virtute iniquitatem evertere ; si pro commodo communi, non libidinis tuæ explendæ causa, ducatum accepisti ; si ad tutandam religionem adversus impios Turcas quem animum geris, devovere proponis, & injuriam proximi non quæris, confidenter, ritu, & jux-

ta leges tuæ civitatis : tum demum hoc tibi imperium demandatū est. Et, quod, ut polliceris, utiliter populo tuo præeris : illum tibi, & tuis civibus, & universæ reipublicæ Christianæ, in nomine Sanctæ Trinitatis benedicimus. Datum Romæ apud Sanctum Petrum, sub anulo Piscatoris, pridie Calendas Februarias, 1463, Pontificatus v anno.

Morbasanus Habery Tessi, cum fratribus suis, Corali, Iusbacchi, Imperatores Orgami collaterales, & in partibus Achaie domini, Magno Sacerdoti Romanorum, juxta merita dilecto.

Nuper auribus nostris intonuit, quod in partibus Italiæ, ad preces populi Venetorum, in basilicis vestris fecistis edicta, quod, quicumque contra nos nostrosque arma capefferet, suorum in hoc seculo remissionem peccatorum, eisque beatam vitam promittitis in futurum. Cujus rei veritatem oculata fide perspeximus per adventum quorundam pedum cruciferorum, qui nuper in eorum navibus transfretarunt. Propter quod admirari cogimur vehementer : quia, dato, quod à summo Tonante vobis data sit

fit potestas etiam absolvendi animas & ligandi; tamen ad hoc procedere maturius deberetis; neque Christianos, maxime Italos, cruce signatos, inducere super nos: cum, secundum quod patres nostri ante dixerunt nobis, populus noster Turcarum innocens fuerit mortis & injuriæ Christi vestri, & terras & loca vestra Sancta nos non possideamus: imo populum Iudæorum semper odio habuimus, habemusque: & quia in annalibus & chronicis nostris audivimus ipsi, proditorie, & per invidiam, eundem Christum vestrum Hierosolymis traditum præfidi Romanorum; quem cruci affixit. Insuper miramur nostro maximo dolore, quod surgat Italia contra nos, cum latens amor nos ad eos amandos alliciat, quod ipsi priscis illis temporibus à Trojanorum sanguine oriundi sunt. Scimus enim, Antenorem, & Aeneam, vel de Priami sanguine genitos, vel Trojanos fuisse saltem. In cujus locum nos etiam ducti sumus; & Imperium in partibus Europæ tenemus; & juxta promissa, quæ à Diis vestris patres nostri habere noscuntur, Trojam magnam instaurare & ulcisci sanguinem Nestoris, ac Ilionis ruinam, nobis Græcorum Imperium subjugando, & deæ Palladis fatum puniendo, intendimus.

In-

Insuper, quia intēdimus Cretam & alias maritimas insulās nostro Imperio vindicare: iccirco prudentiam vestram requirimus, quatenus diplomatibus vestris per Italiam missis, ad instantiam Venetorum, silentium imponatis; non provocantes amplius sub pietatis specie populū Christianum; cum nos erga ipsum nullum bellum religionis causā geramus; cumque nihil nobis referat, si Christum colitis, quia & nos ipsum credimus prophetam; neque nos ex lege ipsius, prout audivimus, potestis ad credulitatem compellere. Si autem lis vel discordia orta est inter nos & populum Venetorum, hoc accidit, quia per vim, & nullo iustitiæ muniti colore, jamdudum quāsdam insulas maritimas & alia loca suo imperio subjugarunt; quod diutius perpeti non possumus, cum futurum tempus nostræ promissionis instet. Propter quā, & alia, potestis in merito ab inceptis desistere; & imprimis, cum audiverimus, ipsum populum fore alienum à moribus & vita Romanorum. Alioquin si ab inceptis vestra prudentia non desistat, ampliare curabimus vires nostras, sumpto Divi Imperatoris Organi aliorumque Orientalium Regum auxilio, qui simulant hodie se dormire: quorum præsiidiis adiuti, armato-

matorum multis millibus, non modo cruciferis vestris resistemus, verum, si contra nos Italiam, Germaniam, Galliamque concitetis, vos omnes retundere intendimus. &c. Anno Machometi, die mensis Calcubii,

*Maonenses Civitates, & Insula
Chii, Romano Pontifici.*

ET si videmus, Beatissime Pater, maximis nostris periculis nos objectos furori Machometi Turcarum regis, qui in omnes Christianos promiscue arma sumpsit: hucusque tamen quadam animi alacritate sævas illius minas, & illata plurima mala, ideo perferebamus, quia certam conceperamus spem, Christianos, clade tam nefaria accepta, pia arma sumpturos, & summo consensu ac faciliore eventu hostem infidelem atque nimium insolentem oppressuros. Cumque indies graviora ab ipso capiti nostro imminerent, non aliter eadem soliti eramus pendere, quam ut quoddam commune Christianorum incitamentum ad vindictam accelerandam. Quibus rebus spem nostram foventes, omnibus artibus & præfidiis contra ejus vim nos muniebamus. Sed heu nimis longam spem! ô Christianorum

norum arma nimis dilata! siquidem omnibus quiescentibus jam oppugnamur, jam ingens vis & rabidus furor in nos conversus est. Nos erimus in eo nunc occupati, Sanctissime Pater, ut vestræ Sanctitati explicemus, emissam nuper in nos classem, & damna plurima illata esse. Illud potius est præsentis terroris: illud instantis & maximi discriminis, quod, inspecta loci opportunitate, primo proximo vere eadem classis, auctis viribus, & comparatis bellicis operibus, quæque ad oppugnationem pertinent, in nos est reditura: quod ita fore, non vano rumore, sed certis authoribus comperimus. Contra quos impetus ut perstare possimus, fidelis quidem & constans animus non desperat: sed quotæ sunt vires nostræ? quonam pacto sine communi Christianorum auxilio tam modica colonia defenderetur? quæ, licet parva, quanti tamen sit momenti, omnibus Christianis transmarinis haud ignotum putamus, cujus ruina plurimos in eandem secum traheret calamitatem. In tantis igitur nostris & aliorum Christianorum periculis ad Vestram Sanctitatē sapientissimam confugimus; quam non dubitamus divina providentia hoc potissimum tempore ad Apostolicam sedem assumptam, ut suo impulsu

impulsu & auctoritate universalis fides & Christianorum decus instauraretur. Apud eandem, quas præsens necessitas exprimit, preces fundimus, obsecrantes, ut caussam nostram & Christianorum foveat, cœptum opus ne deserat. Christiani concitentur, sumantur arma: quæ si non ita statim inferri terra marique possunt; at illud saltem maritimi auxilii non denegetur, quo tantisper hanc paratam vim ferus hostis contineat, & nos salvi esse possimus. Hæc ita fieri, non maximi laboris esse putamus, & Apostolicæ auctoritati non difficile. Conservantur autem, non Græci, non schismatici, sed Italici generis antiquissimi Christiani, qui semper Sacrosanctæ Romanæ Ecclesiæ pio affectu & deditissimi & obsequentissimi fuerunt: in quorum tutela aliorum pericula propulsantur. Quod si ea infelicitas esset, ut tam justæ preces apud Christianos deperirent, Iesum Christum, dominum nostrum, judicem invocamus; vestram Sanctitatem testantes, nos impie à sociis Christianis destitutos, pro fide tamen usque ad extrema pericula pugnatos; paratissimi semper omnibus obsequiis B. V.; cujus pedes humiliter exosculamur. Ex Chio, die XIII Aug. 1455.

Petrus

Petrus Fregosius, Dux Genuæ, Aragonum & utriusque Sicilia Regi.

COgitantes, quod bella adversus nos sæpenumero; Serenissime ac Excellentissime Rex, injuste tamen, suscepisti; magnitudinem animi tui, etiam si plura forsitan cupit quam capere possit, admirari & extollere aliquandiu potuimus. Sed ubi aperte deprehendimus; nullam inter nos belli causam esse, nisi si tuos movet prædæ aviditas; id indignum tanto Rege, nemo est qui nesciat. Non admirari tamen non possumus, sapientiam tuam, cum per ætatem, tum rerum gravissimarum usu adeo periculis edoctam, totiens adversus nos male expertam fortunam tuam rursus velle tentare: eo magis, quod nos, tot veteribus, totque recentibus injuriis, quot tua Majestas nobis intulit, prorsus abjectis, summique Pontificis tui consilio & precibus moti, superiore anno ad inducias semestres pervenimus. In quo etsi pro fide tanti Numinis, & pro nostra animi æquitate, ac in tuam amplitudinem devotione, jam animum tuum ad tranquillitatem pacemque confirmatum credidimus: existimavimus, pericula Turcorum, quibus sine
tua

tua & nostra pace tuto satis occurri non posset, non modo servandæ paci, sed augendæ inter nos benevolentia prodesse posse. Nam cum sciremus, hanc animi tui esse magnitudinem, ut in gerendis bellis vera gloria tibi constituta esset; oblatum tuæ Majestati hostem esse videbamus, cum quo non humanâ modo, sed cœlestem gloriam posses adipisci; in quo gerendo, etsi per te potentissimus videbare, nos propitios ac omnino obsequentes tibi habere potuisses. Quæ igitur, sapientissime Rex, causa excitare te aut compellere potuit, ut rursus, & tam repente, bellum adversus nos in tot calamitatibus orbis Christiani susciperes, ubi nihil à nobis non modo agi, sed nec cogitari videres, quod tuæ amplitudini, tuæque dignitati obesset? At saltem, si tanta nobiscum pugnandi cupiditas te movet, quæ certe movere non deberet, quomodo fœderis percussi inter nos oblitus es, ut prius triremes ad nostra damna præmiseris, quam id modo aliquo denunciatum nobis fore volueris? Est ne hæc fides tanti Regis, ut triremes tuæ, quas paullo ante amicas, hospitesque, & omni commeatu ac humanitate plenas, à nobis dimiseramus, vix portu nostro egressæ, ad nostra damna discurre

rere non erubuerint? Quis est inter Christianos Principes, qui tam injuste, tam repentine, bellum suscepisset? Rex es, qui multa per ætatem tuam expertus es, ita, ut felicitatem tuam, qui te diligunt, & qui te non norunt, plerumque possint extollere, qui vel nullius consilio indigere videare. Sed memento tamen, nihil tam firmum ac stabile esse, cui periculum non sit ab invalido. Hæc jam laborum vitæ tuorum pars superest, ut, quam pugnando gloriam adeptus es, pace demum & ocio magis quam diuturnis laboribus servare possis. Plura Reges pacis, artibus justitiæque, quam armis, adepti sunt; & plures fuere, qui injuriam inferentes, plerumque sunt ab impari hoste superati. Si tamen ullam Majestas tua querelam deferre velit; habes Pontificem, sunt Reges, sunt alii Principes, quorum consilio omnis nostra controversia dirimi possit. Quod si fugis, tu ipsemet, juste an injuste facias, facile judicabis. Si nos, ut cœpisti, laceßere non desines; Deum fidei & causæ nostræ testem judicemque obtestantes, salutem nostræ ita consulemus, ut hujus suscepti consilii Majestatem tuam aliquando poeniteat. Genuæ, die xvi i Julii, 1455.

Alphon-

*Alphonfus, Rex Aragonum, Petro
Fregosio, Duci Genuæ.*

Qui vos fortasse non norunt, si modo aliqui sunt in terris qui vos non norint, poterunt ii quidem metu aut aliqua admiratione affici. Ego vero, qui totiens jactantiam vestram, totiens levitatem atque perfidiam expertus sum, non solum, quod scribitis, neque magnifacio, neque formido: sed is potius sum, cui facere videamini quod impudica mulier solet; quæ si semel pudorem ex animo abjecerit, postea in castas probasque objectare adulteria non desinat. Etsi vobiscum verbis contendere animus non sit, respondebo tamen abunde satis pro tempore literis vestris; quo mortales atque immortales omnes intelligant, me nequaquam bellum contra nationem Genuensium in præsentia suscitasse; cum qua & amice & benigne vivere perpetuò, nisi nobis publice fiat injuria, decrevimus: imo vero pro civitate Genuensi, id est, pro optimatibus, summisque viris, ac civitatis flore, qui vestra vi atque opera extorres degunt, nos contra fedifragos triremes nostras immisisse; pro illis, inquam, quos multis
ante-

antehac experimentis inspectos sciremus firmos ac constantes publice & privatim in proposito perstitisse, humanitatem ac justitiam colere consuetos; quos haud dubie speramus, si nostris auspiciis nostraq; ope in urbem restituti rempubl. capeſſant, melius fidem, gratitudinem, fedus, pacē, & decus omne nobiscum ſervaturos. At primum omnium, ſi qua vobis præteritarum rerum memoria extat, primam & ſecundam inter nos pacem veſtra avaritia atque perfidia violatam invenietis. Sed hanc, ut nimis veram, omittamus, & ad hæc recentiora, de quibus querela & controverſia eſt, veniamus. Precibus veſtris demum factum eſt, uti Calixtus Pontifex maxime nos ad inducias vobis incundas compulerit. Quæ res tametſi parum duratura pro veſtris moribus mihi videbatur; tamen Pontifici domino noſtro potius parere volui, quam de fide veſtra parum conſiſus videri. Sed nec illud, præſertim Gotardo dictante, jactare debuisti, pacem ſcilicet inter nos factam conſilio, & precibus Pontificis mei. Aderat Gotardus quidem ipſe, tunc legatus veſter, cum epiſcopus Atrebatenſis, communi omnium legato- rum nomine, diſerta quidem oratione me oraret, ut Genuenſes quoque in ge-

neralem pacem suscipierem. Cumque ego responderem, Genuenses pro sua perfidia pœna potius quam pace dignos videri; exclamavit Gotardus, Quis non veneretur genibus provolutum? tua nos saltem clementia, ô Rex humanissime, communi hac pace dignos efficiat. Factæ igitur, Gotardi precibus, sed interventu Pontificis, induciæ, fedus iētum. Cumque Pontificis saltem autoritate aliquid fidei sustentari posse existimarem, præsidium, quod in terra Corsica habebam, revocavi. Vos interim, occasione oblata, oppida, quæ illic regia domus nostra possederat, ut erant propugnatorum vacua, occupastis, præfectos & populares nostros fœdissime trucidastis, pacem de Pontificis sinu adhuc calentem extinxistis; federa, iusiurandum, fidem, pietatem, religionem pro nihilo æstimantes: inter hæc etiam naves nonnullas subditorum nostrorum, nihil hostile metuentes, cepistis, diripuistis, abduxistis. Quibus de rebus cum ego per Franciscum Castelletum, legatum vestrum, & item per Bernardum, præfectum classis nostræ, apud vos sæpius quererem, nec non apud Pontificem per Solerium, nobilem Theologum: ita ubique super his negligentes extitistis, ut lætari atque exultare
potius

potius malo, quam illud velle corrigere videremini. Nam, quas frivolas & ineptas excusationes affertis, magistratum, quem vos D. Georgii cognomento appellatis, non vos, hujuscemodi facinus patrasse; idem est atque si caput ad ventrem culpam rejiciat, venter ad caput. Facitis sane, ut sacerdos ille Herculis apud D. Augustinum, qui solus, utraque manu alternante, dextra quidem pro se, læva velut pro adversario, tesseris ludebat. Non itaque nos temere, aut repente, ut dicitis, contra vos triremes immisimus, qui totiens per Sollerium, totiens per Præfectum nostrum, totiens per Legatum vestrum, qui apud nos adhuc agit, damna illata à vobis frustra repetierimus; studentes, quantum in nobis esset, amicitiam etiam cum improbis servare, si modo errorum & expilationum aliquando pigeret poeniteretque. Illud autem admirari satis non possumus, quomodo Turcarum pericula nominare vos non pudeat: quippe qui probe scire debeatis, quo de genere Christianorum sint hi, qui prius illos ex Asia in Europam, precio & singulari studio avaritiæ adducti, onerariis navibus devexerunt, & ubique terrarum conatus omnes Regum Ducumque Christianorum pro viribus

subvertunt; Machometanis quotidie tela, arma, tormenta, comineatum, contra jus fasque, subministrando. Rursum & hoc nosse debitis, quoniam sint illi, qui, cum Turco contra Christum perpetuo fere conjurantes, expeditionem nostram, quantum in ipsis est, impedire conentur. Nam, per immortalem Deum, quid aliud est, pacem inter nos initam hoc tempore violare, quam Turcorum causam agere, quam Episcopum abjurare, quam Christianorum omnium exitium optare? Advertet Christus ipse, cujus causa agitur, nos semel atque iterum pacem Italiae summa diligentia procurasse, atque firmasse, cum ob alias causas, tum vel maxime, quo Christianorum in Turcas faciliores essent conatus, atque animi alacriores. Hanc quoniam per vos nunc, ô Dux, octoque viri Genuenses, disturbatum iri palam est, in vos conatus nostros, velut in Turcas in Italia exortos, convertamus oportebit. Nec prius ab incepto destituri sumus, quam vos, Christo ipso adjuvante, supplices Deo vero reddamus. Nec minus, Christo Duce, & in Turcas Asiaticos expeditionem, quam semel suscepimus, executuri sumus; palamque facturi, nos ea tantum cupere, quæ facile assequi aut capere valeamus.

Postre-

Postremo nos haudquaquam præterit, victoriam alternam rem esse, nec hominum robore, sed Dei Opt. Max. arbitrio constare: Idcirco contigisse quandoq; , ut ab invalidis fortiores vincerentur, plures à paucioribus. Vos contra latere non debet, fortiores ut plurimum evadere solere, si justam præsertim Deoque acceptam causam sustinent. Quod si victoriæ alicujus recordatio vos lubet, memineritis simul & in ea federis violati; ut, quantum ex victoriæ lætitiæ, tantum ex perfidia mœstitiæ contrahatis. Posthac vero vobis persuasum sit, non amplius dolo aut perfidia, sed armis atque justitia, vincendum esse. Datum in castro nostro novo, Neapoli, x Augusti, 1456.

Petrus, Dux Genuæ, Regi Aragonum.

Cogitantibus nobis, quam incertus & fallax esse rumor soleat, æquum visum est, ut eos motus, quos utero dudum conceptos hæc tandem civitas peperit, Majestas vestra ex nobis certius, quam aliunde, cognoscat; ut, si quid erit, quod nostris de rebus vel cogitandum vel intelligendum sit, ex minus vera hominum affirmatione falli non possit. Cum exploratum haberemus, multa

multos in perniciem reipublicæ nostræ moliri; idque hominum genus in dies magis magisque augetur: statuimus temporum necessitati obtemperare, illorumque furori paullisper cedere. Itaque cum 28 Iulii arciCastelleti præfecissemus fratres nostros, Pandulphum, & Thomasinum, tradita illis trecentorum prope militum manu, primis tenebris urbem reliquimus, ternasque triremes, quas instructas habuimus, paucis comitantibus statim conscendimus. inde tranquillo mari vecti, Segestum oppidum in Orientali ora positum tenuimus. Interim omnis adversariorum factio, haud exiguum equitatum, magnas mercenarii militis copias, nec minora agrestium hominum agmina secum trahentium, intra urbem accepta est. Nec multo post, cum de instaurandis publicis rebus agi cæptum esset, exortis, ut assolet, inter factiones discordiis, quia ratione componi posse non videbantur, ad vim & ad arma concursus est. Ita, non discedentibus modo principibus factionum, sed inter sese mutuo pugnantibus, tandem prima mensis hujus die, in ipso Solis exortu, Genuensem in portum delati sumus. Quo cognito, multi adversariorum discordias execrati, in partes nostras transire cœperunt.

runt. Expositis igitur in terram copiis quas ea classe nobiscum advexeramus, fratribus nostris, qui mox nobis occurrerant, conjuncti, adversarios adorti sumus. Quibus brevi fusis ac fugatis, intra pauculas horas palatio quoque publico potiti sumus. Cumque adversarii tota in urbe nobis cessissent, ignotum omnibus est, & abjectis mox armis, pax civitati restituta. Hic fuit, Illustrissime Princeps, civilis belli exitus; quod tertium intra diem, nullo prope sanguine, nulla civitatis clade, sedatum est. Cæterum, etsi haud dubitamus, omnia Majestatem vestram intra tempus egisse quæ pacta sunt; nullo tamen regio scripto liquet authentico, nobis fuisse ab ea ratificatas inducias; quas nos suo tempore comprobavimus: & quicquid pepigimus, intra statutam diem præstaturi sumus. Ex quo Sublimitatem vestram precamur, rescribi ad nos jubeat quid super ipsa ratificatione sit actum: qui sumus semper ad omnem gloriam vestram magno studio parati. Genuæ, 1455, die 4 Augusti.

Bellisarius Totilæ S. D.

SI hoc bello victoria potitus fueris, Romanque deleveris, rem non alienam,

nam, sed tuam, perditum ibis: sin victus eris, servata urbe Roma, gratias immortales; delata vero, humanitatem nullam à victore expectare debes.

Francorum Rex, Totila S. D.

SI ad amplitudinem regni tui ac rerum gestarum gloriam respiciam, dignus profecto eras, cui tuto filiam meam uxorem darē. Sed illud sævitiae ac improbitatis me penitus deterrebat, quod te perditissimum regum Romanā urbem omnium præclarissimam incendere ac evertere non puduerit. Tantum enim abest, ut filiam meam tibi despondeam, ut tu etiam tanti sceleris aliquando pœnas mihi daturus sis.

*Alaricus Gothorum Rex, Honorio
Imp. Rom.*

Geritur bellum prope Ravennam abhinc triennio varia fortuna, maxima utriusque exercitus clade; quod libidine Stiliconis, Ducis tui, nobis indictum est. Nos Italiam non vastaturi, sed habitaturi venimus: nec erat cur Stilico Dux tuus, spe novarum rerum, te ad hoc bellum sollicitaret. Non satis mihi constat,
majo-

maiore ne avaritia, an odio & perfidia, huic bello se immisceat. Peto igitur abs te, (quando nobis Italia excedendum putas,) eam saltem Galliæ partem copiis nostris incolendam dari jubeas, ad quam Suevi, Alani, & Burgundiones, ducibus Vandalis, irrupturi sunt. nam & satius est, te ex amicitia nostra aliquos fructus capere, quam ex similitate detrimenta aliqua sentire. quandoquidem militum nostrorum robore iis populis Imperio tuo minitantibus egregie ac fortiter occurrám; efficiamque, ut prius amicitiae nostræ fructus, quam fœderum nostrorum certos nuncios habeas. Vale. Prope Ravennam, in castris nostris.

Honorius, Romanus Imperator, Stiliconi.

PETIIT à me per literas humanitatis plenas Alaricus, Gothorum Rex, ut sibi in Gallia id loci habitandum darem, quod propediem Suevi, Alani, Burgundionesque, ingentibus copiis occupaturi videntur. Ego vero Regis illius amicitiam ac fœdera tanti facio, quanti iis periculosis temporibus fieri debet. Video enim, si tot Barbarorum exercitibus, qui nostris cervicibus imminet, occurrendum sit, totum Imperium nostrum in

discrimen vocari. Statuas igitur diem, qua Alaricus cum exercitu Italia in Galliam excedat. Cui des velim eam potissimum partem provinciæ incolendam, quæ hostium incursionibus ac direptionibus exposita est. Illudque te moneo, ut fidei ac diligentiae semper memineris. Vale. Constantinopoli.

Galla Placidia, Honorio, ac Theodosio Iuniori, S.

IAmpridem intellexistis, Stiliconis Ducis perfidia, & Gothorum virtute, captam fere totam Italiam, urbemque Romanam post longam & gravem obsidionem in manus Alarici Regis devenisse. Ego vero, quam primum mihi licuit, dedi operam, ut cædibus & rapinis aliquando temperaretur, & ut nomen Romanæ urbis una cum aliqua libertatis specie viveret. Nam & Romanis magistratibus opera nostra urbs reddita. est. Illud etiam effeci, ut (si quando pacem ac fœdera probetis) in tanta Imperii vestri ac rerum perturbatione ab armis desistatur. Quod ut probetis, vos & moneo, & etiam atque etiam rogo. Spero enim futurum, ut Alaricum, virum nostrum, Regem optimum vestraque affinitate ac benevolentia dignum judicetis. Valete.

Aëtius

Aëtius Patricius, Theodorico Regi.

DUm mutuo odio ac bello implicamur, Attila, Hunnorum Rex, innumerabilibus copiis Pannoniam, Romani Imperii provinciam, occupavit; Macedoniam, Mysiam, Achajam & universam Thraciam ferro ac flamma vastavit; tantaque Imperii incrementa accepit, tantos exercitus comparavit, ut brevi omnia vnico haustu absorbere posse videatur. Hæc cum ita sint, optimum & utriusque salutis utile fuerit, ut nos communi impensa ac periculo illi occurramus. Si enim Alanos, Burgūdiones, Francos, Saxonesque auxiliares copias habeamus, facile & regna nostra tuebimur, & pulcherrimas Romani Imperii provincias de hostium manibus recipiemus. Quod si quamprimum capessere arma, paribusque auspiciis bellum hoc gerere, neglexeris, vide, ne, quando volueris vires illius imminuere, minime possis. nam tanta est Regis illius tum sævitia, tum regnandi cupiditas, ut huic totus terrarum, illi universus hominum cruor, satis esse non possit. Vale. Romæ.

Aëtius

Aëtius Patricius, Consulibus Romanis.

MAximis itineribus in Galliam veni, legionesque nostras ad Tholosam cum Theodorico Visigothorum Rege ac cæteris conjunxi: quod ubi primum Attila rescivit, relicta Aureliensi obsidione, propius nostros exercitus accessit, accopiam pugnandi fecit. Sperabat autem barbarus hostis, prælium sibi ex sententia eventurum; cum per Vatum responsa fortunam belli sciscitatus, cædem Imperatoris legionumstrarum speraret. Pugnatum est magno ardore animorum, diu neutra acie inclinante, aut cedente: sed tanta hostium cædes facta est, ut montium cadaveribus septi videremur. Verum nox superveniens pugnam diremit. Ad centum octoginta millia hominum in acie utrinque ceciderunt: victoresque maxima gloria evasimus; ita tamen, ut Theodoricus egregie pugnans in altero cornu ceciderit. Attila fractus & fugatus in sua regna se recepit. Thurismundus, Theodorici filius, quam primum recessit, veritus, ne, cognita parentis nece, à fratribus regno spoliaretur. Nos vero reliquias exercitus instauramus; ac speramus, fore, ut, pacata Gallia & pro-

& provinciis omnibus, longo ocio ac quiete fruamur. Valete. Ex castris ad Tholosam.

Pristus, Theodosio Iuniori Imp.

TAndem, transmissis ingentibus fluminibus, & superatis montium jugis altissimis, in Scythiam deveni, aulamque Attilæ regis attingi. Is habitat vicum instar amplissimæ civitatis, in quo lignea mœnia ex tabulis nitentibus fabricata visuntur: quarum tabularum compago ita solidum mentitur, ut vix ab intento oculo possit junctura comprehendi. Triclinia ambitu prolixiore distincta; porticus egregie ornatae ac dispositae; area vero atrii ingenti ambitu cincta, ut amplitudo ipsa regiam domum ostendet. Rex Attila incessu est superbus, huc atque illic circumferens oculos; motuque corporis ingenium ac barbariem demonstrat. Bellorum est amator; sed ipsemet non magnopere manu promptus, consilio satis maturo. Supplicibus immitis: favens ac fovens eos, quos semel in fidem & clientelam accepit. Forma brevis, lato pectore, capite grandiore, minutis oculis, rarus barba, canis aspectu, sumo naso, tetro colore, originis suæ signa

gna præ se ferens. Is demum mihi totus visus est ad bellum apparatus, qui terris & imperiis omnibus cladem minitari soleat : nam & quingenta hominum millia in aciem educere posse prædicant. Hæc volui te præmonere, ut scires, periculosum tibi bellum imminere. Cui quibus viribus occurrere valeas, tu pro tua prudentia videbis. Ego vero, quanto ocius potero, has literas subsequar, coramque plurâ dicam. Vale.

Theodoricus Ostrogothorum Rex Zenoni Imperatori Constantinopolit.

MUltis maximisque tuis erga me officiis, quanti amicitiam nostram faceres, cognovi; eaque in primis ratione, quod mihi equestrem statuam ex ære in rostris erexeris, patricium declaraveris, exercituique nostro stipendia amplissima dederis. Verum, cum mihi jam pridem nuntiatum sit, Italiam totam Odoacri armis cessisse, diuque in contumeliam Rom. Imperii eam provinciam detineri; mihi gratissimum feceris, si me, cum exercitu, ad deturbandum Odoacrum regno Italiæ proficisci patiaris, mihi que, perveteri necessitudine tibi conjuncto, hujusce protectionis author fueris.

ris. Cur autem id tibi minus placere debeat, non video, ut amico potius quam hosti Italia pareret; cum Visigothæ, Suevi, Alani, Vandali, Burgundiones, Eruli, & Turingii, tum Italiam, cum etiam Galliam, Hispaniam, atque Africam ferro igneque vastaverint. Hæc tecum pluribus non agam, ne tuæ erga me benevolentia diffidere videar. Vale.

*Theodoricus Ostrogothorum Rex Zenoni
Imperatori Constantinopolitano.*

AD statutam diem ex Pannonia castra movebam, cum in Noricis Strapilia Gepidarum Rex armatus mihi sit obviam. Hunc primum prælio fudi ac fugavi. Eodem ferme tempore Busarim, Bulgarorum Ducem, mihi infestum delevi. Quamprimum vero Italiam attigi, Odoacrum apud Soricium, Aquilejæ flumen, cum instructo exercitu, obvium habui; quem etiam, cruento tamen prælio, vici. Is, ad Padi vada & loca munitissima delatus, aliquantisper substitit: ego Veronam urbem, deditibus se civibus, recepi; Odoacrum in campis patentibus Veronæ subjectis secundo fudi. Victus Odoacer, Romam petens, à populo Romano exclusus est: suburbana loca incen-

incendens , Ravennam se contulit : per legatos tentavit animos populorum : ad cujus partes multi accolæ Padi fluvii , & Astupha præfectus Flaminiaë Æmyliaëque, transierat. Demum Ticino movens, Ravennam contendit ; urbemque ac hostes ea obsidione cingo , ut aliquando sperem, ex sententia huic diutino bello finem impositurum. Vale. In castris prope Ravennam.

Theodoricus, Ostrogothorum Rex ; Zenoni, Imperatori Constantinopolit.

Nihil est , quod desidia me accuses, quod nimis sero de iis, quæ hic geruntur , te certiores faciam. multa ad te rumor ipse attulit. Id scias, velim, me diu ac multum in hac Ravennæ obsidione laborasse: ea enim fuit hujusmodi, ut, sæpenumero ab Odoacro eruptione facta , de fortunis omnibus dimicandum fuerit. Verum tamen bis & fractus & in urbem conjectus est. Totum triennium in hac obsidione consumpsimus ; hostis, hortantibus cum civibus, se nobis dedit. Ego, quamprimum urbem ingressus sum, de Odoacro ac filio supplicium sumpsi ; qui agros incenderat, urbes evertebat, tantumque ubique locorum humani san-

ni sanguinis effuderat. Hæc volui, nescius ne esses. Vale. Ravennæ.

*Theodoricus, Ostrogothorū Italiaq; Rex,
Clodovæo, Francorum Regi.*

Mihi nunciatum est, te collatis signis in agro Volgadenſi cum Alarico genero meo dimicaſſe; eodemque prælio egregium adoleſcentem, mihiq; conjunctiſſimum, cecidiſſe. Quod, pro eo ac debui, ægre moleſteque tuli. Nihil enim erat, quod me majori moleſtia afficere poſſet, quam videre, hinc ſocerum meum, inde generum, armis decertantes, quorum vel victoria vel caſus mihi peracerbus futurus eſſet. Erat tamen Alarici juſtior cauſſa. Ex quo fit, ut te jure optimo accuſare auſim; cum adhuc nullam ſatis dignam rationem mihi fingere potuerim, qua tu ductus, optimum adoleſcentem, generum meum, regno ac vita ſpoliaveris. Ad cujus injuriam ulciſcendam pietas amorque ſingularis orbi nepotis me plurimū movet; niſi tute ſponte tua regnum illi ac fortunas omnes prius reſtituas. Peto igitur abs te quam diligentiffime, ut ei avitum regnum, omniaque, reddas. nam & id dignitas tua, & innocentiffimi pueri ratio æquiſſima poſtu-

postulat. Quod si quamprimum efficere ac curare neglexeris; dabo operam, ut tu, qui me jampridem generum devin-
vinctissimum expertus fueris, hostem
maxime infensum cognoscas. Vale.

*Iustinianus, Imp. Augustus, Theo-
dato, Gothorum Regi.*

Cum memoria repeto, quibus te of-
ficiis Amalasunta Regina affecerit,
quamque liberaliter post obitum filii te
consortem regni delegerit; non possum
non ingrati animi tui indignitatem ac-
cusare, quem non puduerit, mulierem
omnium maxime memorabilem, optimis
disciplinis ornatam, multarumque lin-
guarum cognitione inprimis claram, in
insulam Vulsinensis lacus relegatam, in-
terficere, ac excarnificandam aliis dare.
Vide tu, quem ego te philosophum ap-
pellem, & qua ratione Platonem divi-
num jactari dicam. Profecto, si aliquem
ultorem scelerum superesse existimasses,
nunquam tanti sceleris tibi conscius,
Theodate, fuisses. Tu tamen tantæ cæ-
dis abs te patratae aliquando Diis im-
mortalibus & mihi pœnas dabis.

Belli-

Bellisarius, Iustiniano Imperatori.

Superioribus literis, quam felici navigatione usus essem, te certiore feci; paucisque diebus insulam Siciliam de hoste recepi. Dumque ibi aliquot dies commoratus essem, mihi nunciatum est, Theodatum à suis interfectum, Vitigemque in Gothorum Regem delectum. Ego vero, è Sicilia solvens, in Campaniam veni, ac urbem Neapolin vi cepi. Inde vero Romam cum exercitu properans, urbem ingressus sum; tantumque terroris hostibus incussi, ut omnes, relictis mœnibus & portis, Ravennam confugerint. Sed cum mihi significatum fuisset, Vitigim multis legionibus, ac fere centum millibus armatorum, Romam adventare; cum aperto Marte nequaquam ei par esse possem, mœnia urbis vallo ac fossa quam celerrime munivi. Obsideri tota urbs jam pridem cœpta est. Quæ cum ita sint, peto abs te, ut, habito veteranorum militum delectu, pro rei magnitudine, exercitum ad obsidionem solvendam mittas. nihil est enim, quod quinque millibus hominum, obsidionem solvere, ac Gothos profligare, speremus. Tota spes est in præsidio ac celeritate tua.

tua. Igitur pulcherrima provincia Romani Imperii agitur, ac gloriæ certissimus triumphus. Vale. Romæ.

Symmachus, Romanus Pontifex, Theodorico, Italia Regi.

POsteaquam in locum demortui Anastasii suffectus sum, nunquam per improbitatem Laurentii mihi divinam rem curare licuit. Nam tumultus in Senatu ac populo concitatus est, & adhuc percrebescit. Ad hos sedandos indictum fuerat Ravennæ Concilium. Ubi, uno omnium consensu, te etiam audiente, mihi locus Romanæ Ecclesiæ adjudicatus est. Sed, cum Romæ, concitatis populorum animis, maxima incendia misceri viderentur; missus est ad hos sedandos Petrus, Altini Episcopus, qui etiam, nobis viventibus, Romanæ Ecclesiæ præfesset. Ille vero, ne dum incendia extinguere, sed nec Ecclesiæ nobis à Deo creditæ rem ullam contingere potuit. Centum & viginti Episcoporum concilio idem Petrus ac Laurentius damnati sunt. Ubi omnia crimina, quæ mihi ab improbis viris obiiciebantur, innocentia mea dilui, ac frequenti senatu liberatus sum. Veruntamen, cum adhuc aliquid supersit re-

fit reliquiarum, quod divina & humana perturbet; peto à te, (quod commodo tuo fiat,) ut iter tuum Romam matures: desque operam, ut perditorum hominum audacia aliquando cohibeatur. Quod si minus commode fieri poterit, malo me imperio abdicare, quam rempublicam funditus Christianam evertere.

Hormisda, Romanus Pontifex, Iustino Imperatori S. D.

Miseram jampridem legatos ad Anastasium tuum, ut dissidia nostra de religione ac sacris rebus conciliarem. Quos ille legatos contra jus gentium maxima contumelia affectos ea conditione à se reiecit, ut navi quassa & rimosa in Italiam recta redirent, nec ullum Græciæ litus contingerent. Hac injuria deterritus, diu ac multum dubitavi, qua ratione potissimum mihi tecum agendum foret. Verebar enim, ne Campano Episcopo ac cæteris legatis meis, quos ad te destinaveram, aliquid hujusmodi eveniret. Postremo virtus tua, amorque erga nos singularis, adde etiam, Theodorici nostri regis testimonium, effecit, ut eos ad te mittere non vereremur. A quibus viris optimis, deque tota Christiana republi-

publica benemeritis, in omni genere nihil est quod expectare non debeas: idque tibi persuadeas, nos in illos authoritatis, gratiæ, ac amplitudinis nostræ vim omnem effudisse; eosque esse huiusmodi, ut doctrina, pietate, ac rerum usu pares iis nullos facile comperias. Vale.

*Theodoricus, Italia Rex, Iustino,
Augusto.*

VIx ferre possum clamores & ejulatus multorum, qui, fortunis ac rebus omnibus dispolati, quotidie nobis sese offerunt, auxilium fidemque nostram implorantes. Cum autem diligentius casus & eorum calamitatem sciscitatus fuisset, eos ita male mulctatos abs te audiebam, quod eos Arrianos, & à Rom. Ecclesia desciscentes, comperisses. Ego vero has quæstiunculas nunquam tanti feci, ut provinciarum & Imperii incendia inde excitari debere judicarem. Quare abs te humanissime peto, ut horum Arrianorum causam mitiori ratione tractes, eosque quam commendatissimos habeas. Quorum salutem ac incolumitatem quanti faciam; Ioannes, Romanus Pontifex Theodorus, & duo Agapeti, coram, meo nomine, tibi declarabunt. Quod si secus, atque

atque debes, erga illos animatus fueris, ac usque ad internecionem insectari volueris; id pro certo habeas, me omnes Italiæ Ecclesias, Romano Pontifici faventes, demoliturum, deque sacris & religiosis viris sævissime supplicia sumpturum: idque tum in ultionem innocentissimorum hominum, tum ob tuendam dignitatem nostram efficiemus. Quæ incommoda si evenerint, ea potius ingenii tui pertinaciæ, quam sævitiae nostræ ascribenda erunt. Vale. Ravennæ.

Amalasijunta, Atalarico filio, Gothorum Regi.

Nihil unquam mihi antiquius fuit, quam te doctrinis & moribus optimis instituere. Sed per procerum Ducumque tuorum improbitatem id nunquam licuit ex sententia mihi efficere. Existimarunt enim rudes homines, Regem suum sub præceptore minime esse debere. Arma tibi magis, quam omnes disciplinas, usui futura prædicant. Hæc satis iniquo animo tuli. Nam scientiarum optimarum cognitionem tanti, quanti amplissimos Thesauros, semper feci. Verumtamen cum animadverterim, ætatem, simplex ingenium tuum, ac utriusque

que fortunam, perditorum hominum audaciæ obnoxiam esse; injuriæ quamprimum obviam eundum duxi: perditissimaque quorundam hominum consilia auverte, qui odia & similitates inter nos insigni pietate conjunctos disseminabant, quæ quasi præsentissimum venenum nos una cum Imperio facile perderent ac everterent. Ravennam igitur maximis itineribus contendere; captisque aliquot noxiis, de iis supplicium sumpsi; nihilque prius duxi, quam de iis omnibus te quam primum certiore facere, monereque, ut ab hujusmodi viris & insidiis, quantum per ætatem posses, caveres. Lubrica est ætas; amplitudo Imperii ea est, ut sapientissimum virum, multis etiam septum consiliis, præcipitem agere possit. Tu autem, fili, cave existimes, te ulli quam mihi chariorem esse. Vale.

Theodora, Augusta, Sylverio, Romano Pontifici.

Quanti fecerim semper Anthemium episcopum nostrum, te facile intelligere arbitror; cum & exilium illius moleste tulerim, & omnes calamitates viri optimi jam pridem maximæ curæ mihi fuerint. Sed hæc omnia illi incommoda
Aga-

Agapeti Romani Pontificis injuria potius, quam sua ipsius improbitate, contigerunt. Verum, cum multa mihi de pietate, tuaque erga nos benevolentia, dicantur, peto abs te mirum in modum, ut Anthemium fortunis & pristinae dignitati suae restituas. Hoc æquitas ipsa, hoc tota urbs, aulaque nostra tota, sibi abs te condonari petit. Ego vero polliceor tibi, in meque recipio, eundem, gratum, Christianum, innocentissimumque virum, ita se gesturum, ut nunquam poeniteat te liberalitatis ac clementiae tuae. Velimque tibi persuadeas, si illum pristinae fortunae restitueris, me tibi devinctissimam futuram. Sin durius aliquid te cogitare, precesque nostras aspernari intellexero; id memineris, me preces hujusmodi ad vim & injuriam esse conversuram. Tu vero, quod optimum & salutis tuae maxime utile fuerit, decernas. Vale. Constantinopoli.

*Sylverius, Romanus Pontifex,
Theodora, Augusta.*

Permolestæ mihi fuerunt literæ tuæ, quibus Anthemium, perditissimum hominem, sacerdotio, patriæ, ac fortunis omnibus restitui petis. Nam nihil est
E omnium

omnium rerum, in quo minus voluntati tuæ morem gerere possim ; cum homo hæreticus, justis sententiis damnatus, & noxius, liberari sine scelere & maxima perturbatione non possit. Quem tantum abest ut restituendum existimem, ut ob pertinaciam suam graviori etiam supplicio afficiendum putem. Quibus enim satis dignis pœnis plecti possit, qui populos, fidei suæ commissos, doctrinis & pravis opinionibus, quasi veneno, necaverit, urbemque omnium florentissimam suo dogmate perdiderit? Quare ab amplitudine tua etiam atque etiam peto, ut ne hoc à me petas; quod nec dignitas tua, nec ulla ratio sacrarum rerum fieri patitur. Id tantum ad vim & minas tuas brevibus dicam, me tanti honorem Dei Opt. Maximi, tanti salutem animi facere, ut necis etiam pœnas non pertimescam. Vale. Romæ.

Narses, Dux, Iustiniano, Imperatori.

CUM mihi nunciatum esset, Thejam Gothorum Regem Nuceriam, de-
dentibus oppidanis, recepisse ; eo copias
& robur exercitus converti, atque ad e-
jus conspectum deveni. Uterque exerci-
tus medio flumine secernebatur ; cujus
pon-

pontem hostis occupaverat. Per paucos dies multis levibus certaminibus, & varia fortuna, demum totis viribus, pugnatum est. In quo prælio Thejas ipse confossus interiit. Ea pugna usque ad noctem intermissa non est. Cum Gothorum reliquæ acriter pugnando aliquas pacis conditiones sperarent, iis petentibus pax ita data est, ut, quæcumque oppida in tota Italia detinerent, restituerent Gothi; duas tamen urbes Galliæ Cisalpinæ, Lucam, & Forum Cornelii, reliquas haberent. Sed & illas nullo labore propediem capiemus. Hæc victoria huiusmodi est, ut Gothorum Imperium prorsus excisum sit, nomenque etiam propediem interitum; quod annos septuaginta duos in hac provincia cum maxima gloria floruit. Centum millia hominum desiderati sunt. Paucos autem, qui tantæ cladi superfuerunt, non Gothos, sed verius Italos appellare possumus. Hæc ad te paucioribus eo scripsi, quod de iis omnibus multorum verbis certior fieri melius poteris. Vale. Nuceriæ.

Narses, Dux, Iustiniano, Imperatori.

PŌst insignem pugnam, quæ ad Nuceriā facta est, cum prorsus nihil belli

Gothici superesse existimarem; ecce tibi Gothi, qui trans Padum erant, Lucam, & Forum Cornelii, instaurarunt, præsidia imposuerunt, & Duces Teobaldi in belli societatem sibi asciverunt. Propere eo cum legionibus accessi, ad fluvium Auferim castra posui, cohortesque aliquot ad Forum Cornelii ire jussi. Vtraque urbs acriter obsessa est. Luca septimo mense capta. Forum Cornelii paulo post expugnatum est, & ob civium improbitatem solo æquatum. Reliquiæ tam diuturni & varii belli, tum veteranorum virtute, tum Dagistei Ducis egregia opera, sublatae sunt; ac ita sublatae, ut nihil sit, quod à Gothorum armis perpétuo timeamus. Totum id bellum tametsi decem & octo annorum laboribus ac impensis gestum sit, tamen tantum gloriæ tibi penes universos, futuris etiam temporibus, comparavit, ut Romanorum triumphos, & Italici nominis gloriam, unus viceris. Quæ omnia prospera ac felicia tibi faxit Deus optimus maximus. Vale. Lucæ.

*Aurelianus, Dux, Carolo VIII,
Gallorum Regi.*

E Go jampridem commodo & judicio
Amplitudinis tuæ Novariam cepi;
quan-

quantumque in me fuit, gloriam Gallici nominis defendi ac tutatus sum. Sed cum ita rerum euentus ac incerti casus tulerint, ut hæc urbs duobus exercitibus hinc & inde obsideretur, rei magnitudo effecit, ut meam & tot fortissimorum militum salutem tibi commendarem. Pertinet enim ad publicam Gallorum existimationem, & ad dignitatem imprimis tuam, Novariam defendi, ac ab obsidione liberari. In quo si aliquorum improbitate vel incuria, & flagitiosis consiliis, deserar, Itali acceptæ cladis memores crudeliter erunt sævituri. Novarienses, qui summæ fidei sunt, & milites, qui summæ constantiæ laude aspera omnia paterentur, propter commeatus inopiam, jam prope ad rerum omnium desperationem devenerunt, neque ulla re magis eorum corpora atque animi sustinentur, quam certa spe tui aduentus. Si exercitum à Vercellis amoveris, & hostes, quos jam ad Terrum profligasti, ex composito aggressus fueris, nos continuo cum octo millibus pugnacissimorum hominum erumpemus, egregioque facinore edito victoriam ingeminabis. Hoc te Novarienses omnes, hoc te Helvetii, Antiisque ipse: hoc etiam atque etiam Ludovicus Salassus rogat: quorum salutem tan-

ti, quanti dignitatem fortunasque tuas, facere debes. Vale. Novariæ.

*Carolus V I I I, Rex Galliarum,
Aureliano, Duci.*

Multa me ad salutem tuam & sociorum hortantur : vel affinitas , qua mecum arcte conjunctus es : vel milites, de me optime meriti ; quorum virtuti tantum debeo , quantum solvere difficile est. Accivi nuper ex Helvetiis pedites, & è Gallia equites cataphractos , in supplementum exercitus. spero , ea auxilia quam mature ventura : quæ ubi applicuerint, extemplo castra movebo ; daboque operam naviter , ut Itali fœda fuga obsidionem solvant ; vel, si opperiri nostrum adventum velint, maximo suo incommodo Gallorum virtutem iterum experientur. Tu interim Novariensibus, Antio , Ludovicoque Sallaslo, meis verbis salutem ac præsidium pollicearis . Vale. Vercellis.

Narses, Alboino, Longobardorum Regi.

Nullus est, qui nesciat, quantis laboribus ac periculis pro tuendo Imperio & in Italia & ubique locorum decerta-

certaverim. Qui tametsi Gothos, aliasque gentes, consilio armisque devicerim; invidia tamen, perditorumque hominum audacia, me oppugnari, sero tandem animadverti. Nam & Sophia Augusta Iustino suavit, ut Longinum patricium mihi successorem mitteret: fore enim melius, inquit imprudens mulier, ut me eunuchum ad dispartiendam inter ancillas pensa revocarent. His affectus contumeliis, non possum non toto animo commoveri; eoque magis, cum videam, servatam à me pulcherrimam provinciam libidini avaritiæque hostium meorum committi. Sed, cum diu animo volvissem, quâ potissimum ratione Italiam è faucibus sceleratorum hominum eriperem: tu mihi inprimis dignus visus es, cui hanc nobilissimam provinciam quasi de manu traderem. Quare te etiam atque etiam hortor, ut, quam maximis poteris copiis, quamprimum Italiam petas: nam tibi polliceor, in meque recipio, fore, ut nullo labore, nullis impensis, amplissimo hoc Imperio potiaris. Quod si huiusce cœli clementiam, agrorum fertilitatem, collium amœnitatem, urbium magnificas ædes, divitias, opes, aliquando cognosces; huic nullam provinciam comparandam duces. Ego, ut primum co-

pias adventare sensero, Neapoli movens, clientum necessariorumque præsidio tibi accurram; efficiamque, ut latissimas vias ad hoc regnum adipiscendum ingrediaris. Vale. Neapoli.

*Præfectus Urbis Romæ, Mauritio
Imperatori.*

CUM Romana urbs parente ac pontifice orbata esset, communi omnium consensu Gregorius Gordiani senatoris filius Pontifex factus est. Qui licet, monachus, genus vitæ ab omnibus curis amotum sibi jampridem delegisset; mores optimi viri, doctrina, virtus denique singularis ac prope divina, effecerunt, ut nolentem invitumque sacerdotes populusque Romanæ Ecclesiæ illum præficerent. Nos vero memores, qua benevolentia ac familiaritate idem Pontifex tibi conjunctus esset, majori alacritate eum abs te comprobari postulamus. Hoc profecto utrique nostrum gratum fore confidimus. Sed, judicium nostrum de Gregorio abs te laudari, tam erit nobis jucundum, quam quod jucundissimum. Vale. Romæ.

Isabel-

*Isabella, Vicecomes, Ferdinando, Avo,
ac Alfonso, patri, Regibus.*

SCio, vos, qui & claritudinis Aragoniæ domus & regiæ dignitatis memores semper fuistis, nunquam me prolem vestram atque in sinu vestro educatam Ioanni Galeacio fuisse desponsuros, si, quem paterno atque avito Imperio, quum per ætatem licuisset, successurum arbitrabamini, eum, exacta adolescentia, liberisque susceptis, ambitiosissimo atque sævissimo patruo servitutum putassetis. Ludovicus enim, non jam patruus, sed immitis & atrox hostis, nunc primum aperte, quod multis ante annis longa gubernandi consuetudine allectus percipide semper affectavit, Mediolanensis Imperii sceptrum solus obtinet, & cuncta cum uxore ad arbitrium moderatur. Ipse Principum legatos audit, belli pacisque fert leges; & denique necis ac vitæ, vectigalium, atq; ærarii supremam habet potestatem: nos miseri, ab eo circumscripti, & destituti ab omnibus, cum solis rerum inanum titulis decoremur, in obscuro luctuosam ac miserabilem vitam agimus; sollicitique etiam de salute, quæ Imperio ac honoribus amissis reliqua est, nisi mature opem feratis, durio-

rem indies afflictis rebus exitum opprimur. Eripite, obsecro, natam, generumque vestrum, ærumnis his : &, si vos divina atque humana jura permovent, si qua justiciæ & pietatis, si qua denique in illis vestris regiis animis pristini decoris cura residet, libertati atque Imperio restituite. Non desunt nobis studia optimorum civium. in Ioanne Galeacio animus viget curarum atque Imperii capax. veteres amici, qui nunc Tyranni sævitiam reformidant, promptum ac fidelem ex occasione operam nobis tacite pollicentur. atque omnes peregregia erga nos voluntate civitates existunt; quibus ille inusitata & prægravi acerbitate pecuniam imperavit. Postremo Dii ipsi immortales, scelerum vindices, nobis non deerunt, si vos, qui alienissimis etiam misera atque indigna servitute oppressis præsidio esse æquum & regium semper existimastis, sanguini vestro, & justissimæ causæ, minime defueritis. Valete. Ticini.

*Pelagius, Romanus Pontifex,
Iustiniano, Imperatori.*

TAnta est clades urbium Italiæ, tam magna incendia, ut jam nullus sit locus impetu & iræ Totilæ regis immunis.

nis. Is Tyberi transmissio Beneventum petiit, eamque urbem mœnibus spoliavit; Neapolim & Cumas obsedit; Apuliam, Lucaniam, atque Calabriam recepit. Duces tui urbes sibi creditas inter se partiti sunt: Ioannes Romam, Bessas Spoletum, Cyprianus Perusiam, Justinus Fesulas, Constantinianus Ravennam accipere. Quorum libido & auri amor usque adeo crevit, ut ipsi præsidēs tui, ex-pilando provincias, Gothorum favitiam æquare videantur. Nos Romanæ urbis excidio eo magis timemus, quod obses-sam Neapolim esse in maximo periculo intelligimus. Hæc cum ita sint, ut saluti-reliquorum paucorum prospiciatur, peto abs te: ut, quam citissime ac maxime poteris, novas legiones, Ducesque fide ac virtute præstantes, in Italiam mittas. Nam, si diutius præsidia expectentur, acriusque oppida premantur, vereor, ne conatus omnes vani irritique censeantur. Iis vero perditissimis temporibus tota spes nostra in Deo Optimo Maximo, virtuteque tua, sita est: qui si quicquam de tua diligentia curaque remittas, de Imperio Romano, deque Italico nomine, actū iri videmus. Vale. Patavii.

Diogenes, Legatus, Iustiniano, Imperat.

POsteaquam Bellisarius Italia excessit, Imperium multa & maxima detrimenta accepit. Nam & Perusia, quamprimum Gothorum armis cessit, Calabria atque Apulia amissa est: urbs Portuensis in hostium manus devenit. Denique ad hæc accessit obsidio Romanæ urbis: quam tametsi ter mille veteranis militibus egregie tueamur, tamen angustia rerum omnium & cives & milites misere afficiantur: facileque fieri potest, ut, annonæ caritate, & reliquarum rerum penuria, & longæ obsidionis tædio, vel civium vel militum animi ad deditionem flectantur. Erit ergo prudentiæ invictique animi tui, afflictæ urbi, Italiæque laboranti, opem ferre. Si enim hæc ita magna fundamenta denuo à Gothis jacta subsistant, tale ædificium construi ab iis videre videor, ut omnia Gothorum imperio cessura facile credam. Hæc quanti facienda sint, tu videris. Ego vero, quod ad meas partes pertinet, dabo operam, ut iis rerum difficultatibus diligentiam fidemq; nostram inprimis probare homines Diique possint. Vale. Romæ.

Mauri-

*Mauritius, Imperator, Gregorio,
Romano Pontifici.*

GRatissimæ fuerunt nobis literæ, quibus nunciatum est, te in Romanum Pontificem delectum fuisse. Sed totum id gaudium perturbabat rumor quidam obortus, te ab hoc sacro munere rei magnitudine maxime abhorrere. Quid est, quæso, in tanta rerum perturbatione, quod egregius, præstantius, aut magis pium fieri possit? Meminisse debes, non tibi ipsi te, sed utilitati hominum, ac divino honori, plurimum debere; quem semper tute rebus omnibus, spretis opibus, posthabitis voluptatibus, atque omni ambitione, prætulisti. Quod si oneris magnitudinem reformidas, tota spes tibi in Dei Optimi Maximi præsidio collocanda est. Me (qui meus in te amor) nunquam tibi nisi salutare consilium dare, tute optime nosti; magistratus item, imperia, sacerdotiaque, à Diis immortalibus dari, tantique esse, ut unius optimi principis pietate, innocentia, ac virtute, universæ provinciæ incolumes firmæque consistant. Reliquum ergo est, ut huic divinæ vocationi aquiescas, rei que pub. Christianæ curam geras, & tibi de nobis,

bis, de toto Imperio, rebus, fortunisque nostris, omnia pollicearis. Vale Constantinopoli.

*Gregorius, Pontifex Romanus,
Mauritio, Imperatori.*

PRæfectus Romanæ urbis, cæterique cujuscunque ordinis viri, mihi sunt locupletissimi testes, quantum ab onere gerendæ Romanæ Ecclesiæ abhorrerem: sed & literæ tuæ humanissimæ, precesque quotidianæ, me à proposito consilio deterruerunt, tantoque oneri succedere voluerunt. Verum, cum multa animum mihi angant, excrucientque, id perquam molestum est, te paullo antequandam legem Ecclesiæ libertati adversam ac perniciosam tulisse. Quippe qui, homines Romanæ militiæ adscriptos, nisi finita militia, aut mancos, aut debiles, Deo militare prohibueris. Idem qui Ioannis episcopi tui dementiam & fovisti, & universalem patriarcham appellari censuisti. In tantis rerum difficultatibus, nisi præsto mihi sit Deus Opt. Maximus, succumbam necesse est. Nam & legem illam divinis rebus inprimis perniciosam prorsus tollendam censeo, & Ioannem audaciæ suæ puniendum arbitror.

bitror. Quod vero ad mutuam pacem pertinet, ego ita illam probavi, ut nihil illa potius aut antiquius judicaverim. Sed erit prudentiæ, amplitudinisque tuæ, eum ab errore revocare, legesque impias abrogare. Quod si effeceris, tibi velim persuadeas, dignitatem, Imperium, resque tuas omnes, Deo Optimo Maximo curæ futuras. Vale.

Eschines senatui Populoque Atheniensi.

EGO ad remp. accessi xxxiii ætatis anno, non, per Jovem, ex scena, ut aiebat Demosthenes, sed & libere scribere edoctus, & studiis bonarum artium mediocriter eruditus, atque ita in dicendo versatus, ut me Athenis loqui deceret. Neque hanc dicendi facultatem ad alicujus calumniæ meditatus fui; aut, ut alicui ex civibus negotium facere prehenderer pecunia corruptus, seu contumelia laceffitus, prorsusve contumeliose tractatus. Neque causam præstiti, ut contemptui haberer. Nec civium quemquam in judicium traxi, præter unum Timarchum. Minusque id prædico in conspectu vestro, quod, cum grandem admodum pecuniarum summam capere potuissem, eas accipere noluerim; sed, quo-

quoad per leges licuit, pœnas sumpserim. Præterea Ctesiphontem rursus, cum multa ab eo, multa ab Demosthene passus essem, illicitæ rogationis detuli, æquissima alioquin, per deos, accusatione. Sed ne admirandum quidem est, si superior, quam leges vestræ & orationes meæ, fuerit eloquentia Demosthenis: quod visum est forte ex iis de quibus ante à Demosthene delatus fui; longe quippe iis maioribus propter quæ in præsentia succubui. Illud non parvum apud vos argumentum bene per me administratæ reipublicæ, quod, Demosthene accusante, condemnatus non fuerim. Post hanc vero calamitatem id vel summæ apparuit gratiæ universis, nedum vobis, quinam, ut reor, ipse fuerim. Quis enim non novit, quod homines defuncti, sicut & exules ab eorum patria, eo vel maxime tempore, mortis scilicet, & exilii, quibus fuerint moribus, apparent; &, quæ ipsi prius celaverant, illis è medio sublatis, palam conspiciuntur. Multo enim magis ab eorum inimicis vellicantur, dum illis resistere nequeunt. Qui vero ob huiusmodi causam exulant, quod hostibus semper adhæserint, manifestos prorsus faciunt suos mores, & quas aperte sententias in republica administranda secuti fue-

fuerint. Nam, & qua de re calamitatem acceperim, & quo sim animo erga patriam, non dissimulanter disquiritur. Nunquid quod Philippo patriam meam tradiderim, & ita legationem fuerim e-mentitus adversus rempublicam, ut Macedonibus obsequerer? Posteaquam à vobis è vestigio exul recessi, ad Alexandrum me contuli, eorum, quæ illi præstiteram, gratiam reportaturus, & consultationis præmium ab eo accepturus. Neque enim fieri potest, ut non videam Demadem in Bœotia diversoria habentem, & xx jugera terræ arantem, aureasque phialas tenentem: Hegemonem vero & Callimedontem, hunc quidem in Pallala, illum vero in Berrhœa, & muneribus pariter condonatos, & honestissimis nuptiis condēcoratos. Attamen neque ad Thebanos, neque in Thessaliam à vobis profectus fui, neque ad alium quemquā, apud quos me oporteret patriam maledictis violare, aut eam ab aliis violari audire. Verum Rhodum appuli; ad hominum sane urbem, neque vobis, per Jovem, infensorum, neque qui alioquin odio habeant qui neque prope patriam suam remanent; his potius mihi similes esse videntur, qui pœnam illudunt, quam quod Civitatem revereantur. Quapropter

pter mihi necesse fuit vel quam longissime ab ea proficisci, ne quid ejusmodi cogitationis ob oculos versaretur quod mentem meam turbare posset. Atque ne hic quidem, Rhodi scilicet, mansisse viderer; parvum quoddam oppidum, Amnum Stereæ, delegi. Ubi cum jugera duobus talentis emissem, (tot quippe, quot eum, qui, pecunia corruptus, ad Philip-pum primum, deinde posteriori loco ad Alexandrum, defecerat, decebat, quique Phocenses, ac Græciæ libertatem, Macedonibus tradiderit:) hic vitam dego; cum famulis VI I; & duobus, vel uno, domesticis; ac matre, quæ, jam tertium ac septuagesimum annum cum attingat, mecum navigavit, ut æumnæ mihi à vobis inflictæ particeps esset; una quoque cum uxore, quæ mecum profecta fuit, quamvis pater eam prohibuisset, ac leges forte cogerent manere, dum mores potius quam civitatis leges edocta esset; tribus insuper cum filiis, qui suam nondum miseriam sentiunt, nec quam eis, cum geniti sunt, patriam Deus dederit, Athenarum quippe civitatem, quæve rursus, ubi nati fuere, ab urbe ejecti sunt; in quam alii (ut videre licet) eorum liberos, sive in Bœotia, aut in Actolia, genitos, ad vos mittunt, ut ibi erudiantur; quibus
vero

vero datum est, ut natura ista sint com-
 parati, ut non è novo patre nati existant,
 turpive de causa damnati exulant, adhuc
 infantes, hi tenuiter aluntur in solitu-
 dine, exilioque paterno. Demosthenes
 enim vobis literas scripsit de filiis Lycin-
 gi, vosque humaniter est deprecatus, il-
 lud petendo, ut paternam culpam illis
 condonaretis. Vos nihil aliud, quam
 quod moris est Atheniensium, agendo,
 eorum miserti estis, ipsisque rem gratam
 fecistis. Etenim facile irasci consuevistis,
 rursusque mitigari. Ego pro filiis meis
 non adducar ut vos rogem, ne mihi soli
 in orbitate alantur, sed ne orbi simul &
 exules sint; cum neque cuiquam inju-
 riam intulerint, vel aliqua alia de re
 damnati fuerint; quæ tamen damnati
 luunt, omnia fuerint perpeffi. Deinde
 me tandem ad memoriam vestram revo-
 cetis, & iis precibus meis obtemperare
 velitis, mutata rursus voluntate vestra.
 Verum enim, Athenienses, agite, & am-
 plectimini quod apud vos ipsos in more
 est positum, & in modestia vestra perse-
 verate. Neque enim à moribus vestris
 recedatis, civitatisve existimatione con-
 temnetis: quæ probe & humaniter a-
 gendo multo magis floruit, quam reli-
 quæ aliæ civitates. Neque Melanopus
 plus

plus potuit, vos prohibendo, ne probitate aut urbanitate vestra utamini; quã adhortando. Ut nec Æschines. (neque enim ad rem illam, per Deos, idoneus est.) Sed nec ego aptus sum, ut patriæ meæ hoc persuadeam; præsertim cum id in gratiam meam agere viderer. Sed civitatis consuetudo, antiquum nomen vestrum, ac mos majorum vestrorum; cui æquius sane est quam Melanopo, qui adversus vos deprecatur, ut animum adhibeatis.

*Mauritius, Imperator, Gregorio,
Romano Pontifici.*

SEro tandem animadverti, me à recta vivendi ratione ad deteriora prolapsam. nam & tam multa portenta Deum Opt. Maximum mihi insensum significant, ut dies & noctes perniciem clademque mihi instare plane videam. Sed quando unus is tantum pœnitentiæ locus superest, oro te, reliquosque viros Deo addictos & charos, ut irata mihi numina precibus vestris mitiora efficiatis, meque ad sinum matris Ecclesiæ redeuntem excipiat. Confido enim, fore, si me amice & more majorum complecti velitis, mecum præclarius actum iri, ac futurum, ut,
quæ

quæ incommoda Romana urbs, ipsaque Ecclesia, per nos passa est, multis maximis officiis aucta, instaurari, excitari, cumularique possit. Vale. Constantino-
poli.

*Heracius, Imperator, Constantino,
Filio, Imperatori.*

QUamprimum mihi nunciatum est, Persas una cum Cosroa Rege Azoti se continere, eo cum legionibus contendendi: qui, copiarum nostrarum adventum sentiens, in Persidem fugit, exustis primum segetibus, quæ tum flavescebant. Is Sarabacum, & Sarabassem, Duces impigros, reliquit, qui nostrorum impetum sustinerent. Quo cognito, magnis itineribus superato Tauro monte, Sarabacum, qui Saron amnem occuparat, fugavi. Saym deinde cum majoribus copiis obviam habui. Cum quo, prælio totam diem varia fortuna dimicavi, ac demum victor evasi. Ad hæc Razatenem cum omnibus Persarum viribus oppugnavi, viginti septem signa militaria abstuli, ducemque ipsum interemi. Hæc te certior feci; tum, ut scires, tibi cum imperio multam gloriam comparari; tum etiam, ut honestas pacis conditiones hosti negandas nunquam putes.

Hera-

*Heraclius, Imperator, Severino,
Pontifici Romano.*

Maxima molestia me affecerunt literæ tuæ, quibus Isacium exarchum nostrum accusabas, quod Lateranense templum expoliaverit, prædam Ravennam detulerit, mihiq;ue optimam spoliiorum partem etiam adiudicaverit. Ego sane, ut Imperatorem Christianum decebat, virum sacrilegum odi; Deosque obtestor, me nihil plane rerum sacrarum aut cepisse, aut capi voluisse; daturumque operam, ut Isacium sceleris sui pœniteat: quandoquidem nihil est, quod animum meum magis quam res sacra moveat. Vix credas, quam acerbus mihi nuncius fuerit Mahumetis nuper inuenta religio. Qua affecti Saraceni, qui mihi ex Arabia militabant, in Syriam secessere; Phœnicem, Syriam, Aegyptumque occupavere. Arabes enim omnes Mahumeti legem susceperunt, Persarumque regnum opulentissimum, cæso rege Orimasda, invaserunt; eoque periculi ventum est, ut tantis viribus nullus exercitus occurrere tuto possit. Quare abs te etiam atque etiam peto, ut rem Christianam multis piis precibus Deo commendes, meque tibi de-

vin-

ILLUSTR. VIROR. EPIST. 119
vinctissimum putes. Vale. Constantino-
poli.

*Iacobus Stuardus, Scotiae Rex, Hen-
rico, Angliae Regi.*

NULLIS literis enarrare possem, quam
multa in contumeliam Scotici no-
minis jam pridem egeris. eaque pro jure
affinitatis ac foederis forti animo semper
tuli; cum gravissima damna finitimis Sco-
tis, ut constitutum fuerat, minime resar-
civeris; cum in percussores Bartonis pira-
tae Scoti non animadverteris, & Spurium
Neronem, qui praefectum finium Scotiae
interfecerat, impune agere in Anglia pas-
sus fueris. Legatos nostros contra jus
gentium non admisisti, oratorem uxoris
invito retentum non dimisisti, complures
nobiles Scotos in Scotia captos vinctos-
que crudeliter etiam nunc in custodia
habes. Ea omnia, quanquam per se ma-
gna, & intolerabilia, dissimulare tamen
potui. Scias tamen, me non passurum
ulterius; Ludovicum, amicum regem,
cognitione & foedere mihi junctum,
abs te ad internecionem oppugnari; Ca-
roli Geldrii consanguinei agrum plus-
quam hostiliter ab Anglis devastari: prae-
terea, esse supremum animi mei judi-
cium,

cium, causſam ſocii regis jure fœderis defendere velle; neque interim me finem facturum populationibus atque incendiis, quamdiu Ludovicus abs te in Gallia vexabitur. Hæc autem cujuſmodi ſint, pro tua prudentia videbis. Vale.

Henricus, Angliæ Rex, Iacobo Stuardo, Scotiæ Regi.

Nihil eſt, quod mirari debeam, te pro vetere gentis inſtituto fidem nobis fallere. Novi enim jampridem animi tui inconstantiam, & conſiliorum levitatem; quibus eo dementiæ adductus es, ut alienam cauſſam proprio periculo tueri, & florentes res tuas cum perditis Gallorum rebus permiscere contendas. Quod ſi, violare juſſurandum, fidem prodere, & arctiſſimæ neceſſitudinis oblivifci, æquum & regium putares, neque eo dedecore permoveris; timere ſaltem Deos immortales deberes, qui turbatæ pacis & ruptorum federum vindices eſſe conſueverunt. Adduci etiam exemplo regis Navarræ poteras, quem, Diis ita jubentibus, ex patrio regno in eas miſerias præcipitatum, Ludovicus in Gallia ſine regno tranquille regnare permittit. Proinde deſine memorare atque obiicere,
quæ

quæ ad violandam pacem ipse confinxisti : ea enim jampridem, ut vetera & vana, literis & legationibus dilui. Cæterum impudentissime agere videris, quod nihil earum rerum, antequam mare trajicerem, commemorasti. Veruntamen scias, apud me, etiam absentem, non esse tantæ existimationis Scotorum Regem, ut ejus repentina atque insperata perfidia terreri possim. Agas modo ut lubet; ego vero nulla denunciatione periculi destitutus sum à felici incepto, neque injuriam animo depositurus. Tu interea, quæ deceant regem nobilem, inprimis cogita. Vale. Ad Teroanam in Castris.

Constantinus, Imperator, Benedicto

I I, Romano Pontifici.

CUM usu receptum fuisset, ut nullus Romanus Pontifex rite electus diceretur, nisi id nobis, vel exarcho nostro, ratum firmumque haberetur; nosque animadvertamus, id minus pie ac commode fieri consuevisse, nihilque exinde religioni sacrisque rebus emolumentum nasci : placuit nobis, deinceps, quem sacerdotes exercitusque Romanus in Pontificem delegerint, eundem statim verum Christi vicarium, nulla expectata nomi-

nis nostri authoritate, judicari. Tu vero, beatissime pater, quæ ad amplitudinem Christianæ reipub. pertinent, ita geras, ut everfis hominum moribus cura diligentiaque tua succurratur. Vale. Constantinopoli.

Cardinalis Araceli, Duci Venetiarum.

CUM me omnibus summis ac Principibus viris, quicunque mea hac in Cardinalium cooptatione mihi gratulati sunt, haud mediocriter obligatum esse intelligo, tum vobis singularia quædam atque eximia studia debere confiteor. Ita enim amanter ad me scripsistis, atq; eam animi lætitiâ ob meum summum honorem literis vestris declarastis, eamque mihi voluntatis significationem demonstrastis, ut mirarer, in tanta rerum copia ac potentia, tamque florenti fortuna vestra, tantam humanitatem esse conjunctam. Indicia vero, quæ de me ita præclare facitis, etsi illud mihi expectationis onus imponunt quod nullo modo possum sustinere; tamen ipsa quoque non mihi non jucundissima esse potuerunt. Quid enim tam amplum mihi aut honorificum esse possit, quam à sanctissimo & sapientissimo Senatu, cujus prudentia in
tantis

tantis Italiæ & Christiani orbis tenebris quasi clarissimum lumen aliquod eluceat, probari? Quare, cum Summi Pontificis erga me meritis divinum quendam prope cultum debeam: vos in studio ac observantia mea perpetuo proximos habeo; omnesque res, (si quæ ad me delatæ erunt) quas pertinere intelligam ad dignitatem atque amplitudinem præclaræ istius reipublicæ vestræ, in qua summus splendor ac tutela Italici nominis inprimis semper fuit constituta, omni mea cura, diligentia, opera, studio denique omni meo, ita complectar, ut vos tantam vestræ voluntatis propensionem non omnino male neque in ingratum hominem posuisse existimetis. id quod pluribus verbis clarissimo viro legato vestro demonstravi; qui literarum vestrarum humanitatem mirifice sua lenitate est prosequutus. Datum Romæ, VI Idus Aprilis, 1557.

Damianus, Episcopus Ticinensis, Archiepiscopi Mediolanensis nomine, Patribus ad VI Synodum Constantinopolitanam congregatis.

NUnquam mihi probati sunt quicunque unicam esse in Christo Deo vo-

luntatem asseruerunt. Nam ea est vera Dei & hominis fides , ut duæ credantur in eo voluntates, duæ operationes. Ego (inquit, quod ad divinitatem) & pater unum sumus. quantum vero ad humanitatem pertinet: Pater major me est. Præterea vero , quod ad humanitatem, cum in navi dormientem cernitis. si divinitatem inspiciatis, ventis , & mari, imperat. • Male igitur sentit quicumque ab hoc pio dogmate recedit. Hæc eo scripsi potius , ut apud vos testatum relinquerem quid sentirem, quam quod de sanctissimorum doctissimorumque Patrum sententia minus considerem. Sed hæc eadem melius coram egissem , si mihi per adversam valetudinem licuisset. Valete. Deus Optimus Maximus vobis adsit. Mediolani.

Ioannes V I , Romanus Pontifex, Gisulpho, Beneventano Duci.

Proximis fere diebus , Romani exercitus ac Exarchi dissidiis fretus, Campaniam invasisti, Shoram & Arpinum occupasti, villas incendiasti, rusticos & pecora abegisti. Quæ quamprimum intelleximus , tanta admiratione affecti sumus, ut etiam dubitaverimus , nunquid tantum cladis à Christiano Principe in Chri-

Christianos innocentissimos, vel potius in ipsam Romanam Ecclesiam, excogitari potuisset. His adducti sumus, ut ad te legatos cum literis mitteremus, deque omnibus certiolem faceremus; mandantes tibi, ut quamprimum, omisis Campaniæ & Hernicorum oppidis, in Samnium redires. Quod si secus feceris, iussaque nostra aspernatus fueris, scias, brevi futurum, ut Deo Optimo Maximo (cujus res agitur) pro illata tibi injuria pœnas des. Vale. Romæ.

*Beda, Sacerdos, Carolo Marcello, Gal-
liarum Regi, ac cæteris Regulis.*

DUm bellum geritur inter Christianos acerrimum, tota Europa primum eversa est. Saraceni, occupata Libya atque Africa, ex Septa solventes, omnes Hispanias, præter Astures & Cantabros, occupaverunt. Africa igitur, quæ à Bellisario egregio Duce recepta de hostibus, centum & septuaginta annis Romano Imperio paruit, ea demum à Saracenis cum Bætica Hispaniæ nunc capta, eorum moribus & legibus, cum maxima Christiani nominis ignominia, obtemperat. Quid magis egregium, quid præstantius fieri aut excogitari potuit, quam

adversus Dei hostes arma capessi? Quid meruere Suevi, quid Germani homines, quid reliqui Christiani nominis viri, quos tot cladibus affecistis? Adsunt prope, imminet cervicibus Saraceni, qui universo terrarum orbi jugum minitantur. Hic regna pulcherrima, opulentissimæ urbes, opima spolia, præmia victoriæ, vos morantur; sed inprimis incomparabilis gloria ac merces penes Christum salvatorem nostrum; qui ad hoc facinus piam multis occultis apertisque acclamationibus vos hortatur ac impellit. Valet.

Aribertus, Longobardorum Rex, Io-
anni VII, Romano Pontifici.

MUltis maximisq;rationibus tandem in eam sententiam deveni, quod nihil nobis majori studio enitendum sit, quam divino cultui vacare, animique nostri aliquando ex iis vinculis exituri aliquam rationem habere. Quare, cum mihi satis constitutum sit, ut obsequii etiam mei erga Romanam Ecclesiam pignus aliquod habeatis; ex hoc nostro latissimo decreto eidem Romanæ Ecclesiæ liberaliter Alpes Cottias, in quibus & Genua est, donamus; ita ut in bonis beati Petri ipsæ Alpes, à Taurinis montibus usque
ad

ad Ligusticum mare, censeantur. Quod eo libentius fecimus, quod de Romanorum Pontificum pietate, justitia innocentiaque, nobis maxima polliceri soleamus: hoc quod nostri animi decretum à quibuscunque nostri Regni successoribus ratum firmumque haberi inprimis volumus. Tu autem, Sanctissime pater, Deo Optimo Maximo piis precibus me pluribus commendes. Vale. Papiæ.

Anastasius, qui & Arthemius, Imperator Constantinopolitanus, Romano Pontifici.

CUM Philippicus male de Ecclesia sentiret, ac una cum Ioanne Monacho urbem Constantinopolim ad perniciosam doctrinam concitasset, ad hæc multis maximisque incommodis me affecisset: arreptis armis, deorum immortalium præsidio fretus, illum fregi, fugavi, ac imperio dejeci. Tamen, pacatis Imperii rebus, nihil antiquius duxi, quam te quamprimum de omnibus certiores facere, meæque erga Romanam Ecclesiam propensæ voluntatis aliquid literis testandum relinquere. Id itaque tibi velim persuadeas, nullum unquam majorum nostrorum sextæ Synodi defensorum

rem me acriorem extitisse, nullumque cui ritus ceremoniarumque omnes Romanæ Ecclesiæ probatæ magis fuerint. Adde etiam, quod me tibi devinctissimum multis maximis officiis profitear. Pro quibus omnia mea studia, curam, diligentiamque, pro tuendis Romanis rebus, dignitateque tua, polliceor, ac deovoco. Vale. meque ama.

*Carolus Martellus, Eudoni
Aquitaniæ Duci.*

Nullus est qui nesciat, quantis periculis rei Christianæ Saraceni Hispaniam invasissent, in Galliamque evocati essent. Quod cum nulla ratione ferendum censuissem, comparato exercitu, prope Turonem eorum copias profligavi. Tanta autem hostium cædes facta est, ut trecenta sexaginta millia hominum cæsa sint, ex nostris vero mille tantum desiderati fuerint. Quæ cum ita sint, erunt partes tuæ, rem Christianam, Gallicamque gloriam, quam maxime poteris, tueri, delereque illam labem, quam eorum adventu contraxisti. Ferunt enim, Saracenos nuper abs te in Galliam evocatos. Quod si paribus auspiciis gloriæ Gallici nominis studueris, exinde tantum
orna-

ornamenti ac dignitatis tibi comparabis, quantum dedecoris ex hac gravi suspicionem contraxisti. Illud te demum hortor ac moneo, ut, habita dignitatis tuæ ratione, malis me amicum quam hostem experiri. Vale.

*Gregorius I. I., Romanus Pontifex,
Leoni I. I. I., Imperatori.*

SAepe numero per legatos ac literas te monui ac hortatus sum, ut aliquando respisceres, atq; à comburendis imaginibus abstineres. Sed tantum abest, ut monitis nostris optemperaveris, ut etiam innumerabiles viros ac innocentissimos ultimo supplicio affeceris, quod Romanæ Ecclesiæ ritus & sacras Sanctorum imagines venerarentur. Quo autem animi mœrore hæc exceperimus, tibi nunquam satis pro dignitate enarrare possum; cum præ dolore ac ægritudine animi id minime conari queam. Illud tamen adhuc te monitum velim, ut, si nulla alia ratio ad ferendas Divorum imagines te movet; saltem id meminisse velis, illorum memoriâ ac pia recordatione homines ad virtutem imitationemque excitari. quæ in quibusdam minus eruditis hominum tantum virium habent,

ut plurimi ad bene beateque vivendum
iis exemplis adducti inflammatique fue-
rint. At ego non vereor, ne te aliquando
consilii tui pœniteat, si puram simpli-
cemque Christi sapientiam indueres, id-
que cogitares, quod sæpenumero usu-
venire solet, Quicumque consiliis do-
ctrinaque sua nituntur, eos in profundis-
sima errorum pronos præcipitesque agi.
Resipiscas tandem, Auguste. Hoc te to-
ta Italia rogat, hoc maxima rerum Ro-
ma, hoc denique totus terrarum orbis.
qui sub Imperatore minus recte sentien-
te salutis aleam jacet. Quid præterea di-
cam, prorsus nescio. Ipse Deus Optimus
Maximus, qui novit occulta cordium, te
tandem ad veram pietatem ab impio &
nefario dogmate avertat. Vale.

*Gregorius I I I, Romanus Pontifex,
Carolo, Gallie Regi.*

NULLIS rationibus adduci potuit Leo
Imperator, ut ab impietate ad sa-
nam doctrinam avocaretur, licet litera-
rum multarum officiis ac nunciis sæpe-
numero excitus fuerit. Ex quo factum
est, ut uno omnium consensu Imperio &
fidelium communione privaretur. Id au-
tem, quamprimum rescivit Luitprandus
Lon-

Longobardorum Rex, augendi regni cupiditate ductus, urbem Romanam obsidere cœpit; oppida, quæ urbi parebant, invasit: ac propediem Italicis Imperii sceptris potiturus, nisi quis obsistat, videtur. Nihil est, quod à Leone Romanæ Ecclesiæ hoste infensissimo, diuque ac graviter à Saracenis obsesso, auxilia expectemus. Superest igitur, ut copiarum tuarum virtute obsidionem nostram solvi speremus. Nam & rerum gestarum gloria maxime præstas, & de Christiana republica bene meritus es: tanta etiam cum Luitprando tibi necessitudo intercedit, ut nullo labore, unicoque nuncio, ab hac præclarissima Vrbe cladem omnem avertere possis. Quod ut facias, te etiam atque etiam rogamus: pollicemurque, tantum te gloriæ tibi adepturum, quantum Romana urbs, Ecclesiæque Sacrosancta, amplissima omnia antecessit: ad hæc & præmia nunquam interitura expectare debes. Vale.

Ismael Sophi, Venetis.

ARbitror, vos meminisse fœderis, quod jampridem per legatos vestros in Armenia cum Ussumcassane materno avo percussistis. Quod cum mihi etiam pluri-

plurimum probetur, ut paribus auspiciis bellum cum Othomanis geratur; peto à vobis pro amicitia nostra, ut artifices, qui ænea tormenta conflent, ab Italia nobis per Syriam mittatis, & classem in Græciam atque Asiam adversum Bajazetem decernatis: ego vero terrestribus copiis minorem Asiam primo quoque tempore invadam; daboque operam, ut classe, vestra oppida, quæ in ora Græciæ superiore bello amisistis, recipiatis. Volo autem, vos mihi charissimos esse, judicare; dignitatemque ac amplitudinem vestram tantæ mihi curæ esse, quantum à legatis meis facile intelligetis; quorum verbis & pollicitationibus plenam indubitatamque fidem, vos adhibere velim. Valete.

*Leonardus Lauredanus, Venetorum
Dux, Ismaeli Sophi, Persarum Regi.*

GRatissimæ nobis fuerunt literæ tuæ, hilarique vultu legatos tuos viros optimos excepimus. Tanti enim amicitiam tuam facimus, quanti jure optimo fieri debet. Neque veteris amicitiae ac fœderis, quæ nobis cum Persarum regibus extitit, obliti sumus; grataque semper apud nos futura est ejus rei memoria.

At

At summopere lætamur, te, novum Persarum Regem, Turcarum hostem esse; quodque tibi curæ sit, nobiscum belli causam communicare, atque ea polliceri, quæ si Vssuncassanes, Iacuppusque filius, præstitissent, nequaquam nobis cum Othomanis bellum gerendum foret. Cæterum illæ sunt rerum vices, ut, sicut Persarum Reges, domi ea tempestate ociosi, occupato in Europa Bajazete nihil sibi movendum existimaverunt: ita nos, in deteriore & periniqua temporum conditione, quod volumus ac maxime optamus, præstare non possumus; quod pacem quinquennio cum Bajazete factam minime violandam existimamus. Implicamur autem gravissimo bello, quod feroces Europæ gentes, conjuratione facta, & maximi Reges, nullis lacessiti injuriis, sed sola concitati Venetæ felicitatis invidia, nuper intulerunt. Speramus tamen, staturos à justiori causa Deos immortales, & rempublicam, quam ulla vis per septingentos amplius annos non fregit, ab immanitate tot hostium servaturos. Proinde tibi velim persuadeas, nos, quum per occasionem licebit, operam daturos, ut intelligas, nihil nobis Persarum amicicia antiquius esse, aut speciosius quicquam futurum.

turum, quam ut Turcas, Christiani nominis hostes, quibus ipse infensus semper fuisti, mutuis consiliis, aut paribus animis, oppugnare possimus. Sed hæc omnia & plura coram per legatos tuos intelliges. Vale. Venetiis.

Zacharias, Romanus Pontifex, Proceribus Francorum.

PETIISTIS à nobis, quid potissimum decernendum foret; cum Childericus Rex vester minus aptus ad tanti Regni onera videatur; Pipinus autem, tum rei militaris scientia, magnitudineque animi, tum etiam omni rerum usu excellat, unusque gerendo orbi par esse possit. In hac ancipiti cura, etsi Theodorico vita functo Childericum germanum illius successorem regni datum intelligam; verumtamen magnitudo rei, curaque gerendi opulentissimi Imperii, belli pacisque munera amplissima obire, in eam me sententiam vocant, ut plane eum, qui melius regia munera impleat, regno præficiendum ac in regem ungendum putem. Verum si Childericus ad divina religionis studia, pacatæque vitæ mores prior videatur; illum quamprimum Sacris initiandum, militiæque nostræ adscribendum censeo. Vale.

Ba.

*Baiazetes, Turcarum Imperator,
Selymo, filio.*

MIror, te in Europam ante sedatum Techellis & Persarum bellum transisse: quodque privato consilio adversus pugnacissimam Hungarorum gentē difficile bellum inieris. Meminisse autem debebas, quanto cum periculo nos superioribus temporibus ea bella gesserimus. Mahometisque avi exemplo commoveri debebas, qui infeliciter Pannoniorum arma sæpe expertus est. Proinde commodiorem rerum occasionem operiri optimum fuerit; ut maturiore, ideoque tutiore consilio, & majoribus viribus, id bellum conficere, & certa cum spe victoriæ gerere possis. Pecuniam, tela, commeatus, vestesque, tibi afferri mandavimus, ut quibuscunque rerum eventibus omnia usui necessaria tibi exercituique præsto essent. Multa coram per legatos nostros intelliges.

*Selymus Othomanus, Baiazeti,
Patri, S. D.*

Nihil est, quod tantopere mireris, me ex Asia propere decessisse; cum Achoma-

chomatis injuriis excitato, contumeliisque affecto, in Europam transeundum mihi fuerit. Quærenda mihi erat amplior præfectura, pro angusta, sterili, spectanteque ad Hiberos & Colchos inter saxa montium. Quod autem Hungaros tanquam insuperabiles bello minime laceffendos dicis, velim putes, me non esse ejus animi, ut ullis periculis aut difficultatibus deterrear; quando illa antiqua jam mutata sunt, mutatis regibus, & non labante modo, sed fere everfa gentis veteri disciplina. Vladistaus, dispar ingenio virtuteque, Matthiæ fortissimo successit. Nec mortem, aut belli communes casus, ab ineunte ætate timere didici: forti enim animo, & honesta quidem petenti, audentique, neque Deos, neque homines, defuturos credam. Decrevi, pro tuenda dignitate mea, quam tu nimia fratrum potentia confregisti, aut in acie non indecoram mortem oppetere, aut propagare Imperii fines; ne omnino, postremo loco natus in Othomanica domo, postremus quoque virtute & gloria videar. Quod autem ad munera amplissima pertinet, ago tibi grâtiâs quam majores possum. Vale.

Grego-

*Gregorius III, Romanus Pontifex,
Constantino V, Copronymo,
Imperatori.*

M Aximo studio curaque operam dedi, ut pacata omnia Italiae loca tenerer. quod ut mihi ex sententia eveniret, Aistulphum Longobardorum regem largitionibus, & quacunque ratione potui, ad pacem quadraginta annorum excitavi. Sed & hac inita, & mox violata, rex impius divina humanaque omnia permiscuit. nam & singulis Pop. Romani, cæterisque hominum, singulos aureos nummos, in capita collatos, sibi tributum pendere decrevit; universa hostiliter invasit; Ravennam, & alias urbes, quæ intactæ fuerant, vi cepit; tantosque spiritus gerit, ut animi magnitudine Imperium totius Italiae concipiat. Qui nisi, virtute tua, copiarumque tuarum robore, cohibeatur ac frangatur, nihil est cur omnia gravissima à victore hoste non timeamus. Quare abs te peto majorem in modum, ut Imperii gloriam, Ecclesiæ dignitatem, quam maxime tueri velis. Hoc Deo, hoc hominibus gratius facere nihil potes.

*Selymus Othomanus, Baiazeti, Patri,
Imperatori.*

CUM ad remotissima loca procul ab-
sim, pietateque summa complexum
tuum maxime exoptem; antequam Tra-
pezuntem petam, te invisere mihi gratif-
simum fuerit; eoque magis, quod exacta
& præcipiti ætate facile futurum sit, ut
nunquam forte te videam. Pertinet etiam
ad quietem Asiæ, mutuamque fratrum
concordiam, si apud te patrem, commu-
nem arbitrum & disceptatorem, propo-
nantur controversiæ, quæ mihi cum A-
chomate intercedunt, nec tuto servorum
fidei committi possunt. Tu pro tua pru-
dentia diem locumque colloquio statues:
nec grave duxeris, me saltem tibi manus
exosculari; quod tenuibus & vilioribus
amicis, ne dum liberis, majores tribuere
consueverunt. Hoc ut mihi condones, te
etiam atque etiam rogo. Vale. In Castris
ad Andronopolim.

*Baiazetes, Turcarum Imperator,
Selymo, filio.*

NON possum non magnopere auda-
ciam tuam reprehendere, quod alic-
nam

nam provinciam, introductis copiis, occupaveris, quod armatus colloquium postulaveris, denique quod humanitate nostra ac patientia tam insolenter abusus fueris. Non est quicquam pacis concordiae expectandum ab eo, qui externo equitatu circumdatus injussu patris bellum moliatur, & fidelissimas Othomani-
co nomini gentes effuse populetur. Proinde scias, te recte facturum, si Thracia Europaque excesseris, &, dimisso exercitu, in Pontum provinciam tuam revertaris. Id si feceris, ex aliquo tibi usu esse poterit. Sin in incepto perstiteris, velim tibi persuadeas, te non mihi filium, sed hostem futurum; nec defuturos, qui tantam audaciam, summæ proximam perfidiæ, statim ulciscantur.

*Gregorius III, Romanus Pontifex,
Pipino, Francorum Regi.*

SÆpe per literas nunciosque petii ab Imperatore Constantino, ut Romanam urbem, atque adeo Italos omnes, è manibus Aistulphi Regis vendicaret. Qui cum Romanis omnibus necem, cruciatus, excidiumque interminari soleat, propediem futurum est, ut de omnium salute desperemus. Desunt nobis legiones
domi.

domi, consilium, pecuniæ: hoc tantum nobis superest, ut abs te Christiano invictoque Rege præsidia expectemus; cuius pietas, magnitudo animi, militarisque disciplina, ea est, ut facile nobis pacem, tibi victoriam, gloriam, omniaque Imperia, aliquando pariant. Ergo primo quoque tempore laboranti Vrbi, Italiæque, accurras, & precibus & lachrymis abs te petimus. Vale.

*Pipinus, Francorum Rex, Gregorio III,
Rom. Pontifici.*

CUM salus tua, Romanæque urbis, agatur, quæ non sine scelere Imperatoris negligi videtur; optimum apprimèque necessarium visum est, ut, dum militum delectus habetur, eaque parantur, quæ ad conficiendum bellum opportuna sunt, injuriæ hostium te subtrahas, ad nosque in Galliam quamprimum contendas. Habes delectos viros quibuscum tuto ad nos accedas. Totam rem maturius coram agemus. Hoc nobis facere gratius nihil potes; cognoscesque, nullum te mihi chariorem. Vale.

Vrba.

*Urbanus II, Rom. Pontifex, Alexio,
Constantinopolitano Imperatori.*

Cum statutum fuisset ad Clarum montem Alverniæ, ut communibus auspiciis bellum adversus Saracenos gereretur; tanta hominum multitudo cruce signata est, ut ad trecenta hominum milia censita fuerint. Ducum autem fortissimorum tantus ardor, ut de recuperanda Hierosolyma multum sperare debeamus. Primus omnium Petrus Eremita innumerabilibus se Ducem præbuit: cui Gotofredus, Eustachius, & Balduinus, fratres, Bulionii Comites, se addiderunt; majores etiam copias paraturi. Hinc Podienfis Episcopus belli Dux, & Raimundus Sancti Ægidii Comes, inde Vgo Magnus, Philippi Francorum Regis frater, & Robertus Nortmaniæ, ac alter Robertus Flandriæ, & Stephanus Cornelii, Comites. Quid dicam de Boëmundo ipso, qui ingenti animi magnitudine iis se comitem adiunxit cum VII millibus delectæ juventutis Italicæ, relicta fratri rerum omnium cura, quicum diu bello contenderat? Ad hos belli maximos apparatus unum illud est inprimis necessarium, ut tuo præsidio commeatuq; tantæ
copiæ

copiæ juventur. Quare abs te peto majorem in modum, ut, quibuscunque rebus poteris, iustissimo bello gloriosoque faveas. Illud autem tamen non dubitem abs te curatum iri, volui tamen, te per literas nostras scire, id mihi & universæ Christianæ reipublicæ jucundissimum fore. Vale. Romæ.

Boëmundus, Rogerio Nortmano, fratri.

POSTEAquam Nicæam urbem per deditionem accepimus, copiæ, commeatus inopiæ, in duo divisæ sunt. Erat inde nobis iter per inculta & deserta loca. Demum, cum ad flumen quoddam devenissemus, opportunitate loci aquari & instaurari exercitus cœpit. Vix datum fuerat momentum temporis quieti, cum Saraceni una cum Solymano principe innumerabilibus copiis castra invadunt. Pugnatum est aliquantisper nostro aliquo incommodo, cum Gotofredus, & Vgô, Bulionii fratres, quadraginta milibus equitum opem tulerunt. Magna cædes edita est hostium: videre erant strues & montes Saracenorum; qui maxima ex parte deleti sunt. Fuere in castris hostium Medi, Syri, Chaldæi, Turcæ, Saraceni, Arabes; quorum spiritus compressi sunt.

sunt. Nos hac satis insigni victoria futurum speramus, ut Christianorum armis omnia cedant. Tancredus filius plurimam tibi salutem dicit. In castris.

*Fabricius Carrectus, Rhodi Magister,
Leoni X, Pontifici maximo.*

SCripteram jampridem B. vestrae de Apparatu Turcarum adversus Persas. Proximis autem diebus per certissimos nuncios nobis nunciatum est, Ismaelem Sophi Persarum, & Selymum Turcarum, Reges, in Calderanis Armeniae campis ad Araxem fluvium praelio decertasse. Turcarum copiae ad centum quinquaginta millia hominum in acie erant; Persarum ad triginta tantum millia equitum, quos inter decem millia cataphracti inerant, spectatae virtutis milites. Tanta contentione utrinque animorum pugnatum est, ut post hominum memoriam maiore decertatum nunquam fuerit. Quo praelio Selymus supra triginta hominum millia, in quibus, praeter Cassembassam Graeciae Bellerbechum, septem Sanzachos, innumerabilesque Duces, amisit. De Persarum caede nihil est quod vere dicere possimus, praeter illud, Ismaelem primum praelio excessisse, urbemque nobilissimam Tauri-

Taurisium deditionem fecisse. At Persæ, aucto instauratoque exercitu, accitis Iberorum, Albanorum, ac Parthorum copiis, maxima celeritate Turcas iis locis decedentes insecuti sunt, extremumque agmen ad Euphratem tormenta que aliquot intercepere. Prælium gestum est anno 1514, septimo Calendas Septembris. Multa mihi de utroque Imperatore nunciantur. Inprimis autem de Ismaelis probitate tam multa, ut de ipso tanquam de optimo rege loqui honorifice possimus. Is ex prima nobilitatis classe liberisque hominibus militiæ robora conscribit: apud quos temperatæ justitiæ, humanæ comitatis, & popularis indulgentiæ studium maxime valet. In eodem Rege mira pietas usque adeo refulget, ut, si qui sint regii fastus, ejus fulgore perstringantur. Ad maximarum virtutum cumulum, pulcherrimo naturæ munere, decora facies accedit, magnanimo digna Rege: ore namque roseo, radiantibus oculis, flava barba, &, quod antiquum apud Persas regiæ stirpis insigne est, adunco naso, illustrique facundia, omnium oculos atque animos capit. In Selymo omne virtutis ornamentum inhumana crudelitas elidit & obscurat; qui & pœna & præmio vim Imperii tuetur, sed
& ali-

& aliquanto graviore severitatis quam
 beneficentiæ fama. In hoc rege triste su-
 percilium, prægrandes torvique oculi, &
 Scythico pallore suffusa facies, rigentes-
 que setæ à superiore labro ad cervicem
 retortæ, & nigrescens ad mentum sub-
 tonsa barba; ita ut naturam militarem
 & inexorabilis animi vim exprimant.
 Ismael, aditu pariter & alloquio facilis,
 in magna procerum frequentia epulatur:
 in stadio & palæstra cum nobilioribus
 honesta atque utili contentione corpus
 exercet: multasque ex Regulorum suo-
 rum virginibus uxores ducit: quas, si
 fœcundæ sint, neque fastidit, neque re-
 pudiat, vetere Persarum instituto: qui
 conjuges amare, impensius colere, in re-
 gia familiaris habere, & ad longinqua
 bella secum trahere consueverunt. Alia
 ratione Selymus in arcano cuncta vitæ
 munera obit. Puerorumque imberbium
 & Eunuchorum ministerio contentus, si-
 ne conviva discumbit; ac uno fere sim-
 plicissimo cibo naturæ desiderium implet:
 uxores à regię limine procul arcet; quas
 tantum prolis causa, nec familiari qui-
 dem vultu complectitur; quod, natura
 modicæ libidinis etiam in mares pro-
 nior, corpus atque animum virilem fœ-
 minarum illecebris enervari existimet.

Hæc, quæ mihi ex Syria nunciata sunt, Sanctitati tuæ conscribenda duxi. Si quid autem de Selymi adventu ex Amasia, deque armis illius, tentandum fuerit, faciam te quam diligentissime certiores. Vale. Rhodi.

*Ismael Sophi, Persarum Rex, Selymo,
Turcarum Regi.*

CUM nulli dubium esse possit, Armeniam mihi jure optimo deberi, nullisque temporibus ea provincia Othomanis Regibus cesserit; miror sane, cur hoc regnum invaseris. Quod si forte antiquæ virtutis æmulus, imitatus Alexandrum Macedonem, tantum soli terrarumque jure tuum futurum existimas, quantum tibi promotis armis victoria fortunaque pepererit; pares te, in crastinum diem, tuas atque alienas vires periclitari.

*Selymus, Turcarum Imperator, Ismaeli
Persarum Regi.*

QUID est, quod te belli hujus causam mirari dicas? cum adhuc extet recentissima memoria, uti Mahometes, Cassemus patruus, Bajazetes pater, ego que,

que, dum fratris Achomatis armis oppugnor, à Persis summa detrimenta & insignes contumelias acceperimus. ea tamen & si magna & gravissima sint, dignas belli causas nunquam judico. Unum tantum abs te peto; Amurathem, fratris filium, hostem meum, & Cappadociæ prædatorem, si ex æquo amiceque mihi tradideris, ut mutua inter nos proteuendis firmandisque Imperiis jura postulant, polliceor tibi, in meque recipio, fore, ut copias hinc abducam; in meaue regna revertar. Si vero facere neglexeris, ferro igneq; Armeniam Perfidemque me vastaturum scias. Quod autem ad pugnam pertinet, nihil est quod copiis nostris accidere gratius possit, quam virium utriusque periculum quamprimum fieri.

Boëmundus, Rogerio Nortmano, fratri.

Quæ à militibus nostris præclare ad
Murasim gesta sint, intellexisti. Ve-
rum tamen, ubi locorum nunc sumus,
quæque à nobis gerantur, te certio-
rem facere, optimum duximus. Proximis
diebus ad urbem Antiochiam castra po-
suimus, obsidionemque cœpimus. Ea
urbs omnium opulentissima à Cassiano

Rege detinetur, egregieque à civibus defenditur. Duplici muro circumdatur, interiori lateritio, exteriori quadrati lapidis. Quadringentæ & sexaginta turres insunt: colles quatuor includuntur; in quorum celsioris cacumine, ad Orientem vergentis, arx natura loci adeo munita est, ut omnis conatus & omnia oppugnantium ingenia facile frustrentur. Fluminibus fontibusque irrigua, & agro fertili, vicinoque lacu, dives. Recedit à mari Cilico passuum xii millibus. Farfar fluvius portum efficit satis amplum. Ad Septentrionem mons est excelsus, qui Græca significatione, à fontium amœnitate, Eto dicitur. Ad orientalem plagam campestris latissima regio, quam Farfar prope mœnia irrigat. Hæc urbs millè annis sub Christiano Imperio jampridem flourerat. Centum quinquaginta tres Episcopi sub Antiocheno patriarcha fuerunt; in ipsa autem urbe trecentæ sexaginta sex Ecclesiæ. Ex quibus, quanta qualisque urbs sit, quantæque accessiones Christiano nomini hujus oppugnatione fient, facile pro tua prudentia judicabis: tametsi munitissima videtur tanta militum nostrorum virtus, pertinaciaque tanta est, ut propediem de victoria certissimum nuncium expectare te velim. Tancredus
filius

filius bene valet. Vale. In castris ad Antiochiā, 1197. Primo Novembris, quo cœpta est obsideri Antiochia.

Bœimundus, Rogerio Nortmano.

ARbitror, te ex Tancredi filii literis cognovisse & quorundam trepidationem, & prælia, quæ maxima cum gloria paullo ante gessimus. At de induciis, deque toto negotio confecto, malo te ex meis quam ex aliorum literis certior fieri. Petierat inducias Casscamus Rex, quibus tutissimus absque ullo metu in urbem aditus militibus erat, quo usque, Gallico milite ab hostibus cæso, fœdera rupta à Vollo fuerunt. Dum autem oppugnandæ urbis negotium difficile satis videretur, Pyrrhus quidam, Antiochenus, civis potens, mihi apprime propensus, de dedenda urbe mecum sermonem habuit: ea tamen ratione, ut penes me (cui plurimum fidebāt) Imperium urbis esset. Egi totum negotium cum Ducibus & proceribus, facileque communi omnium consilio mihi adjudicari urbem obtinui. Exercitus, per apertam à Pyrrho portam ingressus, urbem capit. Per eos etiam dies Aret oppidum, aliquo nostro incommodo salutisque pe-

riculo ob vulnus acceptum, oppugnatum est. Multa tibi de Tancredi filii virtute polliceor; quem tanti ipse facio, tanti exercitus totus, quanti fortissimus Dux & optimus Imperator fieri solet. Vale.

Tancredus Hormanus, Rogerio, patri.

Post captam Antiochiam quamprimum Sensadulus, regis filius, cum maximis Persarum copiis accurrit, & per arcem, quæ adhuc hostium erat, urbem invasit. Pugnatum est in urbe varia fortuna. Deinde legiones nostræ in latos campos egressæ sunt: ibique tanta contentione ardoreque prælium gestum est, ut centum millia hostium cæsa fuerint, quindecim millia camelorum capta, spolia ditissima recepta, & annonæ maxima vis: eadem ipsa die arx deditonem fecit, & Boëmundo tradita fuit. Hac insigni victoria perculsi hostes, remotissima loca accesserunt. Tandem, egregia militum virtute, uno eodemque tempore, famines, hostes, arx, omniaque, devicta sunt. De reliquis nihil est quod non optime speremus. Boëmundus plurimam tibi salutem dicit. Vale.

*Gotfredus Bullionæus, Boëmundo,
Antiochiæ Regi.*

MAXIMIS itineribus, captis primum aliquot oppidis, Hierosolymam venimus. Quæ urbs arduis montibus circumdatur: fluminibus caret, & fontibus; excepto unico Siloë amne, & eo tenuit. Multæ insunt cisternæ, ubi asserventur aquæ, & in urbe & in agro. Hic Arabes, Moabitæ, & Amonitæ Orientales sunt: Idumæi, Ægyptii, & Philistæi meridionales: maritimæ civitates, Ptolemais, Tyrus, & Tripolis: Occidentales, Tyberias, Cæsarea Philippi: regio Decapoleos, & Damascus, septentrionales. Ego in oppugnatione urbis partem muri, quæ mihi obtigerat, primus ascendi, & Balduinum in urbem descendere jussi: qui cæsis aliquot hostium cohortibus portas perfregit, & Christianos admisit: Raimundus Turrin Davidis cum preciosissima gaza per deditionem accepit. Ad Salomonis templum ventum est. ibi pariter fuit pugna; tantaque hostium cædes, ut cæsorū cruor nostrorum talos superaret. Nocte adventante, superiora templi expugnare non potuimus. At altera die, civibus miserabili voce pacem

acclamantibus, data. Atque ita urbs Hierosolyma à nobis Idibus Julii capta est, anno salutis nostræ 1059, die 39 post captam obsidionem, qui annus fuit 409 postquam sub Heraclio Saracenis cessarat. Adhæc me, etiam reluctantem, summo omnium consensu Hierosolymæ regem acclamavere. Qui, tametsi tantum regnum horrescerem, veruntamen dabo operam, ut me Christianum regem, de quæ fide publica optime meritum, facile agnoscant. Tu autem me, quod facis, ama. Vale.

Tancredus Nortmanus, Rogerio Patri.

Cum plane sciam, te de nobis magnopere laborare, cursuquererum nostrarum felicissimo lætari: nihil mihi potius unquam duxi, quam te de omnibus quamprimum certiores facere. Capta urbe Hierosolyma nunciatur nobis, Solymanum Babylonix regem cum magnis copiis Ascalone confedisse: quæ urbs vix viginti quinque millibus passuum ab Hierosolymis distat. Gotfredus hostibus occurrere statuit; quem ego cum duabus Legionibus, mecumque Eustachius, secuti sumus. Primo ex captivis didicimus, Clementem, Solymani Ducem, cum quin-

quingentis millibus hominū nobis imminere. Nos, tametsi numero impares, præsentī animo ad Ascalonem Babylo-
nios aggressi, universos fudimus ac fugavimus. Ad centum hominum millia cæsa sunt. Hac insigni victoria Hierosolymæ salus ac quies parata est. Quod autem ad res Italicas pertinet, gratissimum feceris, si, quæ istic gerantur, ad me quam diligentissime perscripseris. Vale. Ascalone.

*Balduinus, Hierosolymæ II Rex,
Calisto, Romano Pontifici.*

Venetorum ducentæ naves maximo nobis adiumento fuerunt; tantumque addiderunt virium, ut Ioppæ, quingentis navibus obsessæ, opem tulerimus, ac, soluta obsidione, Barbaros innumera-
rabiles cæsos captosque perdiderimus. His prospere actis, paribus auspiciis in Tyrum ductum est: quam, jampridem tentatam, nunquam milites nostri oppugnare poterant: sed tum demum opulentissima munitissimaque urbs, multo Venetorum sanguine, capta & Hierosolymæ Imperio adjecta est. Tertia pars Tyri, & Ascalonis, si caperetur, multis immunitatibus honorificisque decretis

Imperio Venetorum assignata est. At Emanuel, Græcorum Imperator, tantam nobis victoriam invidens, sedulo operam dat, ut Venetorum auxilia à nobis sejungat. Quare abs te majorem in modum peto, ut eundem Imperatorem à perditissimo consilio avoces, ipsosque Venetos quammaxime in fide contineas. nihil est, quod literis ac nunciis à Senatu illo non facile impetres. Tanto autem nobis usui classis Veneta futura est, ut eo præsidio munitissima quæque oppida oppugnare, mariaque latissime olim tuto percurrere possimus. Vale.

Saladinus, Isacio, Constantinopolitano Imperatori.

Obsidebam Tyberiadem, cum mihi nunciatum est, Guidonem, Hierosolymæ Regem, equitum triginta millia, peditum quadraginta, in aciem eduxisse. Hunc ego citato agmine præveni, ac è regione Christianorum cum copiis omnibus constitui. Oriente Sole initum est prælium; hostium aliquot cæsi, aliquot capti: Guidonem regem, & templi magistrum, cum nobilioribus Christiani nominis, captos servavi: de paucis supplicium sumptum. Hac victoria usus, Aconem

nem duxi ; quam per deditiōem accepi. Spero , brevi futurum , ut Beritum , Biblium , & omnis maritima ora usque ad Ascalonem , Imperio nostro adiiciatur. Hæc eo scripsi , quod te rebus nostris prospere gestis pro necessitudine nostra maxime lætari intellexi. Vale. In Castris.

Saladinus , Isacio , Constantinopolitano Imperatori.

POsteaquam Ascalonem valido præsidio , com meatibus , rebusq ; omnibus communivi , copias ad oppugnandam Hierosolymam deduxi. Decem totos dies ad plagam Occidentalem oppugnavi , vigintique aliis diebus obsedi : hostes , desperatis auxiliis potius quam oppugnationis metu , eâ conditione deditiōem fecerunt , ut cum suppellectili , quæ singuli humeris ferre possent , abire permitterentur. Facta est deditio secunda Octobris , anno 89 post , quam Christianis cesserat. Ii decedentes , pars Antiochiam , pars Tyrum , aut Alexandriam , petiit. Verumtamen , qui Asia oriundi erant , paucissimi Hierosolymæ constiterunt. Reliquum est , ut Tyri oppugnationem tentemus : quæ si nobis ex sententia evenerit , video , res nostras in tutissimum locum positas iri. Vale. Hierosolymæ. *Cle-*

*Clemens III, Romanus Pontifex, Isacio,
Constantinopolitano Imperatori.*

IAm omnia Saladini virtuti cesserant, cum edicto nostro ad instaurandam gloriam Christiani nominis, principes nostri excitati sunt. Præcipui fuere Federicus alter Imperator, Philippus Francorum Rex, Riccardus Angliæ, & Oddo Burgundiæ; Veneti quoque, & Pisani, paratissimas classes eduxere. Venetæ præfuit Ravennas Archiepiscopus, Pisanæ præsul Pisanus. Gulielmus Rex Sicilia, pacato à piratis mari, annonam ex Sicilia & Apulia profecturis ministravit. Frisones quoque & Dani triremes quinquaginta, & duodecim Flandrenses armare: qui transeuntes in Mauritaniam, & ad Africæ litora flectentes, Saracenos magnis incommodis afflixerunt, & Sylvinam urbem vi captam diripuerunt. Bela Rex Ungarus, habita ratione rei Christianæ, Venetis pacem dedit: Quæ cum ita sint, oro te majorem in modum, ut hoc bellum instauratum ac Christiano nomini gloriosum, quibuscumque rebus poteris, (poteris autem pluribus) juves, ne quando Saraceni validiores effecti regnum etiam tuum clade aliqua afficiant: Vale.

Rican-

*Ricardus, Angliæ Rex, Calestino III,
Romano Pontifici.*

ERat meæ erga Sanctitatem tuam ob-
servantiæ, ut de belli rationibus feli-
cique rerum eventu certiolem facerem,
ac imprimis de Ptolemaidæ diuturna ob-
sidione aliquid significarem. Ea urbs bi-
ennio post, quam obsideri cœpta est, tan-
dem in deditionem venit. Quod autem
ad captivos pertinet, quos toto hoc bel-
lo innumerabiles cepimus, illos cum
Christianis superiori bello captis com-
mutavimus. Ad hæc Porphyriam, Cæsa-
ream, Ascalonam, Gazam, & Dan, oc-
cupavimus, cum Saladinus multis maxi-
misque cladibus affectus eas tueri pror-
sus diffideret: is etiam Hierosolymam
nobis sponte reddidisset, nisi, dissidiis
nostris cognitis, consilium mutasset. Ve-
rum tamen Dei Optimi Maximi benefi-
cio reliqua omnia felicissimo cursu even-
tura speremus: multumque spei in piis
precibus vestris nobis repositum est. Va-
le. Ptolemaidæ.

Maximilianus Sforzia, Helvetiis.

CRebris rumoribus ad me affertur,
multorum militum delectum in
Gallia

Gallia haberi ; & Regem ipsum Franciscum, belli Ducem , superatis Alpibus in Italiam primo quoque tempore venturum ; commeatus, arma, equos, tormenta, atque omnis generis præsidia, summo studio adversus nos comparari. Quæ cum ita sint, pro amicitia nostra vos oratos velim , ne me in tanto rerum discrimine deseratis : cum & vosmet ipsi facile cognoscere possitis , me ex Regno Insu-
brum pulso , victores Gallos & Venetos Imperii sui finibus contentos non fore ; ut qui Pontifici maximo etiam præscribere audeant, & , cæteris gentibus Italia pulsæ , omnium rerum imperium sibi animo destinaverint. Quod si arma vestra nostris conjungere , communemque aleam subire velitis , polliceor vobis , in meque recipio , & id vobis maximo usui futurum, & me , meaque omnia, ita vestra fore , ut iis vos pro arbitrio vestro frui perpetuo possitis. Valete.

*Henricus , Comes Niverniensis ,
Regi Franciæ.*

Diu obsidebatur Damietta, cum Cypri Sultanus medio itinere inter utramque urbem castra posuit. A prælio maxime abhorrebat, cum Galli parva admo-

admodum manu illum irritaverunt, ac erumpere coëgerunt. Ea pugna Gualterius, camerarius tuus, Hilo Nantoliensis, & Viccomes Sanctæ Susannæ, intercepti sunt: Ioannes vero Rex Hierosolymæ ignibus aliquantisper læsus. Sed nec propterea obsidio intermissa est. Nam, exacto anno cum dimidio, Damietta tandem capta est; quod militum præsidium, & magna pars civium, contagione interiissent. Neque enim plusquam tria millia hominum reperta sunt, cum ab obsidionis principio septuaginta millia fuissent. Ea civitas ab Helio Pertinaci conditore Heliopolis dicta est, & triplici muro cincta; quam Nili rivus ad Romani Tyberis magnitudinem ambit, ut insulam oblongam arctamque faciat. Turris Pharea suburbia à prædonibus custodit; cuius ager Nili incremento sæpenumero longe lateque operiri solet; quod & aliquando copiis nostris maximam intulit cladem. Exercitus, urbis opulentissimæ oppugnatione ditissimus, incommodi, quod jampridem passus fuerat, non meminit; majoraque pericula adire ultro appetit. Nos ingentia quædam animo volvimus: quæ cujuscumque sint, propediem intelliges. Vale.

Senen-

Senenses, Manfredo, Regi Neapolis.

Mature nobis præsidio fuit Iordanus tuus cum equitatu. Quo egregiam operam nobis præstante, primum levibus certaminibus utrinque certatum est. Deinde Miniaterſes, Piſtorienſes, Aretini, Florentinique, ad Arbiā fluvium, quarto lapide procul urbe, caſtra poſuere. Nos, eruptione facta, copiis noſtris, ac auxiliaribus, Iordaniq; virtute, ad quadraginta millia hoſtium fudimus, fugavimusque. Prælium initum eſt 16 die Septembris, 1240. Tria millia Florentinorum caſa ſunt; quatuor cum curru publico, vexillisque omnibus, capta; reliqui ad ſuas urbes fuga miſerabili dilapſi ſunt. Guelfi, alii Bononiam, alii Lucam conceſſere. Qua victoria civium noſtrorum animi ita erecti ſunt, ut & amplitudo tua, omneſque Gibellini nominis, non niſi optime ſperare debeant. Sic & hoſ feliciffimos rerū eventus poſt Deum tibi omnes acceptos ferre inprimis debemus: cui jampridem nos ac fortunās omnes propenſiffimo animo dicavimus.

Plutar-

*Plutarchus, Traiano, Romanorum
Imperatori.*

A Nimadverti, te verecundo quodam pudore Imperium Rom. nunquam concupivisse; tametsi morum innocentia, egregiaque virtute, operam dederis, ut id promerere posses. Hoc amplissimo Regno eo dignior existimaris, quo minus rationem ejus adipiscendi quæsisisti. Id cum virtuti tuæ, tum felici fortunæ nostræ, acceptum fero. Mihi que id gratius futurum est, si animadvertam, te recte gerere id Imperium, quod recte etiam promerueris. Nam, si secus gesseris, ne maximum periculum aditurus sis vereor, meque malevolorum voces subitum plane intelligo. Scelus enim discipulorum plerunque præceptoribus vitio dari consuevit. Ut facile Senecæ exemplo dignosci potest; qui, ob immanem sævitiam, moresque Neronis perditissimos, apud universas gentes male audivit; cujus præceptor pueritiæque institutor fuerat. Adde etiam quod eorum, quæ deliquere Quintiliani discipuli, innocentissimus præceptor accusatus fuit. Tu omnia præclare ages, si tui memineris, si te audiveris, si primum te cohibueris, omniaque ad virtutem

tutem referre volueris. Quæ ad tuendum Imperium moresque ornandos facerent, abunde satis libellorum meorem monumentis conscripta sunt. ea si secutus fueris, Plutarchus vitæ tuæ moderator erit: sin secus, atque te educavi, gesseris, has literas meas testes esse volo, consilio meo nihil prorsus, nisi ex usu reipub. Romanique Imperii, fieri. Vale.

*Ioannes Prochicius, Martino. I I I I ,
Romano Pontifici.*

E Go, tametsi mihi conscius sim, te, Caroli Gallorum Regis amicum, ejus incommoda iniquo animo semper tulisse: illud tamen volui te meis literis cognoscere, Gallorum superbiam eo devenisse, ut Siculi omnes uno consilio adversus eos arma sumserint. Ii enim, constituta vespertarum hora, quamprimum campanæ Christiano ritu auditæ sunt, excitato tumultu, omnes cujuscunque ordinis ætatisque interfecerunt; adeoque à populo sævitum est, ut clausi utero materno, qui Gallico semine concepti crederentur, extincti sint. Quæ omnia non magis Siculorum scelere, quam Gallorum libidini ac superbiæ ascribenda sunt. Erit igitur prudentiæ sanctitatisque tuæ, improba
maxi-

maximique spiritus gente explosa, Arragoniis rebus favere. Nam optimi Regis in Ecclesiam eam fidem ac pietatem cognosces, ut demum nihil quam magnum atque amplum illius necessitudini anteponendum censeas. Vale.

*Carolus, Gallia Rex, Petro,
Arragonia Regi.*

NUnquam adduci poteram, ut crederem, te, maximi animi nominisque Regem, mihi conjunctissimum, regnum Siciliae per scelus invasurum. Nam & sanguinis cura, & amor meus erga te singularis, id minime fieri abs te patiebatur: eoque minus, quod nullum jus, nulla satis justa ratio, id suadere videbatur. Quare te monitum velim, ut quamprimum Panormo totaque Sicilia excedas. Sin id agere neglexeris, scito, Deos immortales, æquissimos scelerum vindices, aliquando Gallorum armis de te poenas sumpturos. Vale.

*Petrus, Arragonia Rex, Carolo,
Gallorum Regi.*

NUnquam tanti fieri jura sanguinis censueverunt, ut Regna æquo jure
mihi

mihi cedentia, & lacrymas populorum, voces ac ejulatum opem implorantium, aspernari debuerim. Nam & Siciliae Regnum ob uxorem Constantiam, quæ Manfredi filia & Corradini neptis fuerat, deberi mihi, omnes fatentur: & Siculi ipsi tot tantisque calamitatibus affecti sunt, ut universa insula, fortunis rebusque omnibus spoliata, extrema omnia experiretur. Quæ si à me minus recte facta esse contendes, dabo operam, ut jure belli, & quacunque malueris ratione, pro justa causa me stare intelligas: mihi que propterea Deorum immortalium præsidium præsto futurum plane confido. Vale.

*Henricus Lucemburgensis, Imperator,
Florentinis.*

Quamprimum me in Romanum Imperatorem Germani Principes delegerunt, Clemensque Pont. id ratum firmumque habuit: nihil mihi potius fuit, quam in Italiam primo quoque tempore Imperatoriam coronam accepturum contendere. Sed cum prope omnia perfectioni opportuna mihi constituta essent; id à vobis petendum mihi inprimis fuerat, ut copiis nostris ad urbem vestram
tutus

tutus accessus aditusque præberetur. Nam ea rerum mearum ratio est, ut urbis vestræ hospitio juvandus prorsus sim. Illud etiam à vobis pro mutua benevolentia peto, ut Aretinos longiori bello incursionibusque vexari diutius ne patiamini. Quod autem ad pacandam Etruriam pertinet, ita operam auxiliumque meum vobis polliceor, ut me reipublicæ vestræ amicum fautoremque plane judicetis. Valete.

*Florentini, Henrico Lucemburgensi,
Imperatori.*

FRequenti senatu recitatae sunt literæ tuæ, quæ nobis perquam molestæ fuerunt. Nunquam enim nobis probari potuit Imperator, qui in Italiam barbaras copias ducat; cum id potius cavendum esset, ut hanc nobilissimam provinciam è barbarorum manibus vendicaret. Quod Aretinos foveas, vide quam præclare agas; cum meminisse possis, eos Guelfos cives suos innoxios eiecisse, qui ope tua patriæ restitui inprimis debebant. Nihil est quod nunc de recipiendo exercitu tuo in urbem decernamus: id tum demum curabimus, cum copias tuas adventare cognoscemus. Studium tuum
pacan-

pacandę Etrurię tantũ probamus, quantum id universę Italię maximo usui futurum speramus. Tuę vero erga nos propensę voluntati immortales gratias agimus. Vale.

*Campsoni Gaurio Sultano, Selymus
Othomanus.*

Mitto ad te Cadilescher legatum meum, ut de ipso rationem belli Persici totam cognosceres. non enim intelligo, cur mihi impedimento esse debeas, quo minus Ismaelem bello persequar, qui tot tantasque Asię calamitates intulit, inductisque novis superstitionibus Mahometanę religionis, certissimas leges depravare dilacerareque contendit. Ipsi legato meo in omnibus & quibuscumque rebus plenam indubitatamque fidem adhibeas velim: à quo, quidquid federis percussum vel sancitum fuerit, ratum firmumque esse volo. Vale.

*Selymo Turcarum Regi, Campso
Sultanus.*

EA Sultanorum consuetudo invaluit, ut principem locum in religione obtineant, Mahometanos reges, populosque

que omnes , in pace omni cura contineant. Ego vero in Syriam provinciam meam armatus veni , ut pacem tibi suaderem. Verum si in ea inferendi belli pertinacia persistas, atque Ismaelem, fœdere necessitudineque mihi conjunctissimum, oppugnare perrexeris, me dignitati meæ ac existimationi consulturum scias , nec passurum diutius , ut unius insolentis ambitiosique hominis libidine ac furore humana divinaque omnia permisceantur. Animadverti jampridem ingenium tuum, quam vastum, quam atrox, quam inquietum sit, postquam, Bajazete patre optimo , tantæque virtutis fratribus , ac tantæ spei septem impuberibus consanguineis , per summum scelus enecatis, totque amicis ac fortissimis Ducibus crudelissime trucidatis, immanitati atque audaciæ nunquam modum imposuisti. Eam itaque extremam pacis conditionem esse scias , Si ab Ismaëlis provinciis abstinueris, & Aladoli filio paternum restitueris regnum , quod in Sultanorum clientela ac fide semper fuerit. Id si feceris , præter gratiam atque amicitiam nostram , quæ tibi maximo usui atque ornamento esse poterit, tu longe majorem ex tuta pace quam ex ancipiti bello laudem es relaturus. Vale.

Tomun-

*Tomunbeius Sultanus, Ismaeli
Persarum Regi.*

CUM bellum Turcarum, cervicibus
tuis imminens, Campsonis opera in
nos conversum fuisset, Syria Ægyptus-
que maximis cladibus affectæ sunt. Nam,
cæso ad Singam Rege, deletisque militi-
bus, multa bello nobis opportuna de-
sunt. Tantum enim Selymi exercitus in-
valuit, ut, nisi tu minorem Asiam incur-
sionibus invadas, & Comagenem nuda-
tam præsidiis irrumpas, de pulcherrimo
Ægypti Imperio fortunisque omnibus
agatur. Selymus, qui nunc Iudææ fini-
bus continetur, duobus exercitibus faci-
le intercludi potest, & commeatu prohi-
beri; quando litora nullis Turcarum
classibus teneantur, quæ terrestres co-
pias juvare commeatibus, vel eas, si ali-
quam calamitatem acciperent, avehere
possent. Id si curabis; & Ægypti rebus,
tecum conjunctis, prope labentibus,
subvenies, & de tot insignibus injuriis
ab infensissimo hoste acceptis nullo pro-
pe negotio supplicium sumes. Vale.

Ioanna,

*Ioanna, Neapolis Regina, Ludovico,
Vngariæ Regi.*

Audio, multos mirari, quod, inter-
empto viro, fratre tuo, de parici-
dio supplicium nullum sumpserim. Quid
est autem, cur populus tanti sceleris ream
me faciat, cum Andream Regem, virum
optimum, & perditè amaverim, & ipse
mecum sine querela, quamdiu vixerit,
versatus semper fuerit? Sed, quicquid
suspicientur cæteri hominum, id tibi in-
primis velim persuadeas, me, & ignora-
tione sicariorum, & rerum difficultate,
maximam hanc injuriam mihi illatam
ulcisci non potuisse; eoque animo aman-
tissimi viri necem tulisse, ut à dolore exa-
nimata, iisdem vulneribus pene conciderim.

*Ludovicus, Vngariæ Rex, Ioanna
Neapolis Regina.*

Impudica vita, quam jam pridem du-
xisti; occupatum regnum, neglecta
vindicta, & excusatio subsequens, necis
viri tui probant noxiam te prorsus fuisse.
Proinde Deos immortales scelerum
vindices superesse memineris.

H

Alex-

Alexander Magnus, Illyricis Populis.

QUoniam semper nobis præsto fuistis, in fide firmissimi, in armis strenui, egregiam bello operam navantes: damus vobis libere & cedimus perpetuo totam plagam terræ ab Aquilone usque ad fines Italiæ Meridionales, ut nullus valeat ibi consistere, residere, seu ibi locare, nisi vestrates. Si quis autē ibi commorari deprehensus fuerit, sit servus vester, & postea ii omnes sint servi nepotum vestrorum. Datum in civitate nostra Alexandrina. Anno xii Regnorum nostrorum, arridentibus magnis Diis, Jove, Plutone, Marte, & Maxima Dea Minerva. Valete.

Franciscus Philelphus, Senatui populoque Perusino.

ET humanitatem erga me vestram vehementer amplector, & liberalitatem maximi facio. Doleo autem, & permoleste fero, quod iis temporibus literæ mihi vestræ redditæ sint, quibus jam aliis fidem dederam. Hanc vero inviolatam ut præstem, & ipse cogor, & vos item velle non dubito. Quod si tempe-
stive

stive vestræ ad me literæ advolassent, essem profecto desiderio vestro incredibili meâ cum voluptate obsecutus; ornassetque vestram ipsam splendidissimam juventutem pro virili parte, non modo eloquendi, sed etiam vivendi laudatissimis artibus. Quoniam igitur honestatem causæ intelligitis, ignoscite mihi, si minus hac in re expectationi vestræ responderim. Valete. Ex Senis, Idibus Septembris, MCCCCXXXVIII.

*Philelphus, Gerardo Leandriano,
Cardinali Comensi.*

FECISTI mihi rem pergratam, quod Philonem meum, imo nostrum, ex Aurispa recuperatum, ad me dederis. Quod autem Mosei vitam, quam idem Philon & copiose & eleganter apud Græcos & Græce scripserat, in Latinum à me tantopere verti postulas, & audiui libenter, & obtemperabo libentissime. Itaque factum puta, quod jubes. nulla te tua de meo erga te animo faller opinio. jam operi me accingo. Vale. Mediolani, IIII Calen. Novemb. MCCCCXI.

*Philelphus, Bessarioni, Cardinali
Nicæno, S.*

E Am Homeri Iliada, quam vir eruditissimus Theodorus Gaza exscripsit mihi, & eam quidem magna cum impensa atque sumptu, facio tanti, ut ne Cræsi ingentibus istis admirabilibusque thesauris cuiquam sim cessurus. Te autem, Pater reverendissime, majorem in modum miror, qui (cum vel ab usque Constantinopoli, in publico discendi ludo me noris, ubi post obitum mei soceri Chrysoloræ fuimus apud Chrysococem condiscipulum) mores arbitreris cum ætate mutasse, ut qui omnium liberalissimus esse censerer, benignitatem illam cum avaritia commutarim. Donare didici sæpe permulta, at vendere nihil unquam, præsertim libros, quibus sane pretiosius nihil duco. At hunc Homeri codicem tam charum habeo, tam jucundum, ut vix quicquam in vita magis. Itaque ignosce in hac re mihi. Si quid aliud tibi possum gratificari, jusseris: nihil frustra. Vale. Mediolani x. Calendas Februarias, 1448.

Phi-

Philelphus, Leonello, Marchioni Estensi.

SI tibi coram narrare possem, præstantissime Princeps, quantum me tibi debere putem, quod nullis meritis de te meis ultro me invitari ad Regium hospitium tuum ac familiaritatem; intelligeres profecto, quam sit apud me egregia virtus tua, quamque admirabilis, peneque divina. Non enim expectasti, ut te literis anteverterem ac rogarem, ut me intra regales tuos parietes exciperes, dignumque redderes benevolentia tua; sed id diu mihi atque multum aggredi cogitanti sponte occurristi, teque ipsum liberaliter perbenigneque obtulisti, ac nullum prætermisisti officium humanissimi sapientissimique Principis; &, quod à Platone scriptum legimus, non obscure confirmasti, beatas illas fore respublicas, quæ aut à sapientibus, aut à sapientiæ studiosis, administrarentur. Nec enim ignoramus, inter Regem & Tyrannum illud interesse; quod hic omnia refert ad utilitatem suam, contempto divino omni atque humano jure; at Rex secus omnia; qui, justitiam atque pietatem ante oculos semper ferens, sibi omnia vult cum civitate esse communia, suum atque

proprium nihil ducens, quod a publica utilitate dignitateque separaretur. Dignus es tu profecto, qui quam diutissime sis in vita, & non minus universæ Italiæ, quam tuo isti pacatissimo atque felicissimo pusillo regno, domineris. Totus es ad laudem & gloriam natus; cujus universa vita plena est potestatis, plena sapientiæ. Faciat Deus Optimus Maximus, ut mihi aliquando liceat uti atque frui, quod mihi beneficium quam beneficentissime proponis: nunc enim ea sunt tempora, ut aliud nihil queam non modo deliberare, sed ne respondere quidem. Vale. Mediolani, v Calendas Augusti, 1449.

Philelphus, Petro Medici, Cosmi filio.

PRæcipuum tuum in me amorem & expertus sæpe sum præsens, & audiivi absens. Facisque ac fecisti semper pro officio gratissimi discipuli & viri optimi. nam de tua erga me voluntate cum ab aliis multis, tum ex Angelo Actiolo, splendidissimo equite, & vestræ familiæ studiosissimo, egregie accepi. Reliquum est, ut Achillis, quod fabulantur, jaculo utamur in secundo ictu: quod si factum cognoro, haud patiar, ulla me beneficii
juris-

ILLUSTR. VIROR. EPIST. 175
jurisque magnitudine superatum iri. Me-
diolani, iv Nonas Augustas, 1449.

Philelphus, Sfortiæ Secundo.

PEto abs te majorem in modum, ut,
& quod coram mihi recepisti, & ex
proximis meis literis audire potuisti, id
apud patrem tuum, præstantissimum, &
munificentissimum Principem, quam-
primum & quam optime conficias. Hac
mihi re neque gratius quicquam, neque
magis necessarium, præstare potes. Me-
diolani, pridie Idus Decembris, 1450.

Philelphus Sfortiæ Secundo.

PEtii abs te proximis literis, quod e-
tiam nunc terrium peto, & te quo-
que (si pateris) rogo, ut rem meam
apud Principem munificentissimum, pa-
trem tuum, ubi minus confeceris, ita
conficias, ut mihi abiens coram recepisti.
In hunc diem neque tu respondisti quic-
quam, nec ex alio sum certior factus,
quid egeris, aut non egeris. Itaque aut
responde quamprimum, aut equum mit-
te, quo vehar ad vos. nam si ad vos ve-
nero, facile futurum suspicor, ne vacuus
Mediolanum repetam; præsertim cum
H 4. jam

jam instet Natalis Christianus, quo Princeps solet ad beneficentiam exhortari. Mediolani, v Calendas Ianuarii, 1450.

Philelphus, Sfortia Secundo.

Pollicitus es non modo non petenti mihi, sed ne cogitanti quidem, te dono daturum nescio quid. Ita nolim te falli opinione tua, ut intelligas, nihil esse redditum mihi tuo nomine, nec item alterius cujusque, in hanc diem. Quare facito, ne vel oblivionis accuseris, vel negligentiae. nam utrumque crimen tua præclara indole est indignum. Vale. Mediolani, v Idus Martias, 1451.

Philelphus, Ludovico Gonzaga.

Principi Mantuano,

Proximis diebus literas ad te dedi, quibus intelligere haud obscure potuisti, quam mihi rem gratam, eandemque admodum necessariam, facturus esses, si quamprimum ad id, quod petieram, te humanum (ut soles semper) benignumque præstitisses. Nunc autem, quod scriberem, novi nihil acciderat, nisi ut terogarem, orarem, obsecrarem, id pro animi tui magnitudine efficeres, ne
me

me cunctando ambiguum ex certo red-
deres. Nam, etsi tua erga me benevolen-
tia mihi certius esse vix quicquam potest,
vereor tamen, ne quandoque benevo-
lencia cum difficultate certamen ineat.
Sed quo bonum difficilius est, eo clarius
& laudabilius duci solet. Itaque si diffi-
cultatem istam (si qua tamen, non tuo,
sed fortunæ vitio, apud te est) benefi-
cientia atque industria superabis, nihil a-
pud me gloriosius, nihilque magis ob-
servandum, colendum, prædicandum de
munificentissimo Principe futurum est.
Mediolani, xi Calendas Februarii, 1452.

Philelphus, Renato Regi.

Ternas literas ad te dedi anno supe-
riore, his de rebus, quæ tua maxime
intererant. Itaque non poteram non
mirari, quod nihil responderes, præser-
tim cum, te humanissimum facillimum-
que esse, jampridem uno omnium con-
sensu sermoneque audieram. Sed Ioan-
nes Cossa, vir clarissimus, idemque gra-
vissimus, qui modo & tuus & Christia-
nissimi Francorum Regis legatus in Ita-
liam venit, liberavit me omni dubitatio-
ne: quippe qui coram affirmavit, nullas
ibi omnino redditas esse literas meas.

H 5

Deus.

Deus malefaciat hominum vel negligentiæ vel perfidiæ, qui & me honestissimo officio, & te non mediocri, ut opinor, vel utilitate vel voluptate fraudarint. Quibus literas ad te dedi, Franci fuerunt omnes; quorum uni Malurticæ cognomentum est, homini bellicis artibus studenti, & tui, ut aiebat, observantissimo. Sed quoniam, quæ scripseram, non accepisti, ea in præsentia tibi coram exponet idem Ioannes Cossa, cuius fides & diligentia tibi Sole clarior esse debet. Vale. Mediolani, VI Calen. Februarii, 1453.

*Philelphus, Ludovico Gonzaga,
Mantuano Principi.*

NON equidem sum oblitus, quam mihi nuper in agro Brixiano benevolentiam ostendisti, & quanta me non humanitate solum, sed benignitate etiam persæpe exceperis. Itaque ex eo tempore intellexi, permagnam mihi in te spem & positam esse, & constitutam: indeque factum est, ut ita te observem, ac venerer, ut me abs te putem dignum existimari, in quo nullum beneficium tuum sit intermoriturum. Quæ mea me de te opinio ne falsum habeat, est magnitudinis, & munificentiae tuæ: quid autem abs te
velim,

velim, Hetrusco sermone intelliges: est celeritate non minus opus, quam beneficentia. Vale. Mediolani, 1 v Nonas Aprilis, 1453.

Philelphus, Nicolao V, Romano Pontifici.

Stephanum Caciam Novariensem, Sjureconsultum, & Taurinatem archidiaconum, tuæ Sanctitatis cubicularium, in iis, quæ mihi exposuit tuo nomine, & summa cum observantia, & libentissime audiui; nec diligenter minus quam fideliter gessi omnia, geroque assidue, quæ tum ex literis tuis, tum ejus nuncio, tibi grata fore cognovi. Habeo autem Beatitudini tuæ gratias immortales, quod fidei meæ pietatique erga te ita fidis, ut debes. Quid enim pro te facturus non sim, cujus singularem sum jam pridem benevolentiam & præcipuam modo benignitatem in me expertus? Tantum me tibi debere intelligo, ut ne vitam quidem ipsam in mea magis, quam in tua potestate, positam esse velim. Itaque imperare sit tuum pro voluntate omnia; parere autem meum, omni integritate, veneratione, industria. Vale, Pater beatissime. Mediolani, 1 v Calen. Maji, 1454.

Phi-

*Philelphus, Petro Barbaro,
Cardinali Veneto.*

XEnophonti filio Romam venienti
idcirco literas ad te dedi, ut intelli-
geres, me tanti facere benevolentiam
tuam, quam mihi nuper, cum istic essem,
certissimis documentis declarasti, ut om-
nia de te mihi sperare posse videar. Id au-
tem & facio, & majore cum fiducia, &
libentius, quia novi, nullum apud me
unquam intermoriturum beneficium tu-
um: nam est apud me antiquius nihil gra-
titudine, atque pietate. Reliqua tu ex
Xenophonte cognosces. Vale. Mediola-
ni, 1 v Calend. Martias, 1454.

*Philelphus, Dominico, Cardinali
Firmano.*

Non possum non accusare erratum
meum, quod, cum nuper fuisssem
Romæ, ad te minus salutatam ierim, cui
me jam pridem norim esse charissimum.
Nolim tamen existimes, id vel negligen-
tia mea, vel quod tui oblitus fuerim, ac-
cidisse: sed, dum cupio in te adeundo mi-
nus ineptus existimari, fui in officio ser-
vando minus erga te officiosus. Volebam
enim.

enim & pro amplitudine tua, & pro decoro adire te, & eos conferre sermones, qui & auditione tua, & oratione mea, non indigni judicarentur. Quare, dum studeo ea expedire negocia, quæ mihi erant apud summum Pontificem; in iis, quam putaram, plus temporis consumo. Tandem coactus sum non te ante adire quam abire. Itaque in ipso discessu meo ex urbe Roma inter equitandum accedo ad ipsas tuas ædes: is, qui triclinii præest officio, respondet, in larario te esse divino intentum ministerio, nec licere sibi interea temporis adire te. Quid multis? tres horas expecto, cum ne ipse quidem ostiarius amplius quicquam responderet mihi: Quamobrem, cum video, mirum fervari silentium, & ipse ad abeundum sollicitarer à comitibus, ne aut importunior aut ineptior dici possem, abivi equidem subtristior, quod visere te nequiverim, quem mirifica observantia prosequor. Tenes ecce rem omnem. Tuæ fuerit vel clementiæ, mihi ignoscere; vel iustitiæ, ostiarium castigare; qui, ut est genere Germanus, neque humanitatem sapiat, nec hominum habeat discrimen. Reliqua ex Xenophonte filio cognoscēs. Mediolani, 1 v Calend. Marrias, 1454.

*Philelphus, Ioanni, Marchioni
Montisferrati.*

SI nihil jamdiu ad te scripsi, puto, te iccirco non mirari : quod noris, mihi facere non licuisse ob tempestates procellasque bellorum. Nam ego te & amo, & observo, non solum quod de me sis meritus optime, sed quia dignus es, quem boni viri, ac docti omnes, & colant, & venerentur. Itaque, si quid in me est, quod tibi sit gratum, id jure peculiari tuum cense : ego autem abs te nihil aliud peto, nisi ut me ames, ut soles : præterea majorem in modum rogo te, ut meos illos de exilio libros Xenophonti filio ad me des. Vale. Mediolani, Idibus Maji, 1454.

*Philelphus, Dominico, Cardinali
Firmano.*

EO majore cum fiducia tuis beneficiis usurus advenio, quo te jam plures annos beneficentissimo usus sum. Nam vel à Bononiensi usque legatione tantam mihi benevolentiam ostendisti, ut nihil esse arbitrer, nec magnum, nec parvum, quod mea causa facturum non sis :
præ-

præsertim cum eum me esse cognoris, apud quem nullum sit intermoriturum officium: nam cum referre parem gratiam nequeam, eam habere quam maximam & velim, & soleam. Quid autem abs te cupiam, Xenophon filius tibi coram tempestive declarabit. Vale. Mediolani, Nonis Novembris, 1454.

*Philelphus Bessarioni, Cardinali
Nicano.*

CUM Ioannes Marius, filius, Mantuam peteret, Pii Pontificis maximi salutandi & adorandi gratia, iussi, ut omnium primum tuam amplitudinem adiret, cui mentem suam omnem, animumque, explicaret. Itaque rogo te, ut omnibus in rebus ita eum commendatum habeas, ut illos soles, quos vel ipsos, vel ipsis natos, charissimos habes. Haec una re mihi vix quicquam gratius potes facere. Vale. Mediolani VI Calend. Ianuarias, 1459.

*Philelphus, Ludovico, Cardinali
Aquileiensi.*

QUAM mihi vehementer non solum opera tua, sed ope etiam atque auxilio

xilio opus sit, Pater humanissime, cum ex aliis superioribus literis animadvertere potuisti, tum ex iis maxime, quas ad octavum Calendas Martias ad te dedi. Nunc autem, quod scribam, novi aliud nihil habeo, nisi ut intelligas, tanto me desiderio expectare literas tuas, ut majore aliud nihil. Omnis profecto spes mea in te uno posita ac locata est. & quantum valeas, scio, & quam me diligas, non ignoro. Itaque te etiam atque etiam rogo, oro, obsecro, ut, quod abs te petii, tam summopere, quam celerius fieri poterit, effectum reddas. Hoc erit mihi vehementer gratum, nec tu officium in me tuum unquam accusabis. Mediolani, x i i i Calendarum Aprilis, 1460.

Angelus Politianus, Laurentio Medici.

CYgno poeta similis; uterque candidus, uterque canorus, uterque fluvios amans, uterque Phœbo gratus. Sed negatur canere Cygnus, nisi cum Zephyrus spirat. Quid igitur mirum, si taceo tandiu tuus poeta, cum tandiu non spires meus Zephyrus? Vale,

Ioan-

Joannes Picus Mirandulanus,

N. S. R. E. C.

MAtthæus noster, vir officiosissimus, & salutem mihi plurimam tuis verbis dixit, & quo me amore, qua benevolentia prosequare, apertissime declaravit: pollicitus insuper & tuo nomine studium operamque tuam, si quando iis mihi uti contingerit. Cui officio utinam par essem, Pater amplissime. Suscipi enim in tuam fidem, & inter tuos connumerari, & optavi semper, & speravi: at obvium habere te, ultro me tam benigniter, tam amicis, tam liberalibus pollicitationibus aduntem, & quasi ad amicitiam (si licet ; sed per te licet) vocantem tuam, & spem meam & votum omne superavit, Quid enim, aut quantum est, ab eo invitari, à quo fuerat satis non excludi? Quamquam fecisti rem, etsi non me, te tamen dignam. Poteram enim pro meis meritis non admitti, non poteram pro tua humanitate etiam non vocari. Quamobrem, quantum aut mihi gaudeam, aut tibi debeam, quo pacto explicem, qui nec concipio? Certe ob hæc tanto magis tibi debeo, quanto minus hæc ulla ex parte mihi tu debebas. Neque enim illa mihi sunt
nimis

nimis grandia & nimis multa, quæ & Matthæus, & amici reliqui, retulerunt, ex voluntate potius quam ex iudicio me æstimantes; sed, qualis tamen, aut quantus sum, patiari me quoque inter omnes esse, qui tuas virtutes (ut taceam cætera) colunt & admirantur; per quas in te est videre, & quod vincat antiquitatem, & quod vinci à junioribus non possit; ut dixerim hoc merito, cum in te nihil, quod vel in honesto, vel prudentia, vel doctrina sit positum, desideretur, desiderari hoc unum debere ab omnibus, ut per te aliquando, iuxta Platonis votum, summa potentia cum summa sapientia conjungatur. Sed hæc adeo à te iterum peto & rogo, ut mihi non referendæ gratiæ, (neque enim locus est aut per tuam amplitudinem aut per meam tenuitatem) sed testandi animi erga te mei, testandæ fidei & observantiæ, occasionem præstes: experiens Ioannem Picum hominem supra omnem opinionem tibi deditum & devotum: de quo polliceri plus tibi non potes, quam ea omnia, qualiacunque sint, quæ sunt in eo: quibus tu ipse cum uteris, splendoris tui aliquid invenies; fientque magna cum tua esse cœperint, quæ, dum sunt mea, magna esse non possunt.

Carolus V, Romanorum Imperator, Philiberto Aurantio, Vgoniq; Moncata. S.

MOleste graviterque tuli Romanæ urbis direptionem. Sed quando facta infecta esse non possunt, æquum piumpque mihi videtur, ut Clementem Pontificem missum faciatis, ac dimittatis, ac omni honore in pristinam dignitatem asserere curetis. Mihi etiam gratissimum feceritis, si sacrosanctam ejus dignitatem obnixè defendi & colipatiamini; modo alicunde pecunia pareretur, qua militibus merita stipendia persolvantur; ut, cum tempus deposceret, Germanorum legiones urbe Roma adversus hostes educantur. Sedulo autem cavete certis obsidibus, ne Pontifex (si forte injuriæ nondum oblitus hostilem animum indueret) vobis non magnopere nocere possit. Illud demum vos etiam atque etiam velim curare, ne res nostræ aliquid capiant detrimenti. Valete.

Tarquinius Rex, Vitellis Fratribus.

VOs arbitror meminisse, Adolescentes optimi, quo vos amore ac pietate complexus semper fuerim, ita ut vestrum.

Tar.

Tarquiniorumque ipsorum, discrimen nullum habuerim. At nunc, ea vivendi libera ratione amissa, specioso libertatis nomine, non uni, sed pluribus perditissimis hominibus, servire adacti estis. Memitissimum regem plane omnes cognovistis: à quo facile omnia impetrare erat: nunquam locus gratiæ beneficiove penes me defuit. Leges horum temporum sunt res surdæ, & inexorabiles: nihil laxamenti, nihil veniæ habent, si quispiam vestrum per adolescentiam modum excedat. Periculosum est; in tot humanis erroribus sola innocentia vivere. Proinde, ut amicos Tarquino nomini fortesque adolescentes decet, inite cum legato meo eam dedendæ urbis rationem, ut & vos liberam vitam degere possitis, Rexque vester regnum, sibi proditorum scelere ablatum, tandem consilio præsidioque vestro recipiat. Valete, ac maturate.

S. P. Q. R., Porsenæ Hetrusco, Regi.

SEdulo actum est per legatos tuos de Tarquiniis regibus admittendis. Sed res ea est hujusmodi, ut brevi tota confici non possit. Mittimus ad te honestos patriciosque viros, ex quibus omnia facile intelligas; ac inprimis, eam esse omnium
volun-

voluntatem, ut, qui libertati in hac urbe finis erit, idem urbi sit. Proinde, si salvam Romam esse velis, oramus, ut eam liberam esse patiaris. Sed hæc omnia coram per legatos nostros copiosius. Vale.

S. P. Q. R., Aquis.

CUM Q. Fabius pacem ex vobis paulo ante tulisset Romam, æquum erat, ut idem vobis volentibus bellum Roma afferret. Quorum autem perfidia ac perjurio bellum excitatum sit, norunt Dii ipsi testes & ultores. Verumtamen, utcunque levitate vestra res cesserint, liberum est vobis, pœnitere, aut hostilia à nobis pati. Si vos pœniteat, tutus receptus ad expertam clementiam vobis patet: sin perjurio gaudebitis, id memineritis, vos hoc intempestivum bellum majori Deorum immortalium, quam hostium ira, vestro etiam incommodo maximo, gesturos. Valete.

M. Furius Camillus, Dictator, S. P. Q. R.

IAM pridem nunciatum vobis fuit, Patres conscripti, in agro Nepesino non modo hostes à legionibus nostris fusos fugatosque fuisse, sed castris quoque totis

tis exutos, indeque ex ingenti præda quæstorem magnam vim pecuniarum cepisse. Cum autem ad Veios exercitus deductus sit, certamque mihi victoriam in manibus prorsus videam; hujus opulentissimæ urbis oppugnatione spoliisque maximis tantum prædæ futurum compertum habeo, quantum non, omnibus in unum collatis, ante bellis superfuerit. Senatum super partiendæ prædæ difficili negotio consulendum duxi. A vobis igitur, P. C., peto, ut me de tota hac re, spoliisque hostium, certiore faciat, ac, propediem omnia ex sententia nobis cessura, pro certo habeatis. In castris ad Veios.

M. Furius Camillus, Faliscis.

Mitto ad vos ludimagistrum à liberis vestris virgis cæsum, quod illos novo scelere nobis prodere voluerit. Pueros vestros missos facimus, quod belli pacisque jura esse recordamur, justeque ea non minus quam fortiter didicimus gerere. Arma habemus non adversus eam ætatem, cui etiam captis urbibus parcitur: sed adversus armatos, & ipsos, qui, nec lacesciti à nostris, castra Romana ad Veios oppugnant. Ludimagister, quantum

tum in ipso fuit, vos vicit : ego Romanis artibus, virtute, opere, armis, sicuti Veios, vos aliquando vincam.

Falisci, S. P. Q. R.

Satis periculi factum est virium nostrarum, P. C. Victi à vobis & ab Imperatore vestro sumus ea victoria, cui nec dii, nec homines invideant. Dedimus nos vobis, rati, quo nihil victori pulchrius est, melius nos sub Imperio vestro, quam legibus nostris, victuros. Eventu hujus belli duo salutaria exempla prodita humano generi sunt. vos fidem in bello quam præsentem victoriam maluistis : nos, fide provocati, victoriam ultro detulimus. Sub ditione vestra sumus; mittite qui arma, qui obsides, qui urbem patentibus portis accipiant; nec vos fidei nostræ, nec nos Imperii vestri pœnitebit. Si quid autem est quod à nobis præterea velitis, de iis omnibus legatos nostros certiores faciatis. dabimus enim operam, ut nullis in rebus studium nostrum desideretis.

Capuani, S. P. Q. R.

URbis nostræ institutum vetus fuit, ut afflictis periclitantibusque amicorum

rum rebus opem semper tulerit. Samnites bellum Sidicinis, nobis conjunctissimis, intulerant; quos dum pro viribus ab hostium injuria vindicare nitimur, cæsis profligatisque copiis nostris, eo devenimus, ut pro laribus & focis tandem nobis pugnandum sit. Verum, cum in primis vestra inter sit, cujus imperio urbs Capua, Sidicinique, hostium, an amicorum, cedant: rerum fortunarumque nostrarum quicquid bello superfuit, arbitrio vestro dandum censuimus. Si nos defenditis, vestri; si deseritis, hostium erimus. Capuam ergo, & Campaniam omnem, vestris, an Samnitium viribus accedere malitis, deliberate. Pugnavimus tum pro Sidicinis, tum pro nobis, cum videremus, finitimum populum nefario latrocinio Samnitium peti, & ubi conflagrassent Sidicini, ad nos trajecturum incendium illud esse. Quod & facile evenit: nam, & duobus exercitibus cæsis, eos sanguis fusus explere non potuit, non populationes agrorum, non prædæ hominum atque pecorum, non incendia villarum, non ruinæ, non omnia ferro igneque vastata, sed cupiditas explenda est. Ea Samnites ad oppugnandam Capuam rapit; aut delere urbem pulcherriam, aut ipsi possidere volunt. Sed vos
potius,

potius, Romani, beneficio vestro occupate eam, quam illos habere per maleficium sinatis, opemque labentibus nobis quam primum feratis.

*Alexander, Iovis Hammonis Filius,
Olympiadi, Matri, S.*

IAm omnia cedunt virtuti nostræ. Tandem capta est Tyros omnium urbium munitissima. Sed & in oppugnatione huius, omniumque urbium, tu, in quibuscumque belli periculis, nihil est quod de salute nostra quicquam dubites; cum Iovis filium, Iovis præsidio tutum, neci subtrahi, perpetuoque servari, maxime deceat. Vale.

Olympias, Alexandro Macedoni, Filio.

Maxima lætitia me affecit victoria oppugnatae urbis munitissimæ, resque à te præclare gesta; ni inscriptio literarum me aliquantisper læsisset, quod Iovis filium te appellaveris. Amabo te, mi fili, quiescas; neque deferas me, neque criminere adversus Iunonem. magnum mihi prorsus illa malum dabit, si tu me literis tuis pellicem illi esse confitearis.

*Q. Fabius Maximus, Magister equitum,
S. P. Q. R.*

Mihi nunciatum fuerat per exploratores, apud Samnites hostes esse omnia soluta, ac si nemo Romanus in Samnio esset: ego vero occasione rei bene gerendæ adductus, exercitu instructo paratoque, ad Imbrinium profectus, acie cum hostibus conflixi. Ea fortuna pugnae fuit, ut res geri melius non potuerit: equis, qui aliquoties impetu capto per-rumpere non poterant hostium agmen, frænos detraxi, atque ita concitados calcari-
bus immisi, ut sustinere eos nulla vis posset: secutus pedes impetum equitum, turbatis hostibus intulit signa. Viginti hostium millia cæsa sunt. Hac re injussu Dictatoris præclare gesta, non video cur Papyrius dignitati suæ detractum existimet. Illud tamen mihi conscius sum, me, cum maximo etiam capitis ac fortunarum periculo, nihil unquam prætermis-
surum, quod ex usu reip. futurum putem.

*C. Pontius, Samnitium Imperator,
Herennio, patri optimo.*

Audieram, Romanas copias ad nos adventare. Quas consiliis potius quam

quam armis delere animum induxi. Milites decem, pastorum veste indutos, in conspectum Romanorum cum multa vi pecorum misi: qui, ubi inciderent in prædatores, uno ore legiones nostras in Apulia ad Luceriam esse dicerent. Jam & hic rumor ad Romanos pervaserat. Sed fidem auxere captivi. Hostes, angusta via brevissimum iter in Apuliam capeffentes, insidiis circumventi sunt ad Caudinas furculas, inter duos saltus clausi, ut nulla ratione, nulla vi evadere possint. Quid de Romanis legionibus decernamus, satis non constat; te per literas consulendum censuimus. Tu pro tua prudentia statues, quomodo triginta annorum injurias ab Romanis passas ulcisci possimus. Vale.

Herennius, C. Pontio, Filio.

Legiones Romanas Caudinīs furculis circumventas, gaudeam necesse est. Ego vero primum illæsas & nulla contumelia dimittendas putaveram; quod & nuper per nuncios vobis mandaveram. Sed cum diutius percontando de me quæritis, quid de iisdem copiis decernendum sit, ego tum demum ad unum omnes cædendos censeo. Vale.

Neapolitani, S. P. Q. Romano.

SCimus, Romanum ærarium bello Punico exhaustum; bellumque adversus Hannibalem, pro urbibus agrisque sociorum, atque pro arce Italiæ, ab urbe Romana geri. Aequum igitur censuimus, quod aurum nobis, cum ad templorum ornamentum, tum ad subsidium fortunæ, à majoribus relictum est; eo rempublicam vestram juvare. Si quam autem in nobis opem esse arbitramini, eodem studio illam vobis obtulimus. gratum enim nobis facturi estis, si res Neapolitanorum omnes vestras duxeritis, dignosque judicaveritis à quibus donum accipere velitis. Valete.

Harpagus Medus, Cyro Persæ.

CYre, Cambysis fili, Deorum immortalium cura: (neque enim alia ratione fortuna te eo amplitudinis evexisset:) jam appetit tempus ulciscendi Astyagis, qui tibi necem paraverat. Quod ad ipsum pertinet, perieras! at Deorum, meoque beneficio, adhuc vivis. Nec dubito, quin intellexeris, quas sævitias ob incolumitatem tuam expertus indigne fue-

fuerim. At, si me audieris, universum A-
styagis Imperium occupabis. Hujusce
egregii consilii authores ac fautores ha-
bes regni optimos; quorum etiam no-
mina ascribere libuit. Tu modo pro tua
prudencia, quod superest, conficias. Vale:

*Tomyris, Massagetarum Regina, Cyro,
Persarum Regi.*

DEsine experiri bellum, ô Rex Per-
sarum; quod an tibi utile futurum
sit, nescis: tuum opulentissimum Re-
gnum regas, nosque loca nostra deserta
ac rupes incultas colere æquo animo
patiâre. At cum omnia magis quam pa-
cem tibi probare soléas, verbis meis ob-
temperare profecto noles. Quod si Mas-
sagetarum virtutem experiri malueris,
nihil est quod flumen Araxem armatis
pontibus jungas, aut copiæ nostræ trium
dierum itineribus à vobis recedant, tuque
in Regnum nostrum tuto venias: at, si
magis hoc voles, nobis des tantum ocii,
locique, ut ad tua loca concedamus; ibi
tum demum de Imperio ac virtute sum-
mum periculum faciemus.

Tomyris, Cyro, Persarum Regi.

DEsine gloriari, Cyre, quod copias
nostras deleveris: non virtuti tuæ,
I 3 sed

sed vino laus victoriæ tribuenda est. De-
cet autem magnanimos Imperatores
virtute belli, non dolo, præstare. Tum
dum animadverti tandem, cruoris
humani te aviditate, non gloria, dimica-
re. Proinde edico tibi, ut infra triduum
filium meum, bello captum, missum fa-
cias, ac quamprimum ex Massagetis re-
cedas. Quod si minus curaveris, testor
Solem, solum dominum meum, me da-
turam operam, ut tandem humani cruo-
ris satietas te capiat.

*Amasis, Egypti Rex, Policrati,
Samio Principi.*

Mihi gratissimum est, amico & socio
meo omnia ex sententia cedere.
Sed tam diuturnus feliciû rerum cur-
sus animum meum aliquantisper movet
sollicitum; quippe qui sciam, quantum
invidiæ secunda fortuna obnoxia sit.
Mallem ego, res meas omnes, meorum-
que sociorum, variis casuum eventibus,
quam secunda tam longi temporis serie,
agitari. Mihi ipsi igitur morem geram in
deligenda medicina, quam fortunæ tuæ
demonstrabo. Delige rem, quam plurimi
facias, cujus jacturam iniquo animo fe-
ras: hanc abiicias, & procul neglectam dese-

deferas; ita tamen, ut in nullius manum devenire sinas: hac utaris quasi medicina ad eluendam fortunam; ac medicos imiteris, qui humores hominum variis medicamentorum rationibus purgare consueverunt. Hæc si effeceris, spero, futurum, ut periclitantibus rebus tuis optime prospicias. Vale.

*Policrates, Samius, Amasi,
Ægyptio Regi.*

Nihil mihi fuit antiquius, quam amantissimo consilio tuo parere. Perlecta enim epistola tua, smaragdum pulcherrimum, mihi que charissimum, de biremi in mare dejeci: cuius iacturam præ animi ægritudine ferre vix poteram. at, sexta die post annulli iactum, mihi à piscatore piscis dono datus est; cuius in ore annulus latebat; quem familiares, quamprimum agnoscences, hilari vultu reddiderunt. Rei magnitudo effecit, ut te quamprimum certiores facerem. Vale.

Othanes, Persa, Phedimæ, Filia.

Filia; Splendorem familiæ decet, nullum periculum horrescere quod parentis imperio tibi injungatur. Nam si

is, qui cum dormis, non est Cyri filius, sed quem suspicor; non debet ille per impunitatem decus familiæ nostræ turpi tuo complexu, deturpasse. Igitur, quamprimum is nocte somno captus fuerit, illius aures attingas: quas si deprehendas; illum Smerdem Cyri filium esse, plane credas: sin captum auribus cognoveris; hunc Smerdem mendacem magum esse, nihil est quod dubites: quicumque ille fuerit, me certiolem facias, velim. Vale.

*Orethes, Persa, Policrati,
Samio Principi.*

INtellexi, amplitudini animi tui nihil præter thesauros deesse; ego vero optima ratione & egestati tuæ, & saluti meæ prospexi. Nam, cum mihi nunciatum fuisset, Cambysem regem vitæ meæ insidiari, ac Lydium Regnum per injuriam mihi ablaturum: peto abs te, ut in insula tua tutum mihi locum pares. Polliceor enim, thesaurum regium ita me tecum partiturum, ut, eo adiutus, magnas res bello paceque conficere facile possis. De pecuniarum vi maxima, per certum nuncium tuum, certior fies.

Darius,

*Darius, Persarum Rex, Idanthyrso,
Scytharum Regi.*

Quid tandiu fugis, magnanime Imperator, cum alterutrum facere possis. Si enim te mihi virtute parem cognoscas, prælio certemus. sin te longe impari comperias, honores debitos exhibeas: nec aliud vestigal, quam terram & aquam, mihi deponco. At, si me convenias, spero, futurum, ut omnia inter nos pace ac fœdere optimo firmentur. Vale.

Idanthyrsus, Scythæ, Dario, Regi.

CAve existimes, res meas eo deductas esse, ut vel tu vel totus terrarum orbis terrorem mihi incutiat, fugamque suadeat. Id ago nunc, quod vetere gentis instituto paceque consuevi. Sed, si tecum prælium inire nolui: hoc sedulo egi, ne tibi pugnam optanti obtemperarem. Nos Scythæ neque urbes, neque seminatos agros, habemus, pro quibus tuendis pugnandum sit. Si sepulchrum cineresque meorum attingas, tum demum cognoscas quales bello simus. Quod vero à me tibi honores exhiberi deponcis, miror profecto; quippe qui Solem dominum vene-

veneratus semper fuerim: pro terra autem & aqua, quæ vectigalium loco tibi dari contendis, aliquando dona, & te & me digna, tibi mitti curabo.

*Aristagoras, Milesius, Cleomeni,
Lacedæmoniorum Regi.*

PUdor maximus Ionicæ gentis, quæ jamdiu Barbaris inservit, me ad deprecandum auxilium vestrum impedit. Quod tametsi Græciæ universæ magno dedecori sit, majori tamen vobis Lacedæmoniis, qui virtute ac gloria cæteris præstatis. Quapropter vos per Deos immortales, per affinitatem, per vestrammet gloriam obtestor, ut nos è Persarum manibus tandem vindicetis. Quod perquam facile vobis cedere potest. Nam nec vobis pares, aut similes, vel arte, vel natura, barbari censendi sunt. Vos rei militaris scientiæ, bellicisque artibus, omnium facile principes semper fuistis. Ii, pugnaturi, lanceis brevibus, parvis arcubus, ac pinnis, utuntur, bracati que incedunt. Gens profecto nec assueta urbium oppugnationibus, nec patiens laboris, vel inediæ. Quippe quæ tantum habeat divitiarum, quantum vix reliquum orbis terrarum habeat. Persis aurum, argentum,

tum, vestes, jumenta innumerabilia nunquam defunt. Quæ omnia minimo labore vos adipisci nunc potestis : nam & regionibus vestris imminet ; ut vobis in scripto tabella demonstrabit. Deos quæso, ut, quod optimum sit, ac universæ Græciæ salutare, decernatis.

Datys, Persa, Delis S.

QUO fugietis, viri sacri? Vos de me (nullo meo scelere) male sentitis. Jussu Darii Regis, ac voluntas mea, me impellunt, ut illi insulæ parcam, ubi duo lucidissima sidera nata sunt. Jam redite ad patriam vestram, & tuto illam inhabitate.

*Fabricius, & Q. Aemilius, Consules,
Pyrrho, Regi, S.*

NEque amicorum neque hostium fortunatus existimator esse videaris: cognosces enim, cum hanc epistolam ad nos transmissam perlegeris, te bonis quidem ac justis confidere. Hæc autem non tui gratia nota fecimus tibi: sed ne mors tua nobis calumniam afferat; & quem virtute nequiverimus superare, dolo contendisse videamur. Vale.

Linus.

*Linus Colutius Salutat, Inno-
centio Papæ.*

NEscio cui magis gratuler, Beatissime Pater, tuæ ne Sanctitati, an filio dilecto Leonardo Aretino, quem in tuum à secretis nuper ascivisti. Lætor equidem, & exulto, quod talem familiarem delegeris, quali sanctitas tua indigebat: non quod bonos & industrios viros non haberes; sed quoniam semper pluribus egetis, quotquot tibi, vel dominis aliis, in quorum manibus orbis terrarum est, boni contigerint. Est igitur quod maxime lætari debeam, contigisse tibi hujusmodi virum, ætate florentem, corpore validum, aspectu gratum, scientia clarum, eloquentia singularem, Latinis excellentem literis, eruditum non mediocriter Græcis; quodque in primis nobile est, integra fide, & singulari probitate præstantem. De quibus quidem omnibus, licet pleraque videas, & omnia forte perceperis, ego tamen tibi verus & fidissimus testis adsum. Cum enim jamdiu ipsum accepissem in filium, & ipse se totum mihi addixerit, totum agnosco, totumque discussi: nec me potest in aliquo tanto tempore latuisse. Continua & studio-

studiosa nobis consuetudo fuit. Et, cum eorum, quæ de contractis componerem, judex esset, & ego rerum suarum arbiter versa vice, nos mutuo, sicuti ferro ferrum acuitur, exercebamus. Nec facile dixerim, ex hoc dulci & honesto contubernio uter nostrum plus profecerit; uterque tamen eruditior evasit: ut fateri oporteat, mutuo nos fuisse nobis vicissim discipulos & magistros. In quorum memoriam, dum hæc scriberem, nimis commotus sum, cum me senserim tali socio tantoque præsidio destitutum. Maxima quidem certitudine, de quacumque re amborum consentiret autoritas, tenebamus. Nunc autem nec habeo quem doceam, nec à quo discam. Sed hæc satis. Tuo quidem commodo, & honori suo, mea debeo incommoda posthabere. Jamque ad Leonardum nostrum revertatur oratio. Habes virum aptissimum rebus magnis, virum fidelem, & innocentissimum. Scio quid loquar, & quod Christi Vicario vera loquor. Quamobrem hortor, & opto, ut tuæ clementiæ & humanitati jucundus sit, & charus. Eum cum expertus fueris, multis maximisque honoribus cumulabis. Cujus laudi, quicquid fides mea & propensio animi potest, accedat. Illud etiam B. tuam
memi-

meminisse velim, cum in Leonardo dimidium animæ meæ sit, quibuscunque honoribus eum affeceris, me iisdem auctum existimaturum. Spero tamen, illi nec mea, nec aliorum commendatione, satis virtute sua, & benignitate tua, gratiam Sanctitatis tuæ initurum: Vale.

Cæsar Augustus, C. Mæcenati S.

A me ipso sufficiebam scribendis epistolis amicorum: nunc autem occupatissimus & infirmus, HORATIUM nostrum abs te cupio abducere. Veniat ergo ab illa parasitica mensa ad hanc regiam; & nos in scribendis epistolis adjuvabit: Vale.

Cato, Cæsari S. D.

Existimandum est, mi Cæsar, animum nostrum, de quo sæpe locuti sumus, ex altissimo domicilio fuisse depressum, & quasi demersum in terram, locum divinæ naturæ æternitæque contrarium. Deos immortales præterea credendum nobis est sparsisse animos in corpora humana, ut essent qui terras tuerentur, quique cœlestium ordinem contemplantes, eum ipsum imitarentur modestia vitæ atque constantia. Vale.

Alexan-

Alexander Rex, Divo Aristoteli.

Non parva teneor admiratione, quod disciplinas acroamaticas, quibus à te eruditus sum, libris foras editis evulgaris. Nam, qua alia re cæteris præstare poterimus, si ea, quæ ex te accepimus, omnium prorsus fient communia; Quippe doctrina antequam malletm quam copiis & opulentiis. Vale.

Aristoteles, Alexandro.

Acroamaticos libros, quos editos quereris, & non proinde ut arcana absconditos, neque editos scito esse, neque non editos; quoniam iis solis, qui me audient, faciles cognitu erunt. Vale.

Olympias, Mater, Alexandro.

Scripsisti superioribus diebus, te Jovis filium. Posthac, amabo, fili mi, quiescas; nec deferas me, neque criminare adversus Junonem: magnum mihi prorsus malum dabit, si tu me literis tuis pellicem illi esse confitearis. Vale.

Philip-

Philippus , Rex , Aristoteli S.

Filium mihi genitum scito. Quo equidem Diis habeo gratias , non tam pro eo quia natus , quam pro eo quod eum nasci contigit temporibus vitæ tuæ. Spero enim fore, ut edoctus eruditusque à te, dignus existat & nobis & istarum rerum susceptione.

Philippus , Rex , Atheniensibus.

Quoniam persæpe iam legatos misi, qui vobiscum agerent, ut pacta conventionesque servaremus; nec ea res potuit adhuc vos continere: decrevi scribere ad vos, quibus in rebus injurias mihi illatas arbitror. Ne miremini autem longitudinem epistolæ meæ. Nam, cum multa sint crimina, necesse habui, cuncta simpliciter exponere. Principio quidem, contra vitia. Caduceatore ex meo regno per vim rapto, eos, qui contra legem commiserunt, nulla poena affecistis; sed ipsum injurias passum decem menses in carcere tenuistis, &, quas ad me ferebat epistolas, in concione legistis. Deinde, cum Thasii Byzantinorum triremes & latrones quoscumque reciperent, vos ea fieri omnia

omnia neglexistis; quamquam fœdera nostra aperte dicerent, eos, qui talia fecissent, pro hostibus habendos. Per hæc eadem tempora Diopites in res nostras impetum fecit, & Cromyla & Tarisciso vastatis, omnia loca Thraciæ vicina diripuit: tandem eo injuriarum processit, ut Amphilochem legatum, pro captivis redimendis ad se profectum, inter captivos retineret, summamque necessitatem imponeret, ut pro se redimendo talenta novem exolveret. Et hæc omnia facta sunt populo approbante. Atqui, violare caduceatores, vel legatos, cum cæteris omnibus, nefas visum est; tum maxime apud vos Athenienses, qui Megarensibus interdixistis sacris, quod ab illis Athemocritus caduceator fuisset interemptus; & Columnam ante portas posuistis, ut perpetuo extaret memoria tanti sceleris. Enimvero nonne id turpe est, pro quibus factis ita odistis Megarenses, eadem nunc à vobis fieri? Callias igitur prætor, à vobis missus, universas in Pegaseo sinu positas naves manu cepit: quæ quidem mihi erant sociæ, & in federibus nostris comprehensæ: eos autem, qui navigabant in Macedoniam, pro hostibus habuit, spoliavitq; omnes: & ea de causa est à vobis in decretis vestris laudatus.

Itaque

Itaque ego ignoro, quid tandem sit futurum, si aperte mihi bellum inferretis. Nam, cum occulto differebamur, latrones mittebatis, navigantes ad nos spoliabatis, hostibus meis auxilia dabatis. Præter hæc autem adeo vos transversos egit odium adversus nos injuste conceptum, ut legatos miseritis ad Persarum Regem, petentes, ut mihi bellum inferret. Quod equidem satis admirari non possum. Nam antequam ille Phœniciam Aegyptumque cepisset, decrevistis, me & omnes Græcos contra illum convocare, si quid ab illo moveretur: nunc vero tantum vobis superest odii, ut cum ipso contra me conjurare cupiatis. Atqui majores nostri (ut ego accepi) priscis illis temporibus ea maxime de causa Pelestratas oderunt, quod authores fuissent Regi Persarum in Græciam transeundi. Vos autem non erubescitis nunc ea ipsa facere quæ olim fecisse Tyrannos accusabatis. Etiamque præcipitis in decretis, ut Teram & Cersobletem sinam regnare in Thracia, utpote Athenienses cives. ego autem nec in federibus scio comprehensos à vobis, neque in columnis ascriptos, neque omnino Athenienses esse; sed Teram quidem mecum in exercitu contra vos fuisse; Cersobletum vero, cum
legatis

legatis meis ferire fœdera volentem, prohibutum fuisse à prætoribus vestris, ostendentibus, illum esse hostem Atheniensium. Nunc autem quomodo id justum esse aut æquum possit, non video, ut, cum vobis conducit, civitatis hostem affirmetis; cum rursus me calumniari vultis, eundem civem vestrum ostendatis. Et, si calleo quidem, quem vos similiter civitate donaveratis, eo mortuo, statim cum interfectore ejus amicitiam firmastis. Pro Cersoblete autem contra me suscipitis bellum; quanquam certo sciatis, neque decreta, neque leges, quemquam eorum tenere, qui hoc modo facti sunt cives. Sed fuerint cives, teneantur legibus; nihil ex iis refello. Verumtamen vos Euagoram Cyprium, & Dionysium Syracusanum, atque eorum posteros, civitate donastis. Si igitur persuadebitis iis à quibus illi expulsi sunt, arces atque oppida spoliatis restituere, restituiam & ego illam Thraciæ partem quam tenuit Cersobletes. Si vero illas possidebitis, nec succensere quidem quicquam dignum putatis, me autem vexatis; non ego jure optimo conatibus vestris resisto? Et de iis quidem, quamquam adhuc multa mihi suppetant, ita finem faciam dicendi. Cardianis vero fateor me auxilium præbere; quippe

quippe & ante pacem inter nos factam erat mihi cum illis societas. Cum retraheretis iudicium aliquod, ego persæpe una cum illis provocaveram. An itaque non ego essem omnium ignavissimus, si, desertis vetustis ac fidelibus sociis, vobiscum sentirem, qui nullo modo desistitis me lacescere? Sic igitur oportet ne hoc quidem prætermittere: Eo vos impulit cupiditas vestra, ut, cum pro iis duntaxat, quæ dicta sunt, me concitetis, mox tamen, ut accessit Peparetiorum querela, mandastis prætori vestro, ut à me pro illis pœnas exigeret, quos ego levius, quam dignum erat, castigaveram. Nam illi, cum pax esset, Allonersum occupare; nec loca, nec præsidia mea, reddere mihi voluere, cum ego persæpe hoc ab ipsis petiissem. Sed, quibus ego injuriis à Peparetiis sim affectus, eas injurias vos facile subtrahetis: si quid autem illi à me ulciscendi gratia passi sunt, id vos prope modum conquerimini. Atqui insulam illam neque vobis abstuli, neque illis; sed Sostrato latroni, qui illam invaserat. Si quidem confiteamini, vos Sostrato dedisse, confiteamini necesse est, latrones submittere. Si vero invitis vobis Sostratus occupavit; quæ tandem injuria erat, mea loca, à latronibus extorta, possidere, atque

que ipsa navigantibus tuta præstare? Sed, cum ego tanti facerem civitatem vestram, eoque erga illam essem animo, ut insulam vobis tradere vellem; oratores quidem vestri accipere dissuaserunt, capere autem vos persuaserunt; ut, si hoc modo traderem, in suspicionem populo venirem. Quod cum ego intelligerem, vocavi vos in iudicium; ut, si mea iudicaretur, vobis illam donarem; si vestra probaretur, redderem vobis. Hæc, me persæpe in jus producere postulante, vos neglexistis. Interea Peparetii insulam invaserunt. Quid igitur decuit me facere? nonne ulcisci eos, qui ita petulantes fuerant? nonne pœnas ab iis sumere, qui fœdera transgressi erant? Nam, si Peparetiorum erat insula, quid attinebat, Athenienses repetere? sin autem vestra, cur ferrem indigne, illos occupavisse aliena? Eo vero inimicitia devenimus, ut, cum ego vellem in Hellespontum navibus transire, conatus fuerim per Chersonesum cum exercitu proficisci; colonis quidem, secundum Policratis decretum, mihi bellum inferentibus; vobis autem id fieri approbantibus, & prætore vestro Byzantinos convocante, atq; ostendente. His ego laceffitus, tamen à civitate, à regione, & à classe abstinui. Cum esset mihi fa-

hi facultas pleraque ex iis capiendi, aut omnia; neque destiti vos in iudicium vocare pro quibus rebus nos invicem accusabamus. Atqui consideretis velim, non pulchrius esse, armis, quam verbis, decernere, &, rerum vos ipsos esse iudices, cæteris persuadere. Et, quam illud indignum est, Phasios quidem & Maronitas coactos fuisse à vobis deferri, me vero ad invicem concertare; vos autem nunc nolle mecum eodem modo rem transigere, præsertim cum sciatis, si victi fueritis, omnia ea recuperaturos quæ nos in præsentia possidemus. Omnium vero mihi videtur injustissimum; quod, cum ego cunctorum sociorum legatos istuc mitterem, ut testes nobis forent, vellemque justas pactiones pro Græcis facere, ne legatorum quidem vocem pro iis rebus passi estis audiri; cum vobis liceret, aut metu liberare eos qui gravius quiddam à nobis suspicantur; aut redarguere, me omnium mortalium esse nequissimum. Verum hæc Atheniensi quidem populo utilia erant, oratoribus vero non conducebant. Aiunt enim ii, qui administrationem reipublicæ habent, venalem pacem quidem bellum ipsis esse; bellum vero pacem. Tunc enim favendo ducibus, aut impugnando, pecunias ac-

qui-

quirere: præterea nobilissimum quem-
que civem aut extraneum criminando, &
in concionibus maledicendo, comparare
sibi apud populum authoritatem. Quum
maxime sint populares, perfacile mihi es-
set pauca largienti efficere, ut à maledi-
ctis cessarent, & me laudibus in cœlum
tollerent. Sed erubescerem equidem, si
benevolentiam vestram ab illis viderer
emisse qui ea audacia sunt. Ut verbum
apud vos faciam de Amphipoli, de ea
multo justiora me dicere puto, quam i-
psi qui mihi adversantur. Nam, si ve prio-
rum possidentium res fiant, quis nega-
bit, nos juste eam tenere, cum author
noster Alexander eum locum occupave-
rit, quo tempore & statuam auream ex
Medorum manubiis in Delphis statuit?
Si nec horum quidem esse quis conten-
dat; eum esse, qui postea fuerit, domi-
num, est & pro me, qui ab iis extorsi, qui
à Lacedæmoniis ibi locati erant, vobis
expulsis. Atqui cuncti civitates posside-
mus, aut à majoribus relictas, aut jure
belli à nobis ipsis quæsitæ: vos autem,
nec à principio possessionem, nec nunc
possidentes, sed per breve tempus illic
commorati, civitatem esse vestram con-
tenditis, præsertim cum judicio vestro
addita atque concessa sit. Nam, cum sæ-

pe de ea scripsissem, vos, intelligentes, me juste illam tenere, federa mecum iniistis, pacemque firmastis, nulla de Amphipoli mentione facta. Verum enim, quæ potest esse certior possessio, quam illa, quam primo majores nostri possederunt, deinde nos jure belli quæsimus, &, tertio, vos concessistis? qui consuevistis de iis &, quæ ad vos nihil attinent, litigare. Quæ ego crimina adversus vos habeo, hæc sunt. Quæ cum à vobis facta sint, & in diem magis atque magis propter meam continentiam ac simplicitatem me laceffit; jure vos ulciscar, &, Diis testibus invocatis, pro rebus meis pugnabo.

Libanius Aristaneto.

TU de nobis quidem male loqueris, nos autem de vobis bene prædicamus. Verum neque tibi aliquis, neque mihi, fidem habebit. Vale.

Themistocles, Ioniis S.

IMprobe agitis, Ionii, qui Græciam servam fieri contenditis; quam & parentem vobis esse, recordari, & pro tuenda libertate vestra dimicare, æquum fuerat.

rat. Quod si vobis minus probatur; in neutram tamen partem concedatis: idque Carios agere hortamini. Quod etiam si facere commodum vobis non sit, cum prælio interfueritis, ita vos geratis, ut vos à nobis oriundos, bellumque à vobis primo excitatum, esse cognoscatur. Valere.

Pius II, Pontifex maximus, Christophoro Mauro, Duci Veneto, S.

Quod jampridem occulto concepimus animo, nunc in lucem venit, & omnibus patet; Æstate proxima bellum contra Turcas movemus, & Apostolicus sacer senatus comes erit: nec deerunt robustæ militum cohortes, quæ, nobis oratione pugnantibus, ferro dimicent. Decretum nostrum publice lectum est undecimo Calendas Novembris. Quod promissimus, favente Deo Optimo Maximo, perficiemus; neque irrita fient verba nostra: quanto plus viribus poterimus, tanto fortiores ad bellum proficiscemur. Comitabitur nos etiam dilectus filius, Philippus, Burgundiæ Dux, claro Francorum sanguine natus; quem validas & veteranas legiones adducturum non dubitamus. De hujus exercitu maxime spe-

K

ramus.

ramus. Nec minus de classe vestra, quam paullo ante Pelloponnesum navigare iussistis: cujus multa egregia facinora, & priscis æquanda factis, cum gloria referuntur. Hanc perseveraturam in bello contra Turcas nobiscum & cum Philippo duce confidimus. nam & ita cum Oratore vestro statutum est. Nec dubium nos habet, quin totis viribus vestris bello huic faveatis, quod pro amplitudine Fidei nostræ suscipitur. Hæc, quamvis magna sint, felicissimos cursus mihi tamen polliceri videntur, ac certiora & majora victoriæ signa, si tu bello interfueris, teque nobis adiunges, reipublicæ ductor & princeps. Multum in bellicis rebus auctoritas valet, & splendor, & gloria Principum. Horrentque sæpe à magnis nominibus hostes, & à fama magis quam re ipsa dissipantur. Multum (crede nobis) terroris affert inimicis nostris magni Ducis Burgundiæ authoritas: nos quoque per Apostolicæ sedis dignitatem hostilem metum nonnihil augebimus. Quod si tu pariter accesseris buccinatoria navi, & ducalibus sublimis insignibus, non Græcia solum, sed Asia & omnis terrebitur Oriens. Nec dubites, quin, simul juncti, pro Sancto Evangelio, proque gloria nostri Dei, auctore ipso, res clarissimas gerere valeamus.

mus. Hortamur itaque te præstantem virum, ut nostro in hac parte desiderio morem geras. Te igitur accingas huic bello, atque ita res tuas disponas, ut, nobis mare ingredientibus, apud Anconam adsis, copias juncturus. Erit hoc rei Venetæ maxime gloriosum, & Christianæ Reipublicę maxime salutare; tu vero beatæ vitæ præmio donaberis. Scimus, apud Venetos non esse novum, urbis Principem classem ascendere, ac bellum gerere. Quod si unquam licuit, nunc imprimis decet, cum pro religione dimicamus, & Christi salvatoris nostri causa geritur. Veni igitur, fili, neque labore graveris, quem nos sponte etiam subimus. Neque senem te dixeris, tanquam per ætatem debeas excusari. Philippus quoque senex est, & longioris, quam tu, viæ incommodo properat. Et nos senectus invasit annos duo de sexaginta natos. Accedunt morbi, qui nos dies & noctes torquent; nec tamen propterea laborem detrectamus. Noli tanquam senem aut imbecillum huic tam sancto & tam justo bello te subtrahere. Consilium tuum & auctoritatem quærimus, non lacertorum robur, aut alias corporis vires. Quod Philippus bello præstabit, hoc & abs te petimus. Cura ut venias. Tres erimus eodem

dem bello senes ; quo ternario numero inprimis Deus Optimus Maximus gaudet : Triadem nostram ipsa cœlestis adjuvabit , & coram nobis hostium cohortes conteret. Veni igitur, ac mecum bene speres. Datum Romæ, apud Sanctum Petrum, anno Incar. Dom. 1463, octavo Kalendas Novembris , Pontificatus nostri anno 6.

Bartholomeus Georgianus, Maximiliano, Boëmiæ Regi, S.

SÆpenumero mecum cogitans , Invictissime Rex, mirabar, quid illud esset , quod , cum omnia pro Christianorum victoria stare viderentur , ipsi tamen multis abhinc annis in acie cæsi profligatique semper fuerint. Habemus Christum, qui nocte unica exercitum Sennacherib delevit; qui mulieris Judith manu Holophernem interfecit ; & , ut brevibus dicam, ab ipso Deo Optimo Maximo victoriæ omnes pro arbitrio condonantur. Econtra vero Turcæ habent Mahometem, qui , vivens , scelestissimus fuit , & mortuus , sine spe denuo vivendi , in sepulchro jacet; ita , ut tantum inter utrumque deum intersit , quantum inter viventem Dei filium, & olentissimum cadaver

daver hominis ex mortali homine progeniti. Adeo in Christianorum cladibus, si quis exacte naturam utriusque numinis intueatur, mortui homines armis ac vi vivos vincere plane videntur. Nos enim, quamvis corporis robore animique viribus illis præstemus, quæ ad victoriam plurimi fieri semper solent; verumtamen ubique locorum fundimur ac fugamur. Quis durior Ungaro? quis formidabilior Germano? quis præstantior Gallo? quis firmior Hispano? quis clarior Italo? ut reliquos prætermittam, qui Turcis corporis viribus vel præstantiores vel æquales judicari possunt. Quod si qualitates animorum consideres, quis in vulneribus ac periculis securior Ungaro milite? quis generosior Germano? prudentior Italo? elatior Gallo? callidior Hispano? Quæ omnia sponte sua victoriam comparare nobis facile possunt. Sæpe nullis aliis viribus audacia victoriam parat, sæpe animi altitudo, sæpe præstantia, sæpe prudentia, sæpe etiam calliditas. Nobis tamen miseris continuo victoria fere parva effluit è manibus. Nunc si bello res opportunas, armorumque genera, conferamus, multis rationibus liquet, nos Turcis præstantiores haberi. Tormen-

tot omnium armorum genus. Persæ inermes, aut fere nudi, in aciem prodeunt. Ii arcubus, nos sclopetis; nos fulminibus, ipsi sagittis utuntur, quæ armorum duritie eluduntur. Tormentis vero non rupes, non scopuli ipsi obsistere aut sufficere queant. Ipsi, quos Musalmanos vocant, sclopetarios, sed numero pauciores, ac minus peritos, habent. At, quæso, quas gentes in aciem educunt? Scythas, & Thraces; quibus nihil Italæ sapientiæ, nihil Hispanæ calliditatis inest. In eorum animis feritas, barbaries, ac rerum omnium ignoratio dementiæ immixta, dominatur. Iis additur Græcus, longa jam desidia imbellis; Asiaticus, præ luxu nimio languens; Ægyptius, & corpore & animo mollis; Arabs, exustus, pusillus & exanguis. Quis, ab hujusmodi militibus fortissimos Gallos, audaces Germanos, Italorum ingenia, Hispanorumque versutias, vinci posse, animum induceret? Veruntamen vincimur, & ab iis vincimur, qui jure optimo in servitutem à nobis vendicari poterant. Servi ipsi, ut jugum à majoribus nostris sibi impositum detrectent, nobis, quibus libertas amplissima ac pulcherrima relictæ fuerat, bellum indixerunt. Si vero leges utriusque gentis, si ritus prospicias, nec
iis

iis aliqua ex parte inferiores sumus. Nam quæ res augustior Euangelio? quæ maiori ordine disposita quam Jus pontificium? quæ sapientior ac gravior civili Jure? At econtra vivunt ii Alcorani legibus, non minus ineptis, quam vanis. Quem librum à Christianis legi ac propagari miror: ac si nos eorum leges addiscamus, de nostris aliquando jacturam facturi; ut primum Turcæ animo efficiamur, deinde Otomanno Imperio adjungamur. Cur igitur, tot tantisque rebus maximis præstantes, iis succumbimus? Unde est, ut vexilla, cruce signata, quæ aliquando & Turcis & dæmonum turmis formidini esse solebant, nunc tam facile capta hostibus ludibrio fiant? Id dicam, & brevi dicam: Nos Deum, magnum & verum, sed nobis iratum infensumque, habere ita, ut, una cum Vate illo, Non-populus Dei dici possimus. Cur autem Christus, tot falsis opinionibus & ritibus discerptus, nobis præsto esse debeat? præter nomen Christi, nihil nobis jam pridem reliquum est. Nostra hac tempestate agricola obscœnus est & gladiator; civis nobilis dolosus & avarus; qui præsent curiæ, retributiones quærunt, & munera amant; nobiles luxui proni sunt ac desidia: miles, præter stipendia spoliaque,

nihil magnopere curat ; quo cessura imperia sint, nihil cogitat ; sine delectu amicis hostibusque æque infensus. viri autem sacerdotes , præter pompam & regios fastus, nihil sancti habent , non religionem, non sanctitatem , non doctrinam noverunt. Omnes , quæ sua sunt, non quæ Iesu Christi, curant. Nihil est igitur, quod miremur, si Christus huiusmodi moribus adversatur, nos autem sine Deorum præsidio pugnamus, & quod deterius est, adversus Deum dimicamus. Nos crucem signis impietam proferimus ; at Christus cruci affixus ex adversum, acie nobis opponitur. Omnia igitur corruunt , & maximis calamitatibus involvuntur , cum alteri Christianorum populorum adversus Turcas pugnant, alteri vero aliis bellis implicantur, aut desidio ocioque torpescunt. Miles in aciem eductus, pecuniis, non Christo, inservit : nisi illi quamprimum stipendia pendantur, continuo castris excedit, aut transfugit. Quid igitur sapientia Italorum , quid industria Hispanorum , quid robur Germanorum , quid indomitæ Gallorum vires, quid Ungarorum audacia profint, ubi miles non Christum, non gloriam , cogitat , bellumque quasi tabernam ingreditur, eo consilio, ut divina huma-

humanaque omnia evertat? Leges sanctissimæ nobis propositæ sunt, at moribus perditissimis tenemur; armis optimis, at animis pessimis, militamus: summamque gloriam arbitramur, civilibus armis egregie digladiari. Si vero adversus Turcas segniter pugnemus, aut nullo vitio datur, aut nulla pœna propterea plectimur. Dicat mihi aliquis, quando quispiam miles, militiam deferens, aut transfuga, supplicio vel minimo affectus fuit? At priscis iis temporibus, pro tuenda militari disciplina, desertores, transfugæ, & hujusmodi, capite plectebantur, decumisque legiones universæ aliquando imminuebantur. Prodimus ergo in bellum pauci numero, moribusq; impuris contaminati, adversus innumera- biles hostium copias, militari disciplinæ apprime obsequentes. Turcæ enim in castris vitia exuunt; Christiani induunt. Turcæ nesciunt delicias; castra Christianorum ipsæ deliciæ dici possunt; ubi luxus & licentia dominatur, pluresque in exercitu meretrices quam milites numerantur. Ungarus proditionibus studet, Hispanus furatur, Germanus vino indulget, Italus scortatur, Gallus cantat, Anglus vorat; ita ut vix ne unum militari disciplina militē dicere jurē possis. Nulli

mirum, si sobrii frugique homines, continentés, ac vigilantes, vincant; vincanturque quorū alii errantes furantur, alii inter pocula, alii somno stertentes, aut cum scortis deprehensi, intercipiuntur. Hoc vero plebi populoque vitio dari debet. At quod nos Turcis pares copias in aciem educere non possimus, Reges ipsi in culpa sunt. Nunc bellum Gallorum tandem finem suum sortitum est: ex quo fit, ut non modo hæreses universas, sed & Principū odia simultatesque omnes extinguī, ac tandem firma subsidia adversus Turcas mitti, posse aliquando speremus. Germania igitur sola quinquaginta millia peditum in aciem educet, nec pauciores Italia armabit. Totidem, ac plures, è Gallia expectabimus. Hispaniaque pari militum numero Christianorum rebus favebit. Quid de Brabantia? quid de Flandria, Hollandia, Zelandia, Frisiaque dicam? ipsæ decem millibus equitum, xx peditum præsto aderunt. Reliquiæ Pannoniorum, Moraviæ, Slesia, Boëmia, & quicquid gentium Istro flumine alluitur, Poloniaque ac Ilyrico nomine continetur, quam facillime sexaginta equitū millibus adversus communes hostes in aciem prodire poterunt. Quis dubitet, hujusmodi copiis, procuratis

ratis divinis rebus, moribus nostris aliqua ex parte instauratis, nos de Turcis triumphaturos; Græciam, Thraciamque totam de hostibus recepturos? Quibus in locis adhuc etiam Christiani ritus & religio vigent. Ii enim homines accensis arrectisque animis Christianorum arma expectant, ad minima quæque rerum momenta defecturi, Othomanorumque regum jugum detrectaturi. Post unicum victoriam video plane latissimos aditus ad Pannoniæ res instaurandas dari, futurumque, ut Istro flumine tormenta, resque bello opportunæ, ad oppugnandum Byzantium comparentur: ad quarum rerum apparatus exciti Persæ ipsimet ad usque suburbia Byzantii excursiones facient. Aderunt & nobis Ruthenus & Georgianus reges; quibus adversus Turcas nec vires nec odia ullo tempore defuere. Æthiopum Rex Ioannes non conquiescet, sed, ab India movens, communi hosti clades, quam maximas poterit, inferet. Hæc volui tibi dixisse, Maximiliane, optimorum Imperatorum fili; tum, quod maxima ex parte Christianorum calamitates expertus sim; tum etiam, quod omnes de virtute tua polliceri ea videntur sibi, ut te alterum Maximilianum atavum, Ferdinandum pa-

ren-

rentem, Carolumq; Cæsarem patrum, futurum sperent. Quæ hominum maxima spes percrebrescit, viresque sumit, tuis aucta virtutibus. Nos igitur Deum oramus, ut tantæ de te expectationi faveat; cui te nunquam defuturum confidimus; ut tandem Christianorum res profligatæ ac fessæ in virtute tua conquiescant.

*Isocrates, Philippo, Macedonum
Regi, S. D.*

SI essem junior, non per literas tecum Sagerem, sed, istuc profectus, coram disseruissem. Sed, cum adolescentiæ meæ tempus, & rei gerendæ occasio, non una inciderint, (nam & ego senectute pigresco, & illa nunc rectissime administrari potest:) ita eam tibi explicare conabor, ut tali statu rerum fieri potest. Equidem haud ignoro, quantum ad persuadendum intersit, utrum viva voce, an per literas consilium detur: non eo tamen, quod iisdem de rebus præsentibus cum præsentibus agere, quam scriptis, facilius est; aut quod omnes dictis quam scriptis plus credunt, & illa tanquam decreta, hæc ut figmenta audiunt: sed propterea in primis, quod in congressibus, si quid forte vel non recte intelligitur, vel non creditur, is, qui

is, qui coram adest, utrique incommodo levi opera medetur; in scriptis, si talis scrupulus inciderit, nemo est qui tollat, ipso authore & defensore non præsente. Sed, cum totius rei penes te judicium sit, bona mihi spes est, orationem nostram ponderis aliquid apud te habiturā; quem, rejectis omnibus id genus impedimentis, res ipsas inspecturum arbitror. Quidam autem, qui in congressum & colloquium tuum venerunt, me ab hoc instituto deterrere sunt conati, dicentes, apud te assentatores in precio esse, contemni monitores. Quorum verbis si crederem, altum sane silentium tenerem. Sed nemo unquam mihi persuadebit, posse fieri, ut quisquam tanta rerum gestarum gloria, et laude sapientiæ, cæteris antecellat, nisi ex aliis discat, alios audiat, aliis benefaciat, & undecumque accersat & colligat ea quibus ingenium excolatur. Et hæc me causæ, ut ad te scriberem, moverunt. Dicturus autem magnis de rebus, deque iis, quas audire nemini mortalium, quam tibi, magis convenit, te alacriter adcoesse hortandum existimavi, ut scriptam orationem audire dignareris. Neq; enim aut ego nunc gloriolam capto, aut te hujusmodi orationes vel ad satietatem audivisse ignoramus. Adhæc, illud etiam omni-

omnibus est perspicuum, si qui ostentare ingenia cupiant, celebres eis conventus esse petendos, in quibus plurimos inveniunt eloquentiæ suæ admiratores. Si qui autem perficere aliquid studeant, iis cum eo differendum esse, qui rebus ipsis, quæ oratione fuerint expositæ, summum fastigium quamprimum imponat. Quod si urbi alicui consilium darem, cum magistratibus & principibus civitatis sermonem haberem. Cum vero de salute Græcorum tuenda suadere instituërim, quisnam mihi æquius appellandus erit, quam is, qui & nobilitate & potentia Græcis omnibus præstat? Nam, dum Lacedæmonii rerum potirentur, difficile tibi fuisset, gentis nostræ suscipere curam, illisque adversari. Nunc vero in eo loco res eorum sunt, ut bene secum agi putent, si suam ditionem tueri queant. Nostra vero civitas promptissime tecum suas opes conjunget, si de Græcia bene mereri studebis. Quæ igitur hac melior occasio tibi dari queat? Mirari autem non debes, me, qui neque orator sim, neque imperator, nec alioqui vir potens, negotium tam arduum suscepisse, duasque res maximas conari, ut de statu Græciæ orationem habeam, & tibi dem consilium. Nam ego, ut nunquam gessi rempublicam; (qua
qui-

quibus de causis abstinuerim, dictu operosum fuerit;) sic nemo negabit, opinor, me ea doctrina, quæ res minutas despicit, & consequi arduas conatur, non esse destitutum. Quare absurdi nihil fuerit, me, quid publice profit, aliquanto acutius prospicere, quam qui istic reipublicæ præsunt, magnamque authoritatem habent. Statim autem declarabimus, an alicujus precii simus. Cujus rei testis aptissimus ipsa erit oratio.

Isocrates, Philippo, Regi, S.

EQuidem scio, solere gratiores esse omnibus laudatores, quam monitores, præsertim si quis præcipiendi munus non rogatus ipse ultro suscipiat. Ego vero, nisi prius optimo studio te monuissem iis de rebus, quæ officii tui esse maxime videbantur; fortasse nunc de iis, quæ tibi acciderunt, pronuntiare non instituerem. Sed quia mihi propositum est, rerum tuarum gerere curam, cum patriæ meæ, tum cæterorum Græcorum causa; turpe mihi ducerem, de rebus non perinde necessariis consilium tibi dedisse, nunc longe graviorum nullam facere mentionem. Tum enim gloria tantum agebatur: hæc vero ad salutem tuam pertinent; quam neglexisse

xisse visus es omnibus qui convicia in te dicta audiverunt. Nemo enim est, quin statuatur, te in adeundis periculis magis esse temerarium, quam regia dignitas patiatur; & de laude fortitudinis, plus quam de summa rerum, esse sollicitum. Atqui æque turpe est, & hostibus circumdatum, strenue pugnando aliis non superiorem esse; & cum nulla talis urget necessitas, in ea te discrimina conicere, quibus superatis nihil memorabile gesseris, interfectus omnes fortunas una evertas. Neque vero semper præclarum habendum est, in bellis occumbere, sed, quando id sit pro tuenda patria, parentibus, liberis, tunc laudabile est. Cum vero talis obitus, & iis omnibus nocet, & superiorum temporum successibus labem aspergit; turpis habendus & fugiendus est, ut ignominiae conciliator. Eam potius ingerendis bellis rationem tibi sequendam censeo, qua urbes utuntur: nam hæ omnes, quum aliquo mittunt exercitus, rempublicam & senatum, de rebus præsentibus deliberantem, in tuto collocare solent. Vnde id etiam evenit, ut, si qua plaga fuerit accepta, non tamen una robur totum amittant, sed & multas clades perferre, & tandem vires suas reficere possint. Quod & tibi propositum esse debet: neque, ullum
salute

salute majus esse bonum, existimandum; ut etiam victoriis, quæ contigerint, recte uti queas. Non vides, quanta sit Lacedæmoniorum de Regum incolumitate sollicitudo? adeo ut clarissimi quique cives eos tueri soleant; quibus turpius est, à capite regis pericula non depulisse, quam clypeum abieciisse. Neque illa etiam ignoras, quæ Xerxi, Græcis insidianti, & Cyro, Persarum regnum aggresso, acciderunt. Alter enim, tantis præliis victus, tot cladibus affectus, ut nullum simile exemplum quisquam norit, tamen, quia vitam servavit, non ipse modo regnum recuperavit, sed idem filiis suis reliquit, & Asiam ita firmavit, ut nihil minus sit, quam prius, formidanda. Cyrus autem, victis omnibus regis exercitibus, cum summa rerum potitus esset, temeritate sua non se ipsum duntaxat tanto Imperio privavit, sed & milites suos in summas clades conjecit. Innumeros enumerare possem, qui cum maximorum exercituum Duces essent, quia ipsi immature perierunt, una secum multa millia in exitium traxere. Hæc exempla tibi considerata sunt, ut eam fortitudinis laudem, quæ cum vecordia & intempestiva ambitione conjuncta est, non appetendam judices neque ipse tibi in tot regnorum periculis, alia.

alia ignobilia & militaria accersas: neque cum iis certes, qui aut vitam calamitosam perdere volunt, aut stipendii majoris impetrandi causa temere in pericula se coniiciunt: neque gloriam desideres, tibi cum aliis multis & barbaris & Græcis communem; sed eam, cujus tanta sit amplitudo, ut tibi soli nostro sæculo contingere queat: neque tales virtutes nimis adames, quæ contemptis etiam viris haud negatæ sunt; sed illas, quarum nemo malus particeps est: neque bella geras obscura, & molesta, cum magis honorifica & suavia suscipere liceat; neque ea, per quæ & tibi conjunctissimos molestiis ac sollicitudinibus afficias, & hostibus tuis magnam spem subministres; id quod nunc abs te factum est; sed barbaros istos, cum quibus nunc bellum geris, tantisper vicisse suffecerit, dum regnum tuum in tuto collocaris. Iste vero, qui nunc Rex magnus appellatur, regno evertendus est, ut & gloriam tuam amplifices, & Græcis ostendas cum quibus bella gerenda sint. Vehementer autem optarim, me hæc ad te scripsisse ante susceptum bellum; ut vel, si paruisses, in tantum periculum non incidisses; vel, si mea monita neglexisses, ego non viderer ea suadere, quæ nunc eventu magistro edocti omnes probant; sed

sed ut exitus testaretur, vera & recta fuisse mea iis de rebus consilia. Cum vero hujusce disputationis ea natura sit, ut latam dicendi materiam præbeat, ego pluribus verbis non utar; quod existimo, & te ipsum, & ex amicis tuis viros honestissimos, facile, quam multa volueritis, ad hæc adjecturos. Præterea vereor, ne fuerim in hoc loco tractando curiosior. Nam, dum paulatim progredior, non animadverti, me, neglecta epistolæ brevitate, in justæ orationis prolixitatem incidisse. Quæ quamquam ita sunt, non tamen præterire debeo quæ de nostra urbe dicenda sunt: sed danda est opera, ut te horter ad ineundam cum ea familiaritatem & amicitia usum. Arbitror enim, esse multos, qui nuncient, atque dictitent, non odiosissima tantum, quæ apud nos de te dicta sint, sed quæ etiam de suo affingant. Minime autem te illos audire decet. Nam absurdum fuerit, te, qui nostrum populum eo reprehendas quod calumniatoribus faciles aures præbeat, illos magnifacere, qui artem calumniandi exercent. Satis enim intelligis, istos, quo facilius civitatem nostram à quibuscumque in quamvis posse deduci partem asserunt, tanto magis opportunam tibi eam ostendere. Nam, si ii, qui nulla in rempublicam bene-

beneficia conferunt, solis verbis, quicquid volunt, impetrant: qui consentaneum est, te, qui ipsis factis nos plurimum juvare potes, quicquam à nobis non consecuturum? Acerbis autem nostræ urbis accusatoribus illos esse opponendos video, qui Atheniensium omnia esse dicunt; neque minus eos, qui Athenienses nulla, vel magna vel parva, in re deliquisse asserunt. Absit autem, ut ego tale aliquid dicam. Nam, cum alii, nec Deos omni crimine vacare, putent; ego erubescerem gloriari, nos nihil unquam peccavisse. Illud tamen dicere non verebor, te nullam aliam urbem inventurum, quæ vel Græcis, vel tuis rebus, magis opportuna sit. Quod tibi est quam diligentissime considerandum. Nec enim tantum, si tecum societatem inierit, sed si vel amica tibi esse visa fuerit, maximas tibi allatura est utilitates. Nam & hos, qui tibi nunc parent, si non habebunt ad quos confugiant, facilius in officio continebis, & quosvis barbarorum celerius subiges. An vero talis benevolentia non alacriter expetenda est, qua non modo partum imperium secure teneas, sed amplam etiam ditionem sine periculo acquiras? Miror equidem eorum Principum rationes, qui milites conducunt, & magnas in eos impensas faciunt,

faciunt, à quibus & ipsi norunt plures eorum, quibus illi crediderunt, esse proditos quam servatos; tam potentis vero urbis adiungere sibi studia non conantur, quæ cum singulas urbes, tum universam Græciam, sæpe jam servavit. Illud cogita, multos laudare prudentiam tuam, quod ita cum Thessalis egeris, ut & æquum erat, & illis expediebat; qui quidem viri sunt, non facillimis ingeniis, sed animosi, & seditionibus gaudentes. Isthæc eadem ratio de nobis etiam erit ineunda; quum scias, ut regionem Thessalorum, sic Atheniensem potentiam, tibi esse finitimam. Quam tibi omni studio conciliare debes; cum sit multo præclarius, benevolentiam civitatum capere, quam mœnia. Hoc enim non modo invidiosum est, sed, quicquid sit hujus generis, exercitibus plerumque ascribitur. si autem familiaritates contrahere potueris, & hominum benevolentiam colligere, sapientiam tuam mirabuntur omnes. Hæc, quæ de urbe nostra disserui, affirmanti mihi jure credas. Satis enim constat, me & meis civibus adeo assentari non solere, ut nemo sit omnium qui sæpius eos reprehenderit: neque etiam in magno esse pretio apud vulgus & temerarios æstimatores, sed illorum aliis & ignotum esse, & aliis æque

æque invisum ac te. Hoc tamen inter nos interest; quod tibi opes & potentiam invident; mihi, quod me illis sapientiores esse profiteor, pluresque sunt, qui mea consuetudine, quam illorum, delectentur. Utinam vero tam facile mihi esset, quam tibi, conceptam de nobis vulgi opinionem abolere. Nunc id in tua manu est, modo velis. Mihi vero, cum propter senium, tum pluribus aliis de causis, fortuna boni consulenda est. Quare non video, plura dicere quorsum attineat: hoc tamen addam, licere vobis, ut vestrum imperium ac felicitatem felicitati & benevolentiae Græcorum commendetis. Vale.

Isocrates, Philippo, Regi, S. D.

ET si, cum Antipatro etiam, & de nostræ urbis & tuis commodis, satis, ut mihi persuadeo, copiose, disserui: tamen ad te quoque scribere volui, quod, pace jam facta, mihi agendum esse videatur non multum absimilia iis quæ in oratione perscripta sunt, sed multo breviora. Tum enim suadebam, ut, compositis nostræ urbis & Lacedæmoniorum & Thebanorum Argivorumque controversiis, Græcos in concordiam reduceres. Existimabam enim, si id à principibus civitatis im-
pe-

petraſſes, quamprimum reliquas quoque ſecuturas. Ac illo quidem tempore alius erat rerum ſtatus. Nunc vero in eo loco res ſunt, ut ſuadere nihil ſit neceſſe. Nam propter commiſſum prælium omnes co-acti ſunt ad ſanam mentem redire, & ea deſiderare quæ te velle tum agere tum dicere cogitabam; bellū videlicet, omiſſa inſania & avaritia, qua contra ſe mutuo graſſarentur, in Aſiam eſſe transferendum. Præterea illud etiam complures ex merequirunt, utrum ego tibi ſuaſerim, ut expeditionem contra barbaros ſuſciperes, an vero, cum tu jam id decreviſſes, ego ſententiæ tuæ approbator acceſſerim. Ego vero, cum nunquam hætenus te convenerim, nihil de hoc comperti me habere dico, ſed putare tamen, te id jam antea conſtitutum habuiſſe, me vero tuis deſideriis ſuffragatum eſſe. Quæ illi cum audirent, me rogabant, ut te hortarer, ne mutares conſilium. nunquā enim edi poſſe illuſtriora facinora, vel Græcis utiliora; neque unquam poſſe dari meliorem gerendæ rei occaſionem. Si igitur ea, qua olim florui, facultas ingenii mihi ſuppeteret, neque ſenectus omnes vires ademiſſet, non per literas tecum agerem, ſed coram extimularem te & hortarer ad hoc negotium ſtrenue ſuſcipiendum. Nunc,
ut poſ-

Isocrates, Philippo, Regi, S. D.

QUamquam, literas mittere in Macedoniam, non modo nunc quum bellum vobiscum gerimus, sed pacis etiam tempore, apud nos periculosum fuit: ego tamen ad te scribere de Diodoto institui. Aequum enim esse existimo, ut magnificiam, cum omnes familiares meos, qui se nobis dignos præbuerunt, tum vero hunc, propter & benevolentiam erga nos, & morum integritatem. Maxime autem vellem, eum per nos fuisse commendatum. Postquam vero aliorum opera ei aditus ad te patefactus est, hoc mihi relinquitur, ut testimonium de eo dicam, eamque cognitionem vestram, quæ mutuo intercedit, confirmem. Nam, cum multi & varii viri, atque ex illis plerique gloria celebres, mea consuetudine sint usi; reliquorum alii eloquentia, alii prudentia, & rebus gerendis, claruerunt. Ac alii quidem vitæ modestia & suavitate morum commendati sunt, cum ad alios usus & actiones prorsus inepti essent: huic autem contigit ingenii dexteritas, ut in iis, quæ diximus, omnibus sit absolutissimus. Quæ ego dicere non auderem, nisi & ipse ab omni parte perspectum eum

L habe-

haberem, & omnino putarem, te idem cogniturum, partim ex familiaribus cum eo congressibus, partim ex eorum, quibus notus est, sermonibus. Quorum nemo erit, nisi supra modum sit invidus, quin fateatur, cum & eloquentia, & consiliis, nulli esse inferiorem, virumque justissimum, & modestissimum, & ab auri cupiditate alienissimum, inque vitæ consuetudine suavissimum hominem, & discretissimum. Adhæc, magnam esse in eo dicendi libertatem, non illam quidem indecoram, sed hanc quæ jure maximum signum habetur benevolentiae erga amicos; quam ex principibus ii, qui tantos animos habent, quantos Imperii majestas requirit, tanquam utilem venerantur: qui autem imbecillioribus sunt ingeniis, quam potentiae amplitudo postulat, ut molestam adversantur, quasi per eam cogantur aliquid contra sui animi voluntatem facere; ignari nimirum, cum de utilitate deliberatur, eos, qui adversari audent, maximam eis dare potestatem, ea, quæ velint, faciendi. Consentaneum enim est, eos, qui ad gratiam loqui omnia student, non modo regum Imperia, quæ multa (idque aliter fieri nequit) pericula secum trahunt, firmare non posse; sed ne rerum publicarum quidem, quæ aliquan-

aliquanto tutiores sunt, libertatem. De-
 cet autem, eos, qui propter audientium
 utilitatem libere, quæ sentiunt, dicunt,
 multa conservare posse quæ alioqui peri-
 tura videbantur. His de causis æquum est
 apud omnes principes, majorem esse eo-
 rum, qui vera dicere non dubitant, au-
 thoritatem, quam horum, qui ad gra-
 tiam omnia, nihil autem gratia dignum,
 loquuntur. Fieri tamen solet, ut illi apud
 plerosque minore in precio sint, quam
 assentatores. Id quod etiam Diodotum
 apud quosdam Asiæ procures afflixit.
 Quorum commodis cum multis in rebus
 consulisset, non dandis modo consiliis,
 sed rebus etiam gerendis, adeundisque
 periculis; quia tamen liberius eos officii
 sui monebat; tum honoribus, quos in
 patria tenuit, spoliatus est, tum amplissi-
 morum spe præmiorum decidit. Ita plus
 valuerunt levissimorum hominum adu-
 lationes tanti viri meritis. His de causis
 tametsi ad vos se conferre semper in ani-
 mo habebat, tamen nescio quo timore
 est retardatus: non quod omnes in altio-
 ri dignitatis gradu collocatos similes esse
 putaret, sed quia propter objectas ab il-
 lis difficultates minus a vide spem, quæ à
 vobis ostendebatur, amplecti audebat. In
 quo idem illi accidisse videtur, quod na-

vigantium plerisque, qui ubi semel in tempestates inciderunt, non amplius securis animis mare ingrediuntur, etsi sciunt, sæpe prosperam etiam navigationem solere contingere. Sed quoniam tibi commendatus est, id bene esse factum, eique profuturum, puto. Quod ut existimem, tua imprimis facit humanitas; quæ ab exteris hominibus prædicatur. Deinde vos præterire non arbitror, nihil esse vel suavius vel utilius, quam, fideles simul & utiles amicos parare beneficiis; & de talibus viris bene mereri, propter quos multi etiam alii gratiam nobis habituri sunt. Omnes enim boni & docti eos, qui præstantibus doctrina & virtute viris honorem habent, non minus laudant & venerantur, quam si in ipsos collata fuissent omnia. Sed ipsum Diodotum suapte potissimum industria effecturum esse arbitror, ut sui curam geras. Author autem ejus filio fui, ut se ad vos conferret, seque vobis in disciplinam quasi tradito, proficere atque operæ pretium facere conaretur. Quod ubi ex me audierat, se quidem vestræ amicitiae percupidum esse dixit: sed eodem esse erga illam animo, quo erga certamina pugilum: quos cupere in illis victoriam consequi; sed ad ea propterea descendere non audere, quod sibi

sibi vires coronis dignas deesse animad-
verterent. eodemq; modo desiderare ho-
nores à vobis consequi, sed eam sibi fa-
cultatem negatam arbitrari. nam & im-
peritia sua & splendore vestro se deterre-
ri. Huc accedere corpusculum quoque
minus elegans & reprehensionibus ob-
noxium, quod existimet in multis sibi
rebus impedimento fore. Et hic quidem,
quod è re sua esse putabit, id faciet. Sive
autem ad vos se contulerit, sive, quieti
ac otio sese dans, in hisce locis versabi-
tur, curæ tibi esse velim; cum cætera,
quibus indigebit, omnia ut subministres;
tum vero, ut & hujus & parentis ejus vi-
ta in tuto collocetur. Existimare enim
debes, te hunc tanquam depositum ha-
bere à senectute nostra, (quæ minime
certe negligenda est,) & ab eâ authorita-
te (si quo forte nomine digna videbitur)
quam habemus, & ab eâ benevolentia
qua vos per omnem ætatem sum prose-
cutus. Neque mireris, si vel prolixiorē
scripsi epistolam, vel aliquid in ea curio-
sius aut senilius diximus. ego enim, ne-
glectis cæteris rebus omnibus, in hoc u-
num toto animo intentus fui, ut appare-
ret, mihi maximæ curæ esse amicorum
commoda, quos summa charitate com-
plector. Vale.

Isocrates, Alexandro, Regi, S. D.

CUM ad patrem tuum literas darem, absurde me facturum putabam, si te, qui in eodem loco cum illo versaris, neque compellarem, neque salutarem, neque tale aliquid ad te scriberem, quod efficeret, ne ii, qui me ignorant, putarent, me jam senio desipere, aut prorsus delirare; sed ingenium, quod adhuc mihi reliquum est, nec una cum vigore corporis interiit, non indignum esse ea facultate qua junior florebam. Prædicari autem te ab omnibus audio, ut & humanum, & Atheniensibus amicum, & sapientiæ studiosum: in quo profecto non insipienter, sed prudentissime facis. Illo quoque laudem mereris, quod ex nostris civibus amare & magnificare diceris, non eos, qui nullum virtutis & doctrinæ studium habuerunt, malarumque rerum cupiditate constricti tenentur; sed hos, quorum disputationibus audiendis nullas molestias capias; quorumque commerciis & consiliis utendo, neque damnis, neque injuriis afficiaris. talium enim consuetudo prudentibus expetenda est. Inter doctrinarum porro genera ne dialecticas quidem disputationes improba-

re

re diceris, sed sic de illis sentire, ut eas existimes in privatis congressibus permultum valere; non tamen vel populi gubernatoribus, vel principibus, esse opportunas; neque expedire, nec decere, ut, qui dignitate cæteris præstant, vel ipsi cum civibus rixentur, vel cæteris dent contradicendi licentiam. Hoc igitur studium te non amare ferunt; sed eloquentiæ disciplinam permagni facere, qua utimur, & in quotidianæ vitæ negociis, & cum de republica deliberamus: per quam id tibi contigit, ut & nunc de futuris rebus prudenter tuis populis, & quid singulos facere deceat, non stolide præcipere, & de rebus honestis & justis, horumque contrariis, recte judicare videaris; præterea sic vel pœnis, vel præmiis, afficere utrosque, ut mereantur. Magna igitur laude digna est tua sapientia, qui talibus studiis occuperis. spem enim & patri & reliquis amicis facis, ubi ætate processeris, & in iis actionibus perseveraveris, fore ut reliquos tantum sapientiâ anteeas, quantum pater tuus omnibus antecellit. Vale.

Isocrates, Iasonis Liberis S. D.

REnunciavit mihi nostrorum legatorum quidam, se à vobis sevocatum, ac

seorsum à cæteris interrogatum esse , an
persuadere mihi possit , ut peregre pro-
fectus vestra familiaritate utar. Ego vero
propter Iasonis & Polyæcis hospitium
libenter ad vos venirem: cum enim con-
gressum posse omnibus vobis prodesse
scio. Sed multa me impediunt: atque illud
inprimis , quod & itineris labores ferre
nequeo , & tam grandi ætate peregre vi-
vere indecorum est. Deinde, quod omnes,
audita ea peregrinatione , jure me con-
temnerent , qui , reliquo vitæ meæ tem-
pore ocium sectatus, in senectute demum
peregrinari instituerem ; quum deceret
etiam , si prius alibi vixissem , nunc do-
mum festinare , postquam ab obitu tam
prope absūm. Adhæc (vera enim dicenda
sunt) etiam civitatem meam formido,
dum initas cum ea societates celeriter
solere video dirimi. Quod si & erga vos
tale aliquid accideret , quomodo & cri-
mina & pericula effugere possẽ , (id quod
difficile admodum est ,) & non admitte-
rem dedecus, sive aliqui putarent , vos à
me propter urbem meam negligi , sive
propter vos patriæ rationem non haberi?
Cum autem non communis sit utilitas,
haud scio quomodo utrisque gratum fa-
cere queam. Causæ igitur, propter quas,
quæ vellem, mihi facere non licet , tam
multæ

multæ inciderunt. Neque tamen decere existimo, ut, de meis dumtaxat scribens, res vestras negligam: sed, quæ istic coram differuissem, hæc eadem nunc ita, ut poterò, explicare conabor. Minime vero putetis, hanc epistolam non hospitii vestri, sed ostentationis causa, à me scriptam esse. Non enim ita insanio, ut ignorem, me, hac affectum ætate, meliora iis, quæ prius edita & cum applausu excepta sunt, scribere nequaquam posse; si deteriora protulerò, gloriæ meæ multum decessurum. Deinde, si ostentationi ingenii servire magis, quam serio vobiscum agere, studerem, non hoc argumentum ex omnibus delegissem, de quo hand difficile est apte disserere, sed alia longe pulchriora & uberiora reperissem. Sed neque hætenus unquam de iis mihi placui, sed ob alia potius, quæ plerique ignorant: neque nunc eo animo laborem hunc cepi. At cum vos multis arduis negotiis implicatos esse videam, ostendere volo, quæ mea sit de illis sententia. Ad dandi quidem consilii facultatem ætati meæ adesse censeo; nam experientia, & rerum multarum usus senes erudit, atque efficit, ut, quid expediat, acutius, quam alii, perspicere videantur: de propositis autem rebus suaviter & concinne, atque

elaborate, dicere, non jam nostræ ætatis opus est. Proinde hoc mihi suffecerit, si meam sententiam non dissolute prorsus exposuerò. Neque vero miremini, si quid dicere videbor quod prius audivistis. nam eorum quædam fortassis invito in mentem venient; quædam, quod instituto meo idonea sciam, assumam. ineptus enim essem, cum alios videam dicta mea mutuari, si ego solus iis, quæ prius ipse dixi, abstinere. Hæc propterea præfatus sum, quod id, quod prius occurrit, unum ex pervulgatis est. Soleo enim ad nostræ disciplinæ sectatores dicere, ante omnia esse considerandum, quidnam oratione & partibus orationis efficiendum sit: quod ubi invenerimus, & accurate confecerimus, rationes & ornamenta quærenda esse dico, quibus argumentum expoliatur, & finem eum, qui nobis propositus fuerat, consequatur. Hæc de orationibus dicimus. Est autem idem, & aliarum rerum omnium, & vestræ deliberationis, fundamentum. Non enim fieri potest, ut quicquam prudenter agatur, nisi hoc primum singulari sapientia cogitaveritis & constitueritis, quales vos in posterum præbere velitis, & quomodo vitam vestram instituere, qualemque auctoritatem expetere, & utrum
hono-

honorem adamare, eumne, quem cives ipsi ultro deferunt, an qui ab iisdem invitis extorquetur. His jam definitis & decretis, singulæ actiones, quæ in dies incidunt, considerandæ sunt, & efficiendum, ut ad eum finem, qui initio propositus fuit, referantur. Quod si hoc modo quæretis, sapienterque cogitabitis, vestra consilia ad rationem utilitatis, tanquam metam propositam, accommodabitis, eamque magis assequemini. sin nullum tale fundamentum iacietis, sed id, quod fortuito incidet, agetis; necesse est, ut animis vestris erretis, & multis rebus frustrimini. Fortassis autem eorum aliquis, qui temere vitam instituerunt, has rationes perstringere conabitur, & ut, certi aliquid de quæstione supra agitata dicam, postulabit. Non igitur, quid tota de re sentiam, dissimulandum est. Mihi securior esse videtur & melior privatorum hominum quam Tyrannorum vita: & jucundiores eos honores esse puto, quos principibus viri magnanimi habere solent, quam quos à servitute oppressis extorquet metus. Quamquam autem scio, fore multos qui mihi adversentur, & familiares vestros; inprimis hac de re differendum est. Hos enim vos magno-pere ad retinendam firmandamque Tyranni-

rannidem incitare opinor. Non enim rei naturam universæ, nec ab omni parte, in-
tuentur, sed hallucinantur, & in errores ipsi se conjiciunt. Authoritatem illi quidem, & emolumenta, & voluptates, vident, iisque se fruituros sperant; sed turbas, & terrores, & clades, principibus objici solitas, illorumque amicis, non conspiciunt. Idemque illis evenit, quod iis, qui turpissima & maxime nefaria facinora moliantur: qui, tametsi rerum pravitatem non ignorant, tamen id commodi, quod illis inest, excerpere se posse sperant; pericula vero & mala omnia rebus annexa effugituros; eamque de se rationem inituros, ut à discrimine omni sint remotissimi, utilitatibus vero proximi. Si qui igitur ita sentiunt, illos ego sua socordia beatos esse facile patior: me vero puderet, in dandis consiliis meum duntaxat compendium spectare, illos autem, quibus consulerem, prorsus negligere, nec (repudiatis commodis, & cæteris rebus omnibus, ut à me alienis) utilissima suadere. Mihi igitur sic auscultetis, velim, ut, me hoc esse animo, non dubitetis. Valete.

Isocra-

Isocrates, Timotheo S. D.

Qua necessitudine inter nos conjuncti sumus, ex multis te audivisse arbitror. Gratulor autem tibi primum, quod ista potestate melius uteris, quam pater, ac prudentius: deinde, quod honestam famam parandi, quam magnas divitias coacervandi, es studiosior. Non enim parvum signum virtutis ostendis, sed, quam fieri potest, maximum, qui, tali animo sis præditus. Quare, si, ut cœpisti, passimque de te dicitur, perrexeris, non defuturi sunt, qui & sapientiam tuam, & institutum istud, laudibus illustrent. Arbitror autem, etiam ea, quæ de patre tuo dicuntur, momenti plurimum ad hoc esse allatura, ut sapere, aliisque præstare, videaris. Solent enim plerique non ita commendare & venerari laudatis patribus natos, ut eos qui patrum sævitiam & immanitatem nulla ex parte imitantur. Quicquid enim boni mortalibus præter expectationem offertur, id omnibus in rebus longe gratius est, quam ea, quæ usitata & legitima ratione contingunt. His igitur consideratis, quærendum tibi & solícite cogitandum, quibus modis, & quorum opera, quo-

quorumque consiliis, tum urbis calamitates emendes, tum cives ad beneficentiam & modestiam cohorteris, atque efficias, ut & suavius & securius ævum exigant, quam superiori tempore. Nam hæc officia sunt bonorum & cordatorum Principum. Quibus nonnulli contemptis in id unum intenti sunt, ut cum summa licentia voluptates atque libidines suas expleant, eiectis aut spoliatis optimis & prudentissimis civibus. Ignorant illi nimirum, decere viros prudentes in hoc honorum & dignitatis fastigio collocatos, non ex aliorum miseriis suas parere voluptates, sed sua sollicitudine & laboribus civium felicitatem augere; neque acerbiter & sævitiam in omnes exercere, suamque salutem negligere; sed imperium ea clementia & æquitate administrare, ut nemo eis audeat insidiari; & non minore vitam suam diligentia munire, quam si omnes in eorum exitium conspirassent. Hac ratione fiet, ut & ipsi extra periculum sint, & apud Græcos cæteros gloria floreant. quibus majora bona invenire difficile est. Inter scribendum autem in mentem mihi venit, secundissima tibi omnia accidisse. Opum enim abundantiam, quæ sine tyrannide parari nequit, pater multa violentia & magnis

magnis odiis partam tibi reliquit. His vero bene & humaniter uti, in tua manu est, & in eo te summo studio elaborare decet. Quæ mihi igitur consulta videantur, hæc sunt. Sic autem sese res habet. Si pecunias, magnamque potentiam, & pericula, sine quibus hæc parari nequeunt, adamas; alii tibi in consilium adhibendi erunt. Sin tibi harum rerum abunde est, virtutis vero & honestæ famæ ac popularis benevolentiae desiderio teneris; & orationi meæ obtemperandum erit, & cum illis certandum, qui præclare suas urbes administrant, non modo ut par illis evadas, sed etiam ut eos superes. Nam & Cleomium audio, qui Methymnæ dominatur, cum in aliis actionibus boni viri & prudentis fungi officio; tum tantum abesse ut quemquam occidat, aut in exilium agat, aut proscribat, aut simili clade afficiat; ut cives ejus in summa securitate degant; ut patria pulsos ab exilio revocet; ut restitutis possessiones, unde ejecti fuerant, reddat; iis vero, qui eas tenuerint, tantum pro eis numeret, quanti emerunt; neque iis contentus, cives omnes armis instruat, exornet; nihil metuens nequi novarum rerum studiosi insidias ipsi struant; quod siqui audeant, mortem oppetere, satius esse ducit, in
tanta

tanta humanitate & benignitate erga ci-
ves, quam, crudeliter in eosdem grassan-
do, vitam ultra usitatum mortalium ter-
minum producere. Plura fortasse de iis &
accuratius tecum differuissẽm, nisi mihi
hæ literæ cum magna festinatione scri-
bendæ fuissent. Sed alias iterum tibi (nisi
me senium prohibuerit) consilium dabi-
mus. In præsentia vero de privatis rebus
agemus. Autocrator, qui literas has tibi
reddit, est mihi familiaris, nam & iisdem
studiis delectatur; & ejus arte usus sum;
sæpe denique illi author fui, ut ad te pro-
ficisceretur. His omnibus de causis cum
honorifice ita que tractes velim, ut no-
strum utrique expedit; ac præ te feras,
quicquid officiorum in eum contuleris,
aliqua ex parte, mea quoque gratia fieri.
Neque mireris, me tam expedite ad te
scribere, qui à Clearcho nihil unquam
petierim. Nam fere omnes, qui isthinc
ad nos navigant, te similem esse dicunt
præstantissimis eorum qui nobiscum una
versati sunt. Clearchum vero, quo tem-
pore apud nos fuit, fatebantur omnes,
qui rei aliquid cum eo habuerant, libe-
ralissimum esse, & mansuetissimum, &
humanissimum inter discipulos: post-
quam autem principatum est adeptus, ita
mutasse animum visus est, ut omnes, qui
eum

cum prius noverunt, demirentur. Ob eas igitur causas factus sum ab eo alienior. Te vero & amo & probo; ac vehementer velim, te nos complecti familiariter. Sed & tu ipse quamprimum ostendes, an idem tuus sit erga nos animus: &, cum Autocratorem commendatum habebis, tum epistolam ad nos mittes, qua vetus amicitia nostra & hospitium renovetur. Vale; &, si quid aliud à nobis tibi præstari volueris, scribito.

Isocrates, Dionysio.

SAtellites, lictores, caduceatores, & Saltissimi solii adeptio, sapientiæ studio tenebras offundunt: nec ullâ res est, qua virtus facilius & celerius exterminetur. Non una cum fortuna mutasti etiam naturam. adhuc pelliceo sacco amictus es. Nam nativitatis tuæ primordium mortale fuit. Cur igitur inanis ista gloriola sectilem utrem ita inflavit? Ingenti amentia replētus es, ô infelix, & naturæ fragilis agnitione spoliatus. Itane vero te sublimes isti fortunæ motus à vetere contemplatione desciscere coëgerunt, eoque redegerunt, ut sobrium illum furorem desereres? Fuit olim illustris tua moderatio: nunc vero humi depressa est; fortuna

fortuna tua pervenit ad summum. A falsa igitur felicitatis umbra recede, & fugitivam fortunam effuge. Cujus levitatem & perfidiam si anteverteris, mutatione subito ingruente minus percelleris. Vale.

Isocrates, ad Mitylenaorum Principes.

A Phanei liberi, mei nepotes, ab Agnore in musicis eruditi, me orarunt, ut vos per literas rogarem, ut, postquam etiam alios nonnullos ab exilio revocastis, & hunc cum patre & fratribus restituatis. Quibus ego cum dicerem, vereri me, ne nimis absurde & impudenter facere viderer, qui rem tantam à viris, cum quibus nunquam prius vel collocutus vel familiaritate conjunctus essem, impetrare studerem; hac excusatione audita, rogando multo magis instare cœperunt. Ubi vero spe sua prorsus frustabantur, omnibus apparebat, eos affici molestia, & graviter ferre repulsam. Cum autem eos vehementius dolere viderem, quam decebat: tandem pollicitus sum, me hanc epistolam scripturum, & ad vos missurum. Atque hæc habeo, quæ recte dicam ad deprecandum stultitiæ & importunitatis crimen. Arbitror autem, vos prudenter fecisse, qui & cum civibus vestris
in

in gratiam redieritis, & operam dederitis, ut exulum numerus minuatur, fociorum in republica major fiat, & in ista seditione urbis nostræ exemplum imitemini. Illud autem inprimis laude dignum est, quod exulibus creptas opes una cum patria restitulistis. Ostenditis enim, & omnibus declaratis, vos, non alienarum opum cupiditate impulsos, sed reipublicæ metuentes, urbe eos eiecisse. Verum, etiamsi nihil horum decrevissetis, nec ullum exulem reciperetis, è re nostra tamen esse putarem, ut iis, de quibus ego scribo, patriam redderetur. Quum enim inter omnes constet, urbem vestram peritia musicæ omnibus antecellere, & viros in ea arte celeberrimos apud vos esse natos; turpe fuerit, eum, qui cognitione hujus disciplinæ ætatis nostræ artifices superat, tali civitate exulare: &, quum cæteri Græci eos, qui aliquo honesto studio eminent, tamen si prorsus alienos, civitate donare soleant; vos, quorum apud alios hac de causâ celebre nomen est, ita esse negligentes, ut civem vestrum apud exteros inquilinum agere patiamini. Miror equidem eas civitates, quæ majora præmia victoribus in ludis gymnics decernunt, quam his qui ingenii solertia & industria sua vitæ aliquid utile

repe-

repererunt : neque considerant , pedum celeritatem , & robur , morte una cum corpore interire ; artium autem eam naturam esse , ut perpetuo durent , sui que studiosi semper vivant . Hæc prudentibus considerata sunt , ut maximi faciant bonos & justos rerum publicarum gubernatores . Proximum honoris gradum iis tribuant qui civitatibus ornamento & gloriæ esse possunt . Plerique enim , in hæc ceu specimen quoddam intuentes , reliquos cives universos talibus viris similes esse judicant . Fortassis autem dixerit aliquis , si qui beneficium petant , non rem ipsam tantum esse laudandam , sed ostendendum etiam , ipsos non esse indignos ea re , de qua verba faciant . Sic autem res se habet . Ego reipublicæ administratione , concionibus audiendis , abstinui ; propterea quod & vox & audacia me deficiebat . non tamen omnino nullus mei usus , aut nulla fuit autoritas : sed me his , qui vestræ cæterorumque sociorum dignitati ac commodis patrocinati sunt , & consiliarium & adiutorem fuisse comperietis . Præterea , plura verba feci de libertate & jure suo Græcis restituyendo , quam omnes isti qui suggestum crebris concionibus contriverunt . Pro quibus rebus vos mihi merito maximam gra-

gratiam haberetis. Nam hunc reipublicæ statum maxime perpetuo desiderastis. Arbitror autem, Cononem & Timotheum, si viverent, ac Diophantum, si ex Asia redisset, mea causa strenue fuisse laboraturos; volentes idem mihi à vobis tribui, quod sibimet ipsis, si vestra ope aut opera indigerent. De quibus nescio quorsum attineat plura verba facere. Nemo enim vestrum ita vel adolescens vel obli-viosus est, quin collata in vos beneficia ab illis noverit. Sic autem de negotio rectissime deliberaturi videmini, si consideretis, & quis sit qui orat, & pro quibus hominibus intercedat. Reperietis enim, me conjunctissimum & amicissimum fuisse iis, qui vos & alios summis beneficiis affecerunt: eos vero, pro quibus intercedo, ejus generis esse homines, qui nec senioribus & magistratū fungentibus molesti sint, & adolescentes studiis jucundis, & utilibus, & huic ætati convenientibus, exerceant. Nolite vero mirari, me tam facile scribere, ac tum de cæteris omnibus, tum mihi charissimis, literas ad vos dedisse. nam & filiis nostris obsequi, & simul ostendere cupio, etiam si rempublicam non attigerint, sed mores dumtaxat & institutū meum imitentur, fore tamen, ut apud alios in præcio

cio sint, & magnifiant. Unum adhuc est reliquum, si precibus nostris locum dare visum fuerit, ut Agenori & fratribus ejus significetis, eis mea causa ex quadam parte ea tribui, quæ sibi tribui vehementer optant. Valete.

Thessali, Phocensibus S. D.

DISSIMULATIS adhuc etiam, Phocenses, quantum viribus vobis præstemus? cum nos &, quandiu Græcorum partes secuti sumus, tandiu priores partes habuerimus. nunc vero apud Persarum Regem eum locum tenemus, ut pro arbitrio nostro vos, patria deturbata, ac quasi servos, vendere possimus. Sed, tametsi tantum virium habeamus, id scelus moliri nunquam auderemus. nihil est enim quod facilius quam injurias obliviscamur. Pollicemur igitur, nos operam duros, ut vobis, agroque Phocensis parcat, si nobis quamprimum quinquaginta auri talenta pendantur. Quod cum nobis magno commodo, tum vobis majori usui futurum speramus. Valete.

Phocenses, Thessalis.

SI nos non puduisset, Græciam per prodicionem fallere, neque nobis apud

apud Persarum Regem honorificentissimus locus defuisset, nec esset quod fortunæ vestræ aliqua ex parte invideremus: At illud nobis inprimis statutum est, omnia extrema potius, quam proditiōis notam subire, aut patriæ communi deesse. Proinde desinite, vel nobis interminari, vel de fide nostra quicquam dubitare. Valete.

Mardonius, Persa, Atheniensibus.

HÆc mihi Arses meus perscripsit; Omnes injurias, quibus resp. Atheniensis me affecit, illi condono. Tu vero, Mardonius, ita etiam facies. Atheniensibus urbem agrosque reddas; aliumque locum, quem maluerint, sibi deligant; liberi immunesque sint; Tempia Deorum immortalium dejecta & combusta, quam primum mecum federa percusserint, instaurentur. Nunc partes meæ sunt, regis jussui obtemperare, modo hæc vos probetis. Dicite, quæso, Athenienses, quæ dementia adversus Persarum Regem bellum geritis, quem nunquam vincere, nec semper æquare, poteritis? Arbitror, vos scire, quas & quantas copias adhuc in acie habeam; quæ tametsi à vobis fûgentur ac frangantur, nec propterea ocium

ac

ac quietem sperare debebitis. nam & major exercitus ac firmior facile cogere-
tur. Ne patiamini patriam vestram in-
terire, neve illa vosmet vestro scelere pri-
vetis, jam longis laboribus finem impo-
nentes: oblatamque pacem sine ullo pro-
ditionis metu cum maxima vestra digni-
tate tandem complectamini; &, quod
reipublicæ utile est, statuatis. Valete.

Lacedæmonii, Atheniensibus.

HUc nos Lacedæmonii vos oratum
misere, ne quid novi adversus res
Græciæ statuatis, neve barbarorum. ver-
bis pro factis fidem aliquam adhibeatis.
Hæc vero nullam Græcorum gentem
decent, inprimis autem Athenienses. Vos
enim primi absque consilio nostro bel-
lum excitastis; quod deinde universam
Græciam invasit, nosque pro tuenda li-
bertate vestra in hæc belli incommoda
incidimus. Nec unquam adduci possu-
mus, ut pro tantis erga vos officiis Græ-
ciam barbaris gentibus prodere ac servi-
tuti objectare velitis. Majores vestri aliis
tempestatibus non modo urbis suæ li-
bertatem, sed & communem omnium,
tutati sunt. Quod si primis rerum peri-
culis regio vestra exposita est, periniquo
animo

animo patimur; eoque magis, quod duarum messium fruges vobis ab hostibus interceptæ, domusque vestræ maxima hostium clade direptæ captæque fuerint. Quod prospicientes Lacedæmonii, sociique omnes, vobis filiisq; urbes domusque suas totas donant; pollicenturque, imbellem turbam publice alere, quousquæ Persas, Medosque, communes hostes, domuerimus. Cavete ne vos Mardonii literæ, Alexandrique Macedonis verba, fallant, qui Persarum rebus tantum tribuit. nihil enim est mirum, Tyrannū alterum alteri rationibus quibuscumque favere. Nullum penes vos pondus ea verba habere debent; cum sciatis, barbaros fidei nullam unquam rationem habuisse. Valete.

Athenienses, Alexandro Macedoni.

NOs amplitudinem Persarum Regis, viresque maximas, plane cognovimus; & quantum nobis Rex præstet, facile quivis hominum sciat: at propterea nihil est, quod res nostras rueri desistamus. Est enim virtutis Atheniensium, pro tuenda libertate tandiu pugnare, quandiu spiritus ipse nos non deficiat. Desine igitur nobis suadere, ut cum bar-

M baro

baro rege pacem ineamus. Nec illud sibi Mardonius polliceatur. Cui verbis nostris illud dices, quandiu Sol proprio cursu circumagetur, nos libertatem nostram deorum immortalium præsidio defensores; eorum inquam Deorum, quorum simulachra & templa flammis consumpserunt ac impie demoliti sunt. Postremum hoc à nobis, Alexander, ne petas. Hæc enim non sine maximo dignitatis nostræ dedecore agere ac pacisci possumus. Nobis amicus ac perfamiliaris, pro mutua necessitudine inter nos, nihil tentari nisi honorificum honestumque debueras. Vale.

*S. P. Q. R., M. Claudio Marcello,
Proconsuli.*

Militibus, qui ad Cannas commilitones suos pugnantes deseruissent, nobis prorsus videtur, non recte remp. committi. Si tibi aliter videbitur, facias quod è republica fideque tua duxeris; dum ne quis eorum munere vacet, neu dono militari virtutis ergo donetur, neu in Italiam reportetur, donec hostis intra Italiam erit. Vale.

Bosta-

*Bostares & Hanno, Carthaginenses,
Hannibali S.*

CApuam abs te proditam, etsi minus dignum gloria tua videatur; at longe indignius, nos Pœnos, de te bene merentes, & præsidium universum, omnibus hostium cruciatibus expositos. Nunciatum nobis est, te in Brutios abiisse, veluti avertentem te, ne Capua in oculis tuis caperetur. At hercule, Romani ne oppugnatione quidem urbis Romæ abstrahi à Capua obsidenda potuere, tanto constantiores inimici, quam amicus Annibal. Si redeas Capuam, bellumque omne eo vertas, & nos & Campanos paratos eruptioni futuros scias. Tu jam meminisse deberes, non cum Rheginis neque Tarentinis bellum gesturum transisse Alpes. ubi Romanæ legiones sunt, ibi & Carthaginensium exercitus debet esse. Sic ad Cannas, sic ad Thrasymenum res bene gesta, coëundo conferendoque cum hoste castra, fortunamque tentando. Vale. Capuæ.

Marcellus Consul, S. P. Q. R. S. D.

ET si scio, vobis, Quirites, non gratum nuncium allaturum, cæso ad Herdo-

niam Fulvio proconsule collega cum tredecim millibus hominum: verumtamen nihil est, quod terreamini. Ego enim idem qui post Cannensem pugnam ferocem victorem Annibalem contudi, adversus eum cum instructis legionibus iter arripui; brevem illi lætitiā, quā exultat, facturū. Quare omnes vos præsentī animo esse magnopere volo. Valete. Ex Samnio.

*Syphax, Numidarum Rex, Scipioni,
Consuli, S. D.*

Cum ad me in Africā venisses, id inter nos actum est, ut paribus auspiciis bellum adversus Carthaginienses gereretur, tuque quamprimum cum legionibus in Africā traicerēs: nunc vero eā rerum mutatio facta est, ut filiam Asdrubalis Carthaginensis uxorem duxerim; quem, & jure hospitii & affinitate conjunctum, deserere, scelus maximum censi possit. Adde etiam, quod publico federe omnia cum populo Carthaginensi mihi vincta sunt. Quare te hortor primum, ut procul ab Africa, sicut adhuc fecerunt Romani, bellum geras; ne mihi interesse certaminibus eorum, armaque aut hæc aut illa abnuenti, alteram societatem

tatem sequi necesse sit. Scias enim velim, nisi Africa abstineas, & si Carthagini exercitum admoveas, mihi necesse fore, & pro terra Africa, in qua sum genitus, & pro patria coniugis meæ, proque parente ac penatibus, dimicare. Erit igitur tuæ prudentiæ, quod optimum consilium videbitur, capessere, dignitatisque meæ rationem aliquam habere. Vale.

Scipio, Syphaci, Regi, S. D.

Nullus est omnium hominum, quem magis fides deceat, quam Regem. tu literis, quas proxime accepi, adeo dignitatis tuæ oblitus mihi videris, ut etiam pro tuendis Carthaginensium rebus adversus Populum Rom. in acie staturum dicas. Quare te etiam atque etiam moneo, ne jura hospitii mecum, neu cum Pop. Rom. initæ societatis fedus, neu fas, fidem, dextras, Deos testes, atque arbitros conventorum, fallas. Si enim harum omnium rationem habueris, polliceor tibi, in meque recipio, futurum, ut & rebus tuis amplissimis accessiones maximæ fiant, & dignitati nominique tuo optime prospicias. Vale.

*Ioachimus Serralius, Caponio, dicta-
tori Florentino, S. D.*

QUoniam non semper tuta mihi affertur occasio scribendi, præsentem nactus nuncium nolui differre, quin te facerem de instituto negotio certiores, de quo probe scis ex arcano me agere cum gravi illo, quem nosti, homine, maximeque familiari Pontificis. Is mihi retulit, Clementem, satis prospere & firmiter convalescentem, eo esse animi decreto, ut se honesta conditione cum civitate conciliet, & belli consilia penitus abiciat; neque ægerrime sit laturus, quod populus perpetuo rempublicam administret, & parta libertatis jura tueatur; modo per æquas conditiones civili more propinquorum suorum ratio apud magistratus habeatur. Sed quoniam plura scribere non licet, à te vehementer petimus, ut ad conditum locum extra urbem colloquendi causa Petrum filium ad me mittas: ab eo enim, cuncta fideliter exprimente, præclare cognosces, quæ in conficiendo negotio opus sint. Vale.

Divus Augustus, Caio, nepoti, S. D.

AVe mi Cai incundissime; quem semper mediusfidius desidero, quum à
me

me abes; sed in primis diebus talibus, qualis est hodiernus. Oculi mei quærunt meum Caium. at ubicumque fuisti, spero, hunc diem te bene valentem celebrasse, quartum & sexagesimum natalem meum. Nam, ut vides, *κλιμακτῆρα*, communem seniorum omnium, tertium & sexagesimum euasimus annum. Deum autem Opt. Maximum oro, ut mihi quantumcumque superest temporis, id salvis vobis agere liceat in statu reip. felicissimo, fortiter ac viriliter agentibus vobis, succedentibus atque suscipientibus. stationem meam. Vale. viii Kal. Octob.

Alexander Macedo, N.

TAbulas testamenti ad te dedi perferendas: nam sæpe periclitor de salute, nec corpore rite valeo. Testamentum confeci, ut, si quid contingat inopinatum, sine tua injuria proficiscar ex hac vita; cum tu unus omnium maximo me amore prosequutus semper fueris. Quæ mandavimus, diligenter servare stude, tum propter ætatem, tum propter necessitudinem. Esto memor quantum fidei tuæ committam, & quæ apud te deponam; tuque id molis habes, ut res meæ omnes apud te honeste depositæ sint. Vale.

Alexander Macedo, N.

EGo me fortuna & gloria te antequam existimo. At disciplinis, studiisque liberalibus, & perfecta felicitate, quam tute possides, longe abs te me præcellis sentio. Quocirca te orare statui, uti ad me proficiscaris, sperans, preces meas apud te maximum pondus habituras. Tu igitur viribus omnibus enitere, ut tua familiaritate quotidiana utamur; id tibi persuadens, te non mei tantum, sed omnium simul Macedonum, moderatorem ac magistrum futurum. Nam qui Macedonum regem erudit, atque ad virtutem impellit, eum & populos universos ad fortitudinem ac probitatem vocare certum est. Cujusmodi enim fuerit Dux, tales, ut plurimum, subditos fieri necesse est. Vale.

N. Alexandro.

Amplector tuum maxime discendi studium, quod veram, utilem, ac maxime necessariam, non popularem, ad pervertendos mores, eruditionem apprehendere instituis. Qui enim philosophiæ amore ac studio tenetur, declinat communem

munem illam ac vulgarem voluptatem, quæ quorundam adolescentulorum animos frangit; cum, non natura modo nobilitatem tueri, verum virtutis instituto, manifestum est. Porro, liberali ac nobili ingenio si adiciatur modica exercitatio, neque desit præceptoris copia, mature ad perfectam virtutis evadit frugem. Equidem, nisi senectus obsisteret, (sum enim octogenarius, corpusque præterea invalidum,) ipse ad te pergerem, ut jubes. quia vero id non datur, quosdam ex contubernalibus meis ad te mitto, qui animi bonis me minime inferiores sunt, & corporis commodis exuperant: his si tu studiose congregiare, nihil, quod ad veram pertineat beatitudinem, desiderabis. Vale.

N. Pisistrato.

TUam erga nos benevolentiam mirifice amo: ac, nisi apud me statuissem jampridem, ibi sedem habere, ubi resp. sit libera, malletm apud te in tuo regno quam Athenis vitam ducere, violenter tyrannidem exercentem, Pisistratē. Verumtamen, licet libentius illic ex instituto nostro vivamus, ubi sunt omnibus æqua & communia jura, veniam tamen ad te, ut tuo hospitio tantisper fruar. Vale.

Iubes me in Lydiam venire , inspectu-
rum opes tuas. Ego, etsi illas minime
adspexi, nihil ambigo, Alyattæ filium re-
gum omnium esse opulentissimum. Ne-
que vero nos quicquam amplius habitu-
ri sumus , si Sardeis ad te accesserimus :
auro enim ipsi non indigemus, contenti
modico vitæ stipendio: veniam tamen, ut
tibi perhumano & hospitali viro familia-
ris efficiar.

*C. Fabricius, & Æmilius, Consules,
Pyrrho , Regi.*

NOs pro tuis injuriis , continuo ani-
mo strenui , inimiciter bellare stu-
demus: sed communis exempli & fidei er-
go visum est , uti te salvum velimus , ut
esset quem armis vincere possemus. Ad
nos venit Nicias, familiaris tuus, qui sibi
à nobis pretium peteret, si te clam inter-
fecisset. Id nos negavimus velle, neve ob
eam rem quicquam commodi expecta-
ret : & simul visum est , ut te certio-
rem faceremus , ne quid ejusmodi, si accidis-
set, nostro consilio civitates putarent fa-
ctum, & quod nobis non placet, pretio,
aut præmio, aut dolis, pugnare. Tu, nisi
caveas, jacebis. Vale.

*Julius Cæsar, Imperator, M. Tul-
lio Ciceroni.*

REcte auguraris de me, (unde & tibi
sum cognitus,) nihil à me abesse
longius crudelitate. atque ego cum ex i-
psa re magnam capio voluptatem, tum,
meum factum probari abs te, triumpho,
& gaudeo. Neque id me movet, quod
qui à me dimissi sunt, discessisse dicantur,
ut rursus mihi bellum inferant. nihil e-
nim malo, quam & me similem esse mei,
& illos sui. Vale.

Turcarum Rex, Romano Pontifici.

C.Orinthum, Achaia nobilissimam,
Ætolos, Acarnanes, Macedoniam,
atque omnem Peloponnesum, armis in-
vasimus; vicos præterea, agros, & oppida
late incendio depopulati; ut mox in Ita-
liam bellum transferamus. Hæc tibi o-
mnia, summo Christianorum metu ac de-
trimento, nunciamus. Vale.

Romanus Pontifex, Turcarum Regi.

QUod Græciam omnem ferro igne-
que vastaveris, non tam crudelita-
tem

tem in hac re tuam, quam tot urbium direptiones ulcisci paramus. neque enim victor hostibus ignoscere poteras, qui tuis etiam, immanitate, scelere, libidine, nunquam pepercisti. Neque enim pium fasve apud hominem esse potest, cui, neglecta religione, Deus contemptui sit. Nos nullum abs te bellum in Italia metuimus: facile enim scelerata hominum arma contemnit, qui Dei numine ac præfiduo tutus est.

Turcus, Amazoniis S. D.

SI pro tuenda civium libertate, Amazonii, bellum adversus me susceperitis, non tam vos ipse hostes judicarem, quam, egregios cives pro patria, liberis, ac parentibus arma sumpsisse. Sed nulla quidem ratione persuaderi valemus, eos nunc virorum imperia recusare, quos olim regna feminarum tandiu pertulisse audio. Vale.

Amazonii, Turco.

AMazonidum Regna, quæ nobis ad contumeliam objicere videris, nos minime quidem aliis parere hortantur. Turpissimum quippe ducimus, viros fœmina-

minarum virtute superari. Eos igitur invictos armis & principatu dignissimos arbitrare, apud quos etiam mulieres imperare didicerint.

Turcarum Rex, Venetis.

CLasse vestra, quam ad belli navalis usum maximam comparastis, Lyciæ maritima infestari audio, ac vos, late regni mei fines depopulatos, Attaliam Pamphyliæ urbem armis circumfedisce. Videte, obsecro, quos tandem exitus hæc habitura sint. Aliena temere oppugnat, qui ægre sua bello tuetur. Vos namque post amissam Chalcidem servare potius remp. ac nominis dignitatem retinere oportet, quam armis Imperium quærere.

Veneti, Turcarum Regi.

NEc Peloponnesus, nec Chalcis quidem, ipso jampridem bello amissa, nos ab oppugnatione deterrent; quas, non ipsa virtute militum, nec viribus expugnatas, sed facta nostrorum deditio, in potestatem redeigisti. Nos tamen, qui non perfidiam, sed victoriam, armis quærimus, omnia tuis infesta mari ac terra classe

classe reddidimus. Nec enim ad generosi principis animos virtute accedit, qui non jure belli captas urbes, sed insidiis proditas, in deditionem accepit.

Demosthenes, senatui Pop. Q. Athen. S. D.

QUod de meo in patriam reditu semper omnibus vobis deliberandi copiam fore puto, nunc de eo nihil scripsi. Cum vero videam, hoc nunc esse tempus, quo vos, si recta consilia sequamini, simul & gloriam & salutem & libertatem adipisci possitis, non modo vobis, sed & reliquis universis Græcis: sin erraveritis, deceptive fueritis, non facile posse eandem occasionem recuperari: quam de hisce haberem opinionem, in medium proferre duxi. Difficile quidem est, per literas consilium dare. multa enim vos ante rem cognitam soletis interpellare. ac dicenti facile est, quid velitis, animadvertere, quodque ignoratur, recte explicare. libello autem nullum tale adiumentum suppetit contra tumultuantes. Si tamen audire voletis cum silentio, ac expectare, dum rem omnem dignoscatis, spero, Diis faventibus, quamquam breves hæ literæ sint, futurum, ut appareat, me & optimo studio ea conari pro vobis,

bis, quæ deceant, & quæ vobis expediant. Neque vero eo consilio hæc ad vos dedi literas, quasi desint oratores, aliive, qui imparati, quicquid in mentem venerit, dicant: sed, quæ per experientiam, & ut in gerendis rebus versatus, cognosco, cum exposuerim, ut dicendi studiosis in publico uberem materiam copiamque suppeditarem, ac optimorum consiliorum delectum facilem redderem. Primum omnium, Athenienses, vos concordēs esse propter communem civitatis commodum oportet, ortasque in prioribus conventibus dissensiones missas facere: deinde, consentientibus animis, omnes, alacriterque, quicquid decretum fuerit, adjuvare. Nihil enim constanter, nihil simpliciter agere, non modo est indignum vobis, & animi parum generosi, sed summo etiam cum periculo conjunctum. Jam nec illud vobis ignorandum est, ea, quæ per se ad statum rerum vestrarum tuendum satis non sunt, si ad reliquas copias adiungantur, effectura, ut multo facilius omnia consequamini. Quæ igitur illa sunt? Neque civitati ulli, neque aliquibus, qui singularum urbium vetera instituta defenderunt, irascendum est, sed delenda potius ex animis memoria injuriarum. nam hujusmodi metus efficit, ut, qui

qui se federatis in aperto periculo versantibus necessarios esse sciunt, opem iisdem promptissime ferant: qui, metu isto liberati, omnes fient mitiores; in quo non parum est utilitatis. Per singula vero oppida talia inclamare, stultum fuerit, immo ne fieri quidem potest: sed prout vos cum civibus vestris egisse viderint, efficietis, ut ita quisque cum cæteris actum iri expectet. Proinde censeo, neque civitatem, neque ducem, neque oratorem, neque plebeium quenquam, qui antehac statum illorum temporum defenderunt, à quoquam vel taxandum vel objurgandum; sed concedendum hoc esse, omnes cives ea egisse, quæ oportuerit. Postquam, benignitate deum servata respublica, vobis licitum est, de integro arbitrato vestro deliberare, & cogitare, quemadmodum in navi, cum ii velis, illi remis uti suadent, ab utrisque omnia pro salute tuenda debeant administrari. Id vero latissimum esse consilium, ab ipsis Diis immortalibus felices & utiles rerum eventus proficisci. Quod si de præteritis, ut dicebam, statuetis, & fidem invenietis apud omnes, & officio bonorum virorum fungemini, & res vestras non parum erigetis; & eos, qui in uribus adversati vobis fuerunt, eo redigetis,

ut

ut aut consilia mutant omnes, aut omnino aliqui in culpa esse videantur. Quæ igitur è rep. sunt, ea magnis animis & civiliter administrate, & privatarum rerum recordamini. Atque hæc ego moneo, non eandem humanitatem expertus apud nonnullos, sed per injuriam & seditionem in aliorum gratiam quasi propinatus. Verum nec privatæ explendæ iracundiæ gratia reipublicæ commodis nocendum puto; neque ullam privati odii partem publicis utilitatibus admisceo; sed quæ aliis suadeo, mihi primo facienda censeo. Quæ igitur paranda, quæque cavenda sint, & quibus agendis prospero eventû rerum uti possitis, fere à me explicatum est. Quotidianis autem negociis præesse, & casibus subitis recte uti, & cujusque rei intelligere occasiones, & judicare quæ verborum lenitate obtineri possint, quæ item vi extorquenda sint, Ducum officium est, qui rebus præficiuntur. Qua etiam de causâ durissima est dicendæ in consilio sententiæ provincia. Nam recte consultâ, & magno studio laboreque probata, sæpe corrumpuntur; quod ii, qui ea in mandatis habent, inepte exequuntur. Nunc tamen bene cessura omnia spero. Si quis Alexandrum eo fortunatum putat, quod ei prospere succed-

successerint omnia, is illud reputet, eum agendo, & laborando, & audendo, non desistendo, fuisse fortunatum. Postquam igitur nunc mortuus est, fortuna quærit aliquos quibus adsit. Ii vos esse debetis; & Duces, per quos res geri necesse est, gratos & jucundos copiis præficere; quodque unusquisque vestrum facere poterit & volet, id ad se ipsum dicat & promittat, caveatque ne mentiat. Neque, tergiversandi gratia sibi data esse verba, persuasum esse, cauissetur: quicquid enim vos neglexeritis, qui refarciat, non inuenietis. Neque idem periculum est in iis rebus, quas cum vultis agere, tum sæpe consilia mutare licet, & in iis, propter quas bellum erit gerendum. In hujusmodi quippe rebus sententiæ mutatio, nil est aliud, quam consilii & instituti clades. Vos vero tale quippiam ne committite; sed, quicquid acturi estis, id generosis & paratis animis decernite; & ubi semel decreveritis, ductu & auspiciis tum Dodonæi Jovis, tum reliquorum Deorum, qui multa nobis præclara, & bona, & vera oracula reddiderunt, illorumque ope implorata, votisque omnibus pro victoria nuncupatis, favente fortuna, libertatem Græcis restituite.

*Robertus, Romanorum Rex, Domino
Paduæ Salutem.*

Probatam fidei tuæ constantiam quotidie magis ac magis admiramur; imprimis vero invictum animum tuum in obeundis belli muneribus nunquam satis laudare possumus. Nam & Veronam urbem cum arce munitissima Imperio nostro restitui sedulo curasti: nec ullis laboribus aut vigiliis pepercisti, ut cæteræ urbes, quæ jampridem ab Imperio nostro desciverant, nobis redderentur. Quæ rata & grata habentes, tum multis maximis laudibus te cumulamur, tum accessionibus Imperii merito gratulamur. Agge ergo, ac perge qua cœpisti via, Vincentiamque urbem de hostium manibus extorque, reliquaque oppida, per Catharinam de Vicecomitibus & liberos ejus minus juste occupata. Nos profecto fidei ac virtuti tuæ nunquam deerimus, gratoque animo tuo quam liberaliter respondebimus. Nam & sanctissimo domino nostro Rom. Pontifici, Illustri Duci Venetiarum, venerabili Patriarchæ Aquileiensi, & aliis nostris ac sacri Imperii sociis, te diligentissime commendavimus, orantes, ut tibi in nostris sacri Imperii

perii negociis, ac quibuscumque rebus, præsto essent. Quos & certiores fecimus, nos ad te legationem cum locupletissimo mandato decreturos, ac in Italiam quamprimum venturos. Veronæ autem residebimus, ad negocia & Imperii munera uberius obeunda. Vale. In Castro nostro Heydelbergh, mensis Maii die xii, 1404: regni vero nostri anno quarto.

*Genuenses, Duci & Reipublicæ
Venetorum.*

Maximo dolore intelleximus, vos cum domino Paduæ graviter dissidere, magnisque jam bellicis apparatibus utrinq; acriter configere statuisse. Quod quidem quanto cum periculò partium fiat, vos pro vestra prudentia judicabitis. Estis enim potentes, & proximi: & habet utraque pars sub ictu quod feriat: ita quidem, ut, nisi opportunæ pacis remedio occurratur, timeri sane possit, nedum partis utriusque interitus, sed totius fere Italiæ anceps & periculosa perturbatio. Nos autem, hæc ipsa animo volventes, qui vos & remp. vestram, & eundem dominum Paduanum, suosque natu maiores, nobis conjunctissimos, serenissimoque nostro Regi devinctos, fraterna pietate

tate complectimur, finem tantis dissidiis & cladibus imminentibus dari maxime cupimus. Delegimus igitur legatum nostrum, quem ad vos & ad Carrarienses Paduam mature mittemus, ut, quantum in nobis erit, legati nostri opera, & quibuscumque aliis rationibus, dissidium vestrum salubri pactione tollatur. Cum vero facilius omnia sedari possint, si nondum ad cædes, diræptiones, aliaque belli incommoda, deventum sit, vos mirum in modum rogamus, sicuti etiam domino Paduæ & Veronæ scribimus, ut pacis commoda præ oculis teneatis, &, bellorum clades metientes, ad usque legati nostri adventum bello prorsus abstineatis. Hoc enim & vobis & illi maximo usus futurum, plane videmus; hoc pacis authori Deo Optimo Maximo imprimis probabitur; & id, quod Serenissimo Regi nostro, nobisque, gratissimum, feceritis. Nihil enim opus erit, ut idem serenissimus rex noster nobis injungat, ut auxiliis dicti domini Paduani, amici sui, faveamus: nos potius de mutua inter vos pace, uti volumus, maxime speramus. Super quibus omnibus animum vestrum per eundem Tabellarium cognoscere optamus. Genuæ, 1404. Consilium Ancianorum, & officium Provisionis Genuensium.

Io. de Faba, Ducibus Saxoniae S. D.

Vix adduci possum, ut credam quæ indecens rumor ad nos invexit. A-
iunt enim, inter vos, sapientissimos &
præclarissimos Principes, ac illustrem
matrem vestram, quædam bellorum se-
mina excitari. Quod ut magis demirer,
tum virtus vestra facit, qua uno omnium
ore huc usque celebres extitistis, tum fa-
ma præstantissimæ optimæque parentis
vestræ, quæ innocentia ac fide conjugali
inprimis charissima vobis omnibus esse
debit. Quamobrem, si meus erga vos
amor apud amplitudinem vestram quid
meruit, vos oro & obsecro, ut, depositis
quibuscumque simultatibus, recta animi
ratione genitricem vestram complecti
velitis. Moveant vos divina oracula, pa-
rentes honorare iubentia: rursus &
comminantia, quod, cui mater maledi-
cat, ei funditus omnia evertantur. Mo-
veat splendor nominis vestri: moveat
domesticæ dignitatis integritas; & ma-
tris sanctissimum nomen; nomen, in-
quam, quo uno duntaxat, pressa Roma-
ni Imperii amplitudine, hostis Coriola-
nus devictus est, imminensque urbi a-
movit excidium. Volvite animo, cum ne-
queant

queant Principum acta latere, quid populi, quid Principes orbis dicturi sint, cum talem matrem viduam, jamque senescentem, tantis filiis esse contemptui audient. Siquis alienus à vobis matrem vestram non modo injuria, sed vel minima suspicione contemptus dignam duxerit, nonne ad vestram id summam contumeliam & dedecus fueritis accepturi? nonne totis viribus ulcisci contendere-
tis? Proinde, clarissimi principes, nepotesque, date operam, ut hæc omnia rixarum initia sopiantur. Jungite animos matri; cui tanto naturæ pignore conjuncti estis ut majore prorsus non possitis; cujus optimæ mulieris consiliis & res vestræ domi feliciores erunt, & foris gloriæ nominique vestro maximæ accessiones fient. Valete. Quinto Martii, 1394.

*Franciscus Carrariensis, Reipublicæ
Florentinæ S. D.*

QUamquam abunde vobis de ratione jurati federis cum Genuensibus scriptum arbitrabar; quia tamen postulatis, eadem vobis expressius declarari, pauca etiam scribam. Ego ita sensi: Vos nobiscum colligari; optimum fore: ac propterea, ratione federis, pacis tempore, du-
centa.

centarum lancearum; belli vero, quadringentarum impensis teneri: reliquos vero pro sua rata, ut plane intellexistis. Cæterum, si quid sub conditione literæ nostræ significare videbantur, non erat quod cogitarem pactionibus deesse, verum quod novas pecuniarum impensas nunc omnino pati non possem. Addite, quod à federatis ipsis xxv millia ducatorum ex honestissima ratione mihi debentur, de quibus & instrumenta publica, & suorum fidejussores civium, patent. quem quidem cumulum totum nil gravor impendere pro rata mihi contingente solvenda. Additis insuper, non esse bella in pace quærenda. Quod vobiscum una, pacis avidissimus, ipse confiteor. Profecto nolim, in cujuspiam mentem venire, bella à me vel expeti, vel tentari: quin, si cujuscvis, vel ultimi sociorum, fines impeterentur, absque maximo dolore audire non possem. Certe nemini adeo pax optanda, adeo formidanda sunt bella, quam mihi. Essemne prudens, in periculum cognitum ruiturus? Veruntamen scitis ipsi, comitem Henricum, de cujus virtute nihil est quod dubitetis, illius innixum authoritati. quæ apud me quoque exigua non est, non autem Ang. qui quanti sit faciendus, non me fugit: licet hujusmodi homi-

homines, etsi omnino credendi non sint, tamen audiri debent; cum ex vanissimis relationum verbis contra vera discrimina resides etiam excitemur. Ego tunc quæ senseram, conscripsi, nequid vobis incognitum foret. Quod si vobis minus placere intelligam, à significandis huiusmodi rebus prorsus abstinebo. Atqui novissime scribebatis, legatos Comitum Virutum de exigendis Italia socialibus proposuisse: meamque sententiam quæsi- stis. Ego vero eos censeo nullatenus audiendos. Hi namque bellorum motus, et Italiae tumultus, quo serpant, quis ignorat? cum in omnibus, quæ secum gessistis, tanta verborum perplexitate, tanta morarum interjectione vos fatigarit, ne dicam fefellerit, ut jam nullum apud vos fidei locum ejus hominis autoritas habitura videatur. Quæ non res secum agi- capta finem nullum sortita est, & non potius aut verbis inanibus, aut verius fraudibus acta, aut mora diuturniore suspensa? Quare adduci non possum, ut eos legatos admitti ac nobiscum immisceri censeam. Paduæ, v Maii.

N

Ioannes

*Ioannes de Faba , Comiti Friderico
de Ortemburgh.*

Graviter molesteque tuli generosæ
vestræ prolis occasum; ac, uti læto
animo cuncta vobis felicia audirem, ita
ex vestro hoc tanto doloris vulnere vo-
biscum amice condoleo. Veruntamen, si
diligentius perpendamus, in morte ne-
cessitas, ordo non est. Consideremus,
quanta mala, à quibus hic filius vester
moriendo, jam adepta securitate, quiescit,
immineant victuris. Illud denique memi-
nisse debemus, quod divinæ voluntati
assentiri nos deceat; cui plus æquo do-
lendo adversamur. Quæ cum ita sunt, ni-
hil superest quod doleamus. Illud quo-
que doloris levamen maximum debet
esse, vos illum de sinu vestro, sine ullo
alio incommodo, sed omni adhibita cura,
innocentem, sicuti vera fide credere com-
pellimur, Deo, qui dederat vobis, reddi-
disse. Animadvertite insuper, quod, ætate
simul cum castissima uxore florentes, in
prole numerosa adhuc estis divino mune-
re permansuri. Proinde missas facite tur-
pes lacrymas, & questus: induite vultus
cultusque lætitiæ: ut vestrorum amico-
rum ac populorum fractos dolore vestro
animos

animos erigatis, Deoque Optimo Maximo in hujusmodi orbitate gratias agatis. Virum illum insignem imitantes, dicite, Dominus dedit, Dominus abstulit; ut ipsi placuit, factum est. Vale. xxviii Martii, 1394.

Franciscus de Carraria, Massæo

Memo, Veneto.

Aquissimum est, quem rerum gestarum merita maxime comprobarunt, non modo dignis honorum præmiis, verum insuper charitate benevolentiaque singulari, complecti. Expertus igitur, semestri decurso tempore in Patavina prætura, quam æquus, quam & in administranda urbe mea sollicitus, omnibusque civibus acceptus fueris; decrevi, & volo, quæ tua est virtus, pro futuro quoque semestri tempore, die xviii mensis instantis Aprilis feliciter inchoando, te ad illam ipsam præturam, stipendiis, honore, emolumentis, conditionibusque quibus primum, vocari & confirmari. Sicque accipio, & harum literarum serie te confirmo. Quam præturæ confirmationem ut grato animo, ad commodum, & nostram populi que Patavini jucunditalem accipere velis, quæso. Ad

hujus autem præturæ promulgationem faciendam, sapientem virum, D. Antonium de Sancto Leonardo, civem Patavinum, jureconsultum, statui transmittendum. Cui in hac parte veram fidem dari plane volo. Paduæ, xvi Aprilis, 1394.

*Franciscus de Carraria, Reipublicæ
Florentinæ S. D.*

EX legatione mea nusquam deceptus sum, quin captiones & fallacias allatura esset, quarum vos non modo consciï jampridem esse debetis. Quando enim vir ille bonus verba non dedit? quando non implicavit ambagibus? quando per itritas sponſiones non traxit? quid solidi certive unquam reportavimus? Quo magis miror, vos oculatissimos dominos, rerum & hominum, inprimisque hujus hominis expertissimos, hoc non videre. Quid iis moliri voluminibus censeamus, nisi ut in structas ante insidias imprudentes aliquot præcipites agat? Illa dudum, & nunc, Petri vox omnibus audienda: Vigilate, quoniam infensissimus hostis vester tanquã leo circuit, querens quem devorer. Tandẽ igitur definite de vestræ fidei sinceritate illius verba metiri: excitemini; vel potius, excitatos
vos

vos dudum esse, fateamini; ea nimirum ratione, ut, quod hactenus factum fuisse præstitisset, M. F. V. P. me. D. B. in constituenda creandaque Ba. velitis consilium imitari, quo nimirum alæ (ut dici solet) super alios nitentis cadent; & improbæ spei pennæ decreti hujusmodi forcipe truncabuntur. Prædico vobis, quantum illi fiduciæ decrescet, tantum rebus vestris, tantum animis sociorum, tantum communi paci, quam summo-
pere inviolatam servare desidero, vestrisque foveri suffragiis, tantum firmitatis accessurum vobis, & in gerendis facultatem pleniorē: & utilissimo tutior silentio causâ reddetur, si, sepultis in paucorum optimatum pectoribus quæ agenda decernitis, omnis conscius repellatur. Quid nempe salubrius pro vestra republica? quid tam illius adversum conatibus, quam si ei facultas aliena consilia sciscitandi subtrahatur? Certe videre mihi videor, hunc dolosum hominem nihil iniquiore animo accepturum fore, quam si Ba. dignitatem suis fraudibus objectam esse cognoverit: ad quod amplitudinem vestram pro viribus hortor, & hortationibus cumulatissimas preces addo, ut, cum omnium animi, oculi, fortunæ, ad hoc unum præsidium intenti
N 3 sint,

sint, velitis pro amplitudine vestra, pro salute communi, pro spe sociorum, ad creandum hunc magistratum animos vestros intendere. Valete.

Franciscus de Carraria, Bononiensibus
S. D.

ET si vigiliæ vestræ diligentissimæ, ardorque animi, pro communi omnium utilitate, in providendo, agendo, consulendoque, cognitus hætenus fuerit; nunc vero vestris ita literis patefactus est, ut de prudentia, consilio, ac magnitudine animi vestri nusquam dubitandum jam sit; in hoc præsertim, quod, deprehensis tenebris, quas oculis omnium Comes Virtutum ingerere nititur, opportunissimas atque oppido salutare M. F. V. per me. K. D. F. pro creando Ba. officio, cohortationis ardentibus luminibus occurristis; ut, quos non moverent exempla, saltem consilia excitarent. Profecto nec sanctiore, nec laudabiliore fungi opera potuistis, quam si vestra id suasionem in illa urbe officium statuatur. Erit enim hamus quo suos allapsus intercipi metuat; erunt obices, quibus, se irritum, labi sciat. O utinam cæteri vestra secuti vestigia eo recurrissent! multum enim

nim suspitionis, multum curarum, pectoribus nostris demptum foret; ei vero, qui pacem omnium turbare contendit, adjunctum foret. Ego, quamquam hanc creati dignitatem, ut firmitati sociorum saluberrimam, maxima animi cupiditate expectabam; nuper tamen, vestris excitatus exemplis, omni contentione hortationeque eisdem D. Florentinos nitor animare, ut vel nunc, atque utinam non sero, ad Bai. creationem intendant; quippe qui non modo rempublicam, sed & tutos securosque sociorum animos facturi sint. Ut autem cognoscatis quo fervore animi scripserim, inclusum exemplum literarum, quas D. Florentinis scripsi, mitto. Valète.

Florentini, Franc. Carraria domino S.

Venerunt ad nos legati Comitum Vir-
tutum. Quorū verba nihil aliud fuerunt, quā eadēmet quæ aliorū. Respondimus autem, nos, pro federis debito, & pro commodo colligatorum, & expeditione gerendorum, decrevisse omnino, ut hæc colloquia in civitate Bononiæ indicerentur; opportunitate loci, ut decuit, commendata. Ad quæ responderunt, se non posse super hoc alibi quam hic age-

re, attento responso domini sui; cui & ipsi scripserunt. Hæc hucusq; gesta sunt; quæ sequentur, ordine literarum cognoscatis. Volumus te certiolem facere, F. V. nos operam daturus, ut hæc negocia Bononiæ conficiantur. Cæterum, cum V. F. sit disposita non solvere illa decem millia florenorum, adeo populum in dolorem deduxit, ut ne scribere quidem possimus. Dicunt sane omnes, vos nolle de stipendiis militaribus aliquid solvere, quos milites pro tuendis præcipue vestris comparavimus: item nihil pro federe Genuensium, nisi per compensationis supputationem: nunc vos velle præcipitare federatos in bellum, quod nulla possit justitia palliari. Nos vero videmus, populum nostrum ita fore affectum, ut, si ex hujus cessione solutionis contingat, bellum excitari, nunquam possit ad exhibenda vobis auxilia persuaderi. Quamobrem pro tuenda nominis vestri dignitate, ac statu rerum vestrarum, & ne quis pacis turbatorem vos dicat; hortamur, ne solutionem istam negligere velitis, nec ex parte vestra committere, ut ille D. possit contra nos, aut federatos, jure bellum indicere. Datum Florentiæ, die XIII Junii.

Floren-

Florentini, Bononiensibus S. D.

VIdimus literas vel potius exemplum
literarum, quas vobis, non commu-
nis tantum, sed totius libertatis Italiae
publicus hostis, in forma superbissima
destinavit. Quarum quidem serie vos de-
betis maxime letari, videntes causam le-
vissimam, qua adversus vos perditissimus
omnium concitatur: ubi se asserit, non
propter commissa, sed quae per vos com-
mitti possint pro tuenda republica no-
stra, commoveri. O justam, o egregiam
indicendi belli causam! ô validum ho-
stium regiae amplitudinis, quam ambit,
ut arma capiat, fundamentum! Non ob
aliquam injuriam, inquit, quam subesse
non fatemur, sed ne, vobis quietis & in-
tactis, Florentinis subsidia ministretis; ut
hostibus nostris, ab hac die bellum nun-
ciamus. Non prosequitur hic effectum,
sed affectum: nec vult amicos sub con-
ditione admonere, sed, quasi jam condi-
tionem impleverint, insectatur. Ut satis
manifeste animadvertere possitis, ipsum
non persequi quod intendit, sed oppres-
sioni prorsus imminere. Arbitratur au-
tem &, vos à nobis, si invadimur, habi-
turos non esse subsidium, sed semper in-
N 5 digos

digos nostri futuros auxilii. ut solummodo meditetur, cum vobis bellum indixerit, sic nos hinc involvere, ut vos juvare nequeamus. At bellum inferat, meditetur, & audeat, quicquid libet: semper nos pro tuendis vobis non minus promptos quam pro urbe nostra cognoscat. Vos autem, fratres optimi, nolite verbis aut minis terreri; sed ea animi constantia, qua majores vestri Regis Entii superbiæ restiterunt, contra serpentis insidias ac impetus vos confirmate. Nos hinc ita illi occurremus, ut vobis obesse non possit. Cæterum comminationum & fictionum suarum exemplum, cum responso nostro, his literis vobis destinavimus. Valete. Florentiæ, III Maii, 13 Indiæ.

Galeatius, Comes Virtutum, Reipublicæ Florentinæ S. D.

PAcem Italiæ omni studio curavimus, nec laboribus aut impensis pepercimus. Optabamus enim, ut, diuturno bello defessa Italia, tandem nostra tempestate respiraret. Idque tam intenso animo operam dedimus, ut nonnunquam à plerisque malevolis id nobis vitio datum fuerit, quod humanitate, benevolentia,

lentia, charitateque, agere nitebamur. Sed hæc omnia irrita & vana fuerunt, cum improborum consilia præstiterint. Maluit enim (non dicam, respublica vestra; de qua nihil opinari possumus; sed) paucorum virorum Archiguelphorum rabies bellum quam pacem eligere, & Italiam magna ex parte bellorum motibus involvere, idque, quod majus est, in magnum detrimentum magnificorum Senensium, ac Perusinorum, ignominiamque nostram; primo occulte quantum fieri potuit, deinde palam federibus ruptis, quæ jampridem maximis cerimoniis percussa. Utinam in ipsos solos, & non in alios pacis avidos, in ipsorum capita, non ipsam afflictam patriam, pessima hæc consilia sua redundarent! ex quibus, præter naturam nostram, præterque omne consilium, ad ulciscendum illatas amicis injurias accendimur ac inflammamur, & per has literas bellum vobis nunc indicimus. Papiæ, xx Aprilis.

*Florentini, Ioanni Galeatio Vicecomiti,
Mediolani Duci.*

Hodie nobis redditæ sunt hostiles litteræ nomine Galeatii Vicecomitis, qui se dicit Virtutum Comitem, & Mediolani.

diolani dominum, & Vicarium generalem; totas quidem plenas mendaciis, atque dolis, & tam superbe quam infideliter concludentes. Pacem Italicam omni studio scribit se quæsisse, nec pepercisse laboribus, aut impensis. Quod quidem verbum, quod ejusdem epistolæ primum est, quam impudenter & mendaciter adscriptum sit, declarat invasio per ipsum facta contra dominum Veronensem. Quem, infelicissimo bello implicandum, afflixit. Qui miser bis laceffitus & victus, vix poterat mœnia urbis tueri. Nec est quod illius amplitudinem timere dicat. Adde & illam fidelem societatem initam cum D. Paduano; in qua de partiendo civitates ejusdem D. Veronensis specialis conventio facta fuit: cujus observatio secuta est in occupanda Vincentia; quæ Carrariensi debebatur. Immo, ruptis societatis federibus, bellum eidẽ, invidia & ambitione, diu quæsitis fictis coloribus illatũ est. Hæ sunt pacis rationes, hæc illa studia, quibus transmissor literarum se Italiæ pacem peperisse asserit. Illud etiam satis constat, confectis calumniis nobis, magna simplicitate scribentibus, post percussum fedus consilia nostrorum animorum indicando, publice statuisse ipsum, aliqua ratione punire nos, ut qui turpiter
id

id erat conquestus. Quod idē declarant & copiæ, quas oratores sui revocare promiserunt, quasque juxta federis leges in Tusciam mittere, nisi pro tuendis amicorum rebus, minime debebat. quas omni offensione cessante non modo non revocavit, sed & potius auxit, &, turbando patriam, pessima bellorū semina jecit. Scimus, Senenses pacem desiderasse, sed sub tali domino nec sibi, nec patriæ pacem quærere vel tueri potuisse. Si rupti federis arguimur: dicat, si poterit, in quo fuerit per nos contra pactiones commissum aliquid, vel omissum. Habebamus copias, quas ipse solas, utpote sibi suspectas, formidabat; quas nostris expensis solvimus. Habebamus amicos, & censuarios, quibus cum Senensibus bellum erat; quos ab omni belli consilio ad pacis & concordie jucunditatē duximus convertendos. Sed quid profuit, aut prodesse potuit pacis studium apud illum, qui pacis verbum enūcians, bellum totis viribus meditabatur? Nos voluit esse inermes, ut læderet: armatos Senenses & alios, ne possent cum veteribus suis conjunctissimis in gratiam redire. Et tamen audet nobis rupti fœderis notam inurere: qui fœderi non consensit, nisi quo posset facilius supplantare; quique, cum aliis, & nobis,

arma-

armatorum societates etiam dissolvere pepigisset, vix bene siccatis literis pactio-
num, novam armatorum societatem ad
colligatorum excidium conflavit: quippe
qui non prius hoc fœdus firmare quam
rumpere cogitaverat. Quod si Montem-
politianum, ut promissimus & teneba-
mur, adjuvimus; & nobili viro Bertaldo
de Ursinis, Comiti Suanensi & Palatino
filio, & censuario nostro, ruptis federum
legibus per Senenses invaso, subsidio fui-
mus, quod per pactiones communes li-
citur fuerat: quomodo dici potest, nos
pactis federibus non stetisse? Nam de
Perusinis quid loquamur? quorum civile
bellum expulsis bonis civibus dici debet.
Sed profecto nosmet ipsos vana spe de-
lusi decipiebamus; persuadentes nobis,
illum fore fidelem, qui tam perfidus ne-
pos, & gener, & frater, in patruum, so-
cerum, & fratres extiterit; cujus animus
ac fides toriens cognita nihil habet con-
stantiæ, nisi in hoc, ut promissam fidem
nunquam servare didicerit. Esset quod
possemus illi gratias agere, quod volun-
tatem suam literis significare voluerit,
nisi per suos Duces, ut facile demonstra-
re possemus, ante statutum diem jam-
pridē agris nostris multum cladium intul-
lisset. Sed hic est non optimorū mos, pri-
mum.

mum destinatos hostes invadere, quam
 se vel verbo vel literis infensos declara-
 re. Nos autem contra hujusmodi calum-
 nias obtulimus &, remp. nostram, juxta
 federum leges & federatorum, paratam
 judicium subire: quod minus ab ipso
 probari animadvertimus. Ex quo post-
 quam de jure disceptare non licet, nos-
 que turpiter & crudeliter invadimur, ut
 ejusdem jurati federis verbis utamur, su-
 perbiissime lacesciti; nos versa vice tyran-
 no Lombardia, qui se regem cupit inun-
 gere, bellum indicimus, &, pro tuenda li-
 bertate populorum, arma capimus: spe-
 rantes, Diis bene fortunantibus, Lom-
 bardorum calamitatem defensum iri: qui
 Diis hominis unius nequissimi ambitio-
 nem libertati tot populorum, & saluti
 tot urbium, quot per vim evertit, nun-
 quam præponent. Unum autem omit-
 tere nolumus, te maxime tua sententia
 falli; quippe qui paucos Florentinos
 archiguelphos vi tuæ non adversaturos
 speres. Bellum enim egregia omnium or-
 dinum virtute animoque geretur; cum
 præstet omnibus, potius mori, quam sæ-
 vissimi tyranni jugum gravissimum subi-
 re. Florentiæ, XVIII Maii, 1390.

*Franciscus Iunior Carrariæ do-
minus, Marchioni Estensi.*

VSu, institutoque majorum, factum est, ut priusquam hostiliter aliquid agatur, vel literis, vel oratione, hostem quis præmonëat, ut vel resipiscat, vel direpta ablataque alteri reddat: sin autem Mars sæviat, nullusque locus paci detur, fortunæ belli reliqua committantur. Nos nunquam adduci potuimus, ut vel nobis, vel Florentinis, ac Bononiensibus, sociis nostris, quicquam injuriarum fieret; memoria repetentes, qua necessitudine atque adeo affinitate conjuncti semper fuerimus. quod & vobis, & quibuscunque gentibus, satis est cognitum ac perspectum; eoque magis, cum nullæ belli causæ subesse videntur. Sed vos, aliorum suasionem, in fœderatas urbes, ac in me, quasi antiquos hostes, animum atque manum armavistis. Quibus omnibus æqua lance libratæ, nolui latere Amplitudinem tuam, me, cum nobilebus illarum rerum pub. legatis, ac earum copiis, Pollicinum armatum venisse, ac ibi constitisse. quod egimus inviti, à vobis, ut jam diximus, injuriis pluribus laceßiti. Injuria profecto nulla major, quam quæ per amicos & affines

affines illata fuerit. Nos tamen, quam minori poterimus damno vestro, in iis locis commorabimur, quousque animum vestrum exploremus. quem à pessimis consiliis resipiscere maxime optamus. Quod si pertinacius æquitati reluctari volueritis, sciatis velim, copias nostras ad quæque vestrorum pervasuras, prout belli furor suadebit. De quibus à vobis excusari jure optimo debebimus: Constituentes & præfinientes vobis totam diem Martis proxime venturam ad quodcunque malueritis consilium capeffendum. In castris, ad Abbatiam Pollicini, die xvii Septembris, 1390.

Florentini, Francisco Carrara,
Padua Domino, S. D.

NUnquam satis pro rei magnitudine mirari possumus, vos adhuc illa decem millia florenorum Comiti Virtutum quæ jampridem ex pace illi debebatis, non solvisse. quod quidem nihil aliud est, quam pacem rumpere, & contra vos bellum justissimum excitare. Quam facile autem viribus vestris tanti Principis vim sustinere possitis, pro vestra prudentia judicetis. Nam & colligatorum auxilia quo vultu implorabitis, si æs alienum non exol-

exolvatis, si vestra sit culpa, si vosmet id bellum concitetis? Quod si unanimes cum aliis vos defendere vellemus, qua iusta causa poterimus arma movere? quomodo vniuersis hominibus belli causas reddemus? Hostis ipse nos damnabit, si per injuriam, quæ debueritis, solvere abnueritis. Durum est, & difficile, cum potentiori decertare. At si cui iusticia etiam aduersetur, qua vi duobus validissimis hostibus resistet? Omittamus famam, omittamus causam & pericula; nonne declinando nunc hoc onus expensarum, quas pace subire non vultis, longe maioribus sumptibus atque bello vos implicatis, agros prædiaque vestra direptionibus ac incendiis exponentes? Vobis igitur id consilii damus, & per publicam fidem obtestamur, ut has pecunias solvere velitis, ne sponte vestra rem eo deducatis, ut aliquando vos pertinaciæ vestræ pœniteat. Quod autem oporteat nos & alios colligatos causam vestrâ indefensam inter belli angustias ob sui turpitudinem relinquere, nihil est quod dubite-
ris. nam & fovendo injustam causam, factum profecto esset, si quis sibi de victoria quicquam polliceri auderet. nos vero, solutis quæ jure Vicecomiti debentur pecuniis, nunquam federum legibus de-
erimus. Vale. Florentiæ.

Fran-

*Franciscus Junior Carrariensis,
Marchioni Ferraria.*

ACcepi binas literas, Illustrissimo patri destinatas. Alteræ significabant, vos copias à castro Monbaranzoni abduxisse; & veteranis nostris, qui ad vos missi fuerant, collaudatis, eos missos facere constituisse. Alteræ nos certiores faciebant, Marchionem Azonem ad Pisanos concessisse. Ex quibus facile intelligo, vos Illustriss. parenti meo omnia consilia vestra impartiri. Quare vobis pro vestra in nos benevolentia immortales gratias ago; hortorque, ut veterani nostri vobis alicui usui esse poterunt, illorum opera uti quam maxime velitis. nihil est enim quod tanti quam amplitudinem vestram, faciamus. Vale.

*Carolus V, Rom. Imp. Augustus,
collegio Cardinalium.*

ALlatum ad nos est triste & lugubre nuncium de obitu felicitis memoriæ Pauli III, Pont. Maximi. Quem sane virum, cum ætate & moribus, tum auctoritate venerandum, & longo rerum usu clarum & insignem, nisi Deo Optimo Maximo

Maximo visum esset, in beatiorum illum vitam evocare, Ecclesiae suae superstitem diutius optaremus. Verum, quoniam divinae illius bonitati atque sapientiae ita visum est decernere, ejus voluntati nos aptare & subiicere par est: atque interim summis precibus flagitare, ac pro virili sua quemque contendere, ut populo suo alium pastorem & episcopum concedere velit, qui illi gratus sit & acceptus, & Ecclesiae suae quam maxime commodus atque utilis. Hujus quidem rei cura vobis Reverendissimis patribus praecipue incumbit. Ac, licet nihil dubitamus, vos pro vestro officio in remp. Christianam, & pietate, provinciam hanc ea prudentia & maturitate gesturos, quam & praesens reipublicae Christianae status, & omnium de se expectatio, postulat; ac neque nostrae, neque alterius monitionis, ad eam rem opus esse arbitramur: attamen, ut in mentem venit, nos advocati Ecclesiae munus & provinciam sustinere, eoque nomine ex veteri majorum instituto in partem hujus sollicitudinis vocatos esse; non potuimus, neque certe debuimus, officio nostro deesse, quin huic rei omnium maximae gravissimaeque partes nostras interponeremus. Quod ut eo magis praestare cupiamus, & studium religio-

ligionis nos invitat; & muneris nostri ratio, ac jurandi religio, qua Ecclesiæ Dei, & huic sanctæ sedi, devincti sumus, ad hoc quasi adigunt & impellunt. Proinde vos, Reverendissimos patres, summo opere hortamur & obtestamur, huic rei omnem curam & cogitationes impendere; atque, Dei inprimis causa, deposito omni alio humano affectu, in deligendo uno pontifice hoc solum spectare velitis, quicumque tandem, ille talis sit, qui merito Ecclesiæ Dei utilis & commodus censeatur, atque, quoad ejus fieri possit, his donis ornatus sit, quæ in episcopo & pastore maxime requiruntur, & patrum monumentis prodita sunt, eorum præcipue qui prima religionis & fidei nostræ fundamenta in ipsa alma Urbe jecerunt, ac sanguine consecrarunt. Omninoque vos monitos velim, præsentis reipublicæ status rationem habere, qui talis plane est, ut non minor cura religioni instaurandæ adhibenda sit, quam prisca illi patres in illa propaganda jam olim adhibuerunt. In qua re Deo inprimis gratam & acceptam, reipublicæ utilem & necessariam, officio vestro dignam, ac nostræ omnium expectationi consonam rem facietis. Quos recte feliciterque valere maxime opto. Datæ in oppido nostro

nostro Bruxellis, die xx Novembris 1459,
Imperii nostri 30, regnorum 33.

Genuenses, Papa Callisto.

Nemo prope est, Beatissime pater, &
Domine nobis colendissime, qui
nesciat, quantus terror, & animi conster-
natio, populos invaserit Pontici maris,
tunc, cum, capta Constantinopoli, Ma-
chometus, Turcarum Rex, Thraciam,
Bosphorum, ita clausisse visus est, ut Pon-
tū inaccessibilem fecisse putaretur. Nam,
cum illic Europam ab Asia angustum di-
rimat fretum, Rexque in utroque littore
immania tormenta disposuisset; claustra
iniecissem mari, non sine ratione dictus est:
tantusque pavor in omnes, qui mari ne-
gotiantur, effusus est, ut annum nemo
introsum penetrare ausus sit. Paravimus
autem nos ingenti quidem mercede na-
ves duas, in quibus arma, viri, tela, &
reliqua necessaria Capham mittebantur:
sed navium magistri, cum pervenere Pe-
ram, falsis pollicitationibus decepti, de-
scendentes in urbem, capti & in vincula
conjecti sunt; atque ita conatum nostrum
perfidia regis irritum fecit. Interim ter-
restri via frequentes ad nos afferebantur
literæ, quibus miserabiles illi populi o-
pem

pem orabant. Horum cum nos pericula lachrymaeque flexissent, alias iterum naves, majore stipendio conductas, omnia portantes quæ desiderabantur, Capham penetrare jussimus. Quæ Aprili superiore saluæ eo pervenerunt: tantumque spei trepidis populis injecerunt, ut, quide deferenda patria consilia sæpius agitaverant, non modo in fiduciam erecti sint, sed alij quoque, invalida oppida relinquentes, Capham migraverint, arbitantes, ejusmodi auxilia sibi nunquam defutura esse. Verum, cum, redeuntibus navibus ipsis, earum altera, tormentis icta, mox obruta mari sit: certum videtur, civitates illas in priorem desperationem collapsitas esse, nec facile inveniri posse navem, quæ audeat, etiam geminata mercede, tam certo discrimini sese obicere. Hæc dum cogitamus, Sanctissime pater, facile prævidemus, populos illos, desperata salute, animum abjecturos esse, nisi vel novis auxiliis, vel spe certa, foveantur. Et, ne quis forsitan putet, pro vili plebecula verba fieri; habet Ponticus ille angulus Imperium Trapezuntanum, claris urbibus frequens; habet Capham, non ambitu quidem mœnium, sed populorum multitudine Constantinopoli facile præferendam; habet Soldajam, habet Simbolum,

bolum, haud contemnenda oppida ; habet denique Amastram, urbem quondam celebrem, sed sanctorum Episcoporum fama celebriorem. Præter quos insuper populos extenditur late ora maritima, quam Hostiam vulgo nominamus, quam soli incolunt Christiani. Cum igitur, ut perspicuum est, nobilissimarum urbium ac maximorum populorum salus aperto in discrimine versetur, qui sine ope Sanctitati vestræ salvi esse nequeunt ; orandam duximus benignitatem vestram, velit ad eorum calamitatem animum oculosque convertere ; eamque illis opem ferre, quæ pro rerum ac temporum conditione præberi potest. Super quibus omnibus venerabilis sacrarum literarum professor Deodatus à nobis pridem missus ad Beatitudinem vestram. Si quid opus fuerit, particularius verba faciet. Quem ut audire & exaudire dignetur, eam iterum atque iterum precamur. Cui nos, & nostra omnia, supplices commendamus. Data Gen. 1455, die v Novembris.

Petrus, Dux, & Consilium,

Callisto, Papa.

Legimus, Beatissime pater, & Domine nobis colendissime, literas Sanctitatis

tis vestræ, xxiii die Maii superioris datas. Legimus item exemplar literarum Reverendissimi Domini Cardinalis Sancti Angeli, quas ex Ungaria xvii die mensis Aprilis misisse videtur. Ex his cognovimus, quanta sit Serenissimo illi Regi spes reposita in classe Sanctitatis vestræ, quāque cupiat ea litora, terrasque Turcarum, mox incurfare. Nobis multa cogitantibus verba profecto desunt, quibus studium ardoremque vestræ Sanctitatis ad fidei defensionem digne extollere, satisque laudare valeamus. Quid enim addi posse dicemus tanto animi fervori, qui, erogatis auro, argento, gemmis, se ipsum cupiat pro suo grege in captivitatem dare? Verum, quoniam hæc pia animi vestri conscientia, in Deo requiescens, humanas laudes aspernatur, missa hæc facimus. Quod nos respicit, Sanctissime pater, non est ignotum sapientiæ vestræ, hanc Rempublicam, etiam priusquam Mahometus Constantinopoli potiretur, non exiguum Turcici belli pondus subiisse. Ex eo omni tempore navibus, viris, armis, tritico, urbibus Pontici maris succurrere cœpimus; vixque unquam postea ejusmodi sumptus cessavit. Postquam autem à conspectu vestræ Beatitudinis redierunt legati nostri, cum Rhodus, Chi-

us, Lesbos, aliæque urbes & insulæ, manifestis periculis objectæ viderentur, præter Ponticarum urbium curam; ad has quoque terras consilia convertere necessarium fuit. Itaque naves duas cum viris circiter quingentis, armisque, & instrumentis bellicis, Chium misimus; unam Mytilenas, cum ducentis, & omni telorum armorumque genere: tritici autem tantum conveximus Chium, ut, si vel Rhodus, vel alii vicini populi, esuriant, inde fami eorum succurri possit. Capham autem, & ad alias Ponticas urbes, duas item misimus alias naves, magnam frumentorum vim ferentes: quarum altera omnium maxima, quæ Mediterraneo mari navigarit, fulmine icta, malo & antennis ambustis, facta inutilis est: ingruitque necessitas aliam loco ejus quærere, quæ in Pontum penetret, & onus incensæ non sine novo & gravi sumptu illuc perferat. Hæc quisquis recte cogitare voluerit, licet ingens aliqua & hosti formidabilis classis à nobis comparata non sit, inveniet tamen, nos hoc longo & assiduo bello tot naves, tot viros armasse, tantum pecuniarum profudisse, ut longe minore sumptu prævalida classis parari potuerit. Lætamur, classem Sanctitatis vestræ nunc solvi, & Orientem petere.

Quæ

Quæ utinam Calendis Maiis, ut fama erat, in Asiam pervenisset. fovisset enim bona spe Christianorum populorum animos. quorum quidam perterriti, abjecta spe Occidentalium præsidiorum, pacem cum rege Turcarum agitare feruntur. Nos, Beatissime pater, quanquam diuturni belli mole defessi, non desinemus tamen terris & insulis, quas nominavimus, opem ferre, quamdiu vires patientur. Et, si reges ac populos Christianos Beatitudo vestra in unum consensum adducet, præclaram aliquam magnificamque expeditionem adversus Turcas parare; annitemur profecto, spei, quam de nobis Sanctitas vestra concepit, respondere; nec promptitudine vel ardore cuiuspiam cedere conabimur. Qui nos nostraque omnia benignitati vestræ propensius commendamus. Data Gen. die xi Julii, 1456.

*Petrus, Dux, & Consilium, Sacra
Regiæ Majestati Angliæ.*

ET si nobilissimum illud regnum Angliæ, Serenissime & præcellentissime Princeps, remotum est admodum ab Imperio Turcarum; arbitramur tamen, non esse ignotum Majestati vestræ, quanto

in periculo versentur urbes illæ, insulæque Christianorum, quæ Turcis propiores sunt. Chius certe, Lesbos, aliæque his vicinæ insulæ, & Amastrata præterea, ac Simbolum, Caphaque, & aliæ Pontici maris civitates, adeo attonitæ & tremefactæ sunt, ut, nisi præsidiis nostris servarentur, vix in diem usque præsentem perdurare potuissent. Nos, annus jam tertius elabitur, ex quo his populis adversus Regem Turcarum naves, viros, arma, triticum assidue prope subministramus, tanto quidem sumptu, ut defessi & exhausti vix spiritum trahamus. Non ignoramus, præclarissime Princeps, ex iis, quæ rerum gestarum scriptores prodiderunt, perraro vel nunquam adversus infideles bella esse suscepta, in quibus inclyti quondam Reges Angliæ, viri Christianissimi, & divini cultus zelantissimi, magnam laborum ac periculorum portionem non subierint. Quæ nos movent, Majestatem vestram orare, ut ad reprimendam insolitam hanc Turcarum ferociam velit jam oculos & cogitationes suas convertere: ita quidem, ut Christiani populi, in Oriente ac Septentrione positi, tanti Regis auxilia sentiant, & Rex ipse Turcarum, apud quem omnes Reges nostri irrisui sunt, sciat, esse sublimitati

mitati vestrae vires, quae sibi terrori ac formidini esse possint. Cæterum, injecta nobis suspicio est, quosdam tentare, ut cives nostri, Londinii negotiantes, contra jus, fasque, contraque fedus, & colligationem, quae multis jam annis est cum Majestate vestra, subjiciantur novis gravaminibus: de quibus cum aliquando suscitata lis fuisset, virtute ejus federis libere ab iis absoluti fuere. Non arbitramur, æquissime Princeps, humanitatem vestram expectare à nobis hoc loco preces exaggerari. Nam quo excelsiore loco sublimata est serenitas vestra, eo magis decet promissorum suorum curam habere. Ex quo, ut duorum saltem meminerit, summa sit precum nostrarum. Primum, premi Christianos Turcorum armis; quibus ut quam primum succurratur, æquum est. Alterum, nostros, ut diximus, in reverentiam ejus federis jam dudum absolutos fuisse, quod cum celeberrimæ memoriæ domino quondam parente vestro Henrico, gloriosissimo Rege, contractum est; quod ob memoriam ejus decet Majestatem vestram longe majore studio observare ac tueri. In cujus gloriam sumus omni tempore cupide parati. Data Genuæ, 1456, die VII Aprilis.

*Petrus , Dux , & Consilium , Sacra
Regia Majestati Anglia.*

SI ad memoriam superiorum temporum animum revocemus, Serenissime & præcellentissime Princeps, & seniores nostros, inclutum illud regnum frequentare solitos, audiamus; fuerunt profecto, in quibus non justitia modo, sed leges insuper, ac mores, omnisque præclara virtus, aulas clarissimorum quondam regum Angliæ inhabitare videbantur: ipsaque urbs regia Lodinium, non tam una civitas, quam veræ libertatis, incorruptæque justitiæ, templum quondam digne vocari merebatur. Quæ dum recogitamus, non miramur modo, sed obstupescimus, cognito nunc impetu, qui superioribus diebus in mercatores nostros, cæterosque Italicos, factus est. Quis enim non miretur, quosdam, licet paucos, ex ea plebe, quæ, miris hætenus, & quieta, leges ac jura venerari solebat, tanto furore exarsisse, ut more sævientis alicujus belluæ in homines innocentes irruerint, domos eorum refractis portis irruperint, bona diripere non erubuerint, &, mortem minitantes, à vulneribus etiam & sanguine non abstinuerint? Hanc tam barbaram,

baram, tamque inauditam, licet paucorum, insaniam vix nobis persuadere quisquam potuisset, nisi jam adeo per omnes terras vulgata esset, ut testes ultra non desiderentur. Nec ignoramus, præclarissime Princeps, scelera hæc non minus atrocia visa esse Majestati vestræ, quam iis ipsis, qui ea passi sunt. Nam, eo metu cognito, non premisit quempiam suorum ad opprimendum furorẽ vestra sublimitas, sed ocius advolavit, & discussa multitudine, quosdam in vincula conjecit, de quorundam capite supplicium sumpsit; de reliquis nondum perlatam esse sententiam, fama est. Quæ in fontes talis animadversio profecto fuit, qualis eum Regem decuit, qui Deum justitiamque respiciat, famamque ac dignitatem suam vitæ anteponat. Nos, ut de nobis ipsi loquamur, quemadmodum, re cognita, plurimum irritaverat iniuriarum magnitudo, quibus indigne nostri affecti fuerant; ita dolorem mitigavit severitas pœnæ, qua in reos Majestas vestra usa est; nec mitigavit tantum, sed fiduciam insuper præbuit, digna his malis remedia mox adhibenda fore, talia quidem, ut bonorum innocentia etiam inter improbos tuta fiat. Exploratum habet vestra Serenitas, mercatores illic nostros ita ne-

gotiari solitos, ut magna ab his commoda in alios, & multos quidem, diffundantur. Nec ignorat, non pacem modo nobis esse cum ea, sed fedus quoque, & colligationem, sancte à nobis incorrupteque servatam, & erga Excell. vestram, aliosque quondam Reges Angliæ, eam venerationem atque observantiam, qua neminem vobis præferendum putamus. Hæc cum ita sint, oramus Majestatem vestram, eamque iterum iterumque precamur, ut eam securitatem, easque provisiones adhibeat, per quas ea, quæ indigne direpta è domibus nostrorum fuere, mox reddantur, & cives nostri in vestris regnis procul ab injuria, proculque ab omni terrore ac metu securam vitam degant. Id quoniam ad famam & dignitatem regii nominis pertinet; supervacuum duximus, alias super alias exaggerare preces. Quod reliquum est, nos, nostraque omnia, in gloriam sublimitatis vestræ parata semper deferimus. Data Genuæ, iiii Junii.

*Petrus, Dux, & Consilium, Sacra
Regiæ Majestati Portusgallia.*

Oblectaverunt nos, Serenissime & præclarissime Princeps, magnaque spe simul & voluptate affecerunt literæ
Maje-

Majestatis vestræ, pridie Calendas Majas datæ, hodie tamen nobis redditæ. Quibus cognovimus, eam statuisse, susceptū adversus atrocissimum Christiani nominis hostem Mahometum, Regem Turcarum, bellum pie ac streue juvare. Qui certe ardor vestræ sublimitatis est hoc admirabilior, & majoribus laudum præconiis extollendus, quo in tam longa navigatione multo plus laboris ac sumtus ei subeundum est. Discedentibus enim è regno vestro, quod in extremo prope Europæ positum est, Thraciamque, & Constantinopolim petituris, pars maxima longitudinis terræ habitabilis metienda est. Quo fit, ut longe præclarius sit hoc fidei vestræ propositum, & omni commendationis genere prædicandum. Accedunt, ut literæ pulchre loquuntur, curæ ac labores tuendæ Cæsareæ; quæ in littoribus Mauritaniæ sita, & infidelibus populis undique cincta, armis ac insidiis barbarorum peropportuna est. Sed has difficultates ac labores contempsisse videtur generositas animi vestri: probe sciens, hanc militiam illi præstari, cui debemus omnia, per quem sumus ac spiramus; apud quem meritorum præmia, & immensa ira, perpetua sunt. Quod autem Excell. vestra nosse

cupit, quidnam & nos in id bellum moliamur; quæ, qualiaque paremus; libenter cupiditati vestræ morē gerimus. Nos, quamprimum Mahometus iste Amuratha patri successit, suspectum habere cœpimus ingenium ejus: nam cumque sævus & sanguinis avidus ferebatur, tumque in omnes omnis generis Christianos odium profitebatur. Propter quæ naves, arma, propugnatores ex tunc fidelibus populis in Orientem misimus. Postea vero quam Constantinopoli potitus, reliquas urbes terrore ac formidine complevit, tum demum, velut suscepto bello, necesse fuit, Chium, Lesbum, Capham, Simbolum, Amastram, aliaque oppida Pontici maris, aut præsidia mittere, aut infelices illos populos in exitium corporum & animarum sævissimis hostibus prodere. Itaque quartus annus circumagitur, ex quo naves, viros, arma, tela, triticum, his aliisque urbibus supeditamus. Qui tam assidui sumptus quamquam nos plurimum exhausserint, cum tamen Reges ac populi Christiani ingentem aliquam expeditionem parare cœperint, annitemur & nos nec dignitati nostræ deesse, nec ad divini cultus amplitudinem inter postremos haberi. Nunc autem neque numerum; neque reliqua
fatis

fatis explicare possumus : idque eo minus, quod Serenissimus Rex Aragonum fractis indigne induciis nuper cœpit nos mari terraque vexare. Conatus vero vestros, Excellentissime Rex, ut maximi habendi sunt, ita nos plurimi facimus; eoque pluris, quod plerique Reges, ac Principes, cum viderint, Majestatem vestram in altero propè orbe positam tam multa moliri, dedecori sibi fore ducent, si ipsi propinquiores in communiū Christianorum bello cessarent. Si quid autem est, aut erit, rerum nostrarum, quod huic expeditioni vestræ conducere possit, id, quicquid est, & nos ipsos, paratos semper deferimus in omnem gloriam vestram. Data Genuæ, die III Septembris, 1456.

Petrus, Dux, & Consilium, Illustrissimo & præclarissimo Principi, Domino Philippo, Duci Burgundiæ, Brabantia, & Limburgi; Comiti Flandriæ, Arthesiæ, Hannoniæ, Holandiæ, Zelandiæ, ac Namurci &c.

Dum recogitamus, Illustrissime & præclarissime Princeps, quantas, quamque præclaras res gesserit Excel. vestra,

vestra, vel ad divinum cultum, vel ad pietatis opera pertinentes; non sine ratione confidimus, fore, ut humanitas vestra, Deum respiciens, misereatur tandem Oliverii Maruffi, civis nostri. Nam, si (quod ignoramus) nihil debeat sublimitati vestræ, sed iusta aliqua indignatio adversus eum concepta sit; satis pœnarum pro ea culpa pendisse videtur: si multa debeat Celsitudini vestræ; (quod credibilius est;) quales forent hominum cogitationes, quales rumores, si pauperimus hic senex in vinculis moreretur? Nec latere arbitramur summam prudentiam vestram, hunc virum ita semper debitum in obsequia Excell. vestræ, cujus multis maximisque beneficiis creverat, ut omnium Regum ac Principum neminem vestræ sublimitati adæquaret, laudesque vestras adeo profuse die ac nocte prædicaret ut liquido apparerent. Hæc cum ita vera sint, ut omnem dubitationē excludant; orandam duximus humanitatem vestram, quæ libentius sibi thesaurizat in cœlis, quam inter tineas & fures, ut, memor divinæ admonitionis, quæ suadet, eos dimittere liberos qui confracti sint, dignetur huius inopis senis ærumnas miserari, eumque, si dignum, si indignum, plenæ libertati restituere.

Si

Si enim libertate dignus est, vinciri non debet: si indignus, erit ejus liberatio hostia quædam acceptissima Deo, cujus intuitu is liberatur qui libertate fuerat indignus. Nos autem, quorum animos calamitas uxoris ac familiæ suæ merito torquet, hoc ipsum accipiemus loco ingentis beneficii, cupide semper parati in omnem gloriam vestram. Data Genuæ, 1456, die xx Octobris.

*Petrus, Dux, & Consilium, Sacra Regiæ
Majestati Aragonum & utriusque
Siciliæ.*

ADmonuerunt nos nuper, Serenissime, & præclarissime Princeps, ex transmarinis regionibus ad nos missi legati duo Peræ; pavidî adhuc à recollectione periculorum, quæ æstate superiore egre devitarunt; pavidiores à novi terrore belli, quod adversus Constantinopolim & Peram Mahometus, Turcarum Dux, in ver proximum summa vi molitur. Namque hic præcipitis consilii juvenis, recenti Imperio ferox, eo cogitationes suas, eo conatus omnes obstinatissimo proposito vertisse videtur, ut has, quas diximus, urbes ferro excindat, & Christiani nominis memoriam in tota regione

ne illa penitus deleat ; eo forsitan consilio, ut, quemadmodum prior Mahometus, direpta Asia & Africa , inter clarissimos viros colitur , ita hic secundus , armis subacta haud ignobili Europæ parte, ingens sibi nomen ac gloriam comparet. Dumque, implorantibus legatis ipsis , propere ad se præsidium mitti, omnia diligentius percunctamur; renunciaverunt nobis, Oratorem ab Imperatore Græcorum ad Majestatem vestram mox esse venturum, qui oret, imperio illi, jam senescenti ac defesso , ocius succurri. Nos Imperatoris consilium & laudavimus sæpe, & iterum iterumque laudamus, quod, post Romanum pontificem, spes omnes suas in Majestate vestra colloca-
verit. Nam quem sperare potuit Christianorum regum æque velle ac posse sibi adversus hunc Mahometum opem talem ferre, qualẽ in sublimitate vestra & sperare & certo sperare debuit? Ab his enim regibus orrum ducit clarissima domus vestra, qui multis jam seculis occupantes Beticam Mauros, vi ac ferro domitos, ex iis sedibus ejecerunt: plurimasque urbes, & quidem nobilissimas, Christiano cultui restituentes, vix unquam positis armis à persecutione infidelium quieverunt. Ac sic, succedente temporum serie,
eo

eo parente genita est Majestas vestra, qui, suscepto adversum Granatanum regem bello, multas illi terras, multa parvo tempore oppida eripuit: nec infideles modo populos, Hispaniam incolentes, sed ipsam quoque summotam freto Mauritaniam, velut fulmen quoddam belli, solo nomine plerumque terruit. His accedit, quod vestra sublimitas, mari ac terra latissime imperans, sex, & quidem opulenta regna, in ditione habet, longa pace florentia, nullo hostis incursu, nullis minis exagitata: quorum quædam adeo Græcorum imperio vicina sunt, ut, Cypro excepta, cætera Christianorum regna in eorum comparatione alio prope in orbe posita videantur. Quæ cum ita sint, jure optimo exigere creditur Deus, cujus est, regna dare, atque eripere, ne patiatur Excellentia vestra hanc Christiano nomini maculam inferri, ut Orientale Imperium, totque fideles populi; Occidentalibus auxiliis destituti, calcandi ac dilacerandi pollutis gentibus relinquuntur. Nos, quibus solis Peram tueri necesse est, ut precibus etiam salutem illius Imperatoris adjuvemus, Majestatem vestram orandam duximus, ut hæc, quæ dicta sunt, cogitans; velit, cum pro gloria, tumque (quod majus, certiusque præ-

præmium est) pro causa Dei, infelicibus populis illis ocius succurrere, neque expectare Reges, in longinquo positos, & gravibus præterea bellis implicitos, dum sero auxilia moliantur, interim ferro Christianorum Imperium evertatur. Nos autem, ne quis ociosos putet, arma, viros, tela, naves, magna festinatione paramus, ut, si faverit Deus, illuc præsidia nostra veris initio perveniant; pro viribus semper in omnem gloriam vestram parati. Genuæ.

Sanctissimo ac beatissimo Patri, & domino nobis colendissimo, Domino Calisto, divina providentia Sacrosanctæ Romanæ ac universalis Ecclesiæ dignissimo summo Pontifici, Petrus Dux, & Consilium Genuensium.

Quid rei esse dicemus, Beatissime pater, & Domine nobis colendissime, quod, capta jam biennio ab Rege Turcarum Constantinopoli, & nunc perdomita aut vastata ea parte Mœsiæ quam Serviam vocamus, exterritis aut in dittonem reductis omnibus prope Ægei maris insulis, omnes somno sopiti esse videamur? Estne hoc negligentia, an cæcitas
potius

potius & amentia quædam multorum flagitiorum nostrorum, mentibus nostris innata? Accepimus frequenter ex Lesbo, Chio, Rhodo, Cypro, aliisque insulis literas, quibus certi reddimur, infelicibus illis populis, exitium suum oculis aspicientibus, omnem esse salutis spem in subsidiis regum Christianorum repositam. Qua si destituantur, reliquum est, ut aut desperatione enecentur, aut, abnegato Christi nomine, Mahometicarum cœno spurcitiarum sese immergant. Hæc si ætas nostra spectatura est, Sanctissime Pater; si hæc malorum omnium suprema in ævum nostrum eruptura sunt; quanto satius esset, non vixisse, & ex utero, ut fleas ille cecinit, ad tumulum esse translatos? Ad hos præcipue questus nos nunc movet, quod fama est, ejus Regis, classem, & quidem prævalidam, jam Chium infestam pervenisse. qua si potiatur insula, frustra Cypro, aliisque insulis, succurretur. Ex quibus orare statuimus Sanctitatem vestram, dignetur primum, si quæ in Italia reliquæ sunt contentionum, aut bellorum, vel Iacobi Piccinini, aut aliorum, eas utcunque tollere: quod supremæ quidem sapientiæ vestræ pronum ac facile fuerit. deinde cogitationes, consilia, totum denique animum ad defensionem

Fidei

Fidei vertere: pacatis enim civitatibus ac populis Italiæ, inveniet profecto Beatitudo vestra cætera vel prona, vel non admodum difficilia. In his si, ut confidimus, versentur consilia vestra, præter laudes humanas, quæ virtuti debentur, expectet Sanctitas vestra immortales illas divitias, quæ fideli servo promissæ sunt. Nos denique, & omnia nostra, Benignitati vestræ peculiariter commissa esse, præcipuum votum nobis est. Data Genuæ, xxvi Augusti.

Illustrissimi Duces Mediolani, ad Serenissimum Regem Ferdinandum.

SI justo animo fortunam tuam metitus fuisses, Rex Ferdinande, ad quietem potius quam ad arma consilium deduxisses. Verum, & si bellandi cupiditas prævaluit, saltem justam causam sequi debebas, & in aliud tempus differre, ne, de vindicandi animi libidine dum Italas opes inter se conflictare facis, Turcus, qui legationibus muneribusque sollicitatus, ingenti pene exercitu in Epiro consedit, veluti hanc contentionem speculaturus, omnes de Italiæ possessione mox deturbet. Ex eo enim fit, ut tibi, ac cæteris, periculum pares, ingenti dolore tuorum, quibus

quibus publica pax, & gloria tua, semper
cordi fuerunt. Verum, hac communi tem-
porum atrocitate, privatam ad expostu-
landum tecum dolorem causam habemus;
ut à quo, si quando aliquid gravius
incidisset, plurimum præsidii expectabamus,
ab eo nunc, rupto fœdere, & aspernato
omnis affinitatis jure, laceessimur. In
animum siquidem nostrum descendere
nunquam potuisset, ut tu, quem loco pa-
rentis coluimus, nocere nobis sustinuisses.
Atque, cum jamdiu multa de te de-
ferrentur, moniti ut rebus Genuensibus
caveremus, irritos habuimus omnes nuncios,
tanquam falsos & inanès; confirmati
ab Oratore tuo, te in fide perman-
surum; quia, nulla illata tibi prius injuria,
nihil ex te metuendum coniiciebamus.
Sed hæc opinio nos fefellit. Nam
Prosper Adornus, præses nostrorum Ge-
nuensium, studio tuo modo rebellavit.
Misi ei Prospero subsidium, triremes
tuas, addita pecunia. Ardet itaque nunc
ea civitas intestina discordia per te con-
flata: & tu: autor hujus mali, ex tua
Neapoli quasi alienum incendium ex-
portare credis. Quod te compulerit, ni-
hil est, nisi quod in periculo suo Floren-
tinos socios nostros juvamus: quam-
quam iis ipsis ex fœdere mutuo tu quo-
que

que auxilia debes : & , si à nobis minus recte fieri opinaris , minus recte sentis ; quoniam , perire , potius , quam fidem fallere , ducimus. Si vero ob periculum nostrum efficere credis , ut subsidia nostra ab Etruria retrahamus ; eodem voleris errore. Nam Superum nobis vires præsto futuras non dubitamus , quibus hanc injuriam tuam propulsemus , & socios nostros non deseramus. Quod etiam si in contrarium cederet in populos nostros ; quorum , quam Florentinorum , ruinam fortiori animo laturi sumus : tamen interest inter nos , & fidem tuam , qui ultimo capessis arma in eos , qui ex operibus suis te juverunt. Et pro justa causa stare semper consuevit Deus. Ille novit, Alfonso Regi, patri tuo , per Philippum Mariam, proavum nostrum, inopi & captivo, libertatem & regnum fuisse restitutum. Ille idem Deus scit, clementia primum sua , deinde Francisci Sfortiæ, avi, & soceri nostri, beneficio, regnare. Hæc tibi obliterari non debebant: quæ si auditu molesta sunt, acceptu quidem fuerunt jucundissima. At meritum omnium oblitus , cum pupillo & viduæ arma inferis , non multum studes gloriæ tuæ ; quæ apud omnes nationes interitura est , nisi servas fidem.

Neque

Neque satis fortunam agnoscis. Cujus est, in eodem vestigio nunquam stare. Itaque, nisi fallimur, non multo post sese aliorum convertet. De beneficiis quidem tecum certare cupiebamus animo liberali, ut, si quando ita occasio tulisset, non exigere avita & vetera auxilia, sed præstare nova, parati essemus, ad confirmandum Regnum liberis tuis. Contra accidit quam volebamus. Parem itaque dolorem tibi reddere compellimur, quoad movere lacertos poterimus. Mortalis es; & superfuturos, nisi casus abrumpas, æstimatione justa nos putare debes. Quid opum relinquas hæredi tuo in Regno, quod provocasti, jam nunc potes cogitare. At hoc fortasse tanquam alienum judicabis; quasi longam vitam tibi fata sponderint. Illud certe in præsens reputare debes, quod, rupto per te federe, nobis omnia licebunt, quæ te viventem perturbare possint: neque te fore quietum spera, ubi nos perturbasti. Perturbasti enim inclytos quoque Venetos & Florentinos, quibuscum nos fedus habemus. Neque in quemquam nostrum insurgere potes, quin simul omnes provoces. Quibus, si recte vires tuas consideras, par neque opibus eris, neque justitia. Spiritus vero æquales fortasse geres. Utinam! modo

do non temere nunc eos sumpseris. Sed nos eo propensius ad dirumpenda hæc tua studia cogimur, quod arma nostra laus secutura est pro injuria propulsata: bellum vero à te susceptum sequetur infamia; quia fedus & affinitatem ultro sis averfatus. Itaque, nisi consilium mutes, cogita, nihil nos prætermitturos, ut incendium nostrum mox regnum quoque tuum apprehendat: cum etiam, si id volumus, metuere debeas quos terrores justos sis Genuæ habiturus, si quando eam urbem retinere non possemus. Sed omnia potius experturi sumus ut vel integram civitatem recipiamus. Quod ubi non licebit, eam diu conflictatam ad postremum iis tradituri sumus quos semper offensissimos habuisti; ut discas, nullius graviores esse morsus quam pereuntium, & tandem suscepti consilii te quoq; pœniteat. Vale. Datum Mediolani, xi Julii, 1478.

Rex Ferdinandus, Illustrissimo Prospero Adorno, Governatori Genuensium, & XII Capitaneis populi.

Magnifici viri, amici charissimi, legimus literas vestras, per Magnificum Simonetum de Belprato nobis red-
ditas,

ditas, ipsumque Belpratum audivimus. Quem cum intra quatrimum remittere ad vos constituerimus, pluribus nunc nō utimur. Mittimus in præsentia hanc triremem cum iis rebus, quas, cum istuc applicuerit, intelligetis. & ipsum Belpratum cum iis rebus mittemus. ut facile singularem nostram in vos voluntatem & præcipuum studium prospiciatis. Intelligetisque etiam, quam nobis gratissima acciderint quæ publicæ utilitatis civitatis istius gratia à vobis acta sunt, & quantopere eas ob res nos vobis debere judicemus. Satisfaciemus cumulatissime spei opinionique vestræ. Interim hortamur, ut concordie accuratissime studeatis; efficiatisque, ut omnes in officio ac fide permaneant. De ipso Belprato, fuerunt, quæ scripsistis nobis, jucundissima. Et, si se, qualem scribitis, gesserit, faciet quod maxime cupiebamus, quodque ei à nobis injunctum fuerat. Bene valete. Data in Castello novo Neapolis, die xxvii Augusti, 1478.

Dux Mediolani, Genuensibus.

Dilectissimi nostri. Longiori sane epistola nos uti oporteret, ad ea verissimis rationibus refellenda, quæ, literis nostris

nostris respondentes, in medium adducitis. quibus ostendere nitimini, suscepta merito à vobis fuisse arma. Verum, omnis refutandi argumenta rationibus, consilia convertimus ad id, quod vobis salubrius, istique inclytæ civitati conducturum magis, & quietem restitutum putamus, ac finem facturum gravissimis laboribus, impensis, ac damnis, quibus oppressi estis; de quo certe, ob summam in vos charitatem nostram, plurimum auguramur. Ut igitur rei vestræ bene consuli, & ad eas conditiones deveniri possit, quibus quiescere tandem, & ejusmodi incommodis ac imminetibus vobis periculis liberari valeatis, operæ precium videtur nobis. Vosque iterum atque iterum hortamur, ut pro rebus componendis ad nos Oratores destinetis: qui nos pacis studiosos, ac optimo erga vos animo esse, invenient: facturique sumus quæ non ingrata vobis fore non ambigimus: nec vos unquam eosdem Legatos misisse pœnitebit: quibus per has nostras liberum & amplum saluum conductum esse volumus, tuto & impune accedendi, morandi, & redeundi. Ex Mediolano, XIII Septembris, 1478.

Rex

Rex Ferdinandus, Reverendiss. & Illustr. Raphaëli Fregosio, Duci, ac Capitaneis Genuensium.

Reverendissime & Illustrissime Dux, ac magnifici viri, amici carissimi. Unum restabat, quo effrenis Venetorum dominandi libido palam omnibus foret, ut scilicet etiam nobis & regno nostro bellum inferrent. Sed id nunc contigit, & omnibus in aperto factum est. Siquidem (ut arbitramur, vos non ignorare) Veneti ipsi irati, regni nostri provinciam, quæ Hydruntina vocatur, nuper irrum-pentes classe, quam ingentem compararunt, Callipolim, quæ ad mare sita est, & nonnulla alia illius provinciæ oppida, per vim occuparunt. Quod hoc tempore illis non admodum difficile fuit, in ea regione præsertim, quæ per superioris Turcici belli incommoda incolis pene denu-data est. Multaque alia in nos & statum nostrum iidem hostes nostri omni suo scelere moliuntur; ut omnibus jam constet, eos de subigenda sibi Italia jam diu inisse cogitationem. Huic tam effrenatæ cupiditati obviam esse eundum, existimantes, robustissimam equitum & peditum manum illuc quamprimum misimus,

mus, aliosque pene in horas singulas mit-
timus. Classẽ & validam & numero-
sam instruximus; quæ propediẽ educe-
tur, eo consilio, ut pro libertate Italiæ
hostium conatus infringamus, occupata
recuperemus, & illatas nobis & federatis
nostris injurias pro viribus ulciscamur.
Quod, Deo bene juvante, qui justis cau-
sis deesse non solet, ita brevi futurum
confidimus, ut, hostes ad pœnitentiam
sui consilii compelli posse, non dubite-
mus. Memores autem antiquæ nostræ
benevolentia, in mandatis dedimus clas-
sis ipsius Præfecto, ut navibus vestris, si in
quas inciderit, nihil incommodi, nihil-
que molestia inferat, sed Genuenses o-
mnes omnibus amicitia officii prose-
quatur. Quæ omnia vobis veteribus a-
micis nostris imprimis significanda puta-
vimus, ut, quando nemini dubium est,
Venetos de occupanda Italia cogitare,
ad idque conatus suos omnes dirigere,
expergiscamini jam tandem; & una no-
biscum in eos, qui vobis, quantum per
ipsum licuit, semper sunt adversati, con-
spiretis, tamquam in communes om-
nium Italorum hostes; nec prætermitta-
tis occasionem hanc, quæ vobis divinitus
oblata est. Quæ si neglecta fuerit, dole-
bimus non parum Italiæ conditionem.

Sed

Sed nobis nullo pacto deerimus; qui speramus, per hanc terrestrem & maritimam expeditionem rebus nostris, & federatorum nostrorum, ac vestris, optime iri consultum. Data in Castello novo Neapolis, primo die Iunii, 1484.

*Leonardus Maruffus, Chii Praefectus,
Genuensibus.*

Virtus nobilissimi viri, Guilielmi Henrici, Harlemani Hollandensis, nobis merito suadet, ut de illa pertinentes ejus laudes in obscuro esse non patiamur. Nam à teneris annis bonis artibus & literarum studiis institutus est. Deinde, crescente ætate, rei militari operam dedit: in eaque cum laude ætatem exercuit. Nam, cum ex ultimis Galliarum finibus, ubi in præclara Hollandiæ urbe generosis parentibus ortus est, in Italiam proficisceretur, eo animo, ut in Asiam traiceret, sepulchrumque Salvatoris nostri & loca sancta inviseret; non deteritus ab eo proposito quod in itinere à latronibus non levi pecunia spoliatus est; primum à Magnifico officio Sancti Georgii Genuensi stipendio conductus in eo bello, quod Genuenses contra Florentinos gessere; deinde, cum

à Turcis nobis ubique periculum instare videretur, cum delecta virorum manu, cui ille præpositus erat, ab Inclyta Rep. Genuensi ad nos missus est: postmodum, adveniente Regis Turcorum classe, cum factum propositum prosequi in animo haberet, pugnandi contra Turcos ardore permotus, profectionem suam remoratus est, donec omnis periculi suspicio abesset. Postea vero quam ea classis in Syriam navigavit, tuti ab hoste, facultatem abeundi Guilielmo concessimus: & ita concessimus, ut, si licuisset, talem virum retinere apud nos maluissemus. Ita à nobis ille cum honore & gratia dimissus est, ad loca sancta profecturus, & honestissimum desiderium suum impleturus. De his omnibus igitur convenire nobis existimamus, palam notitiam facere, ut hujus virtus non ignoretur, & cæteros ejus exemplo ad virtutem accendamus. E Chio, anno 1488, die x v i i Junii.

Julius Feltrius de Ruvere, Sancti Petri ad vincula S. R. E. Diaconus, Cardinalis Urbini, &c. Lectoribus harum literarum, Dominis, & amicis, S. in Domino sempiternam.

Cum

Cum nobilis & dilectus nobis in Christo Dominus Augustinus Curio, civis Basiliensis, familiaris noster singulari pietate, probitate, virtute, nobilitate, honestate, doctrina, & singularum atque diversarum rerum peritia præditus, qui aliquandiu hic apud nos summa pietate & vitæ integritate versatus est, decreverit se ad diversas orbis terrarum regiones conferre, ut mores naturasque hominum varias pernoscat: (quod ad prudentiam comparandam & augendam non parum habet ponderis:) non potuimus ejus consilium non approbare. Cumque cupere-
mus, ut talis adolescens, tot egregiis virtutibus armatus, ubique locorum nostram erga se benevolentiam cognosceret & ex operis effectu sentiret; idque nullo modo melius quam commendati-
tiis literis à nobis effici posse videretur; eo quod absentium animi, multo locorum intervallo distantium, nullis certioribus testibus, quam ipsis literis, ad aliquem amplectendum moveri soleant: Omnes & singulos Principes, & Dominos; tam Ecclesiasticos, quam seculares; nec non Comites armorum, atque belli Duces; & illorum loca, officia, vel vices gerentes; & universaliter atque singulatim omnes, cujuscumque status, & con-

ditionis, vel gradus, quacunque, Ecclesiastica, vel alia dignitate clareant, ad quos hæ literæ pervenerint, rogandos duximus, & rogamus, ut præfatum D. Augustinum, ad nostræ contemplationis intuitum, iis honoribus, favoribus & gratiis prosequantur & accipiant, quibus homines nobis charissimos prosequerentur, & acciperent; eique per eorum terras & loca, de salvo conductu, & itineris securitate, aliisque rebus necessariis, vel profuturis, provideant: significantes & indicantes, id nobis tam gratum fore, quam quod gratissimum; nosque ad gratiarum actiones, iuxta relata, & ad debita rependia, obligantes. Datum Fori Sempronii, die xi Junii, 1558.

Julius Card. Urbin.

Franciscus Strozza,
secr. de mandato.

Vniversis ac singulis, Illustribus, Magnificis, Nobilibus, Strenuis, Prudentibus, Doctissimis viris: Principibus, ac dominis, & rerumpublicarum Rectoribus; necnon eorundem Vicariis, Præfectis, Gubernatoribus, atque alia officia gerentibus: ad quos præsentis literæ pervenerint: Nos Franciscus Oberriedt, Consul,

*Consul, ac Senatus urbis Basiliensis,
salutem à Domino precamur, cum
prompta bene merendi voluntate.*

Significatum est nobis per virum excel-
lentem & Magnificum nostræ univer-
sitatis & Academiæ in hac urbe Recto-
rem, & Cælium Secundum Curionem,
virum præstantissimum, quo pacto ante
annos aliquot Honestus & ingenuus Au-
gustinus Curio, legitimus dicti Cælii Se-
cundi Curionis filius, cum ad alias natio-
nes, tum maxime in Italiam, peregrina-
tione instituta profecturus sit, quo suo-
rum studiorum & bonarum artium cul-
sum, quem dudum hic cœperat, bene ac
feliciter absolveret. Verum quoniam per-
eegrinanti, atque apud varias ac diversas
nationes habitanti, varia quoque pericu-
la atque impedimenta obici atque oc-
currere interdum solent: Orarunt iidem
clarissimi ac nobis charissimi viri, ut di-
ctum Augustinum Curionem, nostra se-
ria ac benevola commendatione munire
dignaremur: nihil dubitantes, eum apud
omnes chariorem futurum, atque à peri-
culis & impedimentis tutiorem. Nos igitur,
Consul, ac Senatus reipub. Basilien-
sis, nobiscum perpendentes, quam præ-
clare jam multos annos D. Cælius Se-
cundus.

cundus Curio, non solum in universitate nostra bonas artes magna cum laude ordinarie professus sit, verum etiam, ut bonum civem decet, se erga cunctos cum sua familia universa, vitæ innocentia, morumque probitate, gesserit: ideo ipsorum petitioni æquissimæ libenter annuimus, parati, ipsis & suis in longe gravioribus rebus adesse & gratificari. Quamobrem quam maxime serio possumus, rogamus Illustrissimos Principes, magnificos Dominos, & quicumque horum vices gerunt, ut dictum Augustinum Curionem, Cælii secundi Curionis Civis nostri dilecti filium, nostra causa commendatum habere, benigne suscipere, ei favere, & sua auctoritate ac præsidio adesse velint, faveant, & adsint: atque in primis ea benevolentia & gratia prosequantur & accipiant, ut tuto ac sine periculo, ac detrimento, & molestia, ei aditus, transitus, reditus, atque commorandi facultas in omnibus suarum jurisdictionum locis, oppidis, & civitatibus, benigne concedatur ac permittatur. Quod quidem quia speramus, vos, quæ vestra æquitas & clementia est, esse nostra causa facturos: pollicemur & nos vicissim, his liberalibus officiis cognitis, nostram operam; atque erga vestras Illustrissimas sublimitates

tes ac dominationes, nec non & vestros homines, gratos nos ac benevolos semper fore. In quorum omnium inviolatam fidem præsentēs literas secreto nostræ urbis sigillo consignavimus. Datum Basilæ, anno Nativitatis Filii Dei 1562, die xx Septembris.

Reverendissimo Patri, Domino Ludovico, Sanctæ Romanæ Ecclesiæ Cardinali, Camerarioque sedis Apostolicæ, Laurentius Valla S. P. D.

CUpienti mihi post annos quatuordecim reverti in patriam, & matrem, sororemque, ac cæteros propinquos, revisere, suadebant amici, ut literas commendatitias ab Rege Alfonso, cujus octavum jam annum secretarius sum, impetrarem, cum ad alios complures Romanæ curiæ Senatores, tum vero ad ipsum Principem senatus summum Pontificem; quarum literarum præsidio istuc venire, & istuc agere, tuto possem. Mihi autem alia ratio ineunda visa est: voluique, non per alium, sed per me; non ad alios, sed ad te, de rebus meis scribi. Nam neque causam meam alius efficacius aget, quam ego, & cum te alloquor,

totum senatum cum ipso senatus Principe alloqui videor. Tu enim, sicut ab illo secundus es, tum virtute, tum potestate; ita in hoc negotio primus. Quoniam, quicquid tu agendum putaveris, id ille ratum habebit. Sed, priusquam me purgem; dicam pauca de iis quæ ad conciliandam benevolentiam tuam pertinent. Cum dico tuam, Papæ dico; quem, ut iterum dixi, alloquor, cum te alloquor. Ego Eugenium, ante Papatum, dilexi atque amavi adhuc adolescentulus, cum eidem præceptori Græcarum literarum uterq; operam daremus. Ego paullo post, ab avunculo meo Nicolao Tartarino deductus ad eum, majore charitate profectus sum, cum opusculum meum magnopere laudasset. Vellem creationi suæ affuissem: sed eo tempore Papiæ eram. Ille tamen, postulante sororis meæ marito, absenti mihi duo beneficia contulit. Ipse quoque affinis meus, quod Papæ plurimis annis contubernalis fuisset, erat aliqua occasio, ut jam Eugenium Papam peculiariter, non charitate modo, sed etiam tota pietate, complecterer. Hæ sunt causæ quare minime ego perosus eum fuisse videri debeam, sed dilexisse, amasse, observasse: quod ita fuisse, res ipsa declarata loquitur. Multi alii ultro citroque discurs-

discurrunt, ut, quod hinc obtinere non poterant, ab hostibus impetrarent. Multi scripsere in vos, etsi in scribendo non satis poterant. Ego neque illuc me contuli, cum multi non parva mihi pollicerentur; neque adversus Papam scripsi, cum in scribendo atque in omni doctrina tantum possem, quantum, ut apertissime dicam, quivis unus potuit illorum, qui Basilix aut sunt aut fuerunt. At, cur de Constantini donatione composui, hoc est quod purgare habeam, ut quod nonnulli obtrectant mihi, & quasi crimen intendunt. Id ego tantum abest ut malevolentia fecerim, ut summopere optassem, sub alio Pontifice necesse mihi fuisse id facere, non sub Eugenio. Neque vero attinet hoc tempore libelli mei causam defendere, nisi Gamalielis verbis. Si est ex hominibus consilium hoc, aut opus, dissolvetur: Sin autem ex Deo, non poteritis dissolvere. Opus meum conditum editumque est: quod emendare, aut suppressere, nec possem, si deberem; nec deberem, si possem, Ipsa rei veritas se tuebitur, aut ipsa falsitas se coarguet. Alii de illo iudices arbitrique jam sunt, non ego. Si male locutus sum, testimonium perhibebunt de malo: sin bene, non cadent me verbis æqui iudices.

Sed:

Sed opus illud in sua, quæso, causa quiescere sinamus. Hoc tantum consideres velim, me non odio Papæ adductum, sed veritatis, sed religionis, sed cujusdam & famæ gratia motum; ut, quod nemo sciret, id ego scisse solus viderer. Multum etiam nocere potuissem, si alieno animo fuisset in rebus quæ mentem animamque magis sollicitant. Nam, quod feci, hoc non modo ad pudorem præsentium, sed mortuorum etiam ac futurorum pertinet. Qui enim nemini parcat, nullum lædit. Verum cum non minus prodesse in posterum possim; quantum uno libello offendi? Per ego te superiorum temporum meam in summum Pontificem benevolentiam pietatemque, id, quod cum per se facile, cum vero tuæ virtuti facillimum, obsecro; non beneficium, non munus, non gratiam, non veniam; sed, ut similis tibi sis; ut, quod semper fecisti, facias; ut de animo erga me tuo summique Pontificis aliter ac sentis non rescribas; etiamsi, me tibi odio esse, nec licere mihi in patriam redire, dicas; quod (absit ut dicas) tamen, si dixeris, beneficii loco numerabo; & quidem maxime vereor. Parce, quæso, si dico, me vereri: periculum me cogit, aliter, ac volo, loqui. vereor ne forte des fidem mihi,

hi, tuto me venire posse; ut præsentem commodius ulciscaris. An parum tibi videtur, ob tantulam noxam me exilium pati? an ulterior tibi ultio quærenda est? Quod si miserationis respectus te tangit, orant pro me omnes propinqui mei, qui istic sunt, cupidi me recuperandi. Si respectus vitæ; innocentia mea te rogat. Si amor gratificandi; tua te bonitas obsecrat. Si studium clientes obnoxios tibi comparandi; affirmo tibi, non in postremis Laurentium, tibi præsentem officio, diligentia, observantia, esse, comperies. Quare ne pluribus verbis te obtundam, finem scribendi facio; avidus cognoscendi, quid de me sentias; jubeasque venire, nec ne. Hoc si feceris, voto meo satisfeceris aliqua parte: omnino autem; si jufferis ut veniam. Et, postquam venero, noli dicere, O Deus! Vale. XIII Kal. Decembris, Neapoli.

Laurentius Valla, Blondo suo, Secretario Apostolico, Salutem.

Litteras tuas facundissime scriptas Rex legit. sed interventu Principis cujusdam non perlegit. Cum præsertim inter legendum interrogaret aliqua, ut sit, ex ipsa materia tuarum literarum incidentia.

ria. Quorum primum fuit, ubinam essent octo libri, quos ad se mittere scriberes. Cupiebat enim videre, tum propter alias historias, tum propter eas, quæ ad eum pertinent. Eos ego opinabar olim jam in manus ejus pervenisse. Quade re miratus admodum sum, quomodo factum sit, ut aut scripseris mittere, aut, quod non mitteres, an non pervenerint, si miseris. Illos ergo scias expeti atque exigi ab eo ipso cui promisisti. Vides ut res in contrarium recidit. Tu ab rege historias exigebas, ille abs te potius flagitavit. Dabis igitur operam, ut aviditatem Principis, quam incitasti, sitientemque effecisti, suavitatem tuarum historiarum saties. Quid autem de historiis, quas postulabas? Ille nullas hic alias habet, nisi eas quæ lingua Hispana à rege quodam Alphonso conscriptæ sunt, & quidem earum rerum de quibus Latini scripti libri non sunt. Nam, quod ad recentes pertinet, Gaspar, ejus medicus, in commentarios retulit pene res ab illo gestas, sed ea accurate, (ut de stylo ipso taceam) nequis prudens scriptor aliquid ad fidem veritatis illinc mutuari possit. Mandaverat autem mihi jam pridem Rex historias suas scribendas, repetitis altius principiis jam inde ab infan-

ria.

tia ejus. Quæ, quia non habui à quibus plane docerer, malui non attingere, quam fidem historiæ obliviosorum quorundam senum memoriæ credere. Tu, si vales hujus medici scripta cognoscere, plusquàm te medicum esse oportebit, ut de ægroto corpore historiarum tuas historias sanas efficias. Itaque, mi Blonde, omnis tua in te reposita est spes. Si quid autem librorum ad hanc rem spectantium Rex aut hic aut potius in Hispania habet, mitto tu historias tuas quemadmodum pollicitus es. sic enim reddes eum ad id, quod petis, alacriorē: atque in te promptiorem. Optime quidem de te sentit, tum quod eruditissimus es, tum quod sibi deditissimus. Mihi crede, nihil avidius libentiusque leget, quam si quid de se honorificum scripsisti. Quod si viderit, perpetuo eum tibi beneficio obstrinxeris: habebitque tibi singularem gratiam; sperans etiam, cætera, quæ nondū mandata sunt litteris, gesta sua per te memoriæ prodi. Mitte igitur quod promisisti, ut regem & me lætitia impleas. Vale. Idibus Januariis. Neapoli.

Reve-

Reverendissimo Patri, Domino Gerardo, Sanctæ Romanæ Ecclesiæ Cardinali, Laurentius Valla S. P. D.

SI, te Romæ agere, prius quam hesternodie accepissem, non hodie primum ad te literas darem. Sed cum Lampugrinus noster, vir & nobilitate & literis & gravitate insignis, dum una essemus, in patriâ esse dixisset, perseveravi in ea opinione quasi adhuc abesses à summo pontifice. Hunc errorem à me heri literæ affinis mei Ambrosii Dardani excusserunt. Quibus, ut causam meam tibi committerem, admonebat. Ut nesciam, an plus ex illis gaudii, ob spem tui, contraxerim; an pudoris, quod parum videor functus officio erga te, nullis literis ad te scriptis, qui tantulo intervallo loci hinc discretus esses; Cujus vetus familiaris, & abs te nonnullis beneficiis auctus, fuisset, præsertim post istam, ad quam ascendisti, dignitatem. Sed superiorum temporum excusationem in aliam epistolam differamus. Quod autem ad te non scripserim postea quam Roma venisti, culpam hanc, si culpa dicenda est, ignorationi rerum remittas: hanc qualemcumque excusationem, quæ tua mansuetudo est, facile

facile accipies. Itaque ab istis suavissimis moribus, clementiaque vera, postulo, ut me non aliter audias, quam si ad te cito, si frequenter, si officiosus scripsissem. Causam meam, ut opinor, nosti. De opere, inquā, Constantinianæ donationis. Ob quod multis seculis apostolicæ sedis senatoribus invisus sum, & reus agor, imo peragor, ab iniquis meis atque invidis. Nam, ipse de me fateor, ac me quoque accuso, quod nec hominibus nec diis pepercissem videar; sicut de Luciano Lactantius ait, Non deest volentibus carpendi materia. Accessit huc novissimum opus, quo vivos non modo, sed & defunctos exagitasse reprehendor, & à quibusdam ob id terror mihi proponitur. Quam ego reprehensionem terroremque, nisi matris causa, quæ istic est pro meo amore, nihili facerem; nec ad te propterea scriberem, aut cuiquam supplicarem; contentus animi conscientia; inventionibusq; felix, ac generosa quid sentiam dicendi libertate me pascens. Sed pietas matris me ad se revocat, & quasi ventus quidam adversus alio vela flectere ac pene retrorsum cogit. Eam nunc visendi & amor & ratio mihi necessitatem imponit, ut amborum, & ipsius & meo, desiderio satisfaciam: fortasse emendaturus

rus præsens quod absenti emendare difficile est. Huic rei conficiendæ deest facultas illa, quam salvi conductum vulgo vocant. Ad quam pro me obtinendam, ut Ambrosius noster perscripsit, quod alioquin ipse intelligebam, nemo te magis idoneus est, tum propter eximiam gravitatem, tum propter singularem sapientiam. Superest igitur, ut, quemadmodum potes, ita & velis. Quid igitur rogem te, amicus amicum, cliens patronum, literatus literatissimum, iusta ac pia petens hominem iustissimum, piissimumque? Ita me deus, uti videor (mihi crede) diffidere naturæ, virtuti, moribus ac literis tuis, si te pluribus rogem. Rogat te itaque, non Laurentius, sed musæ, sed bonæ artes, sed probitas, sed sapientia, sed virtutes: quæ ut in isto pectore, tanquam sacrario, semper habitaverunt, habitantque, ita à Laurentio, quasi procul ac longo intervallo, adorantur & extrema linea amantur. Has si audies, facultatem illam pro me impetrandam curabis, nisi rationem hanc non ineundam mihi, aut aliam potius ineundâ, existimes. Quam, tuæ probitatis interest, aut per temet, aut alium certe, me, sive meo loco levirum meum, literis edocere. Hoc si feceris, ut spero, & opto, non me demereberis,

(nam

(nam olim demeruisti ,) sed ex tuo , ut inquit Plautus, tuissimum feceris. Mitto ad te epistolam, quam nuper ad amicum misi: ut sciam quid de mea sententia sentias. Si istuc veniam, feram xvi libros Homeri prosa translatos. Itemque octo libros super Novum Testamentum. Præterea elegantias meas, cum compendiaris glossis, ipso Opere pene utilioribus. Ad quod agendum & honeste & vere adductus sum. Vale. xii Kal. Februarii, Neapoli.

*Ferdinandus, Alphonso, Regi Aragonum,
Patri, S.*

QUOD unum semper optavi, Rex triumphator, ac mi pater, ut pro summo Pontifice ac matre Ecclesia contra ipsius hostes pugnare posses, & virtutem tuam ostendere, id plane Dei numine consecutus es. Effecisti que brevi, quod nemo alius majori tempore, pluribus copiis, gravioribus laboribus, potuisset. Desperata enim jam erat Marchia summo Pontifici: ad quam recuperandam nec vis Ecclesiæ, nec Papalis auctoritas, nec ulla alia potentia suppetebat: eam tu tamen scientia rei militaris, tum admiratione victoriarum, nec non fama virtutum, rece-

recepisti; ereptamque tyranno, summo pontifici reddidisti. Qua gloria nulla est nec novorum nec veterum principum major. Itaque & mihi videris solus tu Hannibalem atque Hasdrubalem superavisse. Siquidem prius, expulso ex hac parte Italiæ hoste tuo, certe Hannibalem expuleras. nam, ut ille multis commoratus annis, ita hostis tuus hinc exire coactus est. Nunc alter hostis, qui superat, ex eadem regione abs te fugatus est, ex qua Hasdrubal cum suo exercitu fuit eiectus atque vi extractus. Quare, ut iterum dicam, tu unus Hannibalis & Hasdrubalis victor es. Ex quibus rebus licet ego summam præter omnes, te excepto, voluptatem capiam, ut debeo: tamen summo opere optarem, ut me participem huius gloriæ faceres, sicut fecisti & regni. Fore enim, mi pater, tuæ gloriæ participes, si tecum militarem, si laboris aliquid, imo voluptatis in re bellica sentirem. Hoc namque modo aliqua pars laudis & victoriæ ad me redundaret. Eo quidem magis, summe rex, & optime pater, quod mihi discenda est scientia rei militaris, sine qua nullus rex, qualem tua benignitas me futurum esse vult, vere rex dici potest. Hanc scientiam sub quo Imperatore melius discere queo, quam sub
te

te summo Imperatore? aut quo tempore melius, quam incunte ætate? Quamquam, optime pater, non solum mea causa hoc flagito, sed etiam tua; videlicet, ut possim pro te nonnunquam in rebus levioribus subire labores, gerere negotia, suscipere curas. Quamobrem, summe rex, ac sacrosancte pater, ut mature possis ex me aliquem fructum capere, te quaeso ut velis mature mihi procurationem rei militaris injungere. Quod si facies, ut opto & spero, maturius spe tua, prout confido, ex me gaudium fructumque recipies. Vale.

*Laurentius Valla, Guarino Veronensi
salutem.*

Literas equidem libenter, filium vero tuum libentius vidi. Nihil illo vel totius habitu corporis elegantius, vel sermone eruditius, vel moribus liberalius. Vera Guarinia progenies: quippe & paterni corporis decorem, venustatis pariter & dignitatis plenum reddit; & præceptorum eloquentia ac sapientia refert; licet non modo te præceptorem, sed & patrem, à quo multa traducuntur in filios, exhibet. ut in te illud Virgilianum decentissime cadat: O felix nati virtute bonisque,

nisque. Quod si cæteri filii, quorum magnus tibi proventus est, vestigia patris imitabuntur, nec Metellus quidem ille felix te felicior fuisse dicetur. Hunc ego filii loco accipio, amplectorque, tum suo ipsius, tum paterno merito. Apud Regem vero nostrum etsi per se est commendatus, tamen commendatiorem facere laboravimus. Hæc hætenus. Quandam orationem Plinii, non dico eloquentem, sed admirabili eloquentia, haberi aiunt: eam si tu vidisti, velim, per literas me certiore facias. Est autem de laudibus Nervæ apud ipsum Nervam. De qua ipse Plinius meminit prima epistola: ubi ait, se imitatum esse Calvum, quasi Latinum Demosthenem. Tamen si miror, quod tota sit in contentione dicendi, ut ille testatur, in laudibus si tota versatur. Eam si penes te habes, ad meque mittes, mittam ego tibi vicissim meam orationem; quæ etiam ipsa prope tota in contentione versatur de falso credita & e mentita donatione Constantini. Dices; Pacisci mecum vis. Minime. sed, nisi orationem meam non videris, mittendam esse non puto tibi. Rescribes igitur, an Pliniana Laurentianaque oratio in manus tuas venerit. Si utraque, tu Plinianam ad me mittes. Si neutra, ego ad te meam Laurentia-

rentianam mittam. Si Laurentiana, neuter ad alterum aliquam orationem mittet. Sed quid versutius tecum ago, homine probissimo? Vale. & me ama.

Laurentius Valla, Aurispæ suo salutem.

REddidit mihi literas tuas vir egregius, cuique observantissimus, Augustinus, Marchionis legatus, plenas amoris, officii, suavitatis. quid dicam? eloquentiæ: cum nullas unquam accuratius scriptas ad me dedisse videare. cuius rei causa extitit, vel quod ocio pinguiore abundas, vel quod te defendere pariter & me subaccusare necesse putasti. defendis te, tanquam ego, ut tuis verbis utar, aut minus diligentem, aut parum officiosum, te fuisse existimem, quod tam diu ad me scribere, atque adeo scriptitare, intermiseris. rursus subaccusas me, quod antea quidē perraro, postea vero nihil prorsus literarum dederim, immo ne scribenti quidem tibi responderim. unde tum adductus es ad tacendum, nolens sæpius compellare non respondentem. Ego, mi Aurispæ, vir optime ac suavissime, priusquam negligentiam meam, & ut tu videri vis, duritiam mentis, atque barbariem, purgem, quæso ne me ita impotenti ac

ti ac rustico existimes animo, ut, quod ipse crimen admittam, vel negligentiae, vel sprete officii, id alteri objiciam, &, cum in eodem genere gravius in te peccem, quam tu in me, tibi succenseam, cum tu potius mihi succensere deberes. Quid si tu nihil peccasti, quid si diligens in scribendo, quid si officiosus fuisti; vicissimque me nonnunquam accusasti, quod parum amici officio in scribendo fungar? Potest in me istud, quod objicis, cadere, nisi ut à me sensum hominis extirpatum existimes? Quid ergo? negligens antehac fui, nec respondi tibi scribenti? Equidem affirmare ausim, non pauciores me ad te dedisse, quam abs te accepisse literas; fortasse plures. Tu quidem scripsisti; sed nec tuæ ad me, nec meæ ad te, perlatae sunt omnes epistolæ. Postquam vero Florentia summus Pontifex migravit in dextrum, tu à lævo Romam, quo interim loco fuisti, ubinam subsedis, ignorabam. Scripsi que nonnunquam ad eundem levirum, ut, ubi ageres, certiores me faceret. A quo nunquam certior fieri potui: primæque tuæ literæ me hoc edocuerunt, sollicitudineque animi levarunt. Quid enim mihi jucundius, quam te, si non coram, saltem literis & audire & alloqui? Quod si Romam Fe-

bruario

bruario proximo, ut ais, venies, ego ad
 te visendum advolabo. Feram & Elegan-
 tias meas cum titulis, & in marginibus
 compendio comprehensas omnes quæ in
 Opere ipso disputantur; signantes rem
 propemodum non minus utilem quam
 ipsum Opus, licet nihil aliud sint quam
 Opus ipsum. Non id eo tamen, quod cum
 illis sentiam, qui, potuisse res illas brevius
 à me tractari, contendunt, ut ais; quos
 tu per invidiam hoc dicere confirmas.
 Nam brevius quam longius, si in alteram
 partem erratum est, à me illæ tractatæ
 sunt. Veluti circa finem tertii capituli de
 comparativis. Nam hoc exemplum poste-
 rius addidi. Cicero pro Ligario, Quotus
 enim quisque istud fecisset, idem nullus
 vel rarus. Ovidius de arte, Forma Dei
 munus; forma quota quæque superbit.
 Idem Cic., Nulla vel rara sequitur; non
 venit in mentem &c. Et duo tria ve alia
 addidi, cū nihil detraxerim. Addā fortas-
 sis septimum librum. Nam scripsi de notis
 Antonii Raudensis, qui grande Opus de
 imitatione composuit. Et scripsi: tum à
 nostro Rege sollicitatus, ut subnotarem
 quæ mala præcepta crederem: tum à Io-
 hanne Aretino rogatus, qui eisdem die-
 bus de Opere ipso me consuluit: tum ut
 contumeliam, quam ille mihi faciebat,

in ipsum refunderem ; siquidem elegantiam quandam meam , non apud me lectam , sed in Lombardia ab auditoribus meis auditam , petulanter nescio magis an stulte exagitat ; licet non nominatim ; dedit enim hoc amicitiae nostrae ; nam est mihi vetus familiaris. Hunc vel ad te librum mittam , vel feram : consultaboque tecum , cui sex seu septem elegantiarum libros dedicare debeamus. Adhuc namque sine viro & sine tutore errant , tanquam insulae illae , quas postea Apollo revinxit invicem , immotasque coli dedit , ut Virgilius inquit. Feram ad te praeterea sedecim Iliados libros à me prosa oratione traductos : quos nisi iudicio tuo subiciam , in manus aliorum tradere non audeo. Praeterea libros octo de collatione novi testamenti inter Graecum fontem Latinumque rivum : Opus non magni ingenii , licet majus parvitate doctrinae meae in Graecis literis ; tuo tamen praesidio ac quasi numine , qui velut Deus es quidem Graecarum literarum , quicquid in me deest , supplebitur tua auctoritate. Si modo auctor eris , inscribetur alicui Ecclesiasticorum , quos hoc munus proprie decet. Quid multis ? Ne quid in te peccasse videar , quem patris loco mihi colendum duco , me meaque tuo arbitrio do , dicoque.

que. Jube quid de me, quid de operibus meis fieri velis. Nihil est quod ego te jubente facere recusem, tum quia toto te pectore amplector, tum quia impietatis crimen mihi incurrere videor, si quid officii in te prætermisero. Quare noli, quæso, idcirco negligentiam scribendi obiicere, ut probes, me parum in amore respondere. Nam ne Iohanni quidem Aretino, qui fratris amantissimi apud me locum obtinet, jam anno circumactō literas dedi. Cur ita factum sit, noli quærere. Sic habeto, duos Iohannes, alterum patrem, alterum fratrem, me habere, ad quos jam anno vertente scribere non potui; ad quos visendos etiam ultra Oceanum, quo Ulysses apud Homerum se contulit, ire possem. Vale igitur: & frequentes à me literas expecta: aut, si non pervenient, (quod non puto,) nihil vel alienati vel senescentis mei in te amoris indicii existimato. Vale. Pridiæ Kalend. Ianuarias. Neapoli. Orationem meam de donatione Constantini, qua nihil magis oratorium scripsi, sane longam, rescribe, an videris; habiturus à me eam, nisi vidisti. Mandata tua peregi diligenter. Quintilianum me accepisse, olim scripsi.

*Alphonso, Hispaniæ & Italiæ Regi,
Laurentius Valla Salutem.*

ET si propediem visurus auditurusque hominem es, de quo ad te constitui scribere, eadem pro tua incredibili sapientia de præsentē judicaturum : tamen faciendum putavi, ut de absente jam scribam ; ferre non sustinens, quin tibi aut iudicium animi, si forte hoc scire vis, testificer, aut ob hunc virum Hispani nominis gloriam gratuler. Nam, ut ex tuis regiis laudibus, splendidissimisque virtutibus, omnis Hispania gloriatur : ita de hoc homine, quantum ex privata persona, & literariæ, non castrensis, militiæ cultore, fas est, gloriari potest : tuque in primis, qui & bonorum & eruditorum amantissimus es : eo quidem magis, quod Senecæ, Lucanique, quos tu summo, ut debes, in honore habes, est conterraneus concivisque, &, quod plurimum faciās, Senecæ seniori, nescio an corpore, certe memoria atque ingenio, simillimus : ut, si Pythagoram audire vellemus, putari posset anima Senecæ in hoc esse homine renata. Etenim ille in Declamationum proœmio refert, quod pene incredibile hætenus, nunc recens istius fides credi-

credibile facit, solitum se esse mille versus semel auditos continuo referre, & ut à quoque acceperat, (nam à singulis hominibus singuli versus dicebantur,) suum cuique reddere. Idem in duplicato numero ait fecisse Pörtium Latronem, qui fuit idem Cordubensis ac condiscipulus suus. Sed profecto non tantopere illi suo tempore admirabiles extiterunt, quantum hic nostra ætate. Tametsi non omnia me experiri permisit angustia temporis. Siquidem tribus diebus homine usus sum, & mecum & cum aliis compluribus disputante; & ipse talia se quoque facturum pollicetur. Verum de eo, quod expertus sum, siue quæ repetit ex disputatore modo audita, siue ea quæ in thesauro quodam atque in ærario lecta collocavit, nihil cognovi mirabilius. Quantacunque alloquaris oratione hominem, ipse eam omnem, vel ad literam, vel ad sensum, si minus aperte ab altero prolata est, repetit, & quidem celerius, expressius, doctius, ut eum magis sua credas quam aliena proferre. Quidquid ab adversario dudum est dictum, quicquid eodem die, quicquid pridie, quicquid nuper, id omne sic tenet, ut eum nulla sententia, nullum & verbum effugiat. Adeo multum periculi est, ac summopere ca-

vendum, ne quid calore disputandi, aut cursu orationis, aut multitudine rationum, aut altercandi mora, tibi excidat quod non plane cum cæteris tuis dictis constet atque consentiat. Protenus enim ille inconstantia tuæ te admonet, & loqui contraria aut inter se repugnantia ostendit. Quamquam non deest in disputationibus calliditas mira, atque solertia; quin etiam in luctando, ut sic dicam, robustissimus est: tamen omnes, ut ajunt, palæstræ numeros ac flexus adhibet, ut eodem momento, & viribus premat, & arte eludat: Simulque pede, & genu, manu, latere, decertat. Et hæc quidem extemporalia. Quid autem illa, studio ac lectione comparata præter ea? de quibus judicare non possum. Hebræam dico, Punicam, Chaldaicam linguam. Quæ ita multa sunt, & quasi flumine quodam abundantissimo pervehuntur, ut mihi miraculum subeat ac stupor, audienti tantam omnium disciplinarum, immo omnium auctorum & omnium librorum, repetitionem. Nihil in Grammatica est, nihil in Dialecticis, nihil in Physicis, nihil in Metaphysicis, nihil in Moralibus, nihil in Geometria, nihil in Astronomicis, nihil in Medicinis, nihil in Musica, nihil in Theologia, nihil denique in Ju-
re,

re, quod ignoret. Ignoret dico? immo quod non habeat in promptu, memoriterque reddat, ac pene decantet. Ita nusquam in proferendo hæsitat, ita fluit, ita abundat, ut prius dubitare adversarius desinat & repugnare, quam ille fidem aliam super aliam facere. Eo loquente omnes ita stupent, atque ab eo dependent, ut inquit de Didone Virgilius, Pendetque iterum narrantis ab ore: & Ovidius, Narrantis conjunx pendet ab ore viri. Parum dico; Sibyllam putes, aut aliquam Apollinis vatem, cui omnia, si veteribus credimus, cognita erant. Nec unum dicas hominem loqui, ut Priscianum, Aristotelem, Euclidem, Prolo-mæum, Galenum, Aristophanem, Ulpianum: sed, hos omnes, & quam plurimas doctissimorum hominum animas, hoc hominis corculum insidere. Est statura infra justam, & gracili: at certe tot annos vixisse in studiis videtur quot Nestor fuit in vita. Quæris quot annos natus sit? Dicam triginta? nondum satis annorum putabis. Dicam quinquaginta? ne hoc quidem verisimile est. Profecto non credes, nisi tertiam ætatem hominum, quod fertur de Nestore, vixisse dicam. Agit itaque Ferdinandus, (hoc enim nomen est nostro Nestori,) agit tertiam æ-

tatem, exactis jam duabus; siquidem transivit infantiam pueritiamque, in media positus adolescentia, duodevicesimum agens annum, aut modo ingressus undevicesimum, nondum malas signante lanugine. Quis hoc credat, nisi qui viderit? Quomodo habebunt tam miræ rei posterī fidem? Quanto minus credituri, si, quod utinam ei contingat, diu vixerit? Sileo hoc loco morum, sermonis, aspectusque suavitatem, modestiam, mansuetudinem, ut prope cum non minori benevolentia complectamur quam admiratione suspicimus. Verum ut sincere de homine judicem, & nihil, vel quod adest ei, vel quod abest, omittam, lingua Latina, facultas poetica, ars oratoria, tanta ei adest, quantam Hispania docere aut aliqua provincia potuit. Breviter; Summa, ut dicitur, manus in eo desideratur; (solus namque in Italia nitor ille dicendi, ornatus orationis, vis eloquentiæ viget, sive in prosa, sive in carmine) præsertim jactis fundamentis in Græca lingua. Quibus rebus si sub optimo præceptore Ferdinandus, paucos annos dicam, an menses, operam dederit, profecto videbimus, eum fore sapientem illum, quem docti imaginantur, quique, cum esse possit, tamen nunquam fuit, quasi

quasi mortalem quendam deum. Itaque lecto Catone, Varrone, Cornelio Celso, Columella, Plinio, de agricultura cum agricolis contendet. Lecto Vitruvio, cæterisque, cum Architectis de architectura disputabit. Evoluto Frontino, atque aliis, de re militari cum Imperatoribus decertabit; ne dicam, omnes revincet. Atque item in cæteris artibus itidem rapaci, voraci, tenaci memoria est. Quamquam nescio, plusne memoriam, an acumen, an judicium prudens synce- rumque admirer. De quo plurima adhuc dicenda essent, nisi nollem verbis onerare, & scirem, te paucis diebus tibi ipsi magis, quam mihi, crediturum. Quare ob tam admirandum hominem & tibi & nationi tuæ gratulor; gratulaturus Senecæ tuo utrique, si viverent; qui, si apud Elysios campos essent, illic, cum de eorum cive audirent, exultarent, ut Achilles de Pyrrho, ut est apud Homërum. Vale. viii Kal. Augusti. Neapoli.

Florentini, Lucensibus.

SI antiqua repētantur, magnifici domini, amici charissimi, nulla major conjunctio & conformitas animorum per totam Italiam fuisse reperietur, quam

quæ fuit dudum inter civitatem nostram & vestram : multaque beneficia, charitatis & amoris plena , ultro citroque facta memorantur, per quæ manifeste apparet, incredibilem quandam dilectionem & humanitatem duabus istis civitatibus existisse. Omittimus bella, quæ & Florentinus populus pro populo Lucano, & Lucanus populus pro Florentino suscepit. Omittimus obsidiones urbium inimicarum , communiter ab utroque populo factas. Omittimus expeditiones contra omnes hostes, à majoribus vestris ac nostris gloriose susceptas. nullo quippe loco antiquis illis temporibus pugnatum est, quin Florentinus & Lucanus in una atque eadem steterint acie, sub eisdem signis ac tubis contra communes hostes pugnaturi. Per quæ omnia constat, idem velle, atque idem nolle, quæ perfecta est amicitia, harum duarum civitatum fuisse. Pacis certe temporibus hæc eadem, vel etiam majora, charitatis indicia memorantur. Quorum unum referre libet, dignum memoria sempiterna. Seditione siquidem coorta in civitate nostra, civibusque ad arma ruentibus, & jam prælia inter se committentibus, scimus, Lucanum populariter accurrisse, ad arma de manibus civium nostrorum extorquenda;

da ; nec prius abiisse, quam, rebus compositis , civitatem nostram sua opera pacatam quietamque viderunt. Sunt insuper alia multa quæ referre possumus, amore fraterno facta vel à nostris vel à vestris, cum summa benevolentia, & perfectissima charitate; quorum commemorationem epistolaris brevitatis non reciperet. Vtinam perseverassent continuo huiusmodi tempora ! id enim fuisset optimum pro civitate vestra. Sed , quoniam siue error hominum, siue fatalis quædam necessitas, aliter postea induxit: recordemur, quæsumus, primæ illius conjunctionis fraternæ, & hæc posteriora nostris ex animis oblivione sempiterna deleamus. Res enim faciliter solet ad pristinam redire naturam. Cum ergo nunc per Dei gratiam , non solum pax & amicitia reducta sit inter nostram civitatem & vestram , verum etiam confederatio & societas instituta , propositum nostrum firmissimum & indubitatum est , veterem amorem ac perfectam voluntatem conservare de cætero , atque complecti ; & , quantum ad nos attinet , providere , ut perpetua sit hæc amicitia & conjunctio nostra. Quod & vos ex parte vestra facturos esse speramus. Nostra quidem sinceritas ac perfecta voluntas de die in diem

diem magis per experientiam operum
elucebit. Datum Florentiæ, die sexta
Maii, 1438.

Florentini, Duci Venetorum.

Illustrissime atque excelsæ domine, a-
mice charissime. Quoniam per effe-
ctum operum manifeste deprehendimus,
neque inimicis, neque amicis nostris pla-
cere, ut Lucana civitas in potestatem Flo-
rentini populi deveniret; decrevimus
contra, illam non amplius impugnare;
sed nos retrahere à certaminibus & con-
tentionibus illis, in quibus, ut vere dixe-
rimus, nos à sociis desertos ac destitutos,
ab hostibus vero totis viribus impugnari
cernebamus. Itaque, deposito contra Lu-
censes bello, amicos atque benevolos,
quantum in nobis erit, habere illos qua-
rimus; neque in hac parte fatigare so-
cios, ut eorum subsidia implorare com-
pellamur. Quæ omnia talia sunt, ut, sal-
va fide & honestate, ac servato jure fe-
deris, quod vobiscum habemus, ea facere
possimus. Hoc igitur quantum ad nos.
De comite autem Francisco; nollemus
fuisse præstitam fidem; justis suasionibus
nostris totiens apud vestram Celsitudi-
nem profecto fideli animo per nos itera-
tis. Florentiæ, 1438.

Dux

Dux Mediolani, Lucensibus.

Magnifici, amici nostri charissimi. Licet omnipotens Dominus permittat aliquando adversa contingere, semper tamen est in ejus clementia & benignitate sperandum. Solet enim humiles & justos exaltare, superbis vero usquequaque resistit. Et, ita nobiscum saepe actum esse cognovimus, & nunc ab effectu videmus. Occupaverant hostes nostri diebus elapsis vallem Tellinam nostram; & ex ipso illius vallis ingressu in tantam elationem superbiamque evaserant, ut arbitrentur omnia vincere & subvertere, non memores, quod injuste pugnarent. Sed restitit, ut diximus, Deus omnipotens insolentiae eorum. Procedente igitur spectabili & magnanimo viro Nicolao Piccinino de Perusio, locumtenente & capitaneo nostro generali, & praesente spectabili & praestanti viro Comite Guidone Torello, qui totius rei maximus fuit arbiter adversus ipsos hostes, hesternae die, hora circiter xviii, in nomine Dei, cum ipsis hostibus feliciter decertarunt: ita ut contra ipsos nostri victoriam gloriosissime reportarint; captis, inter ceteros, domino Gregorio Cornario, ex primariis

mariis hominibus Venetiarū ; qui provisor erat & commissarius totius exercitus Venetorum; Raddæo Marchione, Cæsare de Martinengho , Grasso de Venetiis , Paulo de Venetiis, Lipitoccho & Daniele de Solnicho , ac armigeris centum quinquaginta ex præstantioribus, facientibus conductum equitum duorum milium; peditibus ultra mille ex melioribus, & Cenedibus infinitis. Pigliardus autem generalis capitaneus gentis suæ pedestris a paësanis trucidatus. cujus finis talis merito esse debuit : quoniam à servitiis nostris imprudenter aufugerat æstate præterita. Talianus vero, ut dicitur, nondum evaserat ; & ipse etiam verisimiliter capietur. Quid plura ? Omnes autem mortui , aut cæsi sunt , & vel nulli vel paucissimi evaserunt. Certumque erat apud nostros , non solum recuperare dictam vallem, sed longe majora perficere. Est aliud felix novum. Exercitus enim , qui, devicto Casali Pado , & capto in eo perfidissimo proditore Francisco de Corrigio , contra Borsillum processerat , dictum locum prorsus obtinuit , cum rocca & villis suis omnibus. Quæ res facit , ut illæ partes nostræ ultra-Paduanæ tutissimum statum habeant , & amplissima pace fruantur. Hos igitur jucundos & faustos

faustos rerum nostrarum successus amicitiae vestrae statim statim duximus intimandos; certi, quod non mediocrem laetitiam ei afferent. Data Cuxaghi, die xx Novembris, 1432.

*Poggius, Petro Donato, Archiepiscopo
Cretensium, S. P. D.*

Cum visitassem pridie abbatem Montis Rosant, qui hac iter fecit, iturus pro legato in Picenum, post verba, quæ primo congressu communiter haberi solent, quæsi de te in primis diligenter, & an esses Præneste, quo te contuleras pridie quam ego recessissem. Qui cum mihi dixisset, Tibur non receptum à Prænestinis, ob timorem inferendæ pestis; detestans illorum immanem rusticitatem, admiratus sum paullum, te repetisse eundem locum, quem ipsum fugeras conservandæ salutis gratia, ac non potius alio divertisse, præsertim cum & tam multi in ea urbe morbo interierint, & tam multa sint oppida circum salubri aere, in quibus absque ulla suspicione esse potuisses. Hoc si abs te factum est propter animi magnitudinem, ut qui contempnas, quam cæteri reformidant, mortem, & hanc fragilem momentaneamque vitam non pluri

ris, quam à sapientibus existimanda sit, facias: laudo certe animum ac fortitudinem tuam, quod ita animatus sis, ut firmam stabilemque vitam huic labenti & caducæ anteponas. Si vero aliud quippiam te movet, ut longius à Pontifice abesse nolis, vide an satis consulto feceris, qui conjeceris te in vitæ discrimen propter nescio quam incertam rerum futurarum significationem. Sed tamen ea sapientia te præditum scio, ut, omne consilium in agendo tuum mature & prudenter à te susceptum, cogar existimare, ut, quamquam tua salus me sollicitum maxime teneat, tamen hoc uno consoler, quod, gravi sapientique deliberatione & egisse te omnia, & acturum, confidam. Cupio quidem, ut superior caussa te impulerit ad redeundum Tybur; quam nos alii propter imbecillitatem mentis animique angustias aufugimus, terrore commori. Et id quoque erat æquius fieri ab eis qui ad aliorum exemplum constituti sunt. Sed multos tamen pavor exanimat, verentes hoc nomen mortis: tum maxime conscientia dictorum, ac factorum maxime; quorum aliquando nobis apud illum tremendum iudicem æternum ratio reddenda est. Libet paullum, mi Petre, philosophari tecum, qui me non solum loquen-

quentem serio, sed fabulantem quoque pro tua singulari humanitate libenter soles audire. libet autem, non ostentandi causa; quod vitium longe à me abest; sed tecum ea loquendi, viro omnium eruditissimo, quæ ita fert temporis ratio præsentis, quæ, ut timere, ita quoque aliquid dignum viro nos sapere, docuerit. Equidem non meam, quæ nulla est, sed multorum prudentium, ut habentur, atque excellentium virorum, sapientiam desidero. Quicunque intenti existunt ad evitandam pestilentiam metu mortis, quod corpore, nullam habentes omnino curam mortis animorum, loca transmittant, hi secretiora quædā petunt, amant solitudinem, hominum fugiunt congressum, exquisitoribus utuntur dāpibus ad præscriptum medici, cujus consilio has parent; atque hæc omnia, ut hæc moles corporea, tum egregium ipsis, tum salutiferum opus, diutius conserve-
tur. Cum interim de animis nullum verbum; ii soli, mæsti, sordidi, inculti, squalentes, jacent in tenebris ac carcere cæco, omni ope destituti: &, cum ipsi ægri anxiique multis obruantur pestiferis animi morbis, qui illos ad internecionem ducunt, nullus accersitur animi medicus, nulla parantur medicamenta. Sed hoc
negli-

negligentia nostra sinimus. Atque cum multis ex rebus, tum vel ex hoc maxime, perspicere licet communem hominum insaniam. Nam cum duplex sit interitus; corporum alter, alter animorum: corporū quidem, quanquam nullo pacto vitare possimus, studiosissime fugimus: animorum vero, qui vivant ne, an intendant, in nostra est potestate, etiam ultro appetere audemus, omnis emendationis ac rationis expertes. Nos corpus nostrum colimus tamquam deum: quicquid expetit, damus: vetat, imperat, præscribit: nos ejus paremus imperio, nos ad illius arbitrium ætatem agimus nostram; ad ejus cultum, pompam, fastum, atque ornatum, studia nostra ponentes; cœlum, terram, maria, deos atque homines pro ipsius augmento fatigantes: quod potius comprimere; spernere, exercere debebamus, atque ejus vim minuere, tanquam omnium malorum irritamentum. At vero animum, qui ipse deus est in nobis, hoc est, divina pars quædam, humilem, abjectum, mœrentem ac sorditatum, reorum more in compedibus & vinculis captum teneamus; nihil ei opis, nihil damus auxilii in cœno jacenti & sordibus: qui cum ægrotet, sitiatur, atque esuriat, & medicum negamus, & cibum. Qui si nos illum, prout

debet,

debet, non servi, sed domini loco, haberemus; si bonis artibus excoleremus: næ vitæ ejus, quæ futura est æterna, curam aliquam subiremus. Si de ejus interitu æque ac corporis perturbaremur, solliciti ad fugam: næ æquo animo susciperemus diem nobis constitutum, in quo & maiorum præsentium finis esset futurus, & laborum præmia: nosque sarcina corporis exui facile pateremur, evoluturi ad liberiores vitam, in qua nulla esset mors extimescenda. Sed nos, veluti pecora, dediti ventri, vitio, & otio ignavo, vitam, ut inquit Salustius, veluti peregrinantes, transimus; quibus corpus voluptati, anima oneri fuit. Videntes, prudentes, scientesque, nos pessum ire, nullo exemplo, nulla doctrina, nulla ratione retrahimur ab iis curis, quæ in nostrammet perniciem redundant. Sed hæc hæc haftenus. Redeo ad illud superius, cujus occasione hæc dicta sunt. Si tu ob eam causam Tibure te contines, quod vere philosophus evaseris; cujus vita, ut nosti, omnis præmeditatio mortis esse debet: bene est. id quod summa laude dignum, tibi que gratulor philosophanti. Verum cupio abs te scire, quid agas, quæ vitæ institutio, quæ virtus, in quam philosophorum sectam deveneris. Epicurei dissoluti sunt
nimis;

nimis; Stoici severiores; mediocritatem Peripatetici servant, admittunt divitias, dignitates non adspernantur. Hos cen-
seo amplectendos. De me autem si quæ-
ras, quid agam, possum id quidem unico
verbo expedire: Statur. Vel, si pluribus,
unico versu: Vivo equidem, at vitam
insanam per omnia duco. Si tamen sin-
gularius id cupis, accipe paucis: Prius
quam veni Reate, conduxì domunculam
penes flumen ingens satis, quod præter-
fluit civitatem. Mane visito ecclesiam o-
randi causa. Tum demum, revertens,
pertranseo forum, circumspectans, atque
emens, si quid usui est; & præsertim me-
lones. Quorum cognitionem Muccharus
existimabat perdifficilem; & ob eam rem
non absque intermedio emendos cense-
bat. Neque exemplum Mucchari, me tan-
tum, quantū Horatii auctoritas, movet:
qui, ipse Poëta egregius, laudans vitam
suam, scribit, se Romæ, urbe omnium
celeberrima, solitum obambulare fo-
rum, percunctantem quanti olus aut far
emeretur. Multo magis ego, homuncio
præ illius excellentia, in hac urbe rusti-
cana, quod in usum meum sit, emens,
nullam reprehensionem timeo. Tum do-
mi lego aliquid, ac scribo, sedens in ac-
cubulatorio propter fluvium ad aquæ
mur-

murmur. Indulgeo deinde corpori quantum satis est. Magna vero pars temporis consumitur deambulando. nam & est hic aer frigidiusculus, & loca amœna admodum, & ad deambulationem accommodata. Quod autem facio plurimi, nulla hic audio nova, nulla bella, nullos rerum tumultus: non quæri sentio, quid Aragonum, quid Francorum parent Reges; quid Dux Mediolani, quid Florentini moveant: non audio nostrorum temporum molestas archipiratarum terrestrium militias, quos ultra Sauromatas vellem hinc esse abreptos. Fruor quiete animi. nam corpus sibi consulit; neque me sollicitat cupido ulla lucri. Quin potius illa me torquebant cum essem Tibure. Si quem conveneram ex nostris; Heus tu, nunquidnam novi? Unus mortuus est, alter morituro proximus. Nunquid aliud novi? Milites conscribuntur, aliqua obsidio paratur, Tudertum deditionem fecit, Perusini legatos misere, nescio quod castellum secessionem parat: & sexcenta alia, factorum plena. Quæ dediscenda essent, si scirentur. Hic vero iis inanibus fabellis honeste caremus. Hujus vitæ vellem te fieri participem, si id esset futurum in rem tuam. Nam tunc nihil nobis deesset ad absolutam cumulatam-

latamque ex omni parte voluptatem. Nam hic quoque Epicurum fieri licet, & eum, qui aqua & polenta hospitem recipiebat, & eum, qui titillatione sensuum vitam effecit beatam. Si aderis, utramvis capere licebit, tibi tamen soli, si priorem elegeris. Virum clarissimum Antonium Luschem, si præsens est, verbis meis salvere jube: & item Ramelem confabulatorem nostrum. Vale. &c.

Alia.

Ingentem benignitatem tuam, vir clarissime, jam ter spectare jussus sum: primum, quum declarationem in Senecæ declamationes commodare mihi, qui nulla tecum familiaritate conjunctus prius fueram, non dubitasti: deinde, quum commentarium in Augustinum de civitate Dei, Bonacurso nuncio, mihi consignandum tuo nomine, dedisti: tertio, quum munuscula mea, dignitate tua longe inferiora, jucunda fronte suscipere dignatus es. Qua in re non te latere velim jocosam contentionem per me cum ipsis muneribus in ipsa destinatione habitam. Cum enim illa mittere deliberarem, nullo pacto pedem efferre volebant; & quanto magis tuos petere lares jubebam, tan-

to magis resistebant. Horrebant, reor, & quodam rubore præpediebantur magnificentum tuum illud subire palatium. Nec mirum, si tanti nominis tui splendore confundebantur. Quis enim genere clarior, quis omni virtutum genere præstantior, quis fortunæ muneribus abundantior; non tantum tua ipsa in urbe Lucana, sed tota in Etruria, reperiri potest? Tu tantum pro tui animi magnitudine fortunæ fulgorem floccifacere, parvique ducere solitus es. Equidem, de mansuetudine tua certior factus, persuadere illis non dubitavi, ut audacter indubitanterque migrarent. Refocillata itaque oratione mea pudibunda, & rubore suffusa, declivibus oculis ædes tuas sidereas subire conata sunt. Ubi præter opinionem benigne suscepta, futuris muneribus tutum pollicentur accessum. Quæ si tardiuscula fuerint, pro tua modestia tarditatem ipsam mansuete patienterque tolerabis. Voluissem tamen tuis illis celeberrimis nuptiis aliquid misisse. Ad quod faciendum me non mediocriter adhortatus est Iohannes de Vecchiano, sacrarum legum interpretes egregius. Sed, quia nihil ipsarum splendorem condecens occurrebat, in aliud tempus differendum duxi. Nec ipsa tarditate tantorum in me benefici-

neficioꝝ immemorem existimes, quæ-
so, si meritis tuis non repente satisfa-
ctum per me fuerit : faxy tamen ne te,
certasse priorem, pœniteat. Quod si di-
gna non contulero præmia, ne tamen in-
gratus videar, enitar pro viribus : pectō-
rique meo Maronicum illud semper hæ-
rebit infixum ; In freta dum fluvii cur-
rent, dum montibus umbræ Lustrabunt,
convexa polus dum sidera pascet, Sem-
per honos nomenque tuum, laudesque,
manebunt. Et quoniam nullum officium
referenda gratia magis necessarium du-
citur, singulari benignitati tuæ, quas pos-
sum, gratias ago, majores debeo ; quas,
cum tempestivum fuerit, persolvere non
prætermittam. Librum vero tuum supra
notatum tam benigno commodatum a-
nimo, tutum, illæsum, inviolatumque
reservabo ; nec illum penes me diu dor-
mitare permittam, sed bibliothecam il-
lam tuam omni genere librorum copio-
sissimam repetere jubebo. Vale, vir insi-
gnis ; & me tuorum servitorum numero
adscribe. Ex Pisis, *Idi.* Kal. Decembres,
1443.

Fran-

*Franciscus Philelphus, Praclaro equiti,
domino Pallanti Strozza, S.P.D.*

SOleo certe nonnunquam, Pallas, vir
Sclarissime, majorem in modum queri
perniciosa[m] praeteriti seculi adversus no-
strae tempestatis doctos homines litera-
rumque cupidos injuriam: & illos vehe-
menti quodam odio detestari, quorum
inerti negligentia factum est, ut in amif-
sis veterum scriptorum illustribus ac infi-
nitis prope voluminibus tacitam ipsi cla-
dem susciperemus. Quid enim claris in-
geniis aut acerbius, aut calamitosius ac-
cidere potest, quam iis carere, quibus si-
ne, omnis suus splendor, omnisque ma-
gnitudo, & manca & muta est? Nemo
profecto, mea sententia, etsi ad equi-
tandum aptissimus sit natura, sine equis
equestrem teneat, neque sine armis mi-
litiam, neque navigandi peritiam sine
navigiis; neque architecturam, neque
aliam quamvis sive artem sive faculta-
tem, ubi hujusce rei defuerint instru-
menta, medullitus sane noscere quis-
quam queat. Cujusmodi vero quoque
bonarum artium instrumenta, ob tan-
tum hunc tamque indignum veterum li-
brorum interitum, amiserimus, ipse opti-
mus

mus testis sis. Nemo enim est unus omnium inter nostros, qui id te melius scire vel possit vel debeat. Nam & Græce & Latine eam habes eruditionem, qua medius fidius majorem nemo. Et, si quid apud nostros, externosve, librorum relictum sit, id omne, pro tua eximia diligentia ac laudatissimo doctrinæ studio, tibi, vel potius eruditis omnibus, jam pridem maximis cum laboribus impensisque comparasti. Quid enim philosophos numerem? Qui quo majore numero extiterunt, eo paucioribus nihil naufragii factum est. Libros circiter quadringentos Aristoteles, ac prope totidem Theophrastus, scripsit; quorum mirum est quanta sit nobis relictæ paucitas. Democriti illius Magni, tantique viri, magnum de mundo Opus talentis quingentis æstimatum perhibent. Usque adeo multa scripsit, ut librarius sit ab Epicuro appellatus. Epicurus autem ipse trecenta reliquit volumina. Chrysippus vero, quem librorum Epicuri hujus parasitum Carneades nominat, quinque ac septingenta volumina elucubrasse traditur. Per multa Zeno Cirtensis & Cleanthes scripsere, per multa Heraclitus, per multa Empedocles; & alii, cum Græci tum Latini
Philo-

Philosophi, quæ complecti numero, labor sit, permulta nobis & maxima suæ sapientiæ & perillustria monumenta reliquerunt. Horum autem omnium nulla prorsus scripta extant. Quid autem, ut reliquos, siue Poëtas, siue historicos, siue alios præstanti aliqua doctrina & ingenio viros, omittam, quid, inquam, oratorum versoriam interitusque commemorem? Hosce propemodum omnes, ad Brutum scribens, Cicero; non Latinos solum ab ipso usque M. Cornelio Cethego, quem ore suaviloquenti viguisse Ennius decantabat, vel ab illo potius Bruto repetens, qui vim ex urbe Rhegina extruserit; verum & Græcos ab ipsius usque Solonis Pisistratique memoria, & diligenter, ut assolet, & eleganter enumerat. In quibus quanta sit strages facta, quanta suscepta calamitas, quis te, nobilissimo Equite & homine doctissimo, melius omnium unus noscit? Nonne igitur jure succensebimus, detestabimur, execrabimur, quorum desidia ignaviaque tantam nobis jacturâ factam intuemur? Attamen in tanta veterum librorum paucitate, summa diligentia, & studio incredibili, id assecutos nonnullos cernimus, ut honori apud omnes admirationique habeantur. Nec certe dubitandum exi-

stimo, quin multos hodie Leonardos, permultos haberemus Ambrosios, si priscis bibliothecis liceret frui. Quarum aliquota pars cum in omnem Italiam diffusa est, tum potissimum in hac urbe patet, ubi divina quædam ingenia germinant. Nec diffido tamen, quin aliqui brevi ex hac ipsa emerfuri sint, qui sua & cura & industria & ingenio tantæ huic jacturæ cladique medeantur: quo pacto cum Iarnottium Manetum hunc nostrum, & Carolum Arerinum, disertos & doctos homines, tum alios plerosque, ad eloquentiæ eruditionisque decus evasisse, atque indies magis evasuros, jam probe video. Sed de his hæcenus multa. In eo autem veterum scriptorum naufragio insignis est Lysia oratoris procella. Is enim orationes quadringentas viginti quinque scriptitasse fertur. Quarum ducentas ac triginta Dionysius Cæcilius indubitatas illius existimabat: Reliquæ vero creduntur adulterinæ. Hisce autem in omnibus, & id duntaxat ob malignitatem causæ, cum succubuisse Plutarchus refert. Scripsit & rhetoricas artes, & conciones, & laudationes, & epistolas, orationesque, tum amatorias, tum funebres, ac Socratis defensionem. Ex hac autem tanta fuorum scriptorum multitudine vix quinque

que & triginta orationes extant; reliqua vero omnia periere. Quanta is vero dicendi luculentia maiestateque floruerit, princeps eloquentiæ, & optimæ nullus expertus disciplinæ, plurimis in locis differuit, ac nos fortasse propediem alio quodam in loco commodius exposituri sumus. Id tamen abunde dignosci potest ex ea funebri oratione, quæ ab hoc ipso Lyſia pro iis Athenienſibus edita eſt, qui adverſus Lacedæmonios Corinthiis auxilium ferentes, poſt urbem jugo ſolutam triginta tyrannorum, forti & atroci prælio interiire. Hanc ſi frequentiffime antea Græce leſtitaveris, nunc Latinam à nobis factam ut & Latine legas, & cæteris legendam des, te vehementiffime rogo. Vale.

*Franciſcus Philelphus, Claro equiti,
Pallanti Strozze, S. P. D.*

FUERE nonnulli & prudentes & docti viri, præſtantiffime Pallas, qui id, inter Lyſiæ oratoris, Platonisque Philoſophi ſcripta, maxime intereſſe judicarent, quod propemodum alii quidam, & ipſi homines haud vulgares, inter Demotheſenem & Ciceronem voluere. Nam huic nil adiici, illi detrahi nil poſſe.

Id quid aliud esse dixerimus, quam, quod vel Platonis esse cernimus eximiam quādam exuberantemque dicendi copiam, vel Lysiae elimatum gravissimumque orationis filum? Quod quidem acutissimorum hominum iudicium cum semper maxime facere consueveram, tum vero, postea quam Græcas literas degustassem, admiratus sum adeo, ut vix quicquam aut verius aut subtilius iudicatum existimarim. Nam, ut reliquos nunc omiserim, quid de Lysia ipso dicam? cujus peregre-gia dicendi quædam divinaque elegantia, castigata verbis, sententiis affluens, tantum de se stuporem splendoremque legentibus ingerit, ut hunc profecto eum fateri oporteat, qui unus in primis inter Græcos primas eloquentiæ partes teneat. Hic est ille Lysias, cujus disertissimis orationibus si quod subtraxeris verbum, etsi id commode feceris, de sententia subtraxisse tamen appareas; usq; adeo ab eo sunt omnia mirabili quodam suo artificio & ordine lucubrata, dicta, posita, colli-gata. Is præterea cum cæteris in rebus præstiterit plurimum, tum quoque singulari perspicuitate & nitore claruit. Quem etsi nobilis rhetor Socrates imitatus fere sit, tamen neque hunc, neque Demosthenem ipsum, eloquentiæ princi-pem,

pem, neque alium quemquam ex illustribus illis decem oratoribus, assequi potuisse, omnis una voce testatur Græcia. Quam vero hisce omnibus subtilitate antecesserit, ex gravi Ciceronis in libris de Oratore iudicio intelligi licet. Sed de iis alias. Nunc autem ad rem, de qua agitur, revertamur. Cum igitur hanc Lysiae uberrimam luculentamque brevitatem facilitatemque dicendi amatoribus nostris mirifice probatam laudatamque intuerer, libuit animi gratia aliquas, si possem, ex illius orationibus Latinas efficere: quo non solum alieno testimonio, verum & re ipsa, & ipsa quasi oratoris præsentia ac voce, ejus vis omnibus, divinumque ingenium, innotesceret. Quare cum ipse superiorem convectissem, volui & illam ad nostros orationem traducere, quæ in Acostonem adulterum habita esset. Hoc enim in adulterio deprehenso atque interempto, sui pro eo causam necis agunt. Lex autem haud negatur: Sed mœchus jure cæsus defenditur. Argumentum omne narratione patet. Verum ne, quem tanti facio, imitari omnino neges, id est, ne in brevi oratione prolixior sim; de hac re satis superque. Jam Lysias ipse dicere incipiat. Vale.

*Leonardus Aretinus, ad Cyriacum
Anconitanum.*

Leonardus Cyriaco salutem: Quid mihi dabis, Cyriace, si de urbe Anconitana tibi multa ac præclara vetustatis monumenta ostendam, quæ tu nunquam vidisti? licet Achajam totam, cum omni etiam Italia & Bœotia, lustraris; ac Peloponnesum, Spartamque, & Argos, inspexeris; & quicquid antiquitatis est in illis, erueris; & Athenarum propylæa nobis descripseris. Ego tamen, dum tu peregrinando aliena conquiris, ipse, manendo domi, patriæ tuæ monumenta tibi invisa incognitaque perspexi. O magnam vim animi nostri penitus divinam! Siquidem, dum stamus domi, ipse peregrinatur; nec modo locis distantia adit, verum & quæ jam mille annis gesta sunt, tanquam præsentia intuetur. Sed ne te per longa demorer, aperiam quid rei sit. Scripsi noviter libros quatuor de bello Italico, quod Libellarius & Narses, Iustiniani Duces, adversum Gotthos gessere. In illo bello multa ac præclara de patria tua Anconitana repperi, ac reperta libens perscripsi. Nam & obsidio ejus urbis, terra, mari, à Gotthis agitata, & pugna

gna navalis egregia & insignis, circa eam commissa, in qua septuaginta quinque naves longæ pugnaverunt, & situs oppidi qui tunc erat, ac cætera permulta memoratu digna, referuntur. In quibus scribendis tu etiam aliquid mihi caloribus & impetus addidisti: quod tibi & civibus tuis hæc placitura existimabam: & sunt maximo ornamento vestræ civitati. Est autem non hæc translatio, sed opus à me compositum: quemadmodum Livius à Valerio Antiate, vel à Polybio Megapolitano, sumpsit, & arbitratus suo disposuit. Hanc vero historiam meam inspicere si voles, non aliter tibi ostendam, quam, si omnia epigrammata omniaque vetustatis monumenta, quæ in toto terrarum orbe collegisti, ad me feres. Vale. Prid. Calend. Sept.

Guarini Veronensis, Oratoris præclarissimi, ad Illustrem Leonellum, heroem Estensem, gratulatio, pro equestri dignitatis sumptis insignibus.

HOdierna die, mi rex, & dive Leonelle, cives tui, quia, equestri dignitatis insignia tibi tam honorifice addita, seu potius reddita fuisse, cognoscunt,

scunt, privatim ac publice magnam eger
re lætitiā, & præcipuum in templis
honorem divis pro sua vita, illustremque
genitorem tuum pietate & observantia
celebrarunt. Nam, cum tantas tibi &
animi & corporis dotes, ab natura inge-
nitas, tuaque industria expolitas, &
studio auctas, esse cernant; ista ipsa
ornamenta ad decus & ad dignitatem,
quasi consummationem quandam am-
plitudinis, advenisse gloriantur. Qua
in re tibi ne magis, vir magnifice, an or-
namento ipsi gratuler, in ambiguo sum.
Non enim sum ignarus, hujus generis
decorem magnam tibi hominum exi-
stimationem commendationemque con-
ciliare, & egregiam apud eos, quorum
commodis, honori, & saluti consul-
turus es, auctoritatem comparare. Hac
ratione antiquos Persarum reges va-
rios sibi colores concinnasse, Cæsarem
inuitatos vulgo habitus multo auro
multisque gemmis induisse, testis est
Xenophon, ut vel sic inter suos vene-
rationi essent. Præterea clam me non est,
istos honores & insignia virtuti in testi-
monium adduci, ceu bene institutæ Ma-
jestatis præconia. Quocirca milites stre-
nuos, fortissimos, ducesque sapientissi-
mos, hastis, phaleris, vexillis, equis, sta-
tuis,

tuis, &, quod maximum votorum est, triumphis, donari & insigniri legimus. Accedat ad gratulationem meam, quod ornatus auratos, & equestrem dignitatem, per se satis ingentem, ingentiolem facit imponentis donatoris amplitudo simul & gloria. De cujus magnificentia, rebus præclare gestis, clementia, æquitate, cæterisque virtutibus, ut taceam; quid Imperatore Romano, quid Cæsare, quid Augusto excellentius, quid admirabilius, religiosius æque, humanum genus habet? Ejus potestatem poëta maximus paucis verbis exprimens, ait; Divisum Imperium cum Iove, Cæsar, habes. Quippe, Imperium Oceano, famam qui terminet astris. Subinde antiquum genus Estense perpendo, & illustrem majorum tuorum, patrisque, progeniem; quorum liberalitas, sapientia, mansuetudo, sempiternam famam adepta est. Eorum nomini & laudibus splendorem adjungit tua in deum pietas, in parentes observantia, in propinquos amor, in amicos fides, in omnes bonitas, charitas, diligentia, plurimarum & optimarum rerum cognitio: præsertim cum ad paternam animi magnitudinē doctrina uberior accedat. Addo virtutes, sobrietatem somni parcitatē. Addo venationis, aucupiorum, ludo-

ludorum frequentiam ; sagittandi solertiam. nām & his quoque solatia nonnulla insunt. Et librorum studiosus omneis corporis sensus domas : & ita domas , ut intra modestiæ gyrum frenati se contineant. Quid morum severitas ? qua factum est, ut vita, in teneris adolescētīæ annis & regia licentia nil juvenile redolens , mature sapiat Nestorem. Per hæc atque alia in te ornamenta in eam venio sententiam, ut longe magis abs te equestria decorentur, quam tu equestribus decoreris insignibus. Idque jure quidem & merito. Nam plurimi sine virtutibus equitum gestamina usurpant. Neque regem illum esse crediderim , qui majora possideat prædia , aut purpurea in veste gemmas ; quique fronti coronam imposuit, metus & diri mala pectoris : sed illum, ut à Biante dictum est , qui sua secum portat : alioquin larvatum in scena Histrionem Agamemnonē, vel Priamum, liceret appellare regem ; cum is vilissimus sit, & fortasse mancipium. Nec vero, Leonelle, vir illustris, inferiorem dixerim dignitatem equestrem tuam , quam pacis artibus meruisti , quam illam quæ rapi solet. Hæc namque cum cædibus mortalium, civitatum direptione , strage regnorum, cumquē calamitatibus aliis, usurpa-

surpatur. quas singulatim apud Crispum Cæsar explicat. quales sunt: rapi virgines, pueros divelli à complexu parentum, matres familiarum pati quæ victoribus collibuisse: fana atque domos spoliari; cædem, incendia fieri: postremo armis, cadaveribus, cruore atque luctu omnia compleri. His sane indignum est, tot dierum supplicationes indici. Ista altera, vel urbana munificentia, integritate, justitia, vel bene de civibus merendo, patriæ commodis consulendo, honorem suorum augendo, quæritur. Qua in re Titum Flaminium triumpho digniorem fuisse censuerim, quia Græciæ suas vivendi leges & mores restituerit, quodque mille ac ducentos cives in pristinam libertatem à servitute revocarit, quam quod Philip-pum Macedonasque debellarit. Crudele enim est, & ab humanitate abhorrens, ex hominum malis atque miseriis prædicationem titulosque sibi quærere. Aurum, quo te insignitum esse hodie cernimus, ceu grande speculum vitæ propositum esse tibi, considerabis. Etenim, cum aurum splendore, precio, immortalitate, metallis reliquis antecellat: sic & tu vivendi puritate, virtute, excellentia, honesti animi constantia, sicut inter cæteros mortales emines, ita te ipsum
indies

indies superare contendas. Id egregia fide feceris, si nullam tibi cum hæreticis concordiam esse fines, nulla nisi iuste ac legitime indicta bella suscipies, pupillorum ac viduarum tutelam in tuam fidem accipies. Tria hæc perpetua virtute profiteberis. Ne autem longior mea tædio te afficiat oratio, pro mea in te fide ac pietate tuis novis insignibus gratulor & congaudeo: quibus non minus decoris, laudis ac dignitatis à te edis, quam quantum ceperis. Idque tibi ac tuis bonum, faustum, felixque sit, oro. Munusque Cæsareum pro mea virili parte fulcio, accendo, ad perennitatemque produco. Nulla siquidem tanta sunt hominum constructa manibus opera, quæ non ruant, obseurentur, & vetustatis morbos non reformident, nisi literarum monumenta sustentent ea, illustrent, & juvenescere faciant. Ad quod quidem conficiendum pusilla hæc mea scripta doctissimos viros & disertos invitant; quorum ope atque opera hujus facti memoriam nulla unquam delebit oblivio, quam diu legetur & ad posteros hoc perveniet. Sigismundus Cæsar Augustus, cum, sedato adversus Ligurum ducem bello Veneto, ab Eugenio pontifice maximo corona insignitus aurea, ad Basiliense concilium
profe-

profecturus, Ferrariam Roma petens, in Illustris marchionis Nicolai ædes divertisset, illustrem Leonellum Estensem, sextum & vigesimum agentem ætatis annum, equestris excellentiæ donavit insignibus. Quæ & præsentibus & venturis, signum hospitii & monumentum, in pignus amoris relinquat. Vale. Ex Ferraria. Recitata Idibus Septembribus, anno Christi 1433.

*Ejusdem Oratio, in laudem Regis
Angliæ.*

Quum statuissem, serenissime Rex, hoc tempore maxime aliqua in memoratu digna & tardum & hebes ingenium meum exercere; nihil sane æque dignum repperi, in quo meam operam consumendam putarem, quam hoc ipsum, scilicet, ut serenissimæ Majestatis tuæ virtutes celebratissimas, & præclara gesta tua, literarum monumentis æternæ, ut ita dixerim, memoriæ mandarem. Quæ enim esse potest, non dixerim, hesternæ; sed vix unius seculi memoria? Sine scriptorum opera jaceret. Namque apud inferos Hercules, aut, si sic malumus, cum diis nemini metuendis, obscurus & gloriæ omnis prorsus expers foret, nisi poëticis

ricis fabulis illustratus esset. Suo jã igne consumptum esset Ilion, nomenque una cum memoria periisset inter tam multos ignes, ni & à Græcis & Latinis auctori- bus exuscitaretur. Magnus ille Alexan- der, gemini Atridæ reges Agamemnon & Menelaus, belli fulmina Achilles & Hector, Priamides magnus Æneas, calli- dus Ulysses, Pœnorum Dux Hannibal, Pyrrus rex Epirotarum, &, ut Italico splendori non invidisse videamur, pater urbis Romulus, Numa Pompilius, Ancus Martius, Tarquinius Priscus, Servilius Tullus, diis hominibusque tremendi Iu- lius Cæsar, Cæsar Augustus, Gemini Sci- piadæ, Gneius Pompeius, Caius Marius, magnus Fabritius, cæterique Duces, re- ges & Imperatores, qui apud Romanos clari habiti sunt, penitus jam oblivione traditi essent, nullaque in hunc usque diem esset de tantis viris memoria, nisi hi- storia, ac poëtarū fabulæ & figmenta tales celebrassent. Quæ cum omnia ante oculos haberem, Serenissime rex, Salustianum illud, quod est in principio Catilinarii, me prorsus ad hoc capeffendum munus hortabatur; quod scilicet omnes homi- nes, qui studerent præstare cæteris ani- malibus, summa ope niti deberent, ne vitam silentio transigerent, veluti pecora, quæ,

quæ, cæteris omnibus posthabitis, huic rei solum intenta sunt, ut ventris ingluviem expleant. Verum, cum, una hac auctoritate persuasus, me ad scribendum accingerem, Ciceronianum illud, quod est in Tusculanis quæstionibus, me ab incepto non parum deterrebat, Quod, mandare quemquam literis cogitationes suas, qui eas nec illustrare possit, nec delectatione aliqua allicere auditorem, hominis sit intemperanter abutentis & ocio & literis. Quæ cum ita essent, Serenissime Rex, ut una ex parte Salustianum illud me hortaretur, altera ex parte illud Ciceronianum me deterreret, minimæ cujusdam diligentia, & extremæ, ut ita loquar, confidentia, meæ, quam vel negligentia, vel socordia, me damnari malui. Et, quamquam sciam, nonnullos homines (vita & moribus fatuos, disciplina nequam; cum ex eorum officina nunquam vel sola oratiuncula deprompta sit; quoniam, dum hujus arrogantiam, illius inconcinnitatem damnant, alterius nimiam lepiditatem accusant, nil unquam habent quod probent) etiam hac tempestate futuros, qui mihi magnopere vitio dabunt, quod rem tantam inetmīs & imbecillis adortus sim: Nihilominus tamen, horum hujusmodi sine magi-

magistratu censorum garrulitatem spernentes, rem nostram pro viribus proculdubio prosequemur. Tam multa namque intellexi de celeberrimis ac præclaris virtutibus tuis, ut eâ prorsus tacere nequeam. Idem enim natura ipsa insitum, ut, quamquam nullus sit in me virtutis splendor, tamen eos, qui virtuosi sunt, vel in quibus aliqua significatio virtutis eluceat, penitus diligam, amem, & observem. Verum, invictissime Rex, tam multis virtutibus te præditum intelligo, ut, unde narrandi initium facturus sim, ego ipse ambigam: nec id injuria quidem; vereor etenim, ne, cum multa dixerim, plurima, quæ in te celeberrima sunt, silentio præterire opus sit. Sed, quoniam omnia, quæ in te præcipua & memoratu digna sunt, tam modico volumine complecti posse non confido, nonnulla, quæ in te maxime præcipua sunt, breviter perstringam. Te igitur, Serenissime Rex, bonis animæ, corporis, & fortunæ, præter cæteros principes & clarere, & claruisse intelligo. Quid enim prudentia tua mirabilius, quid gravitate majus? Tu etenim in tam tenera ætate tantam redoles gravitatem, ut maturum illum referas Nestorem: qui apud Græcos, in bello illo quod contra Trojanos gestum, & decre-

pitus

pitus & senex, ob mirificam illam prudentiam in tanta exstimatione est habitus, ut gemini Atridæ reges & Græcorum exercitus Duces non dubitarint palam omnibus optare, non decem viros Achilli fortitudine æquales, sed decem Nestori prudentia similes: quod si fieri potuisset, non dubitassent dicere, brevi fore Trojam perituram. Tu adolescens ætate, maturitate senibus senior. Tu, rex, & Reverendissimo domino Cardinali, & Illustrissimo domino Duci Glocestriæ, patru tuis, non secus quam si tibi parentes essent, morigerus es. Te, licet adolescentulum, ob gravitatem & prudentiam tuam, contra callidissimum, versutissimum, & potentissimum hostem, seniores Duces, Princeps, Comites, ac populi innumeri, non dubitarunt sequi ducem. Tu tua prudentia, patruorum tuorum consiliis, acquiescendo, & justiciam subditis tuis æquam præbendo, potitus es rerum. Justiciam enim tanta cum severitate, ut ita dixerim, ad unguem etiam, quod mirabile dictu est, ab extremis adolescentiæ annis eo pacto servasti, ut nemini, nec clam, nec palam, sua subripi, nemini aliena dari, nemini vim inferri, nemini injuriam fieri, passus sis. Furta, homicidia, latrocinia, stupra, violentias omnes, tan-

topere

topere odisti, ut homicidas, sicarios, fures, prædones, violentos & pestiferos homines omnes, ex Angliæ insula, imo, ut & verius dixerim, è regni tui finibus, prorsus ejeceris. non furtis, non latrociniiis, non homicidiis, non stupris, in regno tuo locus est. Quamquam enim tam aureum tamque execrabile bellum, justitiæ exequendæ cupiditate, cum insolentissimis factiosisque hostibus tot annos gesseris; tamen in regno tuo non civis civem spoliat, non civis civem obtruncat, non civis civē opprimit. Quemadmodum in nonnullis partibus fieri solet. Et maxime in adversarii tui regno. Ubi civis concivem impune spoliat, necat, opprimit & obtruncat; non pater à filio tutus est, non frater à fratre, non filius à patre, non socer à genero, non dominus à servis. Tanta denique, ut paucis absolvam, illic est perplexitas, tanta confusio, ut id non hominum, sed dæmonum regnum merito dici possit. Illic triiceps Cerberus, illic anguicoma Tisiphone, illic furix infernales, illic sitiens Tantalus, illic rex umbrarum Pluto, illic omnes dæmonum chori suam posuere sedem: justitia silet, jura tacent; injuriæ, cædes, rapinæ, stupra, violentiæque, vigent. In tuo autem regno longe secus est.

est. Nam ob summum justitiæ rigorem cum hostibus certamen est ; inter cives summa pax & tranquilla populis quies. Auro namque onustus viator omnis Angliæ insulæ partes inermis solus impune lustrare potest , etiamsi opus fuerit inter nemora ipsa vel deserta cum universo thesauro suo quietum somnum capere. Tu profecto, ut paucis dixerim , Trajanum secundum hominibus te præstas. De fortitudine autem tua quid plura dixero, nescio: nisi quod ab extrema adolescentia tua durum bellum sustinuisti, invictissimū hostem debellasti , urbes & oppida sua occupasti , tam multos confictus hosti potentissimo dedisti : adolescens maturum ætate & callidum hostem non formidasti , non ejus potentiam horruisti, non vires, non factionem duri hostis timuisti. Quo factum est, ut tam multas & præclarissimas urbes, tot ornatissima oppida, tot provincias, tot loca amplissima, ex hostilibus bonis regno tuo adjunxeris, hostemque tuum ad extremam inopiam & intra miseriæ terminos penitus redegeris. Alexander Macedo vigesimum attigerat ætatis suæ annum, cum Darium regem debellavit. Divus Iulius Cæsar plusquam vigesimum quintum egerat annum ; nihil tamen ad eam usque ætatem

tem

III

III IIII

tem maxime memorandum vel maxima laude dignum gesserat. Caius Cæsar jam grandis natu execrandum parricidium ultus est. Tu autem, invictissime rex, dum in utero matris eras, horrenda bella gerebas, & permagnæ hostibus formidini eras. Lactebas, & hostilia mœnia evertebas: puer eras, & grandævum regem debellabas. Postea vero quam adolevisti, summum tibi imperium comparasti. Te itaque, invictissime rex, ob ea quæ in hodiernum usque diem gessisti, & Alexandro Regi, & divo Iulio Cæsari, & Caio Cæsari, & cæteris hominibus, quos orbis terrarum claros habuit, vel Reges, vel Imperatores, non immerito prætulerim. Tu enim, serenissime rex, liberalitate & largitate Iulium Cæsarem, magnitudine animi magnum Alexandrum, prudentia & facilitate Caium Cæsarem, in hodiernum usque diem æquasti: pro mira autem magnitudine gestorum eos omnes superasti. Habes insuper participes consiliorum tuorum, & in regno ipso coadjutores, reverendissimum dominum Cardinalem, & Illustrissimum dominum Duce[m] Glocestriæ, patruos tuos; qui neque consiliis, neque auxiliis, aliqua in re tibi defuturi sunt. Es etiam adolescens in florida ætate, agilis, & fortis corpore, robu-

robustus membris. Bonam habitudinem corporis possides, plurimum ingenio vales, potentiam habes maximam, amicos plurimos, qui mortem, qui exilium, qui pericula omnia, si opus fuerit, ob nomen tuum ferre non recusabunt. Ob quas ipsas res, cum in extrema adolescentia tua durum & acerbum bellum tanto tempore & gesseris & sustinueris, in eam venio de te sententiam, ut affirmare audeam, te, cum ad virilem ætatem perveneris, non Martium, sed Martem ipsum futurum; non clarum regem, sed omnium, qui sunt, qui fuerunt, qui futuri sunt, regum potentissimum; non in arte militari peritum, sed omnium peritorum peritissimum. Quo fit, ut nunc primum accingar, meque expediam, ut celebratissima gesta tua literarum monumentis posterorum memoriæ mandem. Perge igitur, perge, invictissime rex, & tum bello tum pace, tum induciis, da operam, quod hactenus fecisti, hostiles injurias à tuis subditis & confederatis propulses. Nam, Audentes fortuna juvat, timidosque repellit. Præterea, cum adolescentiæ laudibus Iulium Cæsarem, Alexandrum magnum, Caium Cæsarem, ut ostendi, jam superaveris; liberalitate vero, facilitate, largitate, magnanimitate, prudentia, ipsos omnes

omnes æquaveris: eos etiã in iis ipsis virtutibus superare contende. His enim virtutibus, & tua tuorumque consiliariorum prudentia, brevi apud te summum Imperium futurum video. Demum, quum compertum habeam, reges & principes summos paucitate verborum maxime gaudere, finem dicendi faciam. Ut igitur, serenissime rex, cum poëtarum Principe Marone Virgilio concludam: Hæc tibi erunt artes, dare tutas civibus urbes; Parcere subiectis, & debellare superbos. Amen.

*Antonii Panormita Oratiuncula, ad
Fridericum I I I Imperatorem.*

Illuxit jam tandem felix illa & expectatissima dies, Friderice Cæsar, quæ bonis omnibus pacem & tranquillitatem, tibi vero laudem & gloriam sit sempiternam allatura. Ecce enim advenisti, exoptatissime Auguste, tuamque sacrosanctam Majestatem hodierno die coram intueri licet, aut rectius, quasi Dei cuiuspiam immortalis effigiem venerari. Nam tecum una, quasi divinum sidus comitantes, advenisse creduntur salus atque libertas Italiæ, bonorum ac constantissimorum hominum exaltatio, pravorum perfidorumque

rumque depressio. Exultent igitur gaudio, Iesuque Optimo Maximo laudes ac gratias habeant, quicunque puri sunt, fidelesque perstiterunt: iniqui vero ac perpetuo contumaces erubescant, formident, profugiant: hujus enim dignissimi Romanorum regis artes, sunt Romanæ illæ quidem, Parcere subjectis, & debellare superbos.

Verum, antequam Alfonsi, magnanimi atque invicti regis nostri, mandata explicemus, à quo ad eminentissimam Majestatem tuam legati sumus; pauca admodum, quæ partim ad laudem, partim ad dignitatem tuam pertinent, enarrare nos, pro singulari tua humanitate, concedas. Ego vero, à clarissimis ac illustribus collegis jussus dicere, obtemperabo. Verum ita obtemperabo, ut rationem tuarum occupationum vel in primis ipso breviloquio videar habuisse. Quod igitur à plerisque oratoribus dictum est, nescire se unde principium sumant, id in præsentia mihi evenire non verbis, quemadmodum fortasse illis, sed re ipsa nimirum intelligo: non solum ideo, quia sunt tuæ virtutes, & variæ, & inter se connexæ; verum etiam, quia ita præclaræ omnes, & ita egregiæ sunt, ut inter se ipsas de excellentia concertare videantur, nec facilis

cilis sit deliberatio, quænam in dicendo sit anteponenda. Sive enim animi magnitudinem considero, nihil non dignum videri potest, de quo quam primum enarretur. Sive religionem, aut ceremoniarum cultum, illud omnino censebis præferendum. At, si iustitiam & æquitatem contempleris, nihil tam magnum videri debet ut illi anteponatur. Cum vero liberalitatem, humanitatem, moderationem tecum pensitas, quam illarum præponere, aut quam non præponere debeas, ignorabis.

Ego tamen, unde aptissimum & congruentissimum putabo, inde initium dicendi faciam, à religione videlicet, & cultu divino. Quæ in re vel maximè tuam, Friderice, sapientiam declarasti; siquidem vera hominis sapientia est, pietas, idest, Dei cultus. Etenim ante omnia verum creatorem, unicum & summum Deum, Christum Iesum, tibi penitus colendum, cum coæterno patre in spiritu adorandum, verendum, animo proposuisti; ut erga eum ipsum Christum, à quo terrarum Imperium assumpsisti, pro tanto munere accepto & gratus existeres, & hominibus, quibus divina providentia præesses, vitæ beatæ viam tui luminis exemplo monstrares. Maxime quidem decet

debet Reges ac Principes, quique ab omnibus timentur, eos ipsos vereri ac metuere Deum immortalem. Quod qui fecerint, sentient præclarum illud & memorabile Camilli dictum, Omnia prospere evenisse sequentibus Deos, adversa spernentibus. His tu itaque rationibus adductus in primo ipso juventutis flore, non maris, non viarum discrimina, non barbarorum, & eorum, apud quos Christi nomen invisum est, latrocinia atque insidias veritus, Sepulchrum Domini ex ultimis usque Germaniæ partibus adiisti, laborum & velut gloriæ primitias Deo reddens atque sacrificans. Quid nunc ego Psalmos, & orationes, quid Missarum sacra mysteria, quid jejunia, atque inditas Christiano ritu abstinentias, referam? Nihil utique omittis, quod boni & puri Christiani officium esse intelligas, quo cum tibi perpetuo places, ac propitium & faventem reddas, cujus ope cives tibi divinitus commissos ad veram dirigas felicitatem & sapientiam.

Cumque animo magno & excellenti præditus sis in hoc uno, ne Dei scilicet voluntatem offendas, mire quodammodo timidus atque anxius prædicaris. Denique cum natura natus ad virtutem videaris, bonitatem naturæ ad Dei volun-

tatem conformas. Ob illud etiam à peccatis atque flagitiis caves, ne tuos cives vitiorum imitatores efficias. Satis enim nosti, exemplo magis, quam peccato, Principes nocere. Inter hæc tam præclara tui animi ornamenta, gloriosissime Cæsar, illud in primis admirari licet, atque veneratione complecti omni, quod, cum tam infinita & innumerabilis multitudo, tum domesticarum, tum exterarum gentium, sub te degat, nullus tamen adhuc inventus sit, qui, non dico à te, qui inter mortales justitiæ & æquitatis gloria excellis, sed ne à proceribus quidem tuis, fuerit injuriam passus, aut de violentia conquestus. Illa quidem lex apud te prima & est, & observatur, Ne cui quis noceat; ut suum cuique in pace & securitate possidere permittatur; quæ vero Cæsaris sunt, omnibus prope modum uti frui fas esse. Illudque divi Adriani præclare dictum frequenter usurpas; Ita te rem publicam gesturum, ut sciat senatus, populi rem esse, non propriam.

Jam vero dicendi apud te & loquendi libertas nō minus infimis quam summis est viris; aditus semper patens, audiendi patientia, & lenitas inaudita. O sæcula aurea! O Cæsarem vere Augustum, vere patrem patriæ! O hominem divinum!

O nos

O nos etiam perbeatos, quibus virum talem intueri, ejusque suavissimis atque humanissimis moribus frui, datum atque concessum est!

Beneficentiam vero, ac liberalitatem tuam, Cæsar, admirari magis possumus quam oratione percurrere. Quæ cum incredibilis sit, & tanquam ex fonte quodâ benignitatis perpetuo emanans, nunquam tamen aliis eripere visus es quod aliis largiri, nunquam aliis nocere ut in alios liberalis viderere. Vacat enim injuria liberalitas tua. Quodve tuum est, (est enim id grande, & ut. terrarum domini patrimonium,) id tamen omne in communem hominum utilitatem erogare solitus es; ut vere, quæ tua sunt, sint, juxta proverbium, communia omnia. Et sane è toto prorsus Imperio, quod quam amplum & copiosum sit, omnes intelligunt, nihil tibi retentum videmus præter dispensandi potestatem. Intelligis tamen quid unicuique conveniat, proque dignitate distribuis; tibi solummodo hoc reservans atque seponens, quod Cæsareæ rationi ac majestati necessarium fore arbitraris; nihil omnino custodiens ad voluptatem, nihil ad delicias. Et es quidem natura liberalis atque beneficus, non ut plerique, quadam va-

S 3

nitate

nitare ducti, multa largientes, ut videantur benefici, cum non sint. Vir utiq; purus, simplex, atque syncerus nihil ad ostentationem, omnia ad conscientiam refert. Gaudes, cum bene benigneq; facis, non cum fecisse laudaris. Neque gratias agi tibi aut rependi admodum curas, præterquam à conscientia benefactorum. Nihil denique tibi arrogas, sed immortalis Deo omnia tribuis; à quo & beneficia & bona omnia proficisci, satis fingari tua sapientia cognoscis. Hoc loco singularia prætereo ac propemodum innumerabilia tuæ liberalitatis exempla. Quis enim hac temporis angustia recensere satis queat, quot regum filios, quot proceres, quot viros tu, in literis, armis, illustres, quotidie suscipias, susceptos exornes, honestes, amplifices? Mihi quidem videtur, tuam hanc non curiam modo, sed academiam, quandam bonarum artium & disciplinarum officinam, appellari posse, ubi de re militari, ubi de literatura, ubi de virtute ac moribus, quoquo te verteris, disputantes acriter simul & erudite circumspicias. Quo fit, ut omnes, qui aut virtute aut eruditione sibi ipsi confidunt, huc ad te undequaque divergant, ac velut olim in Olympium montem exercendæ atque ostentandæ virtutis

tis gratia convenient. Tu vero, benignissime Cæsar, perhumaniter omnes excipis, exerces, acuis, foves, instruis, denique indonatū neminem à te abire sinis.

His præclaris artibus, Cæsar, mortaliū gratiam & benevolentiam consecutus es. His perardua & excelsa semper animo meditaris. His domum relinquens, (quamquam domus tua mundus est,) non asperrimos labores, non infinitos sumptus, non pericula æstimas; per mediam Italiam, sicubi nonnullos scis Imperio rebelles, incedis, fiducia animi lætus, strenuus, invictus. Imo vero tantum & virtutis & dignitatis tuæ auctoritas valuit, ut non solum ab amicis, sed etiam ab his ipsis qui jam pridem erga imperium male sunt affecti, honorificentissime fueris susceptus; nihil aliud, ut mea fert opinio, applausu & gratulatione consentientibus, quam te vere Dominum & Imperatorem eorum esse. At tu, hæc omnia animo recondens, Romam ire pergis; ut, quod animo jam dudum magnifice conceperas, tandem adipiscaris, hoc est, Sacram unctionem, & consuetas Imperatoribus coronas.

Sed, quoniam in coronarum mentionem incidimus, consideremus, si per te licet, humanissime Cæsar, quibus ex caus-

sis majores nostri hujuscemodi coronas excogitasse credantur. Hoc enim viso cognitoque, liquido apparebit, an tu quoque dignus judicandus sis hujusmodi coronario, ut ita dixerim, triumpho. Primum vero pervulgatum est, palearem illos decrevisse coronam. quod aliquando receptum, nunc vero, ut pleraque mansuetudinis officia, obsolevit. Caterum majores illi recte sane: si quidem mansuetudine, & humilitate, non superbia, & inhumanitate, ad Imperiale fastigium se ascensuros esse existimarunt: quod palea denotatum iri visum est. Palea quidem res admodum abjecta atque contempta est. Et Imperatorem decet, se hominem esse, existimare; hoc est, ex humo factum, & in humum tandem rediturum. Huic invento perpulchre consonare videtur Romanorum institutum. Qui triumphanti Consuli vel abjectissimæ conditionis servum associavere in eodem curru, & coronam sustententem, & æqua fortuna triumphantem. Præterea, ut, qui mansuete & humaniter atque benigne cum hominibus agit, is vehementer ab omnibus amatur, & in omnium animos quasi influere videtur: sic ex diverso, qui insolenter & crudeliter sese habet, odium sibi omnium generat, & metum, malum (ut ait Cicero) diutur-

diuturnitatis custodem. Secundo loco coronam ferream excogitavere; ea ratione, ut arbitror, ut fortitudinem animi imperaturus assumeret. Nam, comparata sibi prius, quomodo dictum est, civium & subditorum gratia, intrepidum, constantem, invictum, sese præstare Imperatorem oportet contra pericula ac varios fortunæ casus; præsertim pro gloria tuenda, ac subditorum salute, & conservatione societatis humanæ, divinitus sibi commissæ. Imperio quidem indignus habebitur, qui vim atque injurias aut sibi aut provincialibus illatas non magno ac præsentī animo propulsaverit. Tertio loco argenteam coronam agssinaverunt; ut animadvertat is, qui demum Imperator sit constituendus, argenti nitorem atque candorem præ se ferre oportere; hoc est, sine labe atque spurcitia animum purum & tersum exhibeat necesse esse. Postremo autem loco auream statuerunt. Hæc antiquitus, ut ait Gellius, ex lauro erat, postea ex auro fieri cœpta; ut intelligat is, qui demum coronandus est, se perfectam ac splendidissimam laudem assecutum. Nam, qui mansuetudine & humilitate primo mortaliū benevolentiam, deinde benevolentia Imperium adipiscitur, quod postea animi magnitudine, pu-

ritate, atq; justitia conservet, is omnium judicio splendidissimum ac perfectissimum vitæ exemplum posteris relicturus est. Ita immortalitate ac luce perpetua dignus existimabitur.

Numquid non tu igitur his coronis perdignus censeberis, Cæsar invicte; qui mansuetudine, animi magnitudine, justitia, nemini cesseris; imo vero in quo summi Imperatoris ornamenta lucent omnia; ut non Cæsar modo; sed Cæsarum decus, jure ac merito possis appellari? Quænam enim à te abest Imperatoriarum virtutum? quid autem earum non est in te insigniter? Quærimus clementiam? At tua animi placabilitas ipsam illam C. Cæsaris, quæ singularis exempli & admirabilis memoriæ extat apud homines, ipsam, inquam, illam provocare potest & vincere. Cupimus fidem? At tuis dictis conventisque nihil firmitus, nihil verius, nihil religiosius inquiri potest: non id quidem olim apud gentiles aut Sibyllæ folium, aut Apollinis oraculum. Laudamus prudentiam? At, quid tua prospicientia non videt, quid tua solertia non agnoscit, quid tua denique industria non assequitur, quod ulli uspiam cognitum aut perspectum sit?

Non est autem ullo pacto prætermittenda

tenda temperantia tua, Cæsar. Est enim non modo inter virtutes pulcherrima, sed virtutum omnium singulare decus & ornamentum. Ita ut, si hæc una desit, cæteræ virtutes imperfectæ existimentur. Nam prudentia, & fortitudo, atque harum similes, interdum etiam eorum sunt, qui non satis probantur. Temperantia vero, proborum & clarorum hominum est propria. Illæ sæpenumero impetus animi concitant, nec sinunt obedire rationi: Hæc concitados sedat, compescitque, & ratione moderatur. Quæ quidem virtus tanta in te uno est, quanta in iis Imperatoribus, de quibus legimus, aut accepimus, non fuit. Quem enim tibi continentia comparabimus? Cepisti uxorem genere nobilissimam, moribus excellentissimam; forma vero præstantissimam. Cumque ea Senas ad te nuper venisset è paterno regno, quoniam dies sacri & observandi erant; eam non ut uxorem, sed ut sororem suscepisti, religionem matrimonio, castitatem voluptati anteponeas. Alii ab alienis uxoribus vix sese continere possunt; Tu à tua, tibi concessa, & ea quidem formosissima, te continuisti. Docuisti hoc exemplo inferiores, qualiter sese habere & continere circa conjugia debeant: & di-

vini potius cultus, quam humani juris habendam esse rationem. Nec illud est silentio prætereundum, quam sis vini parcissimus, quamq; in cibo moderatissimus. Neque enim ea parva laus est; regis præsertim, & Imperatoris. Legimus, Alexandrum, ne plures memorem, propter vini intemperantiam non parum gloriam suam obscurasse: quandoquidem per temulentiam Clitum sibi charissimum in convivio occiderit. Namque, ut sobrietas Principem ad charitatis studium excitat, sic ebrietas ad crudelitatem provocat. Nullumque scelus aut flagitium est, ad quod temulentia principem non impellat aut rapiat.

In sermone vero quam modestus sis, quam rarus, quam gravis, quanque in iis suscipiendis, qui ad te adeunt, communis & humanus, facile omni Italiæ perspectum est. Siquidem tanta circa omnes mansuetudine uteris, ut te interdum tuæ dignitatis atque auctoritatis oblivio cepisse videatur. Quam vero adulatores, scurras, & hujusmodi levitatem, spernas, atque oderis, ipsi prospeximus. O dignum summo Imperio principem! Hoc enim est, Imperatorem esse: Superbiam, fastidium, arrogantiam effugere: Erga omnes sese mansuetum, faci-

facilemque præstare: adsentationem procul amovere, gravem esse. Adde quod nec tibi quoque deest in consiliis suscipiendis constantia, virtutum haud mediocre condimentum, sine qua nihil in homine potest esse laudabile.

Hæ te profecto virtutes, Cæsar invictè, Augusto illi, omniū principū felicissimo, hæ te Tito, omnium gratissimo, hæ te Antonio Pio, omnium humanissimo, parem effecerunt. Per has maxime virtutes ab omnibus laudaris, extolleris, diligeris, prædicaris. Maxime enim commovetur amor multitudinis, ipsa fama & opinione mansuetudinis atque constantiæ. Quæ si in privato vel mediocri viro laudabiles plurimum atque admirabiles sunt, quanto magis in eo principe, qui dignitatis principatum inter principes obtinet? Sed jam plura consulto prætereo, ne modum mea excedat oratio: simul, ne inclyti Regis nostri mandata ulterius differamus. Quæ, si tuæ quoque prudentiæ visum fuerit, melius ac cautius seorsum, quam palam, enarrabuntur. Vale, & triumphā. Dixi.

Lauren.

*Laurentii Valla Oratio, ad summum
Pontificem Eugenium Quartum.*

SI, quibus tui pontificatus annis, Beatissime Pater, & abs te & à patriæ abfui, non abfuissem; profecto declarassem meam erga te, ut fieri debere intelligo, observantiam, quæ incepta jam inde ab incunte mea juventute ad hanc usque ætatem perseveravit, & cum annis simul accrevit: declarassem, inquam, non assequendorum ratione præmiorum abs te; qui veluti fons quidam es gratiarum, cum potestate dignitatis, tum bonitate naturæ: sed ut officio meo fungerer, cupiditatisque meæ atque eximio in te amoris obsequerer & indulgerem. Dulce enim est, etiam citra spem ei inservire quem diligas. Ego te, Beatissime Pater, cum aliquandiu, vel propter singulares virtutes tuas, vel propter egregium literarum studium, veneratus complexusque essem, nullum alium quam te magis optavi fore summum Pontificem; nec esse digniorem existimavi: cui meo & voto & iudicio res ipsa eventusque respondit. Itaque, audita assumptione tua, tunc, cum longe à patria abessem, tibi absenti, veluti præsenti, (absentes enim amor quo-

quodammodo præsentēs facit, tibi gratulatus sum; eoque, aliquot post annis, cum primum potui, ad pedes Sanctitatis tuæ me contuli; non recessurus ab Umbria, nisi huc me venire cupiditas compulisset visendi fratris quem novem annos non vidissem. Unum mihi ex novem fratribus superstitem, quem & ipsum intra mensem repereram, & quasi amissum recuperaveram, amisi. Et quamvis assidue ad te redeundi cupiditate urgebar, tamen hætenus redire prohibitus sum: interea semper ex tuis, tum prosperis lætitiis, tum adversis molestiis, capiens; simulque ægro animo ferens, tibi, vel tuæ gloriæ celebrandæ, vel adversariis tuis, immo matris Ecclesiæ ac Patris Dei, confutandis, magna prorsus in utranque partem & excellenti ingenio dignæ materiæ, me pro parvitate virium mearum operam navare non posse. Nam quod ad gloriam pertinet, quis unquam post hominum memoriam summus Pontifex gloriosior te fuit? qui ad istam dignitatem, tum aliquot oraculis prædictus, tum omni Ecclesia suffragante electus es: qui duos Cæsares, alterum Latinum, alterum Græcum, inter se illos quidem dissentientes, sed in agnoscenda tua sanctitate consentientes, tibi

tibi subditos adspexisti. qui tuis consiliis, curis, sumptibus, Græciam omnem, quæ olim parens erat Latinorum, ad concilium pertraxisti, emendasti, ac prope de duobus ovilibus unum fecisti. qui altero concilio Armenios, gentem hætenus fidei Catholicæ non bene cohærentem, in ipsa Catholicæ fidei veritate collocasti. qui per legatos tuos bellum pro religione contra superstitionem gerris. qui denique tanta fecisti, & facis, ut permagnus perquelatus pateat campus iis, qui gesta tua vel scribunt nunc, vel postea scribent. Sed hæc velut publicæ personæ, ac Papalis virtus. Quid? illa propria ipsius hominis, ac privata, quam multiplex est, & quam magna? Te enim, cum sint (quantum ego quidem sentio) in homine duo genera laudum, unum quidem venerabilem, alterum vero amabilem reddit. Et, sicuti, horum utrum utri præferendum sit, solemus ambigere; ita, utrum in te magis eluceat, nemo dixerit. Venerationi quidem sunt nobis gravitas, severitas, consilium, prudentia, magnitudo animi, fortitudo, patientia, ingenium, doctrina, eloquentia, cæteraque hujusmodi. Amamus autem humanitatem, mansuetudinem, affabilitatem, & modestiam; benignitatem, clementiam,

largi-

largitatem, & quæ sunt id genus. Quem-
admodum in his quoque auctoritatem
vultus, proceritatem amplitudinemque
membrorum, robur, velocitatem, agili-
tatem, admiramur; & decorem, venusta-
tem, suavitatem oris, cæteraque corpo-
ris, tacita quadam charitate complecti-
mur. Quæ virtutes tametsi inter se vi-
deantur in aliis contrariæ, ideoque alius
in his, alius in illis excellit: quia tamen
virtus virtuti adversa non est, sed pro
loco, pro tempore, pro persona, alia
cedit, alia interest: universæ pro una
perfecta agnoscuntur. Ut non magis
dotibus corporis, quæ nulli unquam
tot tantæque affuerunt, quam dotibus
animi, exornatus sis. Ex quibus alteræ
te dominum exhibent, atque rectorem:
alteræ parentem, tutoremque. Illæ re-
verentiam metumque conciliant, hæ ve-
ro dilectionem. Quarum etsi posterioribus
favemus, magis tamen superiores suam
dignitatem obtinent, & utræque mutuo
præsidio profunt. Quibus si accesserit po-
testas, præsertim summa, velut in te fit,
quid illæ nisi in terris simulacrum Dei
quoddam existimabuntur? O te unum ex
omni memoria hominem dignissimum
potentia, dignitate, gloria, virtute, ser-
monisque ac corporis Majestate! Verum
Deus

Deus ipse, sicut in summum prosperitatis gradum extulit, sic per adversa te exercere voluit, non ut probaret, sed ut probatiorem redderet. virtus enim mea, inquit Paulus, in infirmitate perficitur. Et sane probatiorem te reddidit hunc in modum, atque perfecit. Nam quæ tua fuit inter adversa aut tolerantia aut sapientia? in quarum altera velut præsentibus fluctibus resistebas; altera futuros providebas, prohibebasque. Quis tuus ille labor, cum inter candentes undas, scissis velis, fracto malo, sibilante tempestate, fulgurante cælo, ac tonante, navis erat tibi gubernanda, ut vix aliquis quispiam ex iis malis fuerit emerfurus? ex quibus tu emerfisti, & jam, paratis armamentis, procellaque sedata, conspicias portum; in quem propediem, invitis fluctibus, incolumi nave, pervenies. Adhuc enim tibi aliquantulum negotii reliquum est. Sed quo laboriosius id fuerit, etsi non optabile, eo tamen uberior tua gloria erit. In illis autem asperitatibus temporum, quod suo loco dixi, quis pius, bonorum amator, quis malorum hostis, non tuam vicem doluit, ac miseratus est? etsi tua fortitudo ac sapientia non miserationem magis quam admirationem merebatur. Quis non inimicis tuis suc-

cen-

cenſuit, atque iratus eſt? Quis non te omni ope adjuvandum, ſublevandumque, illos impugnandos, putavit? quamquam ita tulit caſus infeſtus, ut inimicus generis humani perturbaret omnia, ut multi, qui vellent, juvare non poſſent, tum aliis quibuſdam cauſſis, tum vero prohibiti majore poteſtate, nonnulli etiam coacti, ſi virtus cogi poteſt, nonnihil adverſus te facere. Verumtamen omnes boni tui fuerunt, licet non omnes boni à te ſteterunt. In quorum numero, ut ad me redeam, Beatiffime Pater, me profiteri non dubitem. Nam nec malum me potius quam bonum eſſe opinor, & ſemper concupivi. At laudes tuas attingere, aut cauſſam iſtam, in qua negotium tibi faceſſivit hoſtis, quoad poſſem, adverſus hoſtes inimicosque defendere, cum hactenus non licuerit mihi; velimliceret in poſterum. Et, quamvis permulti tibi ſcriptores graves facundique ſuppeditent; tamen omnes velut in publicum commodum pro ſua quiſque facultate nitemur. Attendetur autem ipſa ex æmulatione ſingulorum induſtria. Res proſecto tibi non ſolum honorifica, ſed etiam utilis, ac prope neceſſaria, ut cauſſa iſta, quæ inter te ac patriæ hoſtes verſatur, mandetur literis à circumſpecto aliquo
eximio-

eximioque oratore, sive ad præsentium temporum patrociniū, sive ad memoriā futurorum, ne quis unquam aut contradicere, aut in dubium revocare audeat vel innocentiam tuam, vel inimicorum calumniam & conspirationem. Multum est enim, Beatissime pater, si scriptor ingenio probet sese, scientia rerum quidquid dicit, confirmet, auctoritate persuadeat, cæterosque, si qui diversa scripssent ab his, ut imperitos malosque convincat. Nam, ut mea fert opinio, qui res gestas aut principum, aut populorum acute ingenioseque conscripserunt, oppidoquam optime meriti sunt de iis quorum facta celebrarunt, tum propter alia, tum præcipue quod illorum virtutes ab invidorum inimicorum malevolorumque linguis vindicarunt. An vero parum facere ad tuendum pudorem populi Rom. existimamus Titum Livium, aliosque historicos, cum causas explicant, cur aut bellum illatum aut non illatum sit; cur de aliis supplicium sumptum, alii venia donati; alii terrore coerciti, alii beneficio aucti? Ex quo illi, qui narrant, veri probique; & ii de quibus narratur, justī, æqui, boni, magnificique judicantur. Idem dicere licet de Græcis scriptoribus, qui cum aliorū, tum

Athe-

Atheniensium, res gestas sapienter sane & probe scriptitarunt: quod nisi fecissent, non abdicassent sese non modo non ab iniquis, qui veritatem iustitiamque in contrarium verterent, sed nec ab aliis, qui famæ non crederent. Consulendum est itaque, Sanctissime pater, per te, tum gloriæ tuæ, tum rei dignitati. Neque vero ego id dico, summe pontifex, quod in me sit hæc, quantacumque sit, facultas, quæ tantæ rei satisfacere possit; (præsto tibi sunt alii viri longe doctissimi:) sed ut, me talia aggrediente, si qui me doctiores sunt, non, ipsos eadem aggredi, illos pudeat: &, si qui aggressi sunt, eos, ut dicitur, currentes incitem; ut ipse quoque, quantum præstare possum, experiar; præsertim tam excitata ad hanc rem mente, ac quasi inflata, ut, etiamsi aliorum scriptorum, ut sic dicam, naves sint majores ac melioribus instructæ remigibus, tamen non desperem, illorum cursum me posse æquare, vehementioribus ventis mea vela tendentibus. Pro tua bonitate, Pater sanctissime, credas, velim, aliquid de rebus tuis scribere aggressurum fuisse, si compertum habuisssem, quam à me de tuis rebus partem mandare literis maxime velles. Et eo quidem magis, quod nonnulli scripta mea quædam apud te conantur
inces.

incessere. Et quidem, Beatissime pater, siquæ data sunt partim consiliis quorundam hominum, partim præceptis, partim gloriæ cupiditati, partim consuetudini disputandi; in his ita me frui benevolentia tua liceat, ut nunquam neque tuæ, neque tui similium majestati atque auctoritati, derogare propositum fuit: & , si quid retractatione opus est, & quasi ablu-tione, en tibi me nudum offero: tu, quæ tua abluendi potestas est, aqua pro-fluente è petra, quæ est Christus, hæc ab-lues. An ignorem, me unam esse tua-rum ovium, quas soles in lavacro remis-sionis abluere, unumque eorum, qui in navigio, cui tu præsides, navigare solent? An ego, cæteris eo, quo cursum dirigi ju-bes, remigantibus, unus in contrarium remigare, cum vel suspensum tenere re-mum, sit reprehendendum? Ego vero, Pater sanctissime, si tibi forte, aut in ad-versum remigasse, aut à remigando ces-sasse, visus sum; id assignandum est ma-gnitudini tempestatis: ubi etiam scientif-simi nautæ, ac præstantissimi gubernato-res, perturbantur, & inopes consilii fiunt; nedum nos remiges, quibus adversum infestas immerfasq; undas est obluctan-dum; ubi, quo tendas, ubi declines, in-certum est; & in ipso conatu inter se re-mi

mi non modo implicantur, sed etiam sæpe franguntur. An non sic satis est, si quis in hac confusione rerum admisit aliquid, quod veniam erroris petat, ac in officio deinceps futurum se esse promittat, & superiorem vel culpam vel negligentiam compensare in posterum industria & observantia velit? Ac nescio, an magis dominos agnoscant atque ardentius ament ii, quibus pœna remissa est, quam quibus opus remissione non fuit. Quod si hujus generis, D. P., est causa mea, cum essem mea sponte ad tua gesta tuasque res celebrandas animatus; quo tandē ardore existimas fore me, ubi tuam videlicet clementiam fuero expertus? Noli, quæso, sanctissime P., hac me, quā mihi proposui, spe atque expectatione frustrare. Non aliter enim animo satis fiet meo, sicque solum in Sanctitatem tuam obsequia mea perstabunt. Omnem aliam vivendi rationem, nisi sub te, omittere, sub te imperatore militare, tua semper sequi signa, pro tua dignitate aut honestam oppetere mortē, aut parta redire victoria, à me constitutū est. Si licet, in castris tuis vel gregarius miles, tamen miles egregius & strenuus, ero; cum sciamus, aliquando hujusmodi hominē aut primum hostiles muros conscendisse, aut rescif-


rescisso vallo suis viam patefecisse, aut
Ducem hostium obtruncasse. Sint alii
quantumlibet me in bello fortiores, at
in turmis equitum, alisque peditum, o-
missa incerta audacia, ac mortis securi-
tate, & quantum in unius hominis manu
situm est, nemini cedo. Nihil modo reli-
quum est, quam ut in hoc bello (adhuc
enim bellum durat) aliquo me opere
strenuum probem, per quod intelligas,
corpus quidem meum abs te aliquandiu
abfuisse, animum vero semper tecum,
tuumque, fuisse. Vale. Neapolis, pridie
Idus Martias:

F I N I S.



Nomina eorum , qui has Epistolas
dederunt ad alios.

A.

 Emylius. vide , C. Fabricius.
Æschynes, Senatui, populoque
Atheniensi. III.

Aëtius Patricius, Theodorico Regi. 83

Consulibus Romanis. 84

Alaricus Gothorum rex , Honorio , Im-
peratorum Rom. 80

Alexander, Aristoteli. 207

Alexander , Iovis Hammonis filius , O-
lympiadi matri. 193

Alexander Macedo, N. 271. 272

Alexander Magnus, Illyricis populis. 170

Alfonsus , Rex Aragonum, Petro Frego-
sio, Duci Genuæ. 72

Amalasunta, Atalarico, filio, Gothorum
Regi. 95

Amasis, Ægypti Rex, Policrati, Samio
Principi. 198

Amazonii, Turco. 276

Anastasius, qui & Arthemius, Imperator

T

Con-

I N D E X.

Constantin., Romano Pontifici.	127
Angelus Politianus, Laur. Medici.	184
Anonymus.	382
Antonii Panormitæ Oratiuncula, ad Fridericum Imperatorem.	408
Aristagoras, Milesius, Cleomeni, Lace- dæmoniorum Regi.	202
Aristoteles, Alexandro.	207
Aribertus, Longobardorum Rex, Iohan- ni V I I, Romano Pontifici.	126
Arthemius. vide, Anastasius.	
Athenienses, Alexandro Macedoni.	265
Augustus. Vide, Divus.	
Aurelianus, Dux, Carolo VIII, Gallo- rum Regi.	100

B.

B Aiazetes, Turcarum Imperator, Se- blymo, filio.	135. 138
Balduinus, Rex I I Hierosolymæ, Calli- sto, Romano Pontifici.	153
Bartholomæus Georgianus, Maximilia- no, Boëmiæ Regi.	220
Bartholomæus Iustinianus, Duci Medio- lani.	24
Basi-	

I N D E X:

Basiliensis civitatis consul, senatus, universis, &c. 343

Beda sacerdos, Carolo Martello, Galliarum Regi, & ceteris Regulis. 125

Bellisarius, Totila. 79. *Iustiniano Imperatori.* 21

Boëmundus, Rogerio Nortm., fratri. 142
147. 142.

Bononienses, Comiti Virtutum. 13

Bostares, & Hanno, Carthaginenses, Hannibali. 267

C.

Caesar Augustus, C. Mecœnati. 206
C. Fabricius, & Aemilius, Consules, Pyrrho Regi. 274

C. Pontius, Samnitium Imperator, Herennio, patri optimo. 194

Campso Sultanus, Selymo, Turcarum Regi. 66

Capuani, S. P. Q. R. 191

Cardinalis Aracœli, Duci Venetiârũ. 122

Cardinalis de Petra Mala, Iacobo de Campo Fregosio. 2

Carolus, Gallie Rex, Petro, Aragonie Regi. 2

I N D E X.

- Regi. 163
Carolus Martellus, Eudoni, Aquitania
Duci. 128
Carolus VIII, Rex Galliarum, Aurelia-
no, Duci. 102
Carolus V, Romanorū Imperator Augu-
stus, Coll. Cardinalium. 307. *Phili-*
berto Aurantio, Vgoniq; Moncata. 187
Cato, Cæsari. 206
Chii civitates. vide Maonenses.
Clemens III, Romanus Pontifex, Isacio,
Constantinopolitano Imperatori. 156
Comes Virtutum, Bononiensibus. 11
Constantinus, Imperator, Benedicto II,
Romano Pontifici. 121

D.

- D** *Amianus, Episcopus Ticinensis,*
Archiepiscopi Mediolanensis no-
mine, Patribus ad VI Synodum Con-
stantinopolitanam congregatis. 123
Darius, Persarum Rex, Idanthyrso,
Scytharum Regi. 201
Datys, Persa, Delis. 203
Demosthenes Senatui Populoque Athe-
nienfi.

I N D E X.

nienſi. 278

Diogenes Cynicus, Ageſilao. 224

Alexandro Macedoni. 225. 227. Antipatro. 223. 229. Ariſtoteli philoſo-
pho. 228. Græcis. 232. N. 238. Nip-
poni. 235

Diogenes, legatus, Juſtiniano Imp. 90.
108.

Divus Auguſtus, Caio, nepoti. 270

F.

Fabricius Carreſtus, Rhodi Magiſter,
Leoni X, Pontifici Maximo. 143

Fabricius, & Q. Aemylius, Conſules,
Pyrrho Regi. 203

Faliſci, S. P. Q. R. 191

Ferdinandus, Alfonſo, Regi Aragonum,
patri. 355

Ferdinandus, Rex, Illuſtriſſ. Proſpero
Adorno, Gubernatori Genuenſium,
& XII Capitaneis Populi. 334. Re-
verendiſſ. & Illuſtriſſ. Raphaëli Fre-
goſio, Duci, ac Capitaneis Ianuen-
ſium. 337

Florentini ad Malateſtas de morte D.

T 3

Galeo-

I N D E X.

Galeoti. 4. Bononiensibus. 5. 297.
 Duci Venetorum. 372. Francisco
 Carraria domino. 295. 305. Henrico
 Lucemburgico, Imp. 165. Io. Ga-
 leacio, Vicecomiti, Mediolani Duci.
299. Lucensibus. 299
 Franciscus Carrariensis, Bononiensibus.
294. Reipublica Florentina. 287.
292. Maffeo Memo, Veneto. 291
 Franciscus junior, Carrariensis, Mar-
 chioni Estensi. 304. Ferraria. 307.
 Franciscus Cataneus, Genuensis, Fran-
 cisco Foscaro, Duci Venetiarum. 31
 Franciscus Oberriedt. Vide, Basiliensis.
 Franciscus Philadelphus, Bessarioni, Car-
 dinali Nicano. 154. 172. 183. Do-
 minico, Cardinali Firmano. 180.
182. Gerardo Leandriano, Cardina-
 li Comensi. 171. Ioanni, Marchioni
 Montisferrati. 182. Leonello, Mar-
 chioni Estensi. 173. Ludovico, Car-
dinali Aquileiensi. 183. Ludovico
 Gonzaga, Mantuano Principi. 176.
178. Nicolao V, Romano Pontifici.

I N D E X.

179. Pallanti Strozza, equiti. 385,
389. Petro Barbaro, Cardinali Ve-
 neto. 180. Petro Medici, Cosmi filio.
174. Renato Regi. 177. Senatui po-
 puloque Perusino. 170. Sfortia se-
 cundo. 175. 176.

Francorum Rex, Totila. 80

G.

Galeatius, Comes Virtutum, Reip.
 Florentinae. 298

Galeotus de Carecto, Marchio Finarii,
 Regi Arragonum. 29

Galla Placidia, Honorio, ac Theodosio
 juniore. 82

Genuæ Dux, & Consilium, S. P. Q. Me-
 diolanensi. 51. Legatis. 55. Vide,
 Petrus. Raphael.

Genuenses, Callisto, Papa. 310. Regi
 Arragonum. 13. Duci & reipubl. Ve-
 netorum. 284.

Gotofredus Bullionæus, Boëmundo, An-
 tiochiæ Regi. 151

Gregorius, Pontifex Romanus, Mauri-
 tio, Imp. 110

I N D E X.

Gregorius II, Romanus Pontifex, Leoni
III, Imperatori. 129. 137

Gregorius III, Romanus Pontifex, Ca-
rolo, Galliae Regi. 13. Constantino
V, Capronymo, Imperatori. 137. Pi-
pino, Francorum Regi. 139

Guarini Veronensis, ad Illustrem Leo-
nellum, heroem Estensem, gratulatio
pro equestri dignitatis sumptis insi-
gnibus. 393. Oratio in laudem Regis
Angliae. 399

H.

H Anno. Vide, Bostares.

Harpagus Medus, Cyro Persa. 196

Henricus, Angliae Rex, Iacobo Stuardo,
Scotiae Regi. 120

Henricus, Comes Niverniensis, Regi
Franciae. 158

Henricus Lucemburgensis, Imperator,
Florentinis. 164

Heraclius, Imperator, Constantino, fi-
lio, Imperatori. 117. Severino, Pon-
tifici maximo. 118

Herennius, C. Pontio, filio. 195

Hono-

I N D E X.

Honorius, Romanus Imperator, Stiliconi. 81

Hormisda, Romanus Pontifex, Iustino Imperatori. 93

I.

Iacobus Stuardus, Scotia Rex, Henrico, Angliæ Regi. 119

Idanthyrus, Scythæ, Dario, Regi. 201

Ioachimus Serralius, Caponio dictatori Florent. 270

Ioanna, Neapolis Regina, Ludovico, Vngariæ Regi. 169

Ioannes de Faba, Ducibus Saxonie. 286.
Comiti Friderico de Ortemberg.

290.

Ioannes Picus Mirandulanus, N.S.R.E. C. 185

Ioannes Prochicius, Martino IIII, Romano Pontifici. 162

Ioannes VI, Romanus Pontifex, Gisulpho, Beneventano Duci. 124

Isabella, Vicecomes, Ferdinando avo, & Alfonso patri, Regibus. 105

Ismael Sophi, Persarum Rex, Selymo Tur-

I N D E X.

- Turcarum Regi.* 146. *Venetis.* 131
Ifocrates, Philippo, Macedonum Regi.
228. 231. 238. 241. *Alexandro Re-*
gi. 246. *Dionysio.* 257. *Iasonis Li-*
beris. 247. *ad Mytilenæorum princi-*
pes. 250. *Timotheo.* 253. 257.
Iulius Cæsar, Imperator, Marco Tullio
Ciceroni. 275
Iulius Feltrius de Ruvere, Sancti Petri
ad Vincula S. R. E. Diaconus, Cardi-
nalis Urbini, &c. lectoribus. 340
Iustinianus, Imperator Augustus, Theo-
dato, Gothorum Regi. 90

L.

- L** *Acedemonii, Atheniensibus.* 264
Laurentii Vallæ Oratio ad summum
Pontificem, Eugenium IV. 422
Laurentius Valla, Alfonso, Hispaniæ &
Italiæ Regi. 364. *Aurispæ, suo.* 359.
Blondo, suo, Secretario Apostolico.
349. *Gerardo, S. E. R. Cardinali.*
352. *Guarino, Veronensi.* 357. *Lu-*
dovico, S. R. E. Cardinali, Came-
rarioque sedis Apost. 345
Leonar-

I N D E X.

- Leonardus Lauretanus, Venetorum Dux,*
Ismaëli Sophi, Persarum Regi. 132
- Leonardus Maruffus, Chii Præfectus,*
Genuensibus. 332
- Leonardus Aretinus, ad Cyriacum An-*
conitanum. 392
- Libanius, Aristaneto.* 216
- Linus Colutius Salutatus, Innocentio*
Papæ. 204
- Ludovicus, Vngariæ Rex, Ioannæ, Nea-*
polis Reginae. 169

M.

- M***Aonenses Civitates, & insula*
Chii, Romano Pontifici. 66
- Marcellus, Consul, S. P. Q. R.* 267
- M. Furius Camillus, Faliscis.* 190. *S.*
P. Q. R. 189
- Mardonius, Persa, Atheniensibus.* 263
- Mauritius, Imperator, Gregorio,*
Romano Pont. 109. 116
- Maximilianus Sforcia, Helvetiis.* 157
- Mediolanensis Archiepiscopus. vide,*
Damianus.
- Mediolani Duces, ad Ferdinandum,*
Regem. 330 Me-

I N D E X.

Mediolani Dux, Francisco Barbavara,
 &c. 42.45.47.48.49.53.54. Ge-
 nuensibus. 52.335. Lucensibus. 373.
 Vide, Philippus.

Morbafonus. Vide, Orgami.

N.

N. Alexandro. 272. Alfonso, Ar-
 ragonum Regi. 1. 3. Pisi-
 strato. 273

Narses, Alboino, Longobardorum Regi.
102. Iustiniano, Imperatori. 98.99

Neapolitani, S. P. Q. Romano. 196

O.

Olympias, mater, Alexandro Ma-
 cedoni, filio. 193.207

Oberriedt. Vide, Basiliensis.

Oretes, Persa, Policrati, Samio Prin-
 cipi. 200

Orgami Imperatores, magno sacerdoti
 Romanorum. 63

Othanes, Persa, Phedima filia. 199

P.

Paduani, ad Comitem Virtutum. 8

Pelagius, Romanus Pontifex, Iu-
 stinia-

I N D E X.

- stiniano, Imperatori. 106
- Petrus Fregosius, Dux Genuæ, Aragonum, & utriusque Sicilia Regi. 69.
vide, Genuæ Dux.
- Petrus, Aragoniæ Rex, Carolo, Gallorum Regi. 163
- Petrus, Genuæ Dux, Regi Arrag. 77
- Petrus, Genuæ Dux, & Consilium, S. P. R. Angliæ. 315. 318. Arragonum, & utriusque Sicilia. 325. Portugallia. 320. Philippo, Duci Burgundia, &c. 323. Callisto, Papæ. 312. 328. Vide, Genuæ. Raphaël.
- Philelphus. Vide, Franciscus.
- Phililippus Maria, Mediolani Dux, suis. 43. Vide, Mediolani.
- Philippus, Rex, Aristoteli. 208. Atheniensibus. 208
- Phocenses, Thessalis. 262
- Pipinus, Francorum Rex, Gregorio III, Romano Pontif. 140
- Pius II, Pontifex Max., ad Archiepiscopum Genuæ. 60 Christophoro Mauro, Duci Veneto. 217
- Pla-

I N D E X.

Plutarchus, Traiano, Imperatori. 161

Poggius, Petro Donato, Archiepiscopo
Cretensi. 375

Policrates, Samius, Amasi, Ægyptio
Regi. 199

Pristus, Theodosio juniore, Imp. 85

Q.

Q. Æmylius. Vide, Fabricius.
Q. Fabius Maximus, Magister
equitum, S. P. Q. Romano. 194

R.

R Aphaël, Dux Genuæ, Cons. & Of-
ficium, Regi Arragonum. 15.22.
34. Burgundie Duci. 18. Friderico,
Rom. Regi. 28. Marchioni Mantuæ, &
fratribus. 38. Mediolani Duci. 40.
Nicoto, Nicie & Provincia Ducalis
Gubernatori. 25. Romano Pontifici.
17. Vide, Genuæ. Petrus.

Ricardus, Angliæ Rex, Cælestino III,
Romano Pontifici. 157.

Robertus, Romanorum Rex, Domino
Paduæ. 283

Romæ præfectus, Mauritio, Imp. 104
Roma-

I N D E X.

Romanus Pontifex Turcarum Regi. 275
S.

S Aladinus, Isacio, Constantinopolitano Imperatori. 154. 155.

Scipio, Syphaci, Regi. 269

Selymus Ottomanus, Baiazeti, patri, Imperatori. 135. 138. Campsoni Gaurio, Sultano. 166. Ismaëli, Persarum Regi. 146

Senatus P. Q. R., Aequis. 189. Marco Claudio Marcello, Proconsuli. 266.

Porsenæ, Etrusco Regi. 188

Senenses, Manfredo, Regi Neapolis. 160

Solon, Lydia Regi. 274

Sylverius, Romanus Pontifex, Theodora, Augusta. 97

Symmachus, Romanus Pontifex, Theodorico, Italia Regi. 92

Syphax, Numidarum rex, Scipioni, Consuli. 268

T.

T Ancredus Normannus, Rogerio, Patri. 150. 152

Tarquinius, Rex, Vitelliis fratribus. 187
The-

I N D E X.

Themistocles, Ionis. 216

Theodora, Augusta, Sylverio, Romano Pontifici. 96

Theodoricus, Ostrogothorum rex, Clodovao, Francorum Regi. 89. Iustino, Augusto. 94. Zenoni. 86. 87. 88

Thessali, Phocensibus. 262

Tomumbeius, Sultanus, Ismaeli, Persarum Regi. 168

Tomyris, Massagetarum Regina, Cyro, Persarum Regi. 197

Turcarum Rex, Amazoniis. 276. Pontifici. 278. Venetis. 277

V.

VEneti, Turcarum Regi. 277
 Vrbanus II, Romanus Pontifex, Alexio, Constantinopolitano Imperatori. 141

X.

Zacharias, Romanus Pontifex, Proceribus Francorum. 134

F I N I S.





XL
A3